



Ravi Shakya

## चमि म्हसीका:

नां : प्रेमशान्ति तुलाधर  
जन्म : ने.सं. १०७२  
मां, बाँया नां : ज्ञानदेवी स्थापित, मणिरत्न स्थापित  
थाय् बाय् : ग १, ६९१ काठमाडौं २  
टेलिफोन नं ४१४ ४१९, ४२२ ०७९  
E-mail :— P\_tuladhar41@hotmail.com

शिक्षा : एम.ए. (अर्थशास्त्र)  
एम.ए. (नेपालभाषा)  
लजगा : प्राध्यापन  
ज्याकुथि : पदमकन्या क्याम्पस, त्रि.वि.वि.  
पद : सह-प्राध्यापक  
विषय : नेपालभाषा, अर्थशास्त्र

मेगु ज्याखँ : नेपालभाषा एकेदमिया दुजः  
लोक साहित्य परिषदया दुजः  
नेपालभाषा साहित्य गुथिया दुजः  
उराय समाजया दुजः  
नेपालभाषा मिसा खलःया आजिवन जः  
नेपाल महिला व्यवसाय संघया जः

पदक व सिरपा : महेन्द्र विद्याभूषण  
चैन लाकौल सिरपाः  
शिक्षा पुरस्कार  
दीर्घसेवा पदक

कृति प्रकाशन : न्हू बाखं पुचःया बाखं (ने.सं ११०९)  
सुगत सौरभ महाकाव्यया बारे छुं (ने.सं १११९)  
जिगु सृजनाया पुचः (ने.सं ११२०)

सम्पादन : नेपालभाषा व ध्वया साहित्य विभागीय गोष्ठी (ने.सं. १११०)  
लोक साहित्य (ने.सं. १११३)  
जि व जिया दुने (ने.सं. १११५)  
तिमी मलाई चिन्ने छौं (ने.सं. ११२०)

9SBN 99933. 560-0  
1(8)-20 (057)-9 (4)-500

# नेपालभाषा साहित्यया इतिहास

(The History of Nepalbhasa Literature)

प्रेमशान्ति तुलाधर



नेपालभाषा एकेदमि



Ravi Shakya

# नेपालभाषा साहित्यया इतिहास

\*

\*

\*

\*

\*

\*

\*

प्रेमशान्ति तुलाधर



नेपालभाषा एकेदमि

यें

ने. सं. ११२०



|         |   |                            |
|---------|---|----------------------------|
| सफू     | - | नेपालभाषा साहित्यया इतिहास |
| च्वमि   | - | प्रेमशान्ति तुलाधर         |
| ता      | - | साहित्यिक इतिहास           |
| भाषा    | - | नेपालभाषा                  |
| पिकाकः  | - | नेपालभाषा एकेदमि, येँ      |
| न्हापां | - | ५००                        |
| ने.सं.  | - | १९२०                       |
| वि.सं.  | - | २०५७                       |
| ई.सं.   | - | २०००                       |

*Nepal Bhasa Sahitya ya Itihas*  
(History of Nepal Bhasa Literature)  
by  
**Prem Shanti Tuladhar**

कम्प्युटर सेटिंगः : तेजनारायण महर्जन व  
राजभाइ श्रेष्ठ

देवः : राजा शाक्य

थाकू : हिसि प्रेस,  
सेतो दरवार, येँ

ISBN : 99933 . 560 - 0 - X

## मन्तुना

गुगुं इलय् नेवाःजातिया मांभाषा नेवाःभाषा (नेपालभाषा) देशभाषाया नामं नं अतिकं च्वछाये धुंकू जुल । थौं नेपाःदेया स्वनिगलय् ब्वलनाच्चंगु सभ्यता व संस्कृतिया विकासक्रमया च्वः मालावं वनेबलय् व हे नेवाःभाषा ल्हानावंपिं व ल्हानाच्चंपिं नेवाःत ध्वोदवइ । अथेनं आः नेवाःतय्सं ब्वलंकूगु स्वनिगःया सभ्यता व संस्कृति नेवाःतय्गु जक मज्जे सकल नेपाःमितय्गु मंकाःगु राष्ट्रिय सम्पदा जूगु दु, अज्ज विश्व संस्था यूनेस्को (UNESCO) या धलखय् दुने विश्व सम्पदा (WORLD HERITAGE) कथं नं दुथ्याके धुंकूगु दु ।

खः, थीथी हुनियानाः छुं ईतक महितातय्गु बेकोगु मिखाय् लानाः नेवाःतय्गु मांभाषा व साहित्यया ख्यलय् वज्रं क्वच्यूल । नेवाःभाषा व नेवाः संस्कृतियात न्हंकाव्येगु कुतःतक नं जूवन गथेकि वि.सं. २००७ सालया जनक्रान्ति कालनिसं हे रेडियो नेपालय् सक्रिय भूमिका दयेकाः नेवाःभाषां सुथय् बहनी प्रसार यानावयाच्चंगु समाचार व “जीवन दबू” नामं न्ह्याकावयाच्चंगु साहित्यिक व सांस्कृतिक ज्याझ्वः वि.सं. २०२२ सालय् विनाकारणं हे छथुं लिकयाः हाकुतिनाविल महितातय्सं ।

लिपा, वि.सं. २०४६ सालय् जूगु जनआन्दोलनं निर्दलीय पञ्चायती व्यवस्थायात हानिसं ल्यैथनाः हानं बहुदलीय प्रजातन्त्रया पुनर्बहाली हसैलि, वि.सं. २०४७ स प्याहाँवोगु नेपाः अधिराज्ययागु न्हगु संविधानं नेवाःतय्गु मांभाषायात “राष्ट्रिय भाषा” यागु मान्यता बिल । अनंलि, नेवाःभाषा, नेवाः साहित्य व नेवाः संस्कृतिया अध्ययन व अन्वेषण, संरक्षण व सम्बर्द्धन यायेत योजनाबद्ध रुपं थीथी ज्याझ्वः न्ह्याकेत छगू आधिकारिक प्राज्ञिक संस्था मदेकं मजिल धइगु वाःचायेकाः नेपालभाषा परिषदया तत्वावधानय् ने.सं. १९९२ पोहेलाथ्व १४ कुन्हु “नेपालभाषा एकेदमि” दयेकेगु विषययात कयाः छगू विद्वद् गोष्ठी जुल । थुनियागु हे लिच्चःकथं थुगु ख्यलय् थःपिन्त पानाःजूपिं मांभाषाया छथ्वः ह्यमिपिनिगु मंकाः कुतलय् जनस्तरं




नेपालभाषा एकेदमि (NEPAL BHASHA ACADEMY) नीस्वंगु जुल । श्वयात श्री ५ या सरकार, गृह मन्त्रालय, जिल्ला प्रशासन कार्यालय, येँ (काठमाडौं) पाखें वि.सं. २०५६ भाद्र २१ गते विधिपूर्वक दर्ता याना: दसिपौ (प्रमाणपत्र) औपचारिक रुपं ब्यगु जुल ।

थौं नेपालभाषा एकेदमिया न्ह्यःने वयाच्चंगु छगू तःधंगु जिम्मेवारी धइगु नेपालभाषा व साहित्य अथेहे नेवा: संस्कृतिया थीथी विधाया आधारभूत व सृजनात्मक ग्रन्थत च्वयेगु, च्वकेगु व पिथनेगु नं खः । थुजोगु ग्रन्थत मौलिक जक जुइमा: धइगु मदु, मेमेगु भाषां नेपालभाषाय् हीकूगु नं जुइफु । हानं नेपालभाषां थीथी विषयस अध्ययन, अन्वेषण व अनुसन्धानया मालेज्या न्ह्याका: थीथीकथंया ग्रन्थसूची, शब्दकोश, साहित्यकोश आदि सम्पादन याना: पिथनेगु ज्याइवः न्ह्याकेगु नं जुइफु । थुलि ज्याइवः युगानुकूलकथं न्ह्याका: वनेफत धा:सा नेवा: जातिया भाषा, साहित्य व संस्कृतियात नेवा: समाजय् दुने ब्वलंका: वनेगुया ल्युन्थ, विश्वया न्ह्यःने नं थुकिया म्हासीका ब्वयेगु जुइ । थथेहे तुं हानं विश्वया थीथी भाषाया च्वन्त्यानाच्चंगु ग्रन्थत नेपालभाषाया धुकुतिइ दुथ्याका: वनेबलय् नेवा:तयगु मांभाषा (नेपालभाषा) स्वभावतः यक्को च्वन्त्याना: तःमिनं जुइगु जुल । थुजोगु हे तथ्यया लिधंसाय् नेपालभाषा एकेदमि थःगु तातुनाकथं थुगु ग्रन्थ पिथंगु जुल । थुकिं नेपा: अधिराज्यया मंका: क्यबय् ला व लुसि थें जुया: व्ह्याच्चंगु थीथी भाषा, साहित्य व संस्कृतिरूपी स्वांफवःया मा:दुने नेपा:मितय्गु राष्ट्रिय भावना व एकतायात यक्को योगदान जुइफु तथा देश देशान्तरय् नेपा: राष्ट्रयागु गौरव नं स्वतः अभिवृद्धि जूवने फु ।

नेपालभाषा, साहित्य व संस्कृतिया छ्यलय् थथे न्ह्यब्वयेबहःगु ग्रन्थ च्वया: च्वछायेबहःगु सेवा याना: योगदान बियादीपिं हनेबहःपिं सकल च्वमि भाजु/मयजुपिन्त नेपालभाषा एकेदमिया पाखें यक्को यक्को सुभाय् दु ।

नेपाल संवत् १९२० दिलापुन्ही  
वि.सं. २०५७ श्रावण १ गते

  
चान्सलर

नेपालभाषा एकेदमि

## जिगु मिखाय्

नेपालभाषा नेपा:या दकलय् पुलांगु व वाडमय नं सम्पन्न जूगु छगू भाषा खः । गुगु भाषा स्वनिगःया जनभाषा जक मखु । श्व भाषा थनया जनभाषा कथं न्ह्यानाच्चंगुया दसु लिच्छवि युगया अभिलेखं नवानाच्चंगु दु । लिच्छवितय्सं संस्कृत भाषायात राजकाज भाषाया रूपय् प्रयोग याना वन । इमिगु मातृभाषा थनया जनतां ध्वामथुइगुलिं इमिसं थःगु मातृभाषायात जवरजस्ती लाडय् यायेगु मूर्खता मया: । बरु संस्कृतयात न्ह्यथन । तर थन प्रचलित जनभाषायात इमिसं न्हंका छयेगु गुबलें कुतः मया: । थनया जनतां नालाच्चंगु भाषायात दमन या:गु जूसा थौं नेवा: भाय्या अस्तित्व दइगु मखु । इमिसं गुं, च्व, थाय् व कर आदिया नां थनया जनभाषा नेवा: भाषाया खंग्व: छ्यला थकूगुलिं नं श्व खं यचुका ब्यु ।

भाषा छन्थु विकास जुइमखु । बुलुहुं न्ह्यानावनी, थुकिया विकासया नितिं सलंस: दै मालेफु । झीगु स्वनिगलय् दुहांवःपिं मन्तय्सं थनया भाषा व संस्कृतियात नाला वन । गुकिं याना: श्व भाय् नवाइपिं आपालं दया वन । संस्कृत भाषाय् थें श्व भाषाय् साहित्य सृजना जुया वन । नेपालभाषा साहित्यया इतिहासयात अभिलिखित यायेगु न्हापा प्रचलन मदु । झीगु भाषाय् थुखेपाखे हनेबहम्ह धर्म आदित्य धर्माचार्यापाखें लुखाया खगो चायेकेगु ज्या जुल । गुकिया फलस्वरूप नेपालभाषा व श्वया साहित्य सृजना जुल । हनेबहपिं चित्तधर 'हृदय', प्रेमबहादुर कसा, फत्तेबहादुर सिंह, सिद्धिचरण श्रेष्ठ, सत्यमोहन जोशी आदिपिसं नं पला: थुखेपाखे न्ह्याकूगु खः । तर चित्तधर 'हृदय' नं ग्यसुग्यंगु पला: छिना: साहित्य इतिहासया जग स्वनेगु गुगु ज्या यानादिल थुकिइ याना: आपा:सित थुखेपाखे अवलम्बित जुइगु हःपा: दत । चित्तधर 'हृदय'या 'झीगु साहित्य' छगू ग्यसुग्यंगु सफू जक मखु झीगु साहित्य इतिहासया छपला: नं खः ।

नेपालभाषा पठन पाठन च्वय्या तगिलय् जुल । झीगु भाषा व साहित्यया इतिहास मदुगु साप हे वा: चाल । झीगु भाषा व साहित्यया इतिहास च्वकेत नसंचा इलय् नां काये बहम्ह स्वयम्भूलाल श्रेष्ठ आपालं पहल यानादिल । गुरुवर डा. जनकलाल वैद्य नेपालभाषा व साहित्यया इतिहासया ध्वः कीगु ज्या याना: मालेज्याया लें तःबाला याना: यंकेगुलिइ आपालं योगदान बियादिल । डा. वैद्यया "नेपालभाषा साहित्य धा: (संक्षिप्त)" छगू ग्यसुग्यंगु पला: खः । गुगु खेल्नुइता: दंपौलय् स्वंगू ल्या:तक्क क्रमशः रूपं पिदंगु दु ।

नेपाल राजकीय प्रज्ञा प्रतिष्ठानया तत्कालीन सदस्य कृष्णचन्द्रसिंह प्रधानया पहल कथं झीगु साहित्यया इतिहास च्वयेगु ज्या डा. जनकलाल वैद्य, माधवलाल कर्माचार्य, नर्मदेश्वर प्रधान व काशीनाथ तमोटयात लःल्हा:गु खः तर सफूया रूपय् थौंतक पिदने फुगु खनेमदु । नेपालभाषा व साहित्यया इतिहासयात लिपिवद्ध यायेगु ज्या डा. कमलप्रकाश मल्ल,



प्रा. झुलेन्द्रमान प्रधान, प्रा. माणिकलाल श्रेष्ठ, भन्ते सुदर्शन, कुमारबहादुर जोशी, कृष्णप्रसाद श्रेष्ठ, इन्द्र माली, प्रेमशान्ति तुलाधर, डा. चुन्दा बजाचार्य व डा. केशवमान शाक्य आदिपि पाखें नेपालभाषा, नेपाली व अंग्रेजी भाषाया माध्यमं जुयाच्चंगु दु । गुकिं यानाः साहित्यया इतिहास मालेगु ज्या छुं भचा न्ह्यात ।

प्रेमशान्ति तुलाधर झीगु साहित्यया इतिहास लेखनया ज्याय् उप्वः अवलम्बित जुयाः न्ह्याना वन । गुकिया फलस्वरूप झीगु भाषाय् छगू ग्यसुग्यंगु सफू पिदने फत । थ्व प्रेमशान्तिया लगनता, धैर्यता व अध्ययनशीलताया परिचय खः । इतिहास थें ज्याःगु विषय, स्वैगु गुगुं कथंया जिम्मेवारी व ग्वाहालि मकासैं थःगु हे मतापं मालेज्या न्ह्याकेगु धैगु छगू साहसया ज्या खः । प्रेमशान्तिया कुतलं झीगु साहित्य छगू तःधंगु ज्या जूवंगु दु, छगू ठोस उपलब्धी जूगु दु ।

थ्वया महत्त्वयात थुकथं न्ह्यःथने :-

१. थौतक अभिलिखित जुइ मफुगु व मदुगु झीगु भाषा व साहित्यया इतिहास दइबीगु
२. प्राचीन, माध्यमिक व आधुनिक साहित्यया धाःयात कःघाना इतिहास न्ह्यःब्वयेगु
३. नेपालभाषाया गतिविधियात फयाः फतले कःघायेगु
४. न्हूगु खोज व प्रयोगयात नं इतिहासया व्याप्ति बीगु
५. साहित्यिक प्रवृत्ति व प्रयोग बारे पूर्वाग्रह मतयेगु
६. कृतिया समालोचनात्मक व्याख्या यायेगु
७. युग चेतना व साहित्य चेतनाया समन्वय
८. न्हूगु सामग्री व स्रोतया उपयोग
९. साहित्यया परम्परायात निरूपण यानाः प्रमुख च्वमिपिनिगु रचनाया सिंहाबलोकन यायेगु
१०. च्वमिपिनिगु नामं मखु कृतिया आधारय् समूचित कथं मूल्याङ्कन यायेगु
११. नेपाल संवत्तया प्रयोग जुइगु

थ्व हे आधारय् मूल्याङ्कन यायेबलय् नेपालभाषा व साहित्यया इतिहास छगू ग्यसुग्यंगु सफू जक मखु झीगु भाषाया छपाः छ्वाःपाः धायेमाः । थुकिं झीगु भाषा व साहित्य गुलि जाल, गुलि च्वन्ह्यात धैगु किपा जक मखु, झीगु भाषा व साहित्य ख्यःया निंतिं थ्व छगू अमूल्य योगदान जूगु दु ।

ताहाच्चः, यैं ।

दिल्लागाः ५, १९२०

इन्द्र माली

## जिगु खँ

नेपालभाषा थौं जक मखु मध्यकालं निसैं हे साहित्यं सम्पन्न जुइधुकूगु भाषा खः । तर अथे खया नं थ्वया साहित्यिक इतिहास सम्बन्धी थौं तक गुलि नं प्रकाशनय् वल आंशिक रुपय् जक वल, छगू समयावधियात कयाः वल, छगू विधा विशेषयात जक कयाः वल । पूर्वक च्वयातःगु सफू आःतक पिदंगु मदुनि । थ्व नेपालभाषाभाषीतय्गु निंतिं जक मखु बहुभाषी नेपाः देया निंतिं हे छगू विडम्बना खः, व्यंग खः । छम्ह नेपालभाषाया विद्यार्थीया नातां न्हापां निसैं हे नेपालभाषाया इतिहास सम्बन्धी सफूया अभाव महसुस यानाम्ह छम्ह जि नं खः । लिपा नेपालभाषाया प्राध्यापन हे थःगु लजगाः जूबलय् ला थज्याःगु सफूया आवश्यकता दुगछि अप्वः महसुस जुल । न्हापा जाँचय् पास यायेत जक नेपालभाषा साहित्यया इतिहास सफू माःम्ह जितः, आः विद्यार्थीतय्त स्यने कनेत माल, छम्ह गुरुया इज्जत प्रतिष्ठा कायम यायेत माल । धाथेला गुरु जुइवं तिनिं नेपालभाषा मन तयाः ब्वनेगु सयेकेगु जुल, न्हासं चुयाः जूसां उखें थुखें सामग्रीत मालाः, थुखें उखें नेपालभाषाया प्राज्ञपिंथाय् ब्वां वनाः न्यनेकने यानाः नेपालभाषा साहित्यया इतिहास नं ब्वंकेगु याना । थ्व हे क्रमय् केवल नेपालभाषा साहित्यया इतिहास ब्वंकेगु जक मखु थुकिया पाठक्रम दयेकेगु अभिभारा क्वबीमाःम्ह छम्ह थः नं जुल । पाठ्यक्रम ला तयार जुल, तर ब्वनेज्वलंया धलः दयेकेगुली समस्या वल । पाठ्य ज्वलंया धलः आपालं ताहाः जुया नं पाठ्यक्रमयात माःगु फुक्क सामग्रीत ताःलाके मफुत । न्यासः दै मयाक ताःहाकःगु साहित्यिक इतिहास दुगु भाषा, आपालं अन्वेषक, विद्वानत दुगु भाषा, आपालं सुसम्पन्न सुसंस्कृत जाति ल्हाइगु भाषा खया नं थौं तक नं थ्व भाषाया छगू साहित्यिक इतिहासया सफू मदुगु वास्तविकतां जितः तसकं हे प्याकुतिं न्यात, तसकं हे हथाय् मथाय् चायेकल । अले थःम्हस्यां सां थुखेपाखे फुथें चाःथे छुं याये धकाः मतिइ तया । नेपालभाषाया साहित्यिक इतिहास सम्बन्धी स्वदेशी विदेशी विद्वानपिनिगु न्हापा पिदने धुकूगु सफू लेख आदि अध्ययन यानाः मेगु नं थुखे उखें मालाः न्यनेकने यानाः सां कथंहंगु नेपालभाषा साहित्यया इतिहास सम्बन्धी छगू बःचाःधंगु सफू च्वये धैगु मतिइ तया । जिगु थ्व मनसुवायात मूर्त रुपय् हयेगुली आपालं नेपालभाषाया



अनुरागीत पाखें प्रेरणा, प्रोत्साहन तथा ग्वाहालि प्राप्त जुल । गुरुवर डा. जनकलाल वैद्यया एम.ए.या कक्षाय् ब्यूगु 'साहित्यया इतिहास' विषयया न्वचुं थ्व विषयस च्वयेत गाक्कं उत्प्रेरणा बिल । गुरुवर डा. जनकलाल वैद्य, वय्कःपाखें छुं कायेत कुतः याइपिं विद्यार्थीपितं गाक्कं बीम्ह, बीफुम्ह गुरु खः । अथे हे मेम्ह गुरु प्रा. माणिकलाल श्रेष्ठ गुम्ह जिम्ह न्हापां निसेंयाम्ह गुरु खः, वय्कःया साहित्यया सैद्धान्तिक ज्ञान सम्बन्धी विशद् न्वचुं छुं नं कृतियात वालाः फायाः स्वयेगु जितः मिखा छुनाबिल, आत्मविश्वास बिल । सफू च्वयेगु निरिति थःत माःगु ज्वलंत मुंका । सामग्रीत मुंकेगु क्रमय् विभिन्न सफूकुथि - केशर पुस्तकालय, राष्ट्रिय अभिलेखालय, आशा सफूकुथि, त्रि.वि.वि. पुस्तकालय, पाटन क्याम्पस पुस्तकालय, पद्मकन्या क्याम्पस पुस्तकालय, विद्वानपिनिगु निजि पुस्तकालय, आदि पाखें जितः माःगु ज्वलंत प्राप्त जुल । अथे हे स्वदेशी विदेशी विद्वानपिं विशेषत - धर्मआदित्य धर्माचार्य, चित्तधर हृदय, डा. कमलप्रकाश मल्ल, डा. जनकलाल वैद्य, सत्यमोहन जोशी, प्रेमबहादुर कसाः, सिग्रफ्रेड लीन्हार्ड, प्रो. माणिकलाल श्रेष्ठ, काशीनाथ तमोट, छत्रबहादुर कायष्ठ, इन्द्र माली, नर्मदेश्वर प्रधान, पं. हेमराज शाक्य, फणिन्द्ररत्न बज्राचार्य, भुवनलाल प्रधान, डा. सुन्दरकृष्ण जोशी, हितकरवीर सिं, मल्ल के. सुन्दर, रे. र.न. स्यस्यः, डा. चुन्दा बज्राचार्य, तुयुबहादुर महर्जन, तुल्सिलाल सिं आदिपिनिगु सफू, थीथी पत्रपत्रिकाय् पिदंगु च्वसुं जिगु च्वज्याया निरिति आपालं तिबः बिल । अथे हे जितः इतिहास च्वयेगु ज्याय् थम्हं स्यूगु खँ आपालं स्यनेकने यानादीम्ह, थःके दुगु ज्वलंत बियादीम्ह थौं मदयेधुंकूम्ह श्रद्धेय विद्वान धनवज्र बज्राचार्य नं छम्ह खः । च्वयेगु क्रमय् आपालं मेमेगु सामग्रीतयगु आवश्यक जुलसा गुलिखय् विषयलय् सल्लाह साहुति नं यायेमाःगु जुल । थ्व हे क्रमय् गुरुवर काशीनाथ तमोटं थःके दुगु सामग्रीत जितः बियादिलसा छतिं हे उसि मचासैं थम्हं खंगु चाःगु खँ नं ध्वाथुइका बियादिल । थुकथं प्राचीन साहित्यया इतिहास च्वज्याय् जितः माःगु आपालं ग्वाहालि वय्कःपाखें चूलात । अथे हे नेपालभाषा एकेदमिया सदस्य - सचिव दाजु इन्द्र माली नं जितः माःगु सामग्रीत बियादीगु, थम्हं खंगु स्यूगु खँ कनादीगु, मज्यूगु, मखुगुली न्वानादीगु यानाः जिगु लेखन ज्यायात परिमार्जन यायेगुली आपालं हे ग्वाहालि यानादिल । आधुनिक साहित्यया लेखन ज्याय् वय्कःपाखें जितः आपालं हे ग्वाहालि चूलात । थुलि जक मखु लिपा थ्व सफू पिकायेत नं वय्कलं उलि हे मेहनत परिश्रम यानादिल । पद्मकन्या क्याम्पस नेपालभाषा विभागया हितैषी पासापिसं नं जितः इलय् ब्यलय् आपालं अमूल्य सल्लाह साहुति बियाः जिगु च्वसा न्ह्याकेबिल ।

अथे हे नेपालभाषा ख्यःया सहृदयी विद्वान् तथा साहित्यकारपिं फणिन्द्ररत्न बज्राचार्य, बैकुण्ठप्रसाद लाकौल, सत्यमोहन जोशी, नर्मदेश्वरमान

प्रधान, डा. सुन्दरकृष्ण जोशी, प्रा. माणिकलाल श्रेष्ठ, हितकरवीर सिं कसाः, राजा शाक्य, पुष्पबहादुर चित्रकार, तुयुबहादुर महर्जन, रमेशकाजी स्थापित, सुदन खुसः, भूषणप्रसाद श्रेष्ठ, ज्वाला स्थापित आदिपिं पाखें नं आपालं नेपालभाषाया ऐतिहासिक सत्य तथ्यत सीकेगुली ग्वाहालि जुल । दाजु राजा शाक्य ला आशासफू कुथिइ वनेबलय् माःगुतक सफू, पत्रपत्रिका पितबियाः जितः मालेज्या, च्वज्या यायेत अपुका ब्यूगु जक मखु, तंसकं हे अमूल्य सल्लाह साहुति बियाः जिगु च्वज्या थासय् लाकेगु कुतः यानादिल । थुकथं जिगु भाग्यं धाये ला बा नेपालभाषायात माया याइपिं अप्वः दुगुलिं धायेला जितः प्रोत्साहन हौसला जक मखु माःगु तक ग्वाहालि फुक्कं थासं चूलात । खासाया पलाखं जूसां जिं च्वज्या न्ह्याका. यंका । भूतपूर्व नेपालभाषा केन्द्रीय विभागया नायः डा. सुन्दरकृष्ण जोशी ला 'छं च्वये जक सिधयेकि न्ह्याथे ताकिता यानाः सां त्रि.वि.वि.पाखें भीगु पाठ्यांशयात माःगु थ्व सफू पिकायेके बी 'धकाः जितः बरोबर धयादीगु । तर अभाग्यवश जिं वय्कःया कार्यकालय् सफू च्वयेगु क्वचायेके मफुत । मेम्ह गुरुवर सत्यमोहन जोशी जिं नेपालभाषाया साहित्यया इतिहास सफू च्वया च्वंगु धइगु सीकाः तसकं हे लय्ताया दिल । जितः सफू याकन च्वये सिधयेकि धकाः बरोबर ताकिता यानादिल । थःहे तकं कम्प्यूटर टाइप जुयाच्वंगु सन्ध्या टाइम्सया ज्याकुथिइ भायाः ज्या च्वयेकः भालः । बल्ल बल्ल सफू च्वयेगु क्वचाल । ला हि थने मफुसां नेपालभाषा साहित्यया इतिहासया 'रुपरेखा' जकसां तयार जुल, 'कलाय्' जकसां निर्माण जुल । थुकियात ला हि थनाः हिष्टपुष्ट याइपिं विद्वानत छन्हु गथे पिमदनी धइगु आशा यासैं थुकीं हे जिं सन्तोष कया । जिगु सफू ल्याकन पिदनेमा बांलाक पिदेनमा धैगु मनंतुनाः थःगु अति व्यस्तताया बावजूद नं भाजु रमेशकाजी स्थापितं थःम्हस्यां हे पुफ तकं स्वयाः थःगु हे सन्ध्या टाइम्सया ज्याकुथिइ कम्प्यूटर टाइप याके बियादिल । अथे हे किजा तेजनारायण नं आपालं मिहेनत यानाः कम्प्यूटर टाइप याना बिलसा थ्वयात भिंकेगु ज्या राजभाइ श्रेष्ठजुं तसकं हे मन तयाः यानादिल । सफूया टाइप सिधयेवं हे अगःचा मालं देगःचा लू थें जुइक नेपालभाषा एकेदमिं सफू पिकायेगु भाला क्वबियाः नेपालभाषा साहित्यय् नं पुष्पेभाबं पत्रम् जूसां, इतिहासया सफू पिकायेगु जिगु प्रबल इच्छयात साकार यानाबिल । उकिं थ्व नेपालभाषा साहित्यया इतिहास सफू फुक्कसिगु मिहेनत परिश्रमया प्रतिफल खः, सिमा मखुसे अलःमा हे जूसां नेपालभाषा प्रेमियगु आकांक्षाया छगू मूर्त रुप खः । उकिं थ्व सफू जिगु जक मखु नेपालभाषायात मतिना याइपिं, नेपालभाषायात म्हसीकेत 'कुतः याइपिं फुक्कसिगु खः । सफू पितहयेगुली थथे जितः प्रत्यक्ष, अप्रत्यक्ष रुपं ग्वाहालि यानादीपिं फुक्कं उलि हे सुभाय्या पात्र खः, फुक्कसितं जिगु उलि हे साधुवाद दु ।



चय्य हे धायेधुन थ्व सफू जिं थःगु विद्वता न्ह्यब्वयेत, थःगु दक्षता पिब्वयेत च्वयागु मखु, नेपालभाषा साहित्यय् इतिहासया सफूया अभावपूर्ति यायेत च्वयागु खः, पाठय ज्वलं ताःलाकेत च्वयागु खः, कन्हे नेपालभाषा साहित्यय् भराय् धंगु इतिहासया सफू निर्माण जुइकेत त्वाथः छुनागु खः । उकिं थ्व सफूतिइ नेपालभाषाया बी.ए., एम्.ए.या पाठ्यांशय् दुथ्याःगु नेपालभाषा साहित्यया इतिहास सम्बन्धी विषयवस्तुयात मूलतया ध्यान बियाः च्वयेगु यानागु दु । विशेष विद्यार्थीपनिगु निंति. हे च्वयागु जूगुलिं साहित्यिक इतिहास लेखनय् साहित्यया सैद्धान्तिक पक्षयात दुथ्याकेगु चलन मदुसां थज्याःगु विषय सम्बन्धी सफू नं नेपालभाषाय् बांलाक मदुनिगुलिं उकिं 'एकपन्थी दो काज' धाःथें साहित्यिक कृति सम्बन्धी अध्ययन विश्लेषण यायेगु ज्याय् विद्यार्थीपिं छुं कथं सां तिबः जुइगु तायाः साहित्यया सैद्धान्तिक पक्ष नं छुं भचा थ्व सफूतिइ दुथ्याकागु दु । अथे हे नेपालभाषा साहित्यया इतिहासयात न्हज्याकेत महत्वपूर्ण योगदान बियावंपिं तर थौं मदयेधुंकुपिं व्यक्तित्वपिं नं थौया विद्यार्थीपिसं छुं भचासां म्हासीमा धकाः थज्याःपिं व्यक्तित्वपिनिगु निपाः प्यपाः किपा नापं प्राचीन अभिलेखया छुं नमुना नं थ्व सफूतिइ बियागु दु । थुकथं विद्यार्थीपनिगु हे पाठ्यांशयात लक्षित यानाः च्वयागु जूगुलिं थ्व सफूतिं साधारण पाठकपिनिगु नेपालभाषाया साहित्यिक इतिहास सम्बन्धी जिज्ञासा पूर्ति याःसां थ्व सम्बन्धी विशेष अध्ययन अन्वेषण याइपिं विद्वानपिनिगु लागीं माःगु ज्वलं मदयेफु, मगायेफु । थुकिया निंति क्षमा याचना यानाच्चना ।

अथे हे साहित्यिक इतिहासया लेखनया दृष्टिं नं थ्व सफूतिइ आपालं कमी कमजोरी दयेफु । थुकी जम्मा साहित्यया खुगू विधा - काव्य, बाखं, निबन्ध, नाटक, समालोचना, उपन्यास (नेपालभाषाय् थुपिं पिदंगु ईया ल्याः कथं) जक दुथ्याकागु दु । थौं मेमेगु विषय गथे जीवनी, यात्रा, आदि नं अलग्ग हे साहित्यिक विधाया रुपय् मान्यता प्राप्त याये धुंकलसा थुकी दुथ्याःगु काव्य, नाटक आदिया नं आपालं कचामचा दयेधुंकूगु दु । अथेहे थौं धार्मिक विषयया सफू नं नेपालभाषाया छगू महत्वपूर्ण पक्ष जूगु दु । तर अथे खयाः नं थुमित दुथ्याकेगु ज्या थ्व सफूतिइ यायेमफुत केवल विशुद्ध साहित्यिक सफू व प्रचलित साहित्यिक विधायात निं आःयात कःघायेगु ज्या थ्व सफूतिइ जूगु दु । इतिहास थें ज्याःगु विषयलय् गुलिखय् खँ विवादस्पद जुइगु स्वाभाविक खः । तर अथे खयां नं तथ्ययात बह कयाः फक्क सत्यया न्हयःने थ्यंकेगु कृतः यानागु दु । थ्व सफू च्वयेगु भवलय् थःत प्राप्त जूगु ज्वलंतयत् फयांफछि कथंहंक वैज्ञानिक धंगं दुथ्याकेगु कृतः यानागु दु । थुमिगु सत्य व तथ्यया लिधंसाय् विवेचना विश्लेषण यायेगु निष्कर्षय् वयेगु फक्क प्रयास यानागु दु । अथे हे इतिहास धइगु गबलें पूवनी मखु, क्वचाइ नं मखु, तर

अथे खयां नं गुलिखय् दुथ्याकेमाःगु घटना, दुथ्याके बहःगु कृति, त्वःफिके मज्यूपिं च्वमित सफूया सीमित क्षमतां यानाः दुथ्याके मफुगु दुसा, गुलिखय् थःगु अज्ञानता, अनभिज्ञतावस् त्वःफ्युगु नं जुइफु । च्वमिया मूल्य निरूपण, कृतिया विश्लेषणय् नं गुलिखय् च्वमिपिं जि नाप असहमत नं जुइफु, असन्तुष्ट नं जुइफु, तर थुकियात जिगु पूर्वाग्रह मनासे जिगु अज्ञानता, कमजोरी भाःपाः क्षमा यानादी धइगु आशा याना । थुकी मगाःगु मचाःगु, त्वःफ्युगु बा भिकेमाःगुलिइ विज्ञ पाठकपिसं माःगु रचनात्मक सुभाव बियाः जितः मार्गदर्शन यानादी धकाः नं भलसा कया । अथे हे थ्व सफू च्वयावले लिधंसा कयागु ज्वलंत फुक्क ब्वयेगु सम्भव मजूसां, नेपालभाषाया साहित्यिक इतिहास सम्बन्धी विशेष अध्ययन यायेमाःपिंत ज्याख्यलय् जुइमा धइगु मन्तुनाः, मुख्य मुख्यगु ज्वलंत सफूया अन्तय् लिखं प्वला, ग्वाहालि ज्वलंया रुपय् बियागु दु । खयेत ला शोध लेखनया सिद्धान्त कथं क्वखँ प्वला प्रत्येक पौया क्वय् हे तयेमाःगु खः, तर अथे खयांनं थुकिं अप्वः थाय् व ई काइगुलिं लिउने बिइगु यानागु खः । थुकिं यानाः जुइगु असुविधाया निंति सहृदयी पाठकपिके हानं छक्कः क्षमा फ्वनाच्चना । इतिहास सुयागु पेवा मखु, सुयागु सृजना नं मखु । उकिं इतिहास च्वमिं थः यःयथे, न्ह्याः न्ह्याःथे च्वये मज्यू, च्वये नं दइमखु । उकिं थज्यागु सफूतिइ मगाःगु मचाःगु तनेगु, मखुगु मज्यूगु संशोधन यायेगु, व इतिहास नाप सरोकार दुपिं फुक्कसिगु कर्तव्य खः, अधिकार नं खः । थ्व हे कथं थ्व सफू भराय् धंगु मखुसां अलःमा नं सिमा भाःपाः, भराय् धंक नेपालभाषा साहित्यया इतिहास धकाः नां छुना । थौं थ्व सफू कैलाय् जक जूसां थुकिइ आपालं परिमार्जन याये मानिगु दनिंसां कन्हय् थ्व सफूतिइ मगाःगु मचाःगु आदि फुक्क तनेकनेत सहृदयी विद्वानपिं गथे न्हयचिलामदी ? अले छंहु गथे नेपालभाषा साहित्यय् भराय् धंगु इतिहासया सफू तयार मजुइ ? थ्व हे जिगु विश्वास खः, थ्व हे जिगु सफू च्वयाया तातुना खः ।

प्रेमशान्ति तुलाधर

ज्ञानेश्वर, यै ।

ने.सं. १९९९, थिलागा १४



# नेपालभाषा साहित्यया इतिहास धलः पौ

खण्डः १

## नेपालभाषा साहित्यया पृष्ठभूमि

नेवाः जातिया निर्माण

नेपालभाषाया उत्पत्ति व सम्मिश्रण

थी थी भारोपली भाषाया प्रभाव

संस्कृत प्राकृत भाषा

मैथिली भाषा

फारसी भाषा

नेपाली भाषा आदि

नेपालभाषाया नां

नेपाल लिपि

नेपाल संवत्

प्राचीनकालय् नेपालभाषाया थाय्

नेपालभाषाया प्राचीन वाङ्मय

पत्र वाङ्मय

लिखित पत्र

उत्कीर्ण पत्र

ग्रन्थ वाङ्मय

चिकित्सा शास्त्र

न्यायशास्त्र

शब्दकोष

इतिहास

ज्योतिष

१ ३२

३

६

७

७

७

८

८

१०

१२

१६

१९

२३

२३

२४

२५

२५

२६

२७

२८

२९



|                              |    |
|------------------------------|----|
| कर्मकाण्ड, पूजाविधि सम्बन्धी | ३० |
| पशुचिकित्सा                  | ३० |
| वास्तुशास्त्र                | ३१ |
| संगीतशास्त्र                 | ३२ |
| वाद्यशास्त्र                 | ३२ |
| गणित                         | ३२ |
| रत्न परीक्षा                 | ३२ |

## खण्ड : २

|  |          |
|--|----------|
| नेपालभाषा साहित्यया विधागत परिचय                 | ३३ - २९१ |
| प्राचीनकाल (ने.सं. ६२५-९६७)                      | ३५ - ७०  |
| न्यच्यःगु प्राचीनकाल ( ने.सं. ६२५- ८८८           | ३५ - ६३  |
| न्यच्यःगु प्राचीनकालया बाखं                      | ३७       |
| विकास  | ३८       |
| स्वरूप   | ४०       |
| प्रकार   | ४१       |
| न्यच्यःगु प्राचीनकालया म्ये                      | ४६       |
| विकास  | ४६       |
| स्वरूप   | ४८       |
| प्रमुख कवि / कर्वायत्री                          | ५०       |
| न्यच्यःगु प्राचीनकालया नाटक                      | ५५       |
| विकास  | ५६       |
| स्वरूप   | ५८       |
| प्रमुख नाटककार                                   | ६१       |
| लिच्यःगु प्राचीनकाल (ने.सं ८८८- ९६७)             | ६४ - ७०  |
| लिच्यःगु प्राचीनकालया म्ये                       | ६५       |
| प्रमुख कवि                                       | ६६       |
| लिच्यःगु प्राचीनकालया बाखं                       | ६८       |
| लिच्यःगु प्राचीनकालया नाटक                       | ६९       |
| माध्यमिककाल (ने.सं. ९६७- १०६१)                   | ७१- १०१  |
| पुनर्जागरणकाल न्हयःया साहित्य (ने.सं. ९६७- १०२९) | ७२ - ७६  |

|   |           |
|---|-----------|
| पुनर्जागरणकाल न्हयःया म्ये                | ७२        |
| पुनर्जागरणकाल न्हयःया प्रमुख कवि          | ७३        |
| पुनर्जागरणकाल न्हयःया बाखं                | ७६        |
| पुनर्जागरणकालया साहित्य (१०२९- १६१)       | ७७ - १०१  |
| पुनर्जागरण धायेगुया औचित्य                | ७८        |
| पुनर्जागरणकालया महारथी                    | ८०        |
| पं. निष्ठानन्द बज्राचार्य                 | ८१        |
| महाकवि सिद्धिदास अमात्य                   | ८४        |
| माष्टर जगतसुन्दर मल्ल                     | ८८        |
| कवि योगवीरसिंह                            | ९०        |
| शहीद शुक्रराज शास्त्री                    | ९३        |
| धर्मआदित्य धर्माचार्य                     | ९५        |
| आधुनिककाल (ने.सं. १०६१ निसं थुखे)         | १०२ - २९१ |
| नेपालभाषा साहित्ययात आधुनिकता ... गतिविधि | १०३ - १४४ |
| थी थी ईया वैयक्तिक तथा सामूहिक प्रयास     | १०३       |
| शुलिंचा पुचःया साहित्य साधना              | १०३       |
| नेपाली विहार सफूया प्रकाशन                | १०५       |
| जेल दुने पिनेया साहित्य साधना             | १०७       |
| जेल दुनेया साहित्य साधना                  | १०७       |
| जेल पिनेया साहित्य साधना                  | ११०       |
| नेपाल संवत् १०८५ या भाषिक आन्दोलन         | ११३       |
| नेपालभाषाया प्रारम्भिक पत्र पत्रिकाया देन | १२०       |
| धर्मदूत                                   | १२१       |
| धर्मोदय                                   | १२१       |
| थौकन्हे                                   | १२३       |
| नेपाल                                     | १२४       |
| नेपालभाषा                                 | १२६       |
| भूमी                                      | १२६       |
| सितु                                      | १२७       |
| संस्थागत विकासया न्हापां न्हापांगु पलाः   | १२९       |
| चवसापासा                                  | १२९       |
| नेपालभाषा परिषद्                          | १३२       |
| नेपालभाषाया सिरपाः                        | १३५       |
| नेपाःया शिक्षाय नेपालभाषा                 | १४०       |



## आधुनिककालया विधागत परिचय

### आधुनिककालया काव्य

|  |           |
|--|-----------|
| पृष्ठभूमि                                      | १४५ - २९१ |
| नेपालभाषाय आधुनिक काव्य                        | १४६       |
| न्युन्यःगु आधुनिककालया काव्य (ने.सं.१०६१-१०८४) | १४८       |
| प्रमुख कवि / कवियत्री                          | १४९       |
| लिचःगु आधुनिककालया काव्य (ने.सं.१०८४- निसं)    | १५०       |
| प्रमुख कवि कवियत्री                            | १६३       |
| लिखं   | १६७       |
|  | १७५       |

### आधुनिककालया बाखं

|                 |     |
|-----------------|-----|
| पृष्ठभूमि       | १७७ |
| नेपालभाषाय बाखं | १७७ |
| प्रमुख बाखं चमि | १८२ |
| लिखं            | १९८ |

### निबन्ध

|                               |     |
|-------------------------------|-----|
| पृष्ठभूमि                     | २०१ |
| नेपालभाषाय निबन्ध             | २०१ |
| प्रमुख निबन्धकार / प्रबन्धकार | २०२ |
| लिखं                          | २०७ |
|                               | २२१ |

### आधुनिककालया नाटक

|                 |     |
|-----------------|-----|
| पृष्ठभूमि       | २२३ |
| नेपालभाषाय नाटक | २२३ |
| प्रमुख नाटकारत  | २२६ |
| लिखं            | २३० |
|                 | २४१ |

### समालोचना

|                     |     |
|---------------------|-----|
| पृष्ठभूमि           | २४४ |
| नेपालभाषाय समालोचना | २४४ |
| प्रमुख समालोचक      | २४७ |
| लिखं                | २५३ |
|                     | २७३ |

### उपन्यास

|                    |     |
|--------------------|-----|
| पृष्ठभूमि          | २७७ |
| नेपालभाषाय उपन्यास | २७७ |
|                    | २७९ |

### प्रमुख उपन्यासकार लिखं

२८२  
२९०

खण्ड : ३

### परिशिष्ट

|                            |         |
|----------------------------|---------|
| क्वखं प्वला                | २९२     |
| ग्वाहालि ज्वल              | २९४     |
| प्राचीन अभिलेखया छुं नमूना | ३००     |
|                            | ३०६-३१८ |







## नेवा: जातिया निर्माण

नेवा:त नेपा:या स्वनिग:या आदिवासी ख: । थुपिं उप्व: याना: शहरय् वसोवास याइपिं ख: । थ्व जातिया उत्पत्तिया खँ आ:तक क्व:मजीनिंसां थौया नेवा:त छगू जाति विशेष व:पिं मखु धइगु खँय् धा:सा विद्वानत सहमत जूगु दु । नेवा: खँग्व:या व्युत्पन्न कथं नेवाड > नेवाहाड > नेवा: धा:पिं मंगोल नश्लयापिं मनूत हे थौया नेवा:तय् आदिम पुर्खा ख: । इमिसं ल्हाइगु भाय् हे थौया नेपालभाषाया प्राचीनतम अस्तित्व ख: । वागमती खुसिया ज:ख: च्वंगु १६X२० माइल ताहा:गु गा: परापूर्वकाल निसें नेपा:या केन्द्रस्थल जुयाच्चंगु दु । थ्व हे गा: नेवा:तय् आदिम स्थल ख: (आचार्य, ने.सं. १०८९ : ३-१६) ।

लिपा विस्कं विस्कं इलय् थीथी कथं उत्तर दक्षिणपाखें विविध जातियापिं मनूत (किरात, शाक्य, लिच्छवी, थकुरी, वृज्जि, गुप्ता, आभीर मल्ल आदि) दुहां वया: थनया न्हापाया आदिवासीनाप छस्वा छथी जुयावन । थुकथं थनया आदिवासीत नेवाड > नेवाहाड > नेवा: धा:पिं मंगोल नश्लयापिं मनूत खया: नं नेपा: गालय् वसोवास याइपिं फुक्कसित उवलया चलन कथं नेपा: देया नामं नेपा:मि, वा नेवा: धाइगु जूगुलिं थुपिं फुक्क नं नेवा: जुयावन (जोशी, वि.सं. २०३० : ८९) । थ्व धापूयात थौया नेवा:तय्गु शारीरिक बनौट, रुप रङ्गया भेद, धर्म संस्कृतिया विविधता आदि नं यचुक कथं । उकिं थौया नेवा:त छगू खास जातियापिं जक मखुसे थीथी जातिया त्वाक:वुक: ख: । थीथी थासं वाय् हिला: थन मूव:पिनिगु समुदाय ख: । थ्व समुदाय दुने च्वपिं मनूत थीथी थासं व:पिं व थीथी भाषा संस्कृतियापिं जूसां नेपा:गालय् वया: थन जीवन हने मासेलि थन उवलया चलनचल्तिइ वयाच्चंगु जनभाषा, गुगु नेपाल देया नामं क्वकयात:गु डेपाल > नेवार > नेपालभाषा ख:, व नं अमिसं मसयेकुसें मगात, वं थ:त सभ्य व सुसंस्कृत धायेकेगु नितिं थनया संस्कृति नं ग्रहण मयासें मगात । थ्व हे कथं थनया न्हापाया आदिवासी जातितय्गु भाषा नेपारभाषा, नेपालभाषायात इमिसं मंका: भाषा कथं नालायकल । नापं थनया मूल संस्कृतियात नं मंका: संस्कृति कथं नालाकाल । कालन्तरय् वना: थनया आदिवासीत नाप छगू समुदायलय्



मूवःगुया छगू परिचय वा मंकाः चिं थ्व हे भाषा व संस्कृति जूवन । डा. कमलप्रकाश मल्लया धापू कथं थौं आदिवासी नेवाःतय् पाखें थौंकन्हय्या नेवाःतय् पुचल्य् छुं तत्व ल्यंदनिसा व तत्व थ्व हे धकाः धायेगु मानवशास्त्रीय, सांस्कृतिक, सामाजिक व मेमेगु प्रामाणिक आधार छुं मदु । अथे जूसां थौंकन्हय्या नेवाःतय्सं ल्हाना वयाच्चंगु गुगु भाय् खः, व भाय् हे छगू क्वातुगु प्रामाणिक आधार जूगु दु । थुकिं आदिवासी नेवाःत व थौंकन्हय्या नेवाःतय् दथुइ छुं मखुसां निद्रुःदँया अटुत सम्बन्ध दुगु खनेदु ... थ्व सम्बन्ध इतिहासया विभिन्न इलय् बाय् हिलाः पिनें वयाः च्वंविं छधी जूगु सह-अस्तित्वया चिं जक नं खयेफु । तर मंकाः भाय्या थ्व सम्बन्ध धाःसा आदिवासी नेवाःत अवश्य नं सामाजिक व सांस्कृतिक दृष्टिकोण आतिथ्य व सौहार्दपूर्ण समाजया पृष्ठपोषक खः धकाः यचुक ब्यं । इमिके अनेवाःतय् नं नेवाः यानाछवयेगु सामाजिक संगठन, अनेवाःतय् नं थःगु संस्कृतिइ थाय् बीगु व नेवाः भाय् ल्हाये सयेके बीगु उदारता दु धैगु स्पष्ट खनेदु (मल्ल, ने.सं. १०९८, घ) । आदिवासी नेवाःतय्के अनेवाःतय् नं नेवाः यानाः छवयेगु सामाजिक संगठन, थनया संस्कृति ग्रहण याके बीगु सांस्कृतिक बाहुल्य, नेवाः भाय् ल्हाये येकेगु उदारता दयेफु, तर पिनें वःपिं अनेवाःतय्सं थन वयाः नेवाःभाय्, नेवाः संस्कृति ग्रहण याःगुया मू हुनि थ्व हे जक मखु । थन च्वनाः म्वायेमाःगु, थनया जीवनय् भ्यलय्पुने माःगु बाध्यतां यानाः हे इमिसं नेवाः भाय्, नेवाः संस्कृतियात नाला यकूगु जुइमाः ।

मूल नेवाःत नेपाःगाःया मूल निवासीत खः, गुपिं काइष्टया सिबें खुसः दँ न्ह्यः हे थन दुगु खनेदु (रेग्मी, इ.सं. १९६०:१६) । लिच्छवितय्सं नेपाः गालय् शासन याये न्ह्यः थन शासन यानाच्चंविं थनया किरात जुजुपित नेपार जातिया जुजुपिं धकाः नालातःगु दु । संस्कृत भाय् ज्वनाः लिच्छवित नेपाः गालय् दुहां वये न्ह्यः थन असंस्कृत भाय् ल्हाइपिं मनूतय्सं वास यानाच्चंगु व थ्व गाःया बस्ती आपालं गुँच्चः, थाय्, खुसि आदिया नां पर्यन्त व हे भासं जूगुलिं छुं मखुसां लिच्छवित वये २००।४०० दँ न्ह्यवनिसें थ्व भाय् ल्हाइपिं (किरात, नेवाड, नेवाहाड, नेवाल, नेवार न्ह्यागु धैदिसँ) दुगु खँ सीदु (मल्ल, ने.सं. १०९८ : १६६) । थुकथं इस्वी संवत् शुरु जुइ न्ह्यः हे थ्व नेपाःगालय् नेवाः भाय् ल्हाइपिं नेवाःत दयेधुंकूगु खः । थुपिं मूल नेवाःत चीनया कांसु प्रान्तया उत्तर पूर्व निसें सँदेय्या दक्षिण व पूर्व दयेकीगु अर्धवृत्त क्षेत्रं म्होतिं नं निकः दक्षिण स्वयाः बाय् हिलाः नेपाः गालय् वःपिं खः (डोहर्टी, १९७८ : ४३९-४४२) । थुपिं अभ्र पूर्वया 'दोलखा' जुयाः वःपिं खः (माली, ने.सं. १०९८ : १५) । थुकथं मूल नेवाःत मंगोल नश्लयापिं व आदिकालं निसें थन खने दयेधुंकूपिं खयां नं थौंया नेवाःत मुक्कं थुमिगु जक वंशज मखुसे मेमेगु जातिया नं ल्वाकःबुकः खः । थौं थ्व समुदायया मंकाः चिं धयागु हे नेवाः भाय् खः, नेवाः संस्कृति खः व गुगुं इलय् थ्व स्वनिगलय् बसोबास याये धुकूपिं खः । ऐतिहासिक क्रमय् शुरुइ स्वनिगःया पिनेयापिसं थ्व स्वनिगलय् च्वंपित नेवाः धायेगु याःसां थुमिसं थःपिनिगु परिचय धाःसा नेवाः धकाः बीगु याःगु खनेमदु । अभ्र शासकतय्सं ला थःत किरात, लिच्छवि, वर्मन,

मल्ल, थकू आदि धकाः म्हसीके बीगु याःगु दु । ख ला नेवार धइगु खँवः नेपाल संवत् ७३९ (इ.सं. १७१९ अर्थात् वि.सं. १७७५) दँय् कस्त दातें च्वःगु नरपतिजयचर्या स्वरोदय ग्रन्थय् उल्लेख जूगु खः (माली, ने.सं. १०९८) थ्वयां लिपा गोरखाया जुजु रामशाहं स्वनिगःया नेवाःत गोरखाय् बनेज्या याकेत यंकूगु इस्वी सन् १९६५ लिपा छयलाबुलाय् वःगु खनेदु । थ्वयां लिपा यँया जुजु प्रताप मल्लं लाय्कूया अंगलय् १५ गू भासं च्वकातःगु (ने.सं. ७७७) शिलापत्रय् नेवार खँवः छयलातःगु दु । ने.सं. ८८८ स गोरखाया शासकतय्सं स्वनिगः त्याकाः सत्ता थःगु ल्हातय् लाके धुंकाः स्वनिगःयापिं मनूतय् जक नेवार धकाः धायेगुलिइ तीव्रता बल, अले पिनें वयाः स्थायी रुपं स्वनिगलय् बसोबास याःवःपिं न्ह्यागु जातियापिं जूसां फुक्कसितं न्हापा थें नेवाः धायेगु परम्परा तनावन (मल्ल, ने.सं. ११११ : २) । थथे खस जुजुपिनिगु ल्हातय् थनया शासन सत्ता लायेधुनेवं थनया प्रशासनीक भाषा खस भाषा जूवन । खस भाषा मखुपिं न्हापांनिसें नेवाः भाय्यात थःगु भाय् कथं ल्हाना वयाच्चंविं, नेवाः संस्कृतियात थःगु संस्कृति कथं हना वयाच्चंविं, गुगुं इलय् स्वनिगलय् बसोबास याये धुकूपिं, थौंथी धर्म जातया छगू समुदाय (Community) वा छगू हे जातियापिं (Ethnic) मनूतय् जक नेवाः धायेगु जूवन । थुकथं नेवाः जातिया जातः प्वला स्वयेगु धैगु हे नेवाःतय्गु जक मखु नेपाःया इतिहास व संस्कृति गय् छधी जुल धैगु प्वला स्वयेगु खः (मल्ल : ने.सं. १०९८ : ड) ।



## नेपालभाषाया उत्पत्ति व सम्मिश्रण

नेपाःया ३.३७ % जनतां ल्हाइगु (२०४८ सालया जन गणना कथं) नेपालभाषा नेपाःया संविधान २०४७ या भाग १ उपधारा ६ कथं राष्ट्रिय भाषाया भवलय् दुथ्याकातःगु देय्या स्वंगूगु प्रशारणया भाषा जूगु दु । थौं थ्व भाय्यात चिनिया-भोट खलःया भोट बर्मेली कचाय् लाःगु छगू असर्वनामिक, हिमाली पुचःया भाषाकथं वर्गीकरण यानातःगु दु । नेपालभाषा चीन सँय् भाय् खलक दुने लाःगु गु खँ दक्खिसिबय् न्हापां भाजु ब्राइन हप्तन हडसनं (ने.सं. १२०-१०१४) ने.सं. १४८ स सीकूगु खः। वय्कलं थःगु च्वसुइ नेपालभाषा उत्तरी मूलया खः धयादिल (Hodgson, ई.सं. १९७२ : ३५) । छुं दँ लिपा भाजु ग्रीयसनं (ई.सं. १९०८) भारतीय भाषा सर्वेक्षण ग्रन्थ सम्पादन यानादीबलय् नेपालभाषायात चीन सँय् भाय्या सँय् बर्मा कचाय् दुथ्याकादिल । थुनिया भाषा वैज्ञानिक पारिवारिक स्वापूया पुष्टि भाजु रवर्ट शेफरं (ई.सं. १९५२) नेपालभाषा व चीन सँय् च्वखँय् यानादिल । वय्कलं पुलांगु सँय् बर्मा खलःया उपसर्ग व खँग्वःया लिउ बाआखः लोप जुयावंगु कारणं यानाः नेपालभाषाया सम्बन्ध आसाम-वर्मा कचा नाप स्वयाः उत्तर (तिब्बती) व पूर्वी (बर्मा व पूर्वी सीमाना) अर्थात तिब्बती बर्मी नाप दुगु क्यनादिल (Shafer, ई.सं. १९५२ : ९३) । अथे हे भाजु ग्लोभरजुं (ई.सं. १९७०) ३०गू सँय्-बर्मा भाय्या बर्गीकरण, अर्थ व ध्वनिया सगोत्री प्रतिशतया आधारय् यानादिसं भाय् पुचः बायावंगु मिति तकं क्यनादिल । थ्व वर्गीकरण कथं नेपालभाषायात हिमाली भाय् पुचलय् दुथ्याकाः अप्वः चेपाङ्ग भाय् नाप थ्व भाय्या स्वापू दुगु खँ क्यनादिल । वय्कःया कथं ई.पूर्व १५०० दँ न्हयः हे थ्व भाय् चीन-सँय् भाय् नाप बाया वयेधुंकूगु खनेदु । मूल नेपालभाषा भाषी म्होति नं स्वकः बाय् हिलाः स्वनिगलय् दुहां वःगु खनेदु । थ्व खँ नेपाल मण्डलय् प्राप्त २२५ गू ति अभिलेखय् छयःगु २७५ गः ति संस्कृतेत्तर खँग्वलं सीदु । उकिइ नं लः थुइकीगु खँग्वः ईशा पूर्वया स्वनिगःया समाजय् संयुक्त पर्याय कथं छयलेगु याःगुलिं सीदु । थज्याःगु चीन-सँय् भाषाया थीथी भाषाया खँग्वः तिब्बू (चेपाङ्ग+नेवाः)- डिब्बू (मगः+नेवाः) खुदुल (नेवाः+किरात) आदि खः । थ्व तथ्यं सीदु प्राचीन नेपालभाषा नं गुगुं छगू खास जातिया भाय् मखुसं ईशा पूर्व पाखे स्वनिगः केन्द्रय् थीथी च्वापुगुं भाय्या स्वाना-भाय् खः । थुकथं सँय्-बर्मा मूलया च्वापुगुं भाय् ल्हाइपिं छपुचः थौकन्हय्या नेवाःत मध्ये अवलय् दःवंगु मू नेवाःतय् पुचः खः (तमोट, ने.सं. १९९४ : पृ ५) । थथे हिमाली छपुचः जुयावंगु नेपाःगालय् लिपा ई न्ह्याःलिसं भारोपेली भाषा परिवारया थीथी भाषा ल्हाइपिं नं थन दुहां वयेगु जुल । फलस्वरूप थुमिगु भाषाया

प्रभाव नं थनया भाषाय् लाःवन । कालान्तरय् भारोपेली भाषा परिवारया थीथी भाषाया खँग्वः जक नेपालभाषाय् दुहांवयेगु मजुसे थुनिया संरचनाय् तकं थुमिगु प्रभाव लाःवन, तिब्बती बर्मी भाषा परिवारया स्वभाव म्ह जुजुं वन ।

## थीथी भारोपेली भाषाया प्रभाव

संस्कृत, प्राकृत भाषा : थीथी भाषाभाषी नेपाःगाः दुहां वयेगु भवलय् ई.पू. ५४२ पाखे कोशल जुजु विडड्भं कपिलवस्तु ध्वस्त यासेलि व मगध जुजु अजातशत्रु वैशाली गणराज्यय् आक्रमण यासेलि अनं शाक्य, कोलिय, वृजित नेपाःगालय् दुहांवल । थुकथं हे उत्तर भारत पाखे नं लिच्छवि आदि जातित इलय् व्यलय् नेपाःगालय् दुहां वयातुं च्वन । थुपिं संस्कृत मूलया भाय् मागधी, प्राकृत आदि भाषाभाषी खः । थुमिसं नेपाःगालय् वयाः थनया सँय्-बर्मा भाषी नाप जीवन हनेगु यासेलि नेपालभाषाय् नं थुमिगु भाय्या प्रभाव वुलुहुं वुलुहुं अप्वः जुजुं वल । प्रशस्त संस्कृत, प्राकृत खँग्वः दुहांवल । सँय् बर्मा व संस्कृत प्राकृत खँग्वःया पर्याय खँग्वः नं ब्वलना वल । ई न्हयानावलिसं संस्कृत प्राकृत भाषाया प्रभाव नेपालभाषाय् थुलि तक लाःवन कि चीन-सँय् भाय्या भाषिक प्रवृत्ति स्वयां नं भारोपेली प्रवृत्ति अप्वः खने दयावल । नेपालभाषा थ्व संस्कृत भाषाया खँग्वःयात थःगु पैतृक खँग्वः कथं कायेगु यात । विशेष रुपं थीथी भावात्मक खँग्वः नेपालभाषाय् दुहांवल । संस्कृतया मुक्कं प्रभावं यानाः उबलय्या समाजं अभिलेख वाङ्मय जक मखु संस्कारगत विधि विधान नं फूक्कं संस्कृत भाषां च्वयेगु यात । गुगु विधि विधानत थौं तक नं संस्कृतया माध्यमं हे ज्याय् छयला वयाच्वंगु दु । संस्कृत भाय्या खँग्वः नेपालभाषाय् तप्यंक दुहां वयेगु जक मजुसे संस्कृत भाय्यागु खँग्वःयात नुनाः थःगु हे पहचह कथं छयलेगु नं जुल ।

मैथिली भाषा : तिरहुतया जुजु हरिसिंह देव ने.सं. ४४६ स विसं वयाः तीनपाटन सिन्धुलीस मदुसेलि वया कलाः देवलदेवी नेपाःगाः दुहांवःगु खनेदु । थथे तिरहुतया मनूत दुहां वसेलि इमिगु भाषा, संस्कृतिया प्रभाव नं थन खनेदत । अभ्र तत्कालीन मल्ल जुजुपिनि इहिपा मिथिलाया राजकुमारीपिं नाप जूगु खँ नं इतिहासय् उल्लेख जूगु दु । अथे हे मल्ल जुजुपिनिगु दरवारय् मैथिली पण्डित नं दुथ्याकातःगु आपालं खनेदु । थथे मैथिली भाषाभाषीनापया नेवाःतय्गु स्वापुलिं नेपालभाषाय् मैथिली भाषाया नं आपालं प्रभाव लात । मैथिली भाषाया प्रभाव नेपालभाषाय् ईशवी सन् १४ शदी हे खनेदये धुंकल धयागुया दसि कथं गोपालराज वंशावलीया भाषायात हे कायेफु । थ्व भाषां मल्लकालय् नेपाःगाःया शासकतय्त थुलि प्रभावित यात कि थःपिसं तकं मैथिली भाषां प्याखं च्वयेगु, म्ये



चिनेगु यानाहल । थ्व हे कथं नेपालभाषा नाप मेगु भाषा ल्वाकछुयाना: च्वयात:गु प्राचीन नाटक मध्ये दकलय् अप्व: मैथिली भाषा ल्वाकछुयाना च्वयात:गु नाटक लुयाव:गु दु । नेपालभाषा च्वयेगु या:गुली नं आपालं मैथिली भाषाया खँव:, खँपु दुथ्याकेगु जूगु दु । मैथिली भाषा स: धका: क्यनेगुलिइ हे तत्कालीन शासकतय्सं गौरव तायेकूगु दु ।

**फारसी भाषा :** ईश्वी सन्त्या १६, १७ शदीपाखे भारतय् मुगल सम्राटतय्गु शासन व्यवस्था क्वातुइ धुंकूगु व संगीत साहित्यय् तसकं हे नां जाये धुंकूगु खनेदु । इमिगु जीवन पद्धति नं सभ्य व त:मिगु भा:पीगु कारण उगु ईया मल्ल जुजुपिसं नं इमिगु जीवन शैलीयात अनुसरण यायेगु यात । थ्व हे कथं मुगलतय्गु संगीत, साहित्य, कला जक मखु, भाषा तक सयेके सीकेगु यात । इमिगु भाषा, संस्कृति, कलाया अनुसरण यायेगु ध्यागु हे सभ्य व सुसंस्कृत जुइगु तायेकल । ने.सं. ८२० स जुजु भूपतिन्द्र मल्लया इलय् आसामया कर्णपूर कायस्थं च्व:गु फारसीपद् प्रकाश सफू नेपालभाषा अनुवाद जूगुया मू कारण थ्व हे नं छता ख: । थ्व हे कथं दरबारीया भाषा, शासन पद्धतिइ मा:गु विशेष याना: न्याय निसाफ व प्रशासन सम्बन्धी यक्व खँव: नेपालभाषाय् नं दुहां वल । थौं नेपालभाषाय् खनेदुगु इनाम, जुलुस, शहर, तलव आदि खँव: थुकिया नमूना ख: । फारसी भाषाया बाहुल्य नेपालय् लिपा तक ल्यनां च्वन ।

**नेपाली भाषा, आदि :** पश्चिम नेपालय् खस राज्यया विकास यक्व न्हय: हे जुइधुंकूगु ख:सां ई सन्त्या १७ गू शदीया बच्छि फपुले धुंका: तिनि नेपा:गा:या मल्ल शासकतय्सं उपत्यकां पिनेया पहाड पहाडया राज्य नाप नं स्वापू स्वायेगु यात । अनं लिपा खस भाषायापित लाय्कलिइ स:तेगु जुल । अथे हे राज्यया सीमाना सीमानाय् किल्ला दयेका: त:थाय् च्वनीपिं पदाधिकारीत नं अप्व: धयाथे खस भाय्यापिं जूगुलिं नेपालभाषाय् नं खस भाषाया प्रभाव ला:वन । ने.सं ७६१ या मखत्वाया शिवालयया लक्ष्मीनरसिंह मल्लया अभिलेख, ने.सं ७९० या रानीपुखूया प्रताप मल्लया अभिलेखय् च्वयात:गु नेपालभाषा व्वनेबलय् नेपा:गालय् थुगु ई स्वया: गाकं न्हय: हे नेपाली भाषां थाय् काये धुंकूगु सीदु । लिपा पृथ्वीनारायण शाहं नेपा:गा: त्याकुसेलि नेपाली भाषा नेपा:या प्रशासनीक भाषा जूवन । लिपा विस्तारं थ्व जन सम्पर्कया माध्यम भाषा नं जुल । लिच्व: कथं थुकिया प्रभाव नेपालभाषाय् न्हियान्हिथं अप्वया वन । अझ शासकतय्सं नेपाली भाय् छगूयात जक प्रश्रय वीगु याना: मेमेगु भाय्यात क्वत्यलेगु नीति ज्वंसेलिं थ्व भाषां नेपालभाषायात विस्थापित तक यायां यंकल । नेपा:या जनगणनाया धलखय् नेपाली भाषीतय्गु ल्या: अप्वयां वंगु नेपालभाषीतय्गु जनसंख्या पा: जुजु वंगु थुकिया प्रमाण ख: । अथे हे नेवा: भाय् ल्हाइपिसं नं थ:गु भाषाया खँव: दयेक दयेक नं नेपाली भाषाया खँव:यात न्हियान्हिथं अप्व: छ्यलेगु यानाहल । मिलेजू, बनेजू, सफाजू व बढेजू आदि थुकिया छुं छुं दसि ख: ।

ई न्ह्यानावलसे नेवा:तय्गु सम्पर्क अंग्रेजी, हिन्दी आदि भाषाभाषीपिं नाप नं जुयावल । लिच्व: कथं थुमिगु भाषाया प्रभाव नं नेपालभाषाय् खनेदत । टुपिन, वाकस, कोट, इस्कोट, यारलिङ्ग आदि अंग्रेजी भाषाया खँव:यात नेपालभाषाय् थ:गु हे खँव: थें याना: छ्यलेगु जूगु थुकिया दसु ख: ।

थुकथं नेपालभाषाया उत्पात हिमाली पुत्र:या भाषा पाखें जूगु खयां नं छगू जीवित भाषाया दसु स्वरुप ईया हिउपा: लिसें थ्व अनेक भाषाया प्रभाव ग्रहण यायां यंकल । उकिं थौंया नेपालभाषा छगू ल्वाकज्या:गु जाति व भाषाया प्रभावं विकास जूगु भाय् ख: (कंसाकार, ने.सं. ११०२ : पृ ३४) ।



## नेपालभाषाया नां

थौं नेपालभाषा, नेवाः भाय्, नेवारभाषा, नेवारी भाषा आदि धकाः सम्बोधन याना वयाच्वंगु थ्व भाषाया ऐतिहासिक नां नेपालभाषा हे खः धयागु खँ प्राचीन अभिलेखं प्रमाणित जू । प्राचीन साहासनय् वा अभिलेखय् थ्व भाषायात नेपालभाषा > नेवारभाषा > डेपार भाषा > नैपालिक (नैपालीय) भाषा आदि कथं नं छ्यलातःगु दु (वैद्य, ने.सं. ११०४, : ६०) । नेपालभाषां सफू च्वयेगु ज्याया शुरुनिसें थ्व भाषाया नां नेपालभाषा धकाः हे छ्यःगु खनेदु । आः तक लूगु तथ्य कथं थ्व भाषाया नां नेपाल भाषा धकाः न्हापां प्रयोग ने.सं. ५०० यागु नारद संहिता टीका ग्रन्थया पुष्पिका वाक्यय् जूगु खः ।

इदमल्पधियां नृणां दुर्विज्ञेय-दोदितम् ॥  
नारदीयं यदस्तांह महार्थवत् ॥  
तस्येयं लिख्यते टीका स्पष्टा नेपालभाषया ।  
इमां विज्ञाय भूपाद्या श्चरन्तु वार्त्सना ॥ ॥  
(वज्राचार्य, ११०७ : ११६)

अथे हे ने.सं. ५०९ या अमरकोषया टीका ग्रन्थया उपसंहार वाक्यय् नं थ्व भाषाया नां नेपालभाषा धकाः न्ह्यथनातःगु दु -

‘इति माणिक्य विरचितो-अमरकोषस्य नैपालभाषा टिप्पनी समाप्तेयं ॥  
स्वस्ति श्री मन्नेपालिक वत्सेर ५०९ चैत्रकृष्ण त्रयोदश्यां बुधवासरे .।.’  
(नेपालभाषाया जातः, १०९१ : ९)

थ्वहे कथं ने.सं. ५५० निसं सीदयेक सफू, सफूया समाप्ति वाक्यय्, ल्वहंपौ अभिलेखय् नेपालभाषाया नामं थ्व भाषा सम्बोधित जुयाच्वंगु दु । गनं नेपालभाषा जक गनं अतः परं नेपालभाषा अझ गनं देशभाषा धकाः थ्व भाषायात सम्बोधन यानातःगु दु । थथे हे जुजु जयज्योति मल्लया शासनकालय् खप देया तौमधि त्वाःया देगलय् च्वंगु ने.सं. ५३० सालया ल्वहं पतिइ -

अतःपरं नेपालभाषा श्री योडस्तु सोमवासरे श्री त्रिपुरविद्या पीठिया द्वाररपादुका स्थापना दि जुरो (माली, ने.सं. १०९८ : १७)

नेपालभाषा साहित्यया इतिहास/१०

धकाः नेपालभाषायात परं नेपालभाषा धकाः उल्लेख यानातःगु दु । अथे हे नेपालभाषायात देशभाषा धकाः दकलय् न्हापां सम्बोधन यानातःगु अभिलेख जुजु यक्ष मल्लया ईयागु खप तौमधि त्वाःया ने.सं. ५६० यागु शिलालेखय् खः ।

‘देशभाषा ॥ श्री जय यक्ष मल्ल प्रभु ठाकुरसं पादस्थानया दिन गजडि छसि पुल द्युका हुँ यितिन दय्का जुरो’ (रेग्मी इ.सं. १९६६ : ४६)

नेपालभाषायात देशभाषा जक मखु स्वदेश भाषा धकाः तक नं गुलिं गुलिं अभिलेखय् न्ह्यथनातःगु लूगु दु । प्रताप मल्लया ने.सं. ७७४या हनुमानधवाखाया ल्वहं पतिइ -

‘अथः देशभाषा, अतः परं देशभाषा  
अथः स्वदेश भाषा’

धयाः नेपालभाषायात सम्बोधन यानातःगु दु । लिपा उत्तर मल्लकालय् वनाः थज्याःगु प्रामाणिक दसि भन आपाः खने दत । अभिलेख तथा कोष, टीका, ज्योतिष, चिकित्सा, अवदान, बाखं आदि विविध विषयया ग्रन्थय् न्हापांगु वाक्यय्, दकलय् लिपा वा खँया प्रसङ्गय् थ्व भाषायात नेपालभाषा, नेवारभाषा धकाः सम्बोधन यानातःगु, प्रामाणिक दसि आपालं लूगु दु । थुकथं देशया नां क्वकया नेपालभाषा धकाः सुशोभित जुइगु सौभाग्य प्राचीनकालं निसं थ्व भाषायात चूलाःगु दु । थज्याःगु हे तथ्ययात मनन् यानाः इतिहास संशोधन मण्डल, डिल्लीरमण रेग्मी, योगी नरहरि, हेमराज शाक्य आदिपिसं संकलन यानाः पिकयादीगु सहासनय्, वीर पुस्तकालय नं पिकाःगु सहासनय् थ्व भाषायात नेपालभाषा हे च्वयेगु याःगु दु ।

नेपालभाषा साहित्यया इतिहास/११



## नेपाल लिपि

चीन सँयभाय् खलःया न्यागू लिपिवद्ध दसि दुगु भाय् मध्ये नेपालभाषा नं छगू खः । नेपाल लिपि नेपालभाषाया निंति जक गौरवया विषय मजुसे नेपाःया निंति हे गौरवया प्रतीक जूगु दु । नेपाः देशं संयुक्त राष्ट्र संघया दुजः जुइत इनाप पौ ब्यूबलय् देया थःगु लिपि कथं रञ्जना लिपियात प्रस्तुत याःगु खः । थौया परिस्थितिइ नेपालभाषा मूलतः देवानागरी लिपि जक च्वयेगु याःसां प्राचीन इलय् थ्व भाषायात मेमेगु लिपि नं च्वयेगु जूगु दु । प्राचीनकालं निसं हे नेवाःतय्सं थःपिनिगु न्ह्यागु ज्याखँयात नं लिपिवद्ध याताः वयाच्वंगु खनेदु, चाहे कर्मकाण्डया ज्याय् जुइमा, चाहे वासःतासः ज्योतिषी आदिया ज्याय् जुइमा । थथे नेपालभाषां प्राचीनकालय् च्वज्याय् छयःगु लिपि : गोलमोल, लिच्छुमोल, पाचुमोल, क्वंमोल, हिमोल, कुंमोल, रञ्जना, भुजिमोल व प्रचलित लिपि खः । तर थथे तःगु कथंया लिपिया प्रयोग जूसां विशेष अभिलेख ग्रन्थ च्वज्याय् प्रचलित, भुजिमोल व रञ्जना लिपि हे छयलेगु जूगु दु । लिपि विकासया भवलय् भी पूर्वज लिपिकारतय्सं नित्ता खँ क्वातुक ज्वंगु सी दु - १). व्यावहारय् छयले छिंगु, स्पष्टगु, च्वये ब्वने अःपुगु, २.) थःपिनिगु जातिय कला शिल्पया पहिचान जुइगु कलापूर्ण शैलीयागु । थ्व हे कारण प्राचीन इलय् नेपाःगालय् व्यवहारय् छयलेत छिंगु अःपुगु भुजिमोल व नेपाल लिपिया व्यापक प्रचलन जूगु दुसा, स्वये हे यइपुसे च्वंगु कलां छाय्प्यगु रञ्जना लिपि धाःसा नेपाल व नेपाल पिये नं मांगलिक ज्याखँय् थाय् कयाः थातं च्वने फयावं च्वंगु दु । तर प्राचीन अभिलेखय् नेपालभाषा, नेपाल संवत् धकाः न्हयथनातःथे नेपाल लिपि वा रञ्जना लिपि आदिया नां न्हयथनातःगु उलि खनेमदु । गोपालराज वंशावलीया २२ (क) पतिइ, श्री भूमिगुप्तया पतिइ नेपालय् गोलनाम अक्षर प्रवर्तते धकाः च्वयातःगु व यँया जुजु कवीन्द्र जयप्रताप मल्लया हनुमानधवाखा लाय्कू जःधुंया ने.सं. ७७४ या अभिलेखय् दकलय् न्हापां गोलमोल आखर धकाः न्हयथनातःगु छुं भचा खनेदु ।

नेपालभाषाया लिपिया विकासक्रम बारे लिपि विशेषज्ञपिनिगु विचाः धाःसा छुं भचाः पाःगु खनेदु । प्रसिद्ध लिपि विशेषज्ञ शंकरमान राजवंशीया धापूकथं लिच्छवि लिपिया लिउ प्राचीन नेवाः लिपि लूगु खः । प्राचीन नेपाल लिपिं

हे भुजिमोल, कुंमोल, पाचुमोल प्रचलित लिपि छसीकथं विकास जुजुं वःगु खः । तर इतिहासकार डिल्लीरमण रेग्मी, लिपि विशेषज्ञ हेमराज शाक्यपिसं धाःसा उत्तर लिच्छवि लिपिया लिउ गोलमोल, भुजिमोल, लुयाः तिनि रञ्जना व नेपाल लिपि लूगु खँ न्हयथनादीगु दु । अथे हे गुलि गुलिस्यां कुटिला लिपिया स्वंगू कचा मध्ये नेपाल लिपि नं छगू खः (पाठक, ई.सं. १९६९: ७६-८९) व थ्व छसी कथं रञ्जना, भुजिमोल, व प्रचलित जुयाः पिदंगु खः धयातःगु दु । प्रो. मोहनराज शर्माया धापू कथं थुपिं फुक्क छगू हे लिपि खः । आखः च्वइवलय् थुमिगु छयं (मोल) विभिन्न कथं तइगु जूगुलि जक थुमिगु थीथी नां जूगु खः । वास्तवय् नेपाल लिपिया बांलाक अध्ययन यायेवलय् नेपाल लिपि दुने लाःगु थीथी लिपिया नां छुनातःगु प्रचलित, रञ्जना, भुजिमोल आदि आखःया छयंया आकार व बान्की जक पाःगु खनेदु । उकिं थुपिं थीथी लिपि मखुसे छगू हे लिपिया थीथी शैली खः । (स्थापित, ने.सं १९९८ : १४-१५)

नेपाःया लिपिया इतिहासय् दकलय् न्हापां लिपिया प्रयोग जूगु अभिलेख इ.पू. २५५ या पिप्पिहवाया स्तम्भाभिलेख खः । थ्व ब्राम्ही लिपि च्वयातःगु दु । थौया देवनागरी लिपि, नेपाल लिपि आदि फुक्कं ब्राम्ही लिपिया हे कचामचा खः । इतिहासकार धनवज्रजुं सम्पादन यानादीगु सफुलिइ दुथ्याःगु १९० गू अभिलेख मध्ये ५३ गू अभिलेख गुप्ता लिपि च्वयातःगु दुसा १३७ गू अभिलेख कुटिला लिपि च्वयातःगु खः । थ्व हे कुटिला लिपिया छगू कचाया रूपय् नेपाल लिपि पिदन । थौं नेपालय् थ्व हे नेपाल लिपि विकास जुयाः च्वयात छयलीगु शैली कथं विभिन्न नां गथेः भुजिमोल, लिच्छुमोल, गोलमोल आदि ज्वन । थुपिं लिपि मध्ये नेपालभाषाय् दकलय् अप्वः छयःगु लिपि प्रचलित नेपाल लिपि खःसा अनं लिपा भुजिमोल व रञ्जना खः । प्रचलित नेपाल लिपियात नेपाल लिपि जक नं धायेगु याः । अथे हे नेपाल लिपियात नेवाः आखः नं धायेगु चलन दु । थ्व लिपि च्वयातःगु दकलय् पुलांगु दसु ने.सं. २८ सालया लंकावतार खः । थ्व बाहेक मेमेगु लिपि उस्त छयःगु मदु । नेपालय् नेपाल लिपिया विकास तथा प्रचार यायेगुलिइ बौद्ध विद्वानपिनिगु तःधंगु देन दु । भारतया नालन्दा व विक्रमशिला थें ज्वःगु उगु ईया बौद्ध अध्ययन संस्थानय् आक्रमण जुसेलि अनया बौद्ध विद्वानत थःपिनिगु प्राचीन बौद्ध धर्मया थीथी ग्रन्थ ज्वनाः थुखें उखें विस्युवनेगु जुल । थथे हे विस्युवनेगु भवलय् गुलि नेपालय् नं वल । लिच्वः कथं थुमिगु पाखें नेपाल लिपि च्वयातःगु सफू आपालं नेपालय् नं दुहांवल । आधुनिक नेपालय् नं नेपाल लिपिया प्रचार प्रसार तथा संरक्षण सम्बद्धनया ज्याय् न्हापां न्हयचिउपिं बौद्ध पण्डितत खः- सिद्धिहर्ष, पूर्णहर्ष, मित्रानन्द आदि । वय्कःपिं पाखें हे सिल्भान लेभि थें ज्याःपिं पाश्चात्य विद्वानतय् लिपिया ज्ञान हस्तान्तरण यायेगु ज्या जुल । अथे हे इतिहासकारपिं नयनराज पाण्डे, बाबुराम आचार्यपिं नेपाःया इतिहास निर्माण यायेगु ज्याय् आपालं ग्वाहालि थ्वय्कःपिं पाखें हे चूलागु दु । थौं नं नेपाल लिपिया वर्णमाला आदि दयेकाः थुकियात जनमानसय् प्रचार प्रसार यायेगु ज्याय् सक्रिय रूप न्हयचिलादीमह हेमराज शाक्य नं छम्ह बौद्ध विद्वान हे खः ।



नेपाःया प्राचीन ग्रन्थय् मिखा व्वयेवल्य् ने.सं. ६०७ जःखः व व स्वयां न्हयः अप्वः चलन चल्लिइ दुगु लिपि भुजिंमोल खः । थुगु इलय् तक मः भ्वंया चलन चल्लि मदुगुलिं भुजिंमोल आखः विशेष यानाः ताडपत्रय् च्वयेगु जूगु खनेदु । नेपालभाषाया न्हापां न्हापांया ग्रन्थ गथे- हरमेखला, नारद संहिता, गोपालराज वंशावली आदि भुजिंमोल लिपि च्वयातःगु दु । भुजिंमोल लिपिया ल्यू ल्यू रञ्जना लिपि न वयाच्वंगु खनेदु । रञ्जना लिपि विशेष यानाः धार्मिक मांगलिक ग्रन्थ मन्त्र आदि च्वयेगु ज्याय् छ्यःगु खनेदु । थ्व लिपि नेपाः दुने जक मांगलिक ज्याखँय् उच्च पवित्र थाय् कयाच्वंगु मखुसे बौद्ध धर्मया लं लिनाच्वंगु चीन, श्रीलंका, जापान, तिब्बत आदि देशय् तक नं थ्व लिपि प्रचलित जूगु दु । रञ्जना लिपिया मेगु कलात्मक रुप कुटाक्षर तथा सप्ताक्षर खः । गुगु छगः आखल्य् मेगु आखः देतनाः च्वं क्वय् वंकाः च्वयेगु याइ । रञ्जना लिपियात व्यावहारिक लेखनय् उस्त मछ्यःसां द्यःया मूर्ति दुने जीवन्त्यास यायेत तइगु हृदय मन्त्रया तुं आखःयात रञ्जना लिपि च्वयेगु थिति नेपालय् आपालं दु । ने.सं. ६०० लिपा नेपालभाषां प्रचलित नेपाल लिपियात अप्वः व्यवहारय् छ्यलेगु यात । थुगु इलय् वयाः मः भ्वंया आविष्कार जुइ धुकूगुलिं थ्व नेपाल लिपि अप्वः धया थें मः भ्वँतय् हे च्वयेगु जुल । उत्तर मल्लकाल तथा शाहकालया पूर्वार्द्ध तक थ्व लिपि नेपाःया जनजीवनय् तथा राजकीय ज्याखँय् थाय् कयाच्वंगुलिं थ्व लिपि च्वये ब्वने माःगु आवश्यकता नं उवल्य् उतिकं दयाच्वन । नेपालभाषा भाषीपिसं जक मखु तत्कालीन नेपाःगाःया फुक्क भाषाभाषी धर्मावलम्बीं नं थ्व लिपियात त्वाः हे मदयेक ने.सं. ७०० जःखः निसें कयाः ने.सं. १०२० या दशक तक छ्यःगु खनेदु । पृथ्वीनारायण शाहया लिपा प्रतापसिंह शाहया पालय् ने.सं. ८९५ स नेपाःया ल्हासा नाप जूगु सन्धिपत्रय् तक नेपालभाषा जक मखु नेपाल लिपि नं छ्यःगु दु । जुजु रणबहादुर शाहया इलय् तक नं घरायसी तमसुक्य् नेपालभाषा, नेपाल लिपि छ्यलाः जुजुया लालमोहर जक देवनागरी लिपि नेपाली भाषां तयेगु याःगु खनेदु, लिपा जुजु सुरेन्द्र विक्रमया पालय् थ्यंकाः नेपालय् सरकारी अड्डाखानाय् नेवाः भाषां च्वयातःगु गुगुं भ्वंभिं दसि कथं स्वीकृत जुइमखु धइगु पलाखं प्रचलित लिपि, रञ्जना लिपि आदि सयेकेगुली गतिरोध हयाबिल, राजकीय भाय् नेपाली भाषा व लिपि देवनागरी जुल । लिच्वः कथं नेपाल लिपि देवनागरी लिपियात थाय् त्वःतु त्वःतु वनेत करंयन । नेपालभाषा नं देवनागरी लिपि च्वयेगु जुल । अझ नेपालभाषायात अप्वः प्रचार प्रसारय् हयेत लिपिया मोह कयाच्वनां जक मजिल धयागु धारणा ब्वलन । अले ने.सं. १०२० दशकं निसें सीदयेक नेपाल लिपिया पलेसा देवनागरी लिपि छ्यलेगु यानाहल । तर थथे भाषा प्रचारया नितिं नेपाल लिपियात त्वःतेगु याःसां धर्मआदित्य धर्माचार्यया सम्पादनय् पिदंगु बुद्ध धर्म व नेपालभाषा पत्रिकानिसें थ्वया संरक्षण संवर्द्धनया नितिं हानं पलाः ल्हवनाहल । पन्नाप्रसाद वैद्य नेपाल देशया अक्षरबोध (ने.सं. १०७०) सफूचा पिकयाः नेपाल लिपिया पुनरुत्थानया अभियान न्हापां च्वयेकादिल । थ्वयां लिपा हेमराज शाक्यया नेपाल लिपि संग्रह (१०७१), वर्णपरिचय (१०८०), वर्ण परिचय (१०९३)

पिदन । थ्व पलाः २०१७ सालय् प्रजातन्त्र लिपा भूतन सशक्त जुल । थौं प्राचीन लिपिया संरक्षण संवर्द्धनया नितिं आपालं संघ संस्थां ज्या यानाच्वंगु दु । नेपाल लिपि गुथि, आशा सफू कुथि, लिपिथपू गुथि, आदि थुकिया दसु खः । थौंया न्हू पुस्तां थुकियात नेपाःया प्राचीन गौरव भाःपाः सकारात्मक रुपं कयाच्वंगु दु । थौं थाय्थासय् लिपि कक्षा संचालन यायेगु जक मखु, नेपाललिपि पत्रपत्रिका तकं पिकायेगु जूगु दु - त्वाःदेवा, पौभाः, मत, संगं, थपू आदि नेपाल लिपि पिदंगु पत्रिकात खः । अझ थौंया स्वनिगःया नगरपालिकां नं नेपाल लिपियात मान्यता वीगु याःगुलिं थ्वया भविष्य उज्ज्वल खनेदु ।



## नेपाल संवत्

नेपालभाषा, नेपाल लिपि धाये थें नेपाः देया नां उल्लेख जूगु नेपाःया छगू प्रचलित संवत् नेपाल संवत् खः । कार्तिक शुक्ल प्रतिपदा कुन्हु प्रारम्भ जुइगु थ्व संवत् थ्वया थौंकन्हया दै कथं शक सवत् ८०१, विक्रम संवत् ९३६ कार्तिक, ईस्वी संवत् ८७९ अक्टोबरस शुरु जूगु खनेदु । थुकथं नेपालय् प्रचलित थीथी संवत् - विक्रम संवत्, ईस्वी संवत्, शक संवत्, कलिगत संवत्, बुद्ध संवत्, आदि स्वयाः नेपाल संवत् दकलय् लिपा शुरु जूगु खनेदु । थ्व संवत्या छयलावुला विशेष रुपं स्वनिगःया मध्यकालीन तथा पूर्व आधुनिककालीन अभिलेख ग्रन्थ आदिइ जूगुलिं नेपाल संवत्या शुरु नेपाःगालय् जूगु व थुकिया विकास नं मध्यकालय् हे जूगु खनेदु । नेपाल संवत् नेपालभाषां च्यातःगु अभिलेख ग्रन्थय् जक छयलातःगु मखु, तत्कालीन मेमेगु भाषां च्यातःगु नेपाल मण्डलय् रचना जूगु अभिलेख तथा विविध विषयया ग्रन्थ रचनाय् नं छयलातःगु खनेदु । उकिं उगु ईया नेपाःया साहित्य, संस्कृति, सभ्यता, कला आदिया अध्ययन अनुसन्धान यायेत नेपाल संवत्या ज्ञान नं मदयेकं मगाः । प्राचीन इलय् नेपाल धकाः स्वनिगः विशेषयात जक धाइगु व थनया वासिन्दातय्त नेपाः/नेवाः, थनया भाषायात नेपालभाषा धाइ थें थन छयला च्वंगु संवत्यात नेपाल संवत् धायेगु याःगु जुइमाः ।

नेपाल संवत् मध्यकालय् नेपाःगालय् जक सीमित मजुसे भारत, चीनया शासकतय्सं नं छयःगु धयागु खँया छुं छुं दसि नं लूगु दु । चीनया मिङ वंशी जुजु तायि मिङ महाचीनाइ नामं 'ने. सं ५३५ आषाढ शुक्ल दशमी छयलाः भवैतया शासक शक्तिसिंह रामयात संस्कृत भाषां रञ्जना लिपिं फरवाना (राजआज्ञा) च्याहःगु इतिहास प्रसिद्ध जू (पेटेक १९८४:२१९) । अथे हे कोचविहारया (थौंकन्हय् पश्चिम बंगालया छगू जिल्ला) जुजु तत्कालीन यँया जुजु प्रताप मल्लया ससःदाजु प्राण नारायणं नं (ने.सं ७४७-७८६) थःगु लूँयागु मुद्राय् नेपाल संवत् छयःगु दु (मिराशी, ई.सं. १९४१ : १) ।

नेपाल संवत् नेपालय् प्रचलित संवत् मध्ये दकलय् लिपा तिनि पिदंगु खयां नं इतिहासकारतय्सं थ्व संवत्या उत्पत्ति सम्बन्धी थीथी हे बिचाः प्वांकाच्चंगु खनेदु । नेवाःतय् दकलय् तःधंगु नखः म्हपुजा नं थ्व हे कार्तिक शुक्ल प्रतिपदा कुन्हु लाइगु व नेपाल संवत् नं थुकुन्हु हे शुरु जुइगु जूगुलिं नेपाल संवत्या स्वापू

म्हपुजा नखः नाप दु धयागु आम धारणा दु । न्हूदँया लसताय् म्हपुजा न्यायेकेगु चलन वःगु खः धयागु धारणां थौं जनमानसय् क्वातुक थाय् काये धुकूगु दु । नेवाःतय्सं याइगु म्हपुजा वारे स्वर्गीय ठाकुरलाल मानन्धरया धापू कथं नेपाल संवत् शुरु जूगु इलय् पाखे, विशालनगरय् लिच्छवि राजधानी जुयाच्चंथाय् तसकं मि च्यानाः शहर हे ध्वस्त जुल । अन च्वपिं यें, यल व ख्वप नगरय् च्ववन । अले म्वाये खपिसं तःधंगु विपत्तिं न्हूगु जन्म काः थें भाःपाः म्हपुजा यात अर्थात् न्हू कथं संवत् नं छयल । (तमोट, ने.सं. १९९८ : २) । थ्व धापुतिइ गुलित सत्यता दु, व मेगु हे खँ खः, तर थौं नेवाःतय्सं म्हपुजायात न्हूदँया पर्याय कथं नालाकाये धुकूगु दु । थथे नेपाल संवत्यात न्हूदँ राष्ट्रिय पर्व कथं हनेत सःतःम्ह न्हापांम्ह विद्वान धर्मआदित्य धर्माचार्य खः । वयकलं म्हपुजायात न्हूदँ कथं हनेगु आह्वान नेपालभाषा व बुद्धधर्म पत्रिका (ने.सं. १०४८) मार्फत यानादीगु खः । तर थ्व न्हूदँया शुरु सुनां याःगु खः, छाया याःगु खः धयागु खँ धाःसा विद्वानतय् थीथी बिचाः खनेदु । थ्व हे सन्दर्भय् केशर पुस्तकालयय् लुयावःगु छगू संक्षिप्त वंशावलीइ नेपाल संवत् श्री राघवदेव वर्ष ६३ मास ६ । श्री पशुपति भट्टारके संवत्सर प्रवृत्ति कृता धकाः न्हयथनातःगु खँपुं जुजु राघवदेवं पशुपतिया नामय् संवत् छयःगु धारणा खनेदु, अथे हे इण्डिया अफिस लाइब्रेरी, लण्डनय् च्वंगु गोरखा वंशावलीइ ख्वपया जुजु राजज्योतिष पिकाःगु साइतय् यँया भचा खुसि व लखुतिथ्या हवनाय् च्वंगु फि हःसा लूँ जुइ धइगु भविष्यवाणी कथं हःगु फि यँया बंजाः शंखधर साख्वाल थःथाय् तयेकाः मेगु फि ख्वपय् छवःगु प्रसंग वःगु दु । शंखधरयाथाय् च्वंगु फि लूँ जूगुलिं उगु लुं यँया दक्क जनताया त्यासा पुलाबियाः पशुपतिइ शंख ज्वनातःम्ह मूर्ति तःगु खँ वःगु दु (हजरत, ई.सं. १९७० : ५०) । पशुपतिइ थौंकन्हय् पश्चिम दक्षिण कुनय् भक्ततय् मूर्तिया भवलय् शंख ज्वनातःम्ह मूर्तियात शंखधर साख्वाल खः धकाः थुइकेगु याना वयाच्वंगु दु । थुकथं जुजु राघवदेवया पालय् थ्व हे साख्वाल जनताया त्यासा पुलाबियाः न्हूगु संवत् हःगु खँ थौं मनूतय्गु नुगलय् हुइ मफइ कथं छाप लाये धुकूगु दु (तमोट, ने.सं. १९९८:२) उकथं हे पञ्चाङ्ग/पात्रय् नं शंखधरकृत नेपाल संवत्सर धकाः च्वयेगु परम्परा न्हयानाच्वंगु दु । थ्व हे कथं शंखधरया लुमन्तिइ वया किपायात न्हूदँया जुलुस नापं दे चाःहीकेगु चलन यानाहःगु दु । तर छम्ह उदार हृदय दुम्ह मनुखं जनताया त्यासा पुलाब्यूगु व ऋणं मुक्त जूगु लसताय् न्हूगु संवत् छयःगु व म्हपुजा हंगु खँ पत्याः याये बहः जुयां नं फि लूँ जूगु रोमाञ्चकारी घटनायात धाःसा थौंया वैज्ञानिक युगय् पत्याः याये मफइगु जूगु दु । खयेफु फि लूँ जुइ थें जुइक छगू कल्पना हे मयाना कथं याःगु अप्रत्याशित धनलाभ जूगुलिं वा थःगुज्याय् तःधंगु सफलता प्राप्त जूगुलिं उदार नुगःयाम्ह शंखधर थ्व धनयात भिंगु ज्याय् छयले कथं तत्कालीन जनताया त्यासा पुलाब्यूगु नं जुइफु ।

गोरखा वंशावलिइ न्हयथनातःगु किंवदन्ति बाहेक इतिहासकारतय्सं नं नेपाल संवत्या शुरुवात सम्बन्धी थःथःगु कथं धारणा, परिकल्पना व्यक्त याना



वयाचवंगु दु । डिल्लीरमण रेग्मीजु लिच्छवि वंश ठकुरी वंशय शासन परिवर्तन  
जुगुलिं थ्व संवत् न्ह्याःगु जुइ धकाः अनुमान यानादीगु दुसा संशोधन मण्डलया  
इतिहासकारतयसं नांजाःम्ह ज्योतिषाचार्य बटेश्वरया जन्म सालया लुमन्तिइ थ्व  
संवत् न्ह्याकगुला मखु ला धकाः शंका न्हयथंगु दु । अथे हे नांजाःम्ह इतिहासकार  
सिल्भान लेभिं थ्व संवत् नेपाल सँदेय्या शासनं मुक्त जूगु लुमन्तिइ छयःगु  
अनुमान यानादीगु दु । तर थौं नेपाल संवत्या प्रणेता शंखधर साख्वाः खः धैगु  
प्रमाणित जुइधुकूगु दु । थुकिया छगू दसि भूपतिन्द्र मल्लया ईयागु ख्वपया जेला  
त्वालय् चवंगु अथ नेपालभाषा शंख्वा संवत् ८२७ वैशाखकृष्णदशमी धका  
न्हयथनातःगु शिलापत्र नं खः । थ्व संवत्यात शंख्वा संवत् नं धायेगु याःगुलिं थ्व  
संवत् छयःम्ह शंखधर शंख्वाः खः धैगु खँ स्पष्ट जू । थ्व हे तथ्ययात मनन यानाः  
थौं श्री ५ या सरकारं शंखधर शंख्वाःयात राष्ट्रिय विभूति घोषित यायेधुकूगु दु ।  
थुकथं नेपाल संवत् नेपाः देय्या हे छगू उपज खः । नेपाः देय्या मौलिकता  
राष्ट्रियतायात प्रतिविम्बित याइगु नेपाःया छुं नं संवत् दु सा थ्व हे नेपाल संवत्  
खः । उकिं नेपाल संवत् नेपाःया मौलिक खः, गौरव खः ।



नेपाल संवत्या प्रणेता शंखधर साख्वाः



## प्राचीनकालय नेपालभाषाय थाय

नेपालभाषाय प्राचीनता सम्बन्धी प्रामाणिक दसि मामां वनेबलय थौं स्वयाः भिन्न्यासः दँ ति न्हयः अर्थात् लिच्छविकालय हे थ्व भाषा अस्तित्वय वये धुकूगु खँ तत्कालीन अभिलेखं यच्चुक हे क्यं । लिच्छवित नेपाःगालय ईशा पूर्व पाखे दुहां वये धुकूगु खनेदुसां नेपाःया इतिहास कथं ने.सं शुरु जूगु इल्लिनसैं तिन थुमिसं थन शासन याःगु खः । जुजु मानदेवया पालं निसैं तिन लिच्छवित समृद्धिशाली व प्रख्यात जुइफुगु खः । नेपाःया प्रामाणिक शिलालेख नं आः तक जुजु मानदेवया इलं निसैं (ई.सं ४६४) यागु जक कथंछि भवःलाक लुयावःगु दु । थुगु ईया शिलामिलेखं तत्कालीन नेपाःया भाषिक स्थितिया जः हवलेगुलिइ तिबः व्यूगु दु । लिच्छवित उत्तर भारतं वःपिं खः । भारत छगू इलय गुप्त साम्राज्य सभ्यता संस्कृतिया केन्द्रविन्दु थें जुयाच्चंगुलिं थुकिं प्रभावितपिं लिच्छवि शासकतय्सं नं गुप्तकालीन भारतय थें नेपालय नं शिक्षा व लायकू ज्याखँया मू माध्यम भाषा संस्कृत हे यानाहःगु खनेदु । थ्व कथं लिच्छवि शासकतय्सं नं थःपिनिगु अभिलेखय संस्कृत भाय हे छयलेगु यात । ई.सं.४६४ - ८७९ तकया दुने नेपाःगालय २०० गू ति लिच्छविकालया अभिलेख लूगु दु । थुपिं फुक्क अभिलेखय छयलातःगु भाषा संस्कृत खः । तर अभिलेखया तमाम भाषा संस्कृत जूसां खुसि, थाय, छुं वस्तु, कर अड्डा आदिया नां न्हयथनीबलय संस्कृत मखुगु खँवः नं छयलेगु यानातःगु दु । थथे संस्कृत मखुगु खँवः उगु २०० गू ति अभिलेख दुने ५० ति दः वः (तमोट, ने.सं. ११०१ : १२३) । थुपिं खँवः नेपालभाषाय खँवः खः धकाः भाषाविदतय्सं प्रमाणित याःगु दु । थथे धायेफुगुया कारण खः, थुपिं मध्ये गुलिं खँवः ला थौं तक नं व हे अर्थय व हे ध्वनिइ नेपालभाषाय छयला वयाच्चंगु दनिसा गुलिं गुलिं छुं ई न्हयः जक त्वःफ्यूगु खनेदु । थथे अभिलेखय लूगु असंस्कृत खँवः मध्ये ९० प्रतिशत खँवः थाय्या नां (प्रदेश, ग्राम, पाञ्चाली, खुसि, शिखर) व मेगु १० गू प्रतिशत जक व्यक्ति, अधिकरण, कर, वस्तु आदिया नां वःगु दु । थथे लिच्छवि शासकतय्सं अभिलेखय संस्कृत भाषायात मू माध्यम कथं छयःसां



थाय, छुं वस्तुया नां नेपालभाषां न्ह्यथनेगु याःगु व थज्याःगु अभिलेख विशेष यानाः थौं नेवाःतयगु मू बस्ति जुयाच्चंगु बलंबु, फपि, यल, सतुंगः, थक्वाः आदि थासय लूगुलिं लिच्छविकालय वा व स्वयां न न्ह्यः नेपालभाषा जनभाषाया रुपय् दयेधुंकल धयागु खँ स्पष्ट जू । कारण भाषा मदयेकं खँवः जक अवश्य नं दइमखु व आवश्यक मजुइकं संस्कृत भाषां च्यातःगु अभिलेखय् मेमेगु भाषाया खँवः छ्यली मखु । थुकथं ई.सं. ४७७ निसं थीथी नेवाः खँवः खनेदत । थज्याःगु नेवाः खँवः ने.सं. १०७-१९२ तकया थीथी ल्हंनपतिइ, ने.सं. १०३ निसं ३४९ तकया ताडपत्रय् व ने.सं २०३ निसं ५७३ तकया सिजःपतिइ लुयावःगु दु (वैद्यः, ने.सं. ११०५:१०८) ।

नेपालभाषाया खँपु नं लिच्छवि अभिलेखय् गनं गनं खनेदुसां ११ शदी तक धयाथें अभिलेखया भाषा संस्कृत हे जुयाच्चन । आः खँ वइ खँपु (वाक्य) । आः तक सीदु कथं नेपालभाषाय् दकलय् न्हापलाक खनेदुगु खँपु धयागु ने.सं. १५९ यागु खः । थुकिइ पण पु २०० पति हन धकाः च्यातःगु दु । थुकिया अर्थ पणपुराण धाःगु ध्यवा निसः लिखित पत्रय् च्यातः तःकथं लित बिया धाःगु खः । थ्वया लिपायागु खँपु धयागु ने.सं २११ रनिन चाती ठ्यू माल (ऋणिं चाती धैगु कर पुले (?) माः धयागु खँपु खः । थ्व यलया रुद्रवर्ण महाविहारय् (उकुवहाः) लुया वःगु खः (महर्जन, ने.सं. १११५:२९) । लिपा भिनिगु शदी अर्थात ने.सं. २३५ निसं तिनि तत्कालीन अभिलेखय् नेपालभाषायात बुलुहुं थाय् बियाहल ।

नेपालभाषा बोलिचालिया भाषाया रुपय् जक मखु लिखित भाषाया रुपय् नं ने.सं. २३५ निसं सीदयेक छ्यलाबुलाय् वल । ने.सं २३५ या यल उकु बहाःया ताडपत्र आः तक लूगुली नेपालभाषाया भाषिक पहयात तकं उलेफुगु पूर्णवाक्यावलि दकलय् न्हापां प्रयोग जूगु अभिलेख खः । यल उकु बहाःया अभिलेखयां लिउ संवत्, तिथि व जुजुया नां न्ह्यथनातःगु व नेपालभाषाया वाक्य छगुलिंया स्पष्ट अर्थ ध्वाथूगु जुजु रुद्रदेवया शासनकालीन नेपाल संवत् २९३ या सक्क वज्रयोगिनी च्वंगु अभिलेख खः । लिपा ने.सं. ४५४ स थ्यंकाः नेपालभाषाया तःगु वाक्य दुथ्याःगु अभिलेख नं खनेदत । यँया मरुसतलय् तानातःगु ने.सं. ४५४ या सिजःपौ नेपालभाषाया दकलय् न्हापांगु तःगु क्रिया रुपावलीइ छ्यलातःगु अभिलेख खः । थ्व ताम्रपत्र छुं स्थिति सम्बन्धी सकल जनसमुदाययात सूचं बीगु नितिं च्यातःगु खनेदु । छुं थिति रिति सम्बन्धी सर्वसाधारणयात जानकारी बीगु नितिं आपाः जन समूह मुनीगु खुल्ला थासय् तानातःगुलिं थुगु इलय् नेपालभाषा छगु आपाःस्यां ल्हाइगु, थूगु भाय् जुइ धुंकल धइगु क्यं । ईशवी संवत् १४ शदीनिसं सीदयेक संस्कृतयां लिउ नेपालभाषां अभिलेखय् थाय् कयाहल । नेपालभाषा हे जक छ्यलाः नं अभिलेख च्वयेगु जुयावल । ने.सं ५३५ या यल आलुक्क हितिया सिजःपौ थज्याःगु हे अभिलेखया नमूना खः । सर्वसाधारण जनतां हिति दयेकाः लः हायेकूगु खँ न्ह्यथनातःगु थ्व यलया आलुक्क हितिया सिजःपतिइ, हितिइ फोहर मयायेगु, हिति मस्यंकेगु नितिं उल्लेख यानातःगु धार्मिक ब्याच्चः आदि नेवाः भाषां न्ह्यब्वया तःगुलिं थुगु इलय् लिखित रुपय् सुयातं उजं, सुयातं

सूचं बीगु नितिं नं छ्यलीगु भाय् जुइ धुंकल धइगु स्पष्ट जू । अथे हे ने.सं ५७३ या ख्वप लाय्क्या अभिलेखय् राज्यं ब्वाथ ज्याया सम्बन्धय् देशया सकल प्रजा पञ्चयात राजाज्ञा थ्व भाषां न्यंकातःगुलिं नेपालभाषां थुगु इलय् राज्यया प्रशासनीक भाषाया मान्यता तकं कायेधुंकूगु खँ नं ध्वाथुइकू । थुकथं सत्या दँ मल्याक तक गनं आंशिक रुपं सा गनं पूर्ण रुपं ताडपत्र, शिलापत्र आदि च्वयेगु ज्याय् नेपालभाषायात छ्यले धुंकाः सफू च्वयेगु ज्याय् नं विस्तारं छ्यलाहल । थथे नेपालभाषायात छ्यलाः दकलय् न्हापां रचना जूगु ग्रन्थ खः हरमेखला (ने.सं ४९४) हरमेखला सफूयां लिउ, नारद संहिता (ने.सं. ५००), अमरकोष (ने.सं. ५०१), गोपालराज वंशावली (५०९ पाखे) आदि थीथी विषयया सफू खनेदत । थुकथं जुजु जयस्थिति मल्लया शासनकालं निसं सीदयेक तत्कालीन ज्याखँयात माःगु सफू नेपालभाषां भाय् हिलेगुया नापं देय्या महत्वपूर्ण घटना, ज्याखँया अभिलेख तये कथं नेपालभाषां स्वतन्त्र रुपं बंशावली, घटनावली च्वयेगु ज्या नं जुल । थथे निगू शदी तक धैथें नेपालभाषायात विविध शास्त्र (ज्योतिष, आयुर्वेद, धर्म, नीति, संगीत, वंशावली, कोश आदिया रचनाय् छ्यलेधुंकाः ने.सं. ६२५ स भागवत् पुराण थें ज्याःगु धार्मिक बाखंया रचनाय् नेपालभाषायात छ्यलसा, जुजु महीन्द्र मल्लया (ने.सं. ६८०-६९६) इलय् वनाः म्ये च्वयेगु थें ज्याःगु सृजनात्मक ज्याय् नं नेपालभाषायात छ्यलाहल । खयेत ला महेन्द्र मल्ल स्वयाः न्ह्यः हे रण मल्ल (ने.सं. ६०२-६४५) यागु नां उल्लेख जूगु कालीमाइ देवीया स्तुति सम्बन्धी छपु म्ये लुयावःगु दु । तर थ्व म्येया बारे गनं छुं उल्लेख मजुगु व रण मल्लया मेगु छुं म्ये आदि गनं लूगु मदुगुलिं रण मल्लयात न्हापांम्ह नेपाल भाषाया कवि कथं नालेगु मजुनि । भिन्ह्यगूगु शदी थ्यंकाः नेपालभाषायात म्ये विधाया च्वज्याय् जक लिक्कुका मतसे नाटकया रचनाय् नं विस्तृत व व्यापक रुपं छ्यलाहल । जगतप्रकाश मल्ल, सिद्धिनरसिंह मल्ल, प्रताप मल्ल आदि थें ज्याःपिं साहित्यिक प्रतिभातय्गु उदय नं तत्कालीन नेपालभाषायात छगू स्तरीय साहित्य सम्पन्न भाषाया रुपय् प्रतिष्ठापित जुइके बिल ।

थुकथं लिच्छविकालय् संस्कृत भाय्या गुगु प्रभुत्व दुगु खः, लिपा मल्लकालय् वयाः बुलुहुं बुलुहुं म्हो जुजु वन । संस्कृत भाय्या प्रयोगय् नं न्हापा थें शुद्धता स्तरीयता कायम मजुया वन । मुक्कं संस्कृत जक कयाच्चंगु थाय् नेपालभाषां बुलुहुं बुलुहुं कयायंकल । बाखं, नाटक, म्ये, वंशावली आदिया रचनाय् मूल माध्यम कथं नेपालभाषायात नं छ्यलेगु यातसा ज्योतिष, आयुर्वेद, धर्मशास्त्र आदिया च्वज्याय् ग्वाहालि माध्यम कथं छ्यल । अथे हे मेमेगु भाषां च्यातःगु नाटकय् नं नेपालभाषा प्याखंम्बःतय् निर्देशन बीगु नितिं सां छ्यलेगु यात । ने.सं ६३२ या चतुराङ्ग नाटक थुकिया छगू दसि खः । सफू छगुलिं मूल माध्यम भाय् संस्कृत जूगुलिइ नं सफू वा अभिलेख ब्वाचायेका तइथाय् च्वःगु मिति, च्वःम्हेसिया नां, च्वयागुया उद्देश्य आदि निध्वःसां नेपालभाषां कीगु चलन नं आपालं खनेदत । थथे हे मल्लकालय् नेपालभाषा स्वनिगलय् जक कय्कुना मच्चंसे दोलखा, रामेछाप, चित्लाङ्ग, तिप्तुङ्ग, गोरखा, तनहुँ आदि थासय् नं बुलुहुं



न्यायन । दोलखां छगू बिस्कं स्वतन्त्र राज्यया रूप कासेलि दोलखायागु न प्रशासनीक भाषा कथं नेपालभाषायात हे नालेगु जुल । थ्व खँया पुष्टि ने.सं. ७८७ या शिव खत्रीया स्वम्ह फुकीया दथुइ जूगु अंशवण्डाया अभिलेख कायेफु (वज्राचार्य व श्रेष्ठ, वि.सं. २०३१ : १३४) । थुकथं उत्तर मल्लकालय् वयाः नेपालभाषां तत्कालीन समाजय् व्यापक रूपं थाय् काये फत । तर अथे खःसां उबलय् जुजुपिनिगु भाषा नीति संकीर्ण मजुसे उदार खनेदु । संस्कृत, मैथिली, अवधी, भोजपुरी, नेपाली आदि भाषाया नं थन उत्तिकं सम्मान जूगु खनेदु । थुगु इलय् रचना जूगु छगू हे नाटकय् तःता भाय् छयलेगु यानातःगु हे थुकिया छगू दसु धायेबहः जू ।

## नेपालभाषाया प्राचीन वाङ्मय

विशुद्ध साहित्य सृजना जुइ स्वयां न्हयः नेपालभाषाया माध्यमं आपालं महत्वपूर्ण वाङ्मयया रचना जूगु दु, गुगु नेपालभाषाया निंति जक मखु नेपाःया निंति हे छगू प्राचीन गौरवया विषय जूगु दु । उकिं प्राचीन साहित्यया अध्ययनया क्रमय् थुगु ईया वाङ्मययात छगू अलग्ग हे ब्व कथं ब्वनेगु आवश्यक जू ।

थन नेपालभाषाया प्राचीन वाङ्मय धकाः नेपालभाषां च्वज्या न्ह्यासानिसं कल्पनाया लिधंसाय् च्वइगु सिर्जनात्मक तथा शुद्ध साहित्य शुरु जूगु तकया इलय् च्वःगु अभिलेख ग्रन्थ आदिया जक अध्ययन यायेगु उचित जुइ । नेपालभाषाया प्राचीन वाङ्मयया रचना तत्कालीन अभिरुचि आवश्यकता पूर्वकेत व न्हूपिं वइपिनिगु निंति लै क्यनेत जूगु खने दुसां उगु ईया नेपाःया जीवन शैली विकास, निर्माणया किपा नं थ्व ब्वयेगु याःगु दु । नेपालभाषाया प्राचीन वाङ्मययात थुकिया स्वरूप कथं निब्वय् थलाः अध्ययन यायेज्यू ।

१. पत्र वाङ्मय (ने.सं. १५९-४९४)

२. ग्रन्थ वाङ्मय (ने.सं. ४९४-६३८)

### १. पत्र वाङ्मय

पत्र वाङ्मय धायेबलय् छपौ छपौ यानाः च्वयातःगु वा छपाः छपाः यानाः कियातःगु ताडपत्र, शिलापत्र, ताम्रपत्र आदियात थुइकेगु जुइ । थुकियात नं निब्वय् ब्वथले छिं -

लिखित पत्र ( Documents ) ( ने.सं. १५९-४९४ )

उत्कीर्ण पत्र ( Inscriptions ) ( ने.सं. २९३-४९४ )

लिखित पत्र ( Documents ) : नेपालभाषाय् वाङ्मयया शुरुवात लिखित पत्रया रूपय् जूगु दु । थ्व क्रयपत्र, पारितोषिक पत्र, वन्धकपत्र, दानपत्र, गोष्ठीपत्र,

नेपालभाषा साहित्यया इतिहास/२३



टिप्पणी आदिया रुपय् दु । थज्याःगु लिखतपत्र नेपालमण्डल दुने आपालं लुयावःगु दु । ने.सं. १५९ या ऋष्यपत्र, ने.सं. २११ या बन्धकपत्रय् संस्कृतया तँसा वा टिपोट कथं नेपालभाषायात छ्यलेगु जूगु दुसा ने.सं. २३५ यल उकु बहाःया ताडपत्रं निसं स्वतन्त्र अभिव्यक्ति कथं नेपालभाषायात छ्यलेगु जूगु दु । ने.सं २३५या ताडपत्र आःतकयागु अनुसन्धान कथं दकल्य् न्हापालाक नेपालभाषाया वाक्य न्ह्यलूगु अभिलेख खः । थ्व शिवदेव संस्कार याःगु श्री मणिधरजैव महाविहारया आर्य संघया नियम परिभाषा सम्बन्धी गोष्ठीपत्र खः । ताडपत्रय् भुजिमोल लिपि च्वयातःगु थ्व अभिलेखया छकू नमूना थथे दु -

सिद्ध स्वस्ति । सम्बत आ ल ज्ह (२३५) मार्गसिर कृष्ण चतुर्दश्याम । श्री ललितकमायां श्रीतेगवल्के श्रीसिवदेवसंस्कारित । श्रीमनिधरजैव महाविहारार्यसर्वसंघानां नियमपरिभाषपत्रिकेय्म । बन्धुबुविहार हावोंया चीवरि मारि २० पदमभद्र दानभद्र पुनभद्र एतेषां चीवरि दस मानिका धा मा १०।१०।१०।१० (शाक्य, ने.सं ११०० :६-७)

(कल्याण जुइमा । ने.सं २३५ मार्ग कृष्ण चतुर्दशी । श्री ललितक्रमा, श्री तेगवल्या श्री शिवदेव संस्कार याःगु श्री मणिधरजैव महाविहारया आर्य सर्वसंघया थ्व नियम परिभाषा सम्बन्धी पत्र खः । बन्धु विहारया हामो (प्रमुख)या चीवरया लागि नीगू मानिका । पद्मभद्र, मुनिभद्र, दानभद्र, पूर्णभद्र थुमिगु चीवरया लागि भिगू मानिका, वा मानिका १०।१०।१०।१०) ।

थ्व अभिलेखं उगु ईया नेपालभाषाया भाषिक स्वरुप गथे - असमापिका क्रिया (तँड, सेड), अभूत क्रिया, (वियु, मालु), लिच्छवि नाप तौल (मानिका, धामा, पन, मंस), सँय् बर्मा तथा आर्यमूल नितां भाषाया संख्यावाचक शब्द (सर,ड,डैयु,दस,तु) आदि नाप उगु ईया नीति नियम नं न्ह्यब्वयेगु याःगु दु ।

उत्कीर्ण पत्र (Inscription) : उत्कीर्ण पत्र विशेष यानाः शिलापत्र, ताम्रपत्र आदिया रुपय् छुं देगः, सतः हिति आदि निर्माण, जिर्णोद्धार जूगुया लुमन्ति कथं सम्बन्धित थासय् तयातःगु खनेदु । नेपाःगालय् आःतकया दुने लुयावःगु न्हापांगु उत्कीर्ण पत्र ने.सं ४० जःखःया यँय् जैसी देगः सतिक मञ्जुश्री मूर्तिया पादपीठय् कयातःगु जुजु शंकरदेवया नां दुगु ल्वहं पौ खः । अथे हे नेपालभाषाया दकल्य् न्हापांगु उत्कीर्ण पत्र जुजु रुद्रदेवया (२८८ माघ-२९५ मार्ग) ने.सं २९३ या सक्व वज्रजोगीनीया स्तम्भाभिलेख खःसा, नेपालभाषाया क्रियाया विविध रुपावली छ्यलातःगु न्हापांगु उत्कीर्णपत्र ने.सं. ४५४ या यँया मरुसतल्य् तानातःगु सिजः पौ खः । वं स्वस ग्वल अधिक संवत न्यश्रस रगुपति रुद्रदेव राजा विजयपरत्व (स्वस = स्वंगुली, ग्वल = गुंगू, अधिक = अप्वः, न्यश्रस = निसः) धकाः ने.सं. २९३ यात संकेतात्मक रुपं सक्वया स्तम्भाभिलेखय् थथे संस्कृत गणना कथं साल न्ह्यब्वयातःगु दु । गुगु उगु ईया छगू परम्परा हे धायेमाः ।

नेपालभाषा साहित्यया इतिहास/२४

अथे हे ४५४ मरुसतःया उत्कीर्णपत्रं नेपालभाषाया क्रियाया विविध रुपावली ( थिरारपंड/थिरारपं/ थिरारपा/ आदियात) न्ह्यब्वःगु दुसा ने.सं ५७३ या यक्ष मल्लया ल्वहंपति नेपालभाषाया भाषिक स्वरुप जक मखु तत्कालीन देश रक्षाया व्यवस्थाया नं जः ह्वलेगु याःगु दु । थथे सुयातं उजं सुयातं सूचं बीत नं जनसमुदाय मुनीगु थासय् उत्कीर्ण पत्र तयेगु उगु इलय् आपालं चलन दुगु खनेदु । थज्याःगु अभिलेख पत्रत थौं नेपाःया इतिहास निर्माणया ज्याय् मू वंगु ज्वलं जूगु दु ।

## २. ग्रन्थ वाङ्मय

नेपालभाषाया प्राचीन गौरव मध्ये थ्वया ग्रन्थ वाङ्मय नं छगू खः । स्वसःत्या दँ धैथें पत्र वाङ्मयया रुपय् नेपालभाषा प्रयोग जुइ धुंकाः ग्रन्थ वाङ्मयया रचनाय् नं थुकिया प्रयोग जुल । नेपालय् संस्कृत भाषायां ल्यु संख्यात्मक दृष्टिकोणं, विषय विविधताया दृष्टिकोणं दकल्य् अप्वः वाङ्मयया सफू दुगु भाषा नेपालभाषा खः । ने.सं ४९४ निसं नेपालभाषाय् ग्रन्थ वाङ्मयया परम्परा शुरु जुल । नेपालभाषाया न्हापां न्हापांगु ग्रन्थ वाङ्मयया सफू खः -

- हरमेखला ( ने.सं ४९४ चिकित्सा तथा तन्त्रमन्त्र सम्बन्धी सफू )
- नारदस्मृति ( ने.सं. ५०० न्यायशास्त्रया सफू)
- अमरकोश ( ने.सं. ५०१ व ५०६ कोशया सफू)
- गोपालराज वंशावली ( ने.सं. ५०९ पाखेया इतिहास सम्बन्धी सफू) आदि ।

थुकथं मध्यकालीन नेपालय् वाङ्मयया रचना यायेगु ज्या छगू अभियान कथं न्ह्याःगु खनेदु । तर आः तक नेपालभाषाय् गुलि नं वाङ्मयया सफू लुयावःगु दु, अप्वः धयाथें तत्कालीन विद्वानपिनिगु मौलिक रचना मजुसे उगु ईया मेमेगु भाषाया नां दंगु सफूया अनुवाद वा टीका कथं खनेदु । थुगु ईया वाङ्मयया प्रमुख विषय थुकथं दु -

चिकित्साशास्त्र : थौं जक मखु मध्यकालीन नेपालय् नं चिकित्साशास्त्र आपालं च्यूताः दुगु विषय कथं खनेदु । थ्व हे अनुरुप मुक्कं नेपालभाषां जक च्वयातःगु २३ गू व संस्कृत ल्वाकछ्यानाः च्वयातःगु २९गुलिं मयाक चिकित्सा सम्बन्धी ग्रन्थ राष्ट्रिय अभिलेखालयय् जक लुयावःगु दु (वैद्यः, ने.सं १११९ : ११)। थ्व फुक्क ग्रन्थया रचनाकाल ने.सं ४९४ - ९९६ तक खनेदु । थीथी ल्वय्या लक्षण, रोग निदान यायेगु उपाय व विधि, वासः दयेकेगु तरिका, जडिबुटीया परिचय, अज्याःगु जडिबुटी दइगु थाय्, जडिबुटी लिकायेगु मन्त्र, वासःया अनुपात

नेपालभाषा साहित्यया इतिहास/२५



आदि थें ज्याःगु आपालं ज्याय् ख्यलेदुगु खँ थज्याःगु ग्रन्थय् उल्लेख जुयाचवंगु दु । अथे हे मचातय्गु ल्वय्या उपचारया नितिं वैद्यशास्त्र व ज्योतिषशास्त्र नितान् छता यानाः अले ग्रहया कारणं मचातय्त जुइगु ल्वय्या स्वभाव न्ह्यब्वयाः उकिया उपचार विधि नापं उल्लेख यानातःगु बालग्रह दशा सम्बन्धी सफू नं लुयावःगु दु । थुपिं ग्रन्थ मध्ये गुलि चिकित्सकतय्सं तत्कालीन प्रख्यात आयुर्वेद ग्रन्थया अध्ययनया नापं थःपिनिगु उपचार अनुभवं प्राप्त यानागु ज्ञानया आधारय् च्यातःगु दु सा गुलिं तत्कालीन प्रसिद्ध संस्कृतया सफू नेपालभाषां अनुवाद टीकाया रुपय् च्यातःगु दु । ने.सं ४९४या हरमेखला सफू हे थौं तक्यागु मालेज्या कथं नेपालभाषां च्यातःगु न्हापांगु चिकित्सा सम्बन्धी सफू जूगु दु । तालपत्र, भुजिमोल लिपि च्यातःगु थ्व तान्त्रिक चिकित्सा सम्बन्धी सफू खः । थ्व प्राचीन नेपालय् अतिकलोकंकाःगु ग्रन्थ खः । थुकियात ल्हय्याः वासः यायेगु परम्परा लिपा तर्क न्ह्यानाचन । हरमेखला धकाः प्रतीकात्मक रुपं नां छुनातःगु न्हय्गु अध्याय दुगु थ्व सफुतिइ भाय् हिउम्हेसिया नां मदु । मूल ग्रन्थया च्वमि गुगुगु शदीया कवि माधुक खः । थ्व सफूया छुं श्लोक खः -

पत्र (क) ऊँ नम शिवायः ...

डोय खिचाया जवलाया फलिस मेसाया नाम चोयाओ अर्कस्वानया शिं मेस छोया हेडालन मेसाया नाम चोयावे अमुक वस मानयत ॥ नाम चोयावो मेस पाजे थ्वते मेसा थवके यवख वस (तमोट, ने.सं. ११४:५) ।

अर्कस्वांया कचासिं छवयेकाः उकिं वःगु हयंग्वालं सुं मिजंनं वय्याचाः खिचाया जव ल्हाःया लप्पाया क्वचय् थः यःम्ह मिसाया नां नापं व मिसा जिगु वसय् वयेमा धकाः च्वल धाःसा व मिसा थःगु वसय् वइ । अथे हे प्राचीन चिकित्सा सम्बन्धी मेमेगु सफू नं लुयावःगु दु, गुगु थथे खनेदु ।

औषधसर्वस्व वैद्यकम् - ने.सं ५२० (रा.अ.)

ज्योतिराजकरणयागु नेपालभाषा चिकित्सा - ने.सं ५४१

शावर मन्त्र - ने.सं ५३१ (रा.अ.)

नेपालभाषा चिकित्सा - ने.सं. ५६१

माधवनिदान - ने.सं ६३१ आदि

न्यायशास्त्र : नेपालभाषाया न्हापा न्हापांगु ग्रन्थ मध्ये न्यायशास्त्रया सफू नं छगू खः । थज्याःगु न्यायशास्त्रया सफुलिं प्राचीन इलय् थौंया मुलुकी ऐनं थें ज्या याःगु खनेदु । नेपालभाषाय् दकलय् न्हापां खनेदुगु न्यायशास्त्रया सफू खः नारदसंहिता थुकियात न्यायविकासिनी धकाः नं थुइकेगु याः । थ्व सफू ने.सं ५०० स जयस्थिति मल्लया मन्त्री जयतयात तत्कालीन राजपण्डित 'भाणिक' टीका दयेकाव्यूगु खः । थ्व ग्रन्थ जयस्थिति मल्लं नेपालय् स्थिति वन्देज न्ह्याकेत च्वकूगु व थुकिया हे आधारय् नेवाः संस्कृति ब्वलंगु खः धइगु धारणा दु । थ्व ग्रन्थ शब्दानुवाद जक मजुसे माःकथं टिप्पणी व उदाहरण समेत न्ह्यब्वयातःगु

सन्ध्याख्या टीका खः । थुकी हे दक्खिसिबय् न्हापां नेपालभाषा नां वःगु दु । भाजु लारिवियेर, ताडपत्र भुजिमोल लिपि च्यातःगु थ्व नारद संहिता ग्रन्थया पाण्डुलिपियात नारद संहिता सम्बन्धी ग्रन्थ अभिलेख मध्ये दकलय् पुलांगु नालादीगु दु । थ्व सफुतिं तत्कालीन भाषिक स्वरुप जक मखु उगु ईया समाजया परिवेश, देय्या नीति नियमयात नं ब्वःगु दु गथे -

शुल्कं गृहीत्वा पुण्य स्त्रीने छन्ती द्विस्ते मावहेत् । अप्रयच्छस्तथा शुल्क मनुभूय पुमास्त्रियमं

बैश्या म्यसान लेवहुयाके दाम कायाव लिचो मयेया

धास्यं प्रसङं मयाचकं हंकाले परीहाजन तंड च्याड दामली

वियके माल्व । लेवहुसन दाम विय धास्यं यंड प्रसंग याडाव दाम,

मवीस्यं वंकाले परीहाजन तंड कीस्यं तकोया च्याडं माल्व बैश्या मेसा (१)

(वेश्यां ल्यवःयाके दां कयाः लिपा मयः धकाः प्रसंग मयासे वन धाःसा, त्वःते त्यन धाःसा च्यागू दोब्बर दां लित बिइके माः । ल्यवःनं दां विये धकाः प्रसंग यानाः दां मबिउसे वन धाःसा, त्वःते त्यन धाःसा धयातःगुया च्यागू दोब्बर दां वेश्यायात बिइमाः)

थथे वेश्यावृत्ति सम्बन्धी नं नीति नियम दुगुलिं तत्कालीन समाजय् वेश्यावृत्तिया प्रचलन जक दुगु मखुसे, वैधानिक नं जू धयागु खँ च्वय् उल्लेख जूगु खपुं स्पष्ट जू । थ्व नारद संहिता सफूयात न्यायविकासिनीया नामं देवनागरी लिपिं हीकाः प्रकाशनय् (ने.सं. १११७) हयधुकूगु दु ।

शब्दकोश : कोश नं नेपालभाषाया प्राचीन अभिलेख ग्रन्थया विषय मध्ये छता खः । मध्यकालीन नेपालय् भाषा शिक्षाया अत्यन्त प्रचलित पाठ्य सफू सरह कोशया सफुलिं ज्या व्यूगु खनेदु । प्राचीन कोश मध्ये खुगू शदी न्हयःयाम्ह संस्कृत कोशकार अमरसिंहं च्वःगु विश्वप्रसिद्ध ग्रन्थ नामलिङ्गानुशासनम्या नेपालभाषा टीका आपालं खनेदु गुगु थथे खः -

अमरकोश १. (ने.सं. ५०१), (रा.अ.) - कल्लहदेवं थः काय छयपित थुइके भनं दयेकूगु ।

अमरकोश २. (ने.सं. ५०६) - जयस्थिति मल्लया मन्त्री जयतया काय्यात थुइकेभनं च्वयाव्यूगु ।

अमरकोश ४. (ने.सं. ५११) - थुकिइ संस्कृत सिलः मल्लयसे छगः छगः पर्याय ल्ययाः उकियात नेपालभाषां हिलातःगु दु ।

अथे हे संस्कृत मूल पाठया फुसय् फुसय् नेपालभाषा अर्थ दुगु ने.सं ८००, ८३७, ९५० व १०३२ पूर्वगु प्यंगू मेगु अमरकोश आशा सफूकुथिइ

नेपालभाषा साहित्यया इतिहास/२७



लुयावःगु दु । थथे पुलांगु नेपालभाषाया खँग्वः संरक्षण यायेगु उद्देश्यं नेपालभाषाया ११ गू अमरकोश (५०१-८३१) या २७ द्रः खँग्वःया धुकू भाजुपिं काशीनाथ तमोट व इयन अल्सप मुकाः इन्टरनेटय् तःगु दु । अमरकोश बाहेक मेमेगु नेपालभाषां हिउगु धनञ्जय कोश, नाममाला, (ने.सं ५९६, रा.अ) व स्यादन्तकोष (ने.सं ६२०, केशर पुस्तकालय) नं लुयावःगु दु । थज्याःगु सफू थीं नेपालभाषाया भाषिक अध्ययनया निंतिं आपालं ज्या खेलय् जूगु दु ।

इतिहास : नेपालभाषाया थःगु हे मौलिक विशेषता दुगु प्राचीन वाङ्मय मध्ये इतिहास सम्बन्धी ग्रन्थ नं खः । इतिहास सम्बन्धी नेपालभाषाया वाङ्मय थुकथं खनेदु -

- वंशावली
- घटनावली टिप्पणी खँ
- विवरण व धलःपौ सम्बन्धी थीथी अभिलेख ग्रन्थ

वंशावली : थुकिइ प्रसिद्ध गोपालराज वंशावली (ने.सं ५०९ पाखे रा.अं.) दुथ्याः । थ्व नेपालभाषाया न्हापांगु मौलिक ग्रन्थ खः । थ्व वंशावली दकलय् न्हापां विलायतया विद्वान सेसिल वेण्डालं ने.सं १०१८ पाखे लुइकूगु खः । उकिं थ्व सफूयात वेण्डाल वंशावली नं धायेगु याः । अथे हे थ्व सफूतिइ न्हापा नेपाःया 'गोपाल वंश'यापिं जुजुपिनिगु नां न्ह्यथनातःगुलिं थ्व सफूया नां नं ...गोपाल वंशावली जूगु खः । थुकीइ २५ प्रतिशत पत्र (पौ १७-२९) संस्कृतं व ७५ प्रतिशत (पत्र २९-६३) नेपालभाषां च्यातःगु दु । थ्व ग्रन्थय् ने.सं ५०८-५०९ तकया घटनाया वर्णन दु, गुगु अप्वः धया थें जयस्थिति मल्लया राजनैतिक, सामाजिक आर्थिक टिप्पणी सम्बन्धी जूगुलिं थ्व ग्रन्थ थुगु ई पाखे च्वःगु वंशावलिइ खः धकाः प्रामाणित यायेछिं । ताडपत्रय् भुजिमोल लिपिं च्यातःगु थ्व गोपालराज वंशावलिइ ने.सं ६ निसं ने.सं १७७ तकया थीथी खँ न्ह्यथनातःगु दुसां ने.सं. ४६९ निसं ५०९ तकया घटनाया विस्तृत वर्णन यानाः ग्रन्थ क्वचायेका तःगु दु । किराती जुजुपिनिगु वंशक्रम, थीथी ऐतिहासिक तथ्ययागु स्पष्ट व संक्षिप्त अभिव्यक्ति, उल्लेखित तथ्य शिलाभिलेख व पुरातात्विक सामाग्री पाखें प्रमाणित जुइफुगु हे थ्व वंशावलीया प्रमुख विशेषता खः । थ्व हे कारण थ्व गोपालराज वंशावली नेपालभाषा भाषिपिंत भाषिक अध्ययनया दृष्टिकोणं जक मखु, नेपाःया ऐतिहासिक सांस्कृतिक अध्ययनया दृष्टिकोणं नं उलि हे महत्वपूर्ण जू । थुकिइ न्ह्यब्वयातःगु विषय कथं थ्व ग्रन्थयात निब्वय् थले छिं ।

- राज वंशावली (पत्र १७ क-३० क)
- भूत वृत्तान्त -पत्र ३० ख-६३ ख)

न्हापांगुलिइ जुजुपिनिगु वंश तथा सामान्य खँ दुसा लिपायागुलिइ तत्कालीन थीथी घटनाया टिपोट यानातःगु दु । थ्व वंशावलिइ मूलतः नेपाल

मण्डलया घटनावली दु । तर थ्व नाप स्वापू दुगु खँ प्राचीन सिंजा, मिथिला तथा भारतया बयान तकया उल्लेख थुकिइ जूगु दु । थुकथं मल्लकालया इतिहास च्वयेगु ज्याय् 'गोपालराज वंशावली' छगू महत्वपूर्ण लिधंसा सफू जुइफु । दसुया लागि छगू थज्याःगु हे घटना न्ह्यब्वये - त्वखा, कपनक्वाठ भन्तन काया कोलाक्वन । सलंक्वाठ पानपीनं पाया (टोखा व कपनक्वाठ बनेपां कब्जा यात, सलंक्वाठ व फर्पिङ नं नितां कब्जा यात - गोपालराज वंशावली - पौ ६९) ।

घटनावली टिप्पणी खँ : मध्यकालीन नेपालय् ज्योतिषी व्यवसाय जोशी, दैवज्ञ, गुभाःजुपिनिगु कुलायन पेशा जुयाच्चंगु खनेदु । इमिसं व्यवसाय हनेगु भवलय् इतिहास निर्माण यायेत तिबः जुइकथंयागु महत्वपूर्ण ज्या नं यानावंगु जुयाच्चन । व खः - थःपिनिगु ईया जुजु खलः आदिपिनिगु जन्म, मृत्यु, विवाह आदि तथा सामाजिक महत्वया घटनातयगु टिप्पणी तयेगु । थुक्रियात थ्यासफू नं धायेगु याः । अज्याःगु हे थीथी टिप्पणिइ वा थ्याससफूतिइ सामाजिक राजनैतिक महत्वया घटनाया टिप्पणी नापं अभ्र व प्रति थःपिनिगु प्रतिक्रिया तक नं न्ह्यब्वया वंगु दु । आः तकया दुने ऐतिहासिक घटनावली (ने.सं १०८४) नामं जगतप्रकाश मल्ल, योगनरेन्द्र व पार्थिवेन्द्र मल्लपिनिगु (ने.सं ७८६-८११) घटनावली मुनाः सफू पिदंगु दु । हुन्तरं नं थथे हे मल्ल जुजुपिं - प्रताप मल्ल, विष्णु मल्ल, महेन्द्र मल्ल आदिपिनिगु जीवनी तथा अभिगु ईया वंशावली घटनावली मुनाः ताहाःगु सूचि न्ह्यब्वःगु दु (Hunter, 1896:358) । थज्याःगु थीथी अभिलेख ग्रन्थयात तत्कालीन नेपालभाषाया स्वतन्त्र गद्यया नमूना नाले बहः जू ।

विवरण व धलःपौ : सफूया विवरण सूचि, थी थी विषयया धलःपौ सम्बन्धी सफू लूगु दु । नेपालभाषां च्यातःगु थज्याःगु अभिलेख नेपाःया इतिहास निर्माण यायेगुलिइ छुं पाय्छिगु तथ्य ज्वलं थ्व नं जुइफु । जुजु रणजित मल्लया क्वथा ज्वलया धलःपौ, जुजु भुपतीन्द्र मल्ल, जितामित्र मल्ल, रणजित मल्लया इलय् दयेकातःगु सफूया धलः अध्ययन याये बह जू ।

ज्योतिष : प्राचीन नेपालय् ज्योतिष शास्त्रया दैनिक प्रयोजन दु धइगु खँ पुलांगु म्ये नाटकया अन्तिम वाक्यय् तकं तिथि बार संवत् न्ह्यथना तइगुलिं स्पष्ट जू । भिन्हयगू शदी न्हयः नेपालय् ज्योतिषशास्त्रया सफू, संस्कृतयागु वृहतजातक, भास्वति, ज्योतिराजकरणया आधारय् नेपालभाषां अनुवाद टीका जक यानातःगु खनेदु सा थ्वयां लिपा स्वतन्त्र रुपं च्यातःगु नं खनेदत । ज्योतिष ज्या उगु इलय् विशेष यानाः गुभाःजु, दैवज्ञ, जोशीतयगु पेशा जुयाच्चंगु व इमिसं अनुमानया भरय् मखुसे गणितया सूत्र कथं थीथी ग्रहयागु गति, उदय, अस्त, सूर्य ग्रहण, चन्द्र ग्रहणया समयावधि तिथि आदिया निर्धारण याइगु जुयाच्चन । ने.सं. ७०० न्हयः तक ज्योतिष छगू स्तरीय शास्त्र कथं ब्वलनाः लिपा फलित ज्योतिषया प्रभाव समाजय् लायेवं ज्योतिष विद्याया स्तरीयता पाः जुजु वन । फलित



ज्योतिषया विकासं ज्योतिष शास्त्रया स्वापू वास्तुकला, चिकित्सा शास्त्र, कर्मकाण्ड, संगीत, नृत्यशास्त्र नाप तर्क दःवन ।

राष्ट्रिय अभिलेखालयय् संरक्षित ग्रन्थ मध्ये नेपालभाषां चयातःगु ज्योतिष विषयया ग्रन्थ ३२ गू व संस्कृतं नेपालभाषाय् अनुवाद टीका यानातःगु जक ६५ गुलिं मयाक लुयावःगु दु (वैद्यः, ने.सं. १११९:१०) । सूर्य सिद्धान्त, भास्वति, वृहज्जातक थें ज्याःगु संस्कृतया प्राचीन ज्योतिष ग्रन्थ अध्ययन यानाः तत्कालीन विद्वानपिसं थःपिनिगु धर्म संस्कृतियात ल्वयेक नेपालभाषां टीका व्याख्या व अनुवाद यानावंगु खनेदु । थज्याःगु ग्रन्थ खः -

दशाफल (ने.सं. ५१९ केशर पुस्तकालय)

भास्वतिकरण (ने.सं. ५२८) (आशा सफूकुथि)

केरलीयशास्त्र (ने.सं. ५२४ (रा.अ.)

सुमती सिद्धान्त (ने.सं. ५३८) (केशर पुस्तकालय)

भाषा ज्योतिष (ने.सं. ५४२) (रा.अ.)

सुमतिकरण (ने.सं. ६६२) (रा.अ.)

**कर्मकाण्ड, पूजाविधि सम्बन्धी :** राष्ट्रिय अभिलेखालय दुगु नेपालभाषाया अभिलेख मध्ये दकलय् अप्वः ग्रन्थ (स्वसः व पीखुगुति) थ्व हे विषय सम्बन्धी खनेदु । विविध कर्मकाण्ड व संस्कार विधि, यज्ञ, होम, पूजा, व्रत, बलि, सिद्धिसाधना, छैं, चीभाः, हिति, आदिया प्रतिष्ठा शिलान्यास हे थज्याःगु सफूया विषयवस्तु खः । छुं नं कर्मकाण्ड संस्कार यायेबलय् मद्रनेमा, विधि पूर्वनेमा, लिपायापिं सन्ततिपिसं नं व हे कथं अनुशरण यायेमा धयागु हेतुं थज्याःगु विधि विधानया सफू आपालं च्वयेगु जूगु खनेदु । तर संस्कृतयागु कर्मकाण्डया सफूया तुलनाय् नेपालभाषाया थज्याःगु सफू तसकं हे न्हूगु खनेदु । थ्व वाङ्मयकालय् छगू जक कर्मकाण्ड सम्बन्धी सफू लुयावःगु दु व खः दश कर्म पद्धति (ने.सं. ६१८, रा.अ.) । थ्व स्वपया तिभय जुजुपिनिगु पालय् च्वःगु खः । कर्मकाण्ड सम्बन्धी थ्व सफू तत्कालीन इलय् तसकं हे प्रचलित जूगु खनेदु । थ्व सफूयात लिपा लिपा नं ल्हययेगु ज्या याःगु दु ।

थथे प्राचीनकालय् आपालं विषयया वाङ्मयया रचना जुइ धुंकाः नेपालभाषाय् सिर्जनात्मक साहित्य ने.सं. ६२५ स 'भागवत पुराण' खनेदत । थनंलि साहित्यया धाः हे न्ह्यात । थथे खयां नं वाङ्मयया परम्परा न्ह्यानांच्वन । फलस्वरूप न्हापा खनेमदुगु विविध विषयया सफू, गथे :- पशुचिकित्सा, वास्तुशास्त्र, धनुशास्त्र, संगीतशास्त्र, नृत्यशास्त्र, वाद्यशास्त्र, गणित, रत्न परीक्षण आदि खनेदत ।

**पशु चिकित्सा :** ने.सं. ७१३ निसं ने.सं. ९२३ तकया दुने चयातःगु पशुचिकित्सा सम्बन्धी अभिलेख ग्रन्थ मध्ये मुक्कं नेवाः भाषां चयातःगु जक ११ गू व संस्कृत नं दुथ्याकातःगु १६ गू राष्ट्रिय अभिलेखालयय् संकलित जुयाच्वंगु दु । पशुचिकित्सा सम्बन्धी गुलि नं सफू लुयावःगु दु, व फुक्कं सल, किसि थ्व

निगू जातया पशुतयगु ल्वय् उपचार सम्बन्धी जक दु । थुकिया कारण खः, उगु ईया प्रमुख सवारी साधन हे सल, किसि जूगु व दैनिक जीवनया नापं युद्ध आदिइ थज्याःपिं वाहनत मदयेकं मगाःगुलिं तत्कालीन जुजुपिसं विशेष अभिरुचि कयाः सल किसिया चिकित्सा सम्बन्धी सफू च्वकेव्यूगु खनेदु । गुगुं गुगुं सफू सल किसि नितानं जातया वाहनतयगु ल्वय्, ल्वय्या प्रकार व उकिया उपचार विधि सम्बन्धी दक्कं खं छगू हे सफलइ न्हयव्वयातःगु दु सा गुगुं अलग्ग अलग्ग हे सफलइ चयातःगु दु । थज्याःगु सफू खः गज आयुर्वेद, शालिहोत्र, ग्रन्थ सम्मुचय आदि, गुगु भारत पाखें हयाः संस्कृतयागु नेपालभाषां हीकातःगु खनेदु । थज्याःगु सफू च्वयेगु व अध्ययन यायेगु परम्परा भिंख्यागूगु शताब्दी निसं कयाः भिंख्यागूगु शताब्दीइ तक नं खनेदु । पशु चिकित्सा सम्बन्धी सफूतिइ विशेषत विभिन्न जातया सल किसिया किपा, नापं इमिगु वाह्य अंगया परिचय न्हयव्वयातःगु तर इमिगु आन्तरिक अंगया उपचार विधि बारे छुं उल्लेख जूगु मदु । थज्याःगु ग्रन्थ खः -

१) अश्व आयुर्वेद शास्त्र - ने.सं. ८५०

२) अश्व लक्षणम् - ने.सं. ९२३

३) अश्व वैद्यक शास्त्र - ने.सं. ७१३

४) नाना ग्रन्थ सम्मुचय - ने.सं. ७३८

५) शालिहोत्र - ने.सं. ७१३

६) अश्व वैद्यक शास्त्रम - ने.सं. ८०२ आदि ।

**वास्तुशास्त्र :** नेपालभाषां वास्तुशास्त्र सम्बन्धी गुलि नं सफू लुयावःगु दु, फुक्क धयाथें मौलिक ग्रन्थ कथं खनेदु । तर अप्वः धयाथें सफलइ तिथि मिति न्हयथनातःगु मदु । अथे हे च्वमिया नां नं मदु । नेपालभाषाया वास्तुकला अप्वः धया थें ज्योतिष शास्त्र नाप सम्बन्धित जूगु खनेदु । मध्यकालीन नेपालय् वस्तुकलाया आपालं विकास जूगु व थौं तर्क वास्तुकला सम्बन्धी थीथी प्राचीन खँग्वः नेवाःतयसं जक मखु नेवाः मखुपिसं तर्क छयलाच्वंगु तथ्य कथं प्राचीन इलय् नेपालभाषाय् स्तरीय वास्तुकलाया सफू दयेमाः धइगु गुगु अनुमान खः, व आःतक बालाक पूर्वगु मदुनि । भिंख्यागूगु शताब्दीइ रणजित मल्लया इलय् चयातःगु धकाः अनुमान यानातःगु गृह निर्माण सम्बन्धी पूर्वगु ग्रन्थ छगू जक राष्ट्रिय अभिलेखालयय् लुयावःगु दु । छैया नक्सा, छैं दनेत माःगु विभिन्न जातया सिं व उकिया प्रयोजन, छैया दिशा, जग स्वनेगु व साइत आदि गृह निर्माण सम्बन्धी प्राविधिक विषययात नं कयाः चयातःगु थ्व छगू जक पूर्वगु सफू खः । अथे हे वास्तुशास्त्रया मेमेगु नं पूमवंगु सफू लुयावःगु दु । आशा सफूकुथिइ नं थज्यागु तःपा हे वास्तुकला सम्बन्धी पाण्डुलिपित संरक्षण जुयाच्वंगु दु । उकिइ छैं दनेगु साइत लिसं दिशायात तसकं महत्व बियाः खं न्हयथनातःगु दु । अथे हे देगः दनेगु विषयया निगू सफू नं लुयावःगु दु । तर थुकी देगः दनेगु विधि व देगःया नक्सा जक न्हयव्वयातःगु दु ।



संगीतशास्त्र : नेपालभाषाया काव्य विधानाप सतिक लाःगु विषय संगीतशास्त्र खः । नेपालभाषाया प्राचीन काव्य धयागु हे गीती काव्य जूगुलिं प्राचीनकालय् राग, ताल मदुगु काव्य, काव्य हे मजगु खनेदु । आःतकया दुने नेपालभाषां च्यातःगु संगीत सम्बन्धी पुलांगु सफू मध्ये संगीत चन्द्र ग्रन्थ न्ह्यथनेबह जू । थ्व ख्वपयाम्ह जुजु जगतज्योति मल्ल व वय्कःया पण्डित वंशमणि ओझा (ने.सं. ७२६-७५३) निम्ह जानाः च्यातःगु सफू खः । खास यानाः भरतया नाट्यशास्त्र व अभिनय गुप्ताया रस सिद्धान्तया सार सार खँयात जक कयाः नेपालभाषां अनुवाद यानाः व्याख्या यायेगु ज्या थ्व सफुली जूगु दु । भरतया नाट्यशास्त्रया लिधंसाय् नृत्य, नाटक, अभिनय, रगमञ्च गीत, आदि बारे मूल संस्कृत श्लोक नापं नेपालभाषां व्याख्या यानातःगु थ्व संगीत चन्द्र, संगीत सम्बन्धी छगू तःजिगु सफू खः । अथे हे लिपा जुजु जितामित्रया इलय् गायनलोचन नांगु संगीतया मेगु सफू नं च्वयेगु जूगु दु । थ्व खास यानाः राग रागीनीया परिचय, लक्षण व हालीगु ईव्यःया सैद्धान्तिक ज्ञान दुगु सफू खः । मूल पाठ संस्कृत भाषां च्यातः अर्थ नेपालभाषां छ्यलेगु यानातःगु दु । थ्व बाहेक संगीत सम्बन्धी मेगु निगू स्वंगू सफू लुयावःगु दु । तर संगीत चन्द्र सफू ति स्तरीय मज्ज (वैद्यः ने.सं ११०६)।

## निगूगु खण्ड

## नेपालभाषा साहित्यया

## विधागत परिचय


वाद्यशास्त्र : वाद्यवादन नेवाः जातिया प्राचीन कालं निसैं तसकं नां जाःगु शीप खयां नं थुकिया सैद्धान्तिक प्राचीन सफू तसकं हे कम जक दु । आःतकया दुने लुयावःगु सफू खः - ताल अनुकरणम्, मृदङ्ग अनुकरणम्, पञ्चताल बाजा आदि । थ्व सफुलिइ बाजंया थीथी बोल जक बियातःगु दु ।

गणित : राष्ट्रिय अभिलेखालय गणित विषयया नेपालभाषाया टीका अभिलेख ग्रन्थ लिलावती नांया स्वंगू सफू लुयावःगु दु । गणित सम्बन्धी सफूयात ल्याःचा शिर्षक बियातःगु आशा सफूकुथिइ नं तःगू पाण्डुलिपित लूगु दु ।

रत्न परीक्षा : बुद्ध भट्टाचार्य च्यातःगु संस्कृतया नेपालभाषां अनुवाद दुगु संवत् मदुगु रत्न परीक्षा सम्बन्धी निगू सफू आशा सफूकुथिइ लुयावःगु दु ।

थुपिं विषयया सफू बाहेक मेगु नं आपालं विषयया गथे - दर्शन, कामशास्त्र, चित्रकला, तन्त्र, प्याखं व प्याख्या विधि, नीतिशास्त्र, धनूविद्या आदि सम्बन्धी तिथि उल्लेख मजगु सफू लुयावःगु दु । अथे हे गुलिखे महत्वपूर्णगु बाङ्मयया सफू भीगु छैय् छैय् नं अर्थ हे लानाच्चंगु दयेफु । थज्याःगु सफूयात पितहये फत धाःसा भीगु बाङ्मयया लागा अज चकनीगु जुइ ।







## प्राचीनकालया महत्त्वपूर्ण व्यक्तित्व तथा च्वमिपिनिगु छुं किपा



जुजु जयस्थिति मल्ल  
(ने.सं. ५००-५१४)



जुजु सिद्धिनरसिंह मल्ल  
(ने. सं. ७२६-७८१)



जुजु प्रताप मल्ल  
(ने. सं. ७४३-७९४)



जुजु भूपतिन्द्र मल्ल  
(ने. सं. ७९५-८४२)



जुजु पार्थिवेन्द्र मल्ल  
(ने. सं. ८००-८०७)



जुजु भाष्कर मल्ल  
(ने. सं. ८०७-८४२)



जुजु जयप्रकाश मल्ल  
(ने. सं. ८५५-८९०)



जुजु रणबहादुर शाह  
(ने. सं. ८९८-९२६)



जुजु राजेन्द्रविक्रम शाह  
(ने. सं. ९३७-९६७)

## प्राचीनकाल (ने.सं ६२५-९६७)

जनभाषाया रूपय नेपालभाषा आपालं न्हयः हे खनेदये धुकूसां साहित्यिक रचनाय ने.सं ६२५ निसं तिनि प्रयोग जूगु थौं तकया अनुसन्धान कथं सीदःवःगु दु । तर आपालं विद्वानपि ने.सं ६२५ य वयाः तिनि नेपालभाषां साहित्य सृजना जुल धयागु पक्षय मडु । ने.सं ६२५ य हे भागवत् पुराण थें ज्याःगु मुक्कं नेपालभाषा च्वयातःगु ४०० पौ नं मयाक दुगु गद्य साहित्यया सफू दयेधुकूगु तथा विश्वया फुक्क धया थें साहित्यया शुरुवात पद्य साहित्य पाखें जूगु व नेपालभाषाय नं स्वयनगु, डहुने भैरव, सिलु तीर्थ थेंज्याःगु आपालं पुलां पहवःगु म्ये खनेदुगुलिं ने.सं. ६२५ स्वयाः न्हयः हे नेपालभाषाय छुं कथंया साहित्यिक सृजना दयेधुकूगु जुइमाः धयागु विद्वानपिनिगु विचाः खः । थ्व धापूयात नेपाःया प्राचीन ऐतिहासिक घटनां नं तिबः ब्यूगु दु । भारतया हिन्दू धर्म प्रचारक शंकराचार्य नेपाः दुहां वयाः थनया हिन्दु जुजुयात ल्हातिइ कयाः बुद्धमार्गी नेपाःमितयत यायेमज्यूगु यातना बियाः इमिगु सफूकुथि फुक्कं छवयेका विल धइगु खं न्यनेदु । डेनियल राइटया वंशावली कथं उबले बुद्धधर्मया विषयलय नेपालय दुगु ८४,००० गू सफू फुकं मुनाः शंकराचार्य छवयेका विल (राइट, ७९-७३) थ्व खंयात पुष्टि याइगु ऐतिहासिक व पुरातात्विक दसि लुइके मफुनिसां थज्याःगु हे सफू छवयेकेगु थें ज्याःगु मेगु नं विध्वंशकारी घटनात जूगुया प्रमाण धाःसा लूगु दु । थ्व खः बंगालया सुल्तान समशुद्दिनया नेपाःगाःया विध्वंशकारी हमला जुजु जयस्थिति मल्ल जुजु जुइ न्हयः ई.सं. १३४९ स बंगालया सुल्तान समशुद्दिनं थन नेपाःगालय हमला यानाः आपालं सफू च्याकूगु खं गोपालराज वंशावली(पृ २ व ५२) नापं स्वयम्भूया शिलालेख (ने.सं. ४९२) व पिम्बाहाया ने.सं ४७७ या अभिलेखय उल्लेख जूगु दु । अथें हे सिल्मान लेभिया La Nepal धैगु सफुतिइ (पृ११६) फाडर जोसेफ द रोभाटे धैम्ह पादरीं नेपालय च्वबले थनया ३००० ल्हाःतं च्वयातःगु सफू छवयेका बिया धका घमण्ड याःगु खं उल्लेख जूगु दु । अथे हे जंगबहादुरं नं थः प्रधानमन्त्री जुइधुंकाः, अईश्वरवादी, नास्तिकगु सफू धकाः वीर पुस्तकालयय च्वंगु आपालं बौद्ध ग्रन्थया सफू वाके छवःगु थथे

नेपालभाषा साहित्यया इतिहास/३५



वाक्येष्टवः गुलि सफू तत्कालीन ब्रिटिश राजदुतावासया डा गइट कयायंकूगु खं नं च्वनेदु (आचार्य, १९७१, १२३) । थथे वाक्येष्टवः गु व विध्वंसकारी क्रियाकलाप नास जूगु सफू मध्ये नेपालभाषा च्वयातः गु नं लाः गु दइ धैगु विद्वानपिनिगु विश्वास खः । अथे हे भारत नाप जूगु सुगौली सन्धि लिपा थनया रेजिडेण्ट जुयादीम्ह ब्राइन हफटन हजशन नं थनया संस्कृत व नेपालभाषाया आपालं सफू मुकाः ने.सं १४४ निसं कलकत्ता छवः गु व थथे कलकत्ता छवः गु सफू मध्ये गुलिखे सफू विलायतया अक्सफोर्ड लाइब्रेरीइ थ्यनसा गुलिखे सफू पेरिसय् थ्यन । हजशनं बेलायतया इण्डिया अफिसयात नं नेपाःया संस्कृति, भाषा, साहित्य धर्म आदि बारेया संस्कृत, नेपालभाषा, फारसी आदि भाषा च्वयातः गु थीथी हस्तलिखित ग्रन्थ लःल्हाः गु दु । थुपि हे ग्रन्थया लिधंसाय् वयंकल एस्सेज अन द लाङ्ग्वेज, लिटरेचर एण्ड रिलिजन अफ नेपाल एण्ड तिब्बत नांगु सफूलिइ सन् १८७४ य् पिकयादिल । थौं नं भीगु पुलांगु गुलिखे सफूत बंगालया एशीयाटिक सोसाइटी, केम्ब्रिज विश्वविद्यालयया सफूकुथि, बेलायतया हे यण्डिया अफिस लाइब्रेरी, पेरिसया राष्ट्रिय सफूकुथि, बेलायतया एशियालि सोसाइटी आदि थासय् मुनाच्वंगु दनि । थुकथं गुलिखे सफू थन हे नास जुलसा गुलिखे सफू पिने वनाः तनावन । अथे हे राणाकालयाम्ह छम्ह नांदम्ह संकुचितम्ह पण्डित वीर पुस्तकालयया आपालं नेपालभाषाया सफू लिकांका यंकूगु, नष्ट याः गु व विदेशय् छवः गु, आपास्यां स्यूगु खं खः । तर थथे खयां नं प्राचीनता प्रमाणित याये फैगु मेमेगु पुलांगु सफू लुयामवःतले, नेपालभाषा साहित्यया प्राचीनतायात ने.सं ६२५ निसं तिनि उल्लेख यायेगु उचित जुइ । तर अभ् गुलि च्वमिंत ला, प्राचीन बाखं अप्वः थें अनुवाद जूगुलि ने.सं. ६२५ या भागवत पुराणं निसं मखु ने.सं. ६९० या यलया तिभय जुजुपिनिगु म्ये निसं जक नेपालभाषा साहित्यया शुरुवाट जूगु नालेमाः धाईपिं नं दु । तर प्राचीन बाखं गुलिखय् थनया लः फसय् निर्माण जूगु दुसा, अनुवाद जूगु गुलिखय् बाखं नं मुक्क अनुवाद जक मजुसे थज्याः गु बाखनय् तत्कालीन च्वमिपिसं थनया धर्म संस्कृतियात नं दुथ्याकाः थःपिनिगु सृजनात्मक प्रतिभाया नं परिचय ब्यूगु दु । उकि नेपालभाषा साहित्यया शुरुवाट बाखं साहित्यया शुरुवाट निसं जूगुयात मनासे मगाः । थ्व हे कथं नेपालभाषा साहित्यया प्राचीनकालया साहित्य धकाः ने.सं ६२५ निसं पृथ्वीनारायण शाहं नेपाल एकिकरण याये धुंकाः नं ने.सं १६७ तकया साहित्ययात कायेगु जुइ, कारण ने.सं ८८८ लिपा थनया राजनैतिक हिउपाः लिसं नेपालभाषाया भाषिक साहित्यिक स्थितिइ नं हिउपाः वः गु दुसां ने.सं. १६७ न्हयः तक साहित्यिक प्रवृत्तिइ उलि छुं खास हिउपाः वः गु खनेमदु । तर थथे खःसां राजनैतिक हिउपायात दृष्टिगत यानाः थुगु समयावधिया साहित्ययात ईया हिसाबं निब्वय् ब्वथलाः ब्वने छिं ।

न्हयचवः गु प्राचीनकाल (ने.सं ६२५-८८८)

लिचवः गु प्राचीनकाल (ने.सं. ८८८-१६७)

## न्हयचवः गु प्राचीनकाल (ने.सं ६२५ -८८८)

नेपालभाषाया साहित्यिक इतिहासय् ने.सं ६२५ निसं ने.सं. ८८८ तकया समयावधियात न्हयचवः गु प्राचीनकाल कथं थुइकेगु जूगु दु । नेपाःया जुजुपिनिगु शासन समयावधिया ल्याखं थ्व ई जुजु भुवन मल्लया इलं निसं पृथ्वीनारायण शाहं नेपाःगाः त्याके न्हयः तकया समयावधि लाः वः । प्राचीन नेपालभाषा साहित्यया अध्ययनया दृष्टिं थ्व तसकं हे महत्वपूर्ण समयावधि खः । थ्व ई नेपाःया कला, संस्कृतिया दृष्टिकोणं जक मखु, साहित्यिक उपलब्धिया दृष्टिकोणं नं तसकं हे उर्वरागु ई खः । नेपालभाषा साहित्यय् ला थ्व युगयात सुवर्ण युग धकाः तकं नालातः गु दु । थ्व युगय् नेपालभाषायात सम्मान व प्रतिष्ठा बियाः थ्या साहित्य संरक्षण व सम्बर्द्धनया निंतिं तत्कालीन शासकतय्सं तिवः जक ब्यूगु मखुसे थःपिसं हे नं नेपालभाषाया साहित्य सृजनाय् सक्रिय रुपं ब्वति काः गु दु । फलतः थुगु इलय् नेपालभाषाया थीथी रचनात्मक, सृजनात्मक कृति यक्व हे निर्माण जुइफत । थज्याः गु थीथी सृजनायात थनया धर्म, संस्कृति लिसं स्वाकाः न्ह्याकां तुं यंकेगु परम्परा नं कायम जुल । थुगु ईया साहित्ययात विधागत रुपं क्वय् बियाकथं ब्वथलाः ब्वने छिं ।

१ - बाखं

२ - म्ये

३ - नाटक

## १ - न्हयचवः गु प्राचीनकालया बाखं

नेपालभाषाया प्राचीन साहित्यया विषय मध्ये बाखं नं छगू जूगु दु । नेवाःत बाखं कनेमापिं, बाखं न्यनेमापिं, बाखं ज्यायेगु कला दुपिं खः धइगु खं माघ लच्छियंकं छैय् छैय् कनीगु स्वस्थानी बाखं, यलय् वुंगद्यःया जात्राबलय् कनीगु बंगद्यःया बाखं, चतुर्मास प्यला कनीगु रामायण महाभारत बाखं, गुंला



लच्छियकं कनीगु बुद्ध जातक अवदान आदि धार्मिक बाखं तथा ज्याथा ज्याथिपिंसं कनीगु धौ च्वलेचा थें ज्याःगु न्येकं बाखनं क्यं ।

आः तक्रयागु अनुसन्धान कथं नेपालभाषाया लिखित साहित्यय् दकलय् न्हापांगु विधा बाखं जुगु दु । खयेत ला गुलि गुलिस्थां नेपालभाषाया प्राचीन बाखंयात सृजनात्मक साहित्य कथं नाले मछिं धकाः नं धाः । कारण थुगु इया अप्वः थें बाखं मेमेगु भाषाया अनुवाद, टीकाया रुपय् जक दु । थथे खःसा प्राचीन च्वमितय्सं मेगु भाषाया बाखंयात थःगु भाषाय् हिइकेगु याइबलय् तप्यंक भाषानुवाद जक मयासे थःपिनिगु कल्पना नं छिंथाय् ज्यूथाय् जिक्व स्वचाकाः थनया धर्म संस्कृतियात ल्वयेक च्वयेगु याःगु दु । उकिं प्राचीन बाखंयात सृजनात्मक साहित्य मखु धाये अवश्य मछिं । प्राचीन बाखनं थनया जनजीवननाप थुलि क्वातुक स्वापू तयेधुंकूगु दु कि थौं थुपिं बाखं थनया धर्म संस्कृतिया हे छंगू अग जुइधुंकूगु दु ।

**विकास :** न्हापा ने.सं ६३८ पोहेलाथ्व ८ या तन्त्राख्यान (रा.अ.) हे नेपालभाषाया न्हापांगु साहित्यिक ग्रन्थ जुयाच्वंगुली आः वयाः भागवत् पुराण (ने.सं. ६२५ रा.अ.) दकलय् न्हापांगु नेपालभाषाया बाखं सफू जुवःगु दु । छुं नं ग्रन्थया प्रामाणिकताया पुष्टि, लिपि, वस्तु भाषा शासनावधि ज्वःलायेवं तिनि जुइ । भिखुगू शदी वयाः नेपालभाषाया च्वज्याय् ताडपत्रया थासय् मःभ्वया प्रचलन, भुजिम्बल लिपिया पलेसा प्रचलित लिपिया गुगु प्रचलन वःगु खः, थ्व हे कथं नेपालभाषा भागवत् पुराणय् नं मःभ्वं, प्रचलित लिपिया प्रयोग जुयाच्वंगु दुसा, थ्व सफूया पुष्पिका वाक्यय् श्री श्री देवकीदेवी ठकुररिणीस्यं ल्हाचका थ्व खं धकाः न्ह्यथना तःम्ह पात्रया नां मेगु ने.सं. ६२७ या चांगु नारायणया भण्डारय् दुगु लुं सिया पतिइ नं श्रीश्री देवकीदेवी ठकुररिणीनं भुखात्रं स्यंगु चांगु नारायण देगः जिणोद्वार याःगु खं न्ह्यथनातःगुलिं थ्व भागवत् पुराण ने.सं ६२५ यागु हे खः धैगु प्रमाणित जूगु दु । थ्व भागवत् पुराण सफू संस्कृतया नेपालभाषां अनुवाद मखुसे मुक्कं नेपालभाषां स्वतन्त्र रुपं च्वयातःगु गद्य कृति खः । भिनिगू स्कन्ध, भिस्वंगू अध्याय, दुगु थ्व तपंगु बाखं सफूया बांलाक अध्ययन अनुसन्धान जुइमलाःसां नेपालभाषा 'भागवत् पुराण' नेपालभाषाय् लिपा खनेदुगु दशावतार नाटक आदि व मेमेगु बाखं, प्याखंया आधारग्रन्थ थें जूगु खनेदु ।

भागवत् पुराण थें नेपालभाषाय् मेमेगु नं थ्व स्वयाः पुलांगु बाखं सफू लुयावये फुगु आपालं सम्भावना दु, तर अथे खःसां आःयात भीसं नेपालभाषाया दकलय् न्हापांगु बाखं सफूया रुपय् भागवत् पुराण यात हे माने यायेगु जूगुलिं नेपालभाषाया बाखं साहित्यया शुरु धार्मिक बाखनं जुल धायेमाः । धार्मिक बाखंया ल्यू औपदेशिक बाखं खनेदत । आतक्रयागु अनुसन्धान कथं औपदेशिक बाखनय् दकलय् न्हापांगु सफू तन्त्राख्यान (ने.सं. ६३८ रा.अ.) खः । ४४ पु बाखं दुगु थ्व तन्त्राख्यान सफू पंचतन्त्र शैलीया चीहाः बाखं माःहना खः । थुकिइ न्हापा संस्कृतया छपु सिलः बियाः उक्रिया नेपालभाषानुवाद बिइगु अनलि व नाप स्वापू

दुगु बाखं बिइगु यानातःगु दु । थथे स्वापू दुगु बाखं न्ह्यव्वइबलय् च्वमिं उपमा, छपु छयलाः थःपिनिगु सृजनशीलता नं क्यनेगु याः । तन्त्राख्यान सफुलिइ दुथ्याःगु छपु बाखंया नमूना -

१ (क)

त्यांगी च वचन मान्नस्य कूर्मस्य पतनं यथा ॥ सदा वचन रक्षरपं यने माल बेलकाल मसो  
स्यं ल्हाया बचनन नाश जु फुव ख हंस नेम्हंस्यं बोयकं यले बचन ल्हाटोलन कापरे ता  
क थें ताय येव खः । थ्वया उपाख्यात । ग्वछिनं ठायस ग्राम समीपस पुषुरि द दस्यं चोग  
थ्व पुषुरिस कापरे वशरपं चोंग, छु क्षणस ब्रम्हभूवनस राजहंस थ्व पुषुरिस जु

१ (ख)

त वव, थेस थ्व कापरेण राजहंसवृन्द खंडव छेसकल गेनन वया धासे येडा थेस हंसन  
ब्रम्हालोकन वया धास्यं कडा थेस कापरेण ब्रम्हलोक जुयु गथेडुंय धाया थेस हंसन ब्रम्ह  
लोकया वण्णा खं ल्हाय जुरसा द लछि मेथुल नागराजास्यं मफु जपनिस्यं छिन गथे  
ल्हाय धास्यं हाडा थेस कापरेण ब्रम्ह लोक सोय प्रत्यासन जे ब्रम्हलोक यने मन भि  
सन धास्यं हसयाके प्रार्थना याडा, थेस हंसवृन्दन अमतेरा जुरसा बेलकाल म सोस्यं नोन धाय मटेव जेपनिस्यं टोड मटोटल छु धाय नं मटेव धास्यं अनेग कोडपं  
सिं छपु वान काचकं थ्व सिं नेम्हं हंसन ट्वाठन काडन थ्व कापरे बोयकं यंडा जुरो

२ (क)

थ्व क्षणस ग्रामया सा गोरौषपनिस्यं खंडव सोव २ हंसन कापरे बोयकं यनं गेता तो  
डफेरं अता छेस्यं काय थ्व कापरे धास्यं न्वाडा तायाव थ्व कापरेया हृदयस क्रोध जा  
यरपाव जन थम याडा पुण्य फलन स्वर्ग वने टंडा सोव धास्य उत्र याटोलेन थ्व



कापरे पडरपं ताक जुरो ॥ श्वतेन बेरकाल मसोस्यं बाक्य पिते मटेव जुरो  
॥ (तन्त्राख्यान ने.सं ६३८, रा.अ.)

तन्त्राख्यान सफूया ल्यू मेमेगु नं थज्याःगु हे औपदेशिक बाखंया सफू खनेदत । थथे धार्मिक बाखं, नीति बाखं पिदने धुंकाः अनं लौकिक बाखंया सफू खनेदत । नेपालभाषाय् आतक लूगुलिइ स्वस्थानी, पशुपति पुराण मेमेगु स्वयाः पाःगु धार्मिक बाखं खः । जननी जन्म भूमिश्च स्वर्गादपि गरियसी या मन्त्र न्यंकूगु स्वस्थानी बाखनं स्वदेश प्रेम, स्वजाति भावना, स्वधर्म प्रति श्रद्धा चजायेकेगु याःगु दुसा, पशुपति पुराण नेपाःया भौगोलिक थाय्बाय्या चित्रण दुगु नेपाःया थःगु हे न्हापांगु पुराण जूगु दु (वैद्य, ने.सं. १११९:२)। धार्मिक, नीतिपरक बाखंया ल्यू पिदगु लौकिक बाखंनय् ने.सं. ७४० या बेताल पञ्चविंशतिका दकल्य पुलांगु बाखंया सफू खः । थथे धार्मिक, लौकिक बाखं बाहेक लिखित रुपय् तयेगु चलन मदुगु न्यैकै बाखंया परम्परा नं प्राचीन इलनिसें दुगु खनेदु । थ्व छगू पुस्तां मेगु पुस्ता जुयाः न्ह्यानां वंगु खनेदु ।

**स्वरूप :** नेपालभाषाया प्राचीन बाखं च्वमिपिसं अप्वः थें थःगु कल्पनां बाखंया कथावस्तु ग्वयेगु मयासे तत्कालीन प्रचलित संस्कृत, प्राकृत आदि भाषाया थीथी बाखंयागु कथावस्तुया लिधंसाय् बाखं ज्यायेगु याःगु खनेदु । थज्याःगु कथावस्तु इसस फेबल, अरेबियन नाइट, विरसिक्का आदि बाखंया कथावस्तु नाप नं गुलिखे ज्वःलाःगु खनेदु । पञ्चतन्त्र व हितोपदेश अप्वः थें बाखं तप्यंक भाषान्तर अनुवाद थें जक जुयाच्चंगु दुसा लौकिक, जातक, पुराण बाखंया च्वमिपिसं थःपिनिगु धार्मिक, सामाजिक, सांस्कृतिक जीवनया स्वाःपाः नं बाखनय् ब्वयेगु याःगु दु । नापं छुं छुं बाखनय् स्वनिगःया थाय्बाय्या नां तर्क न्हयब्वयातःगु दु ।

थौं थें स्कूल कलेजय् मचातय्त छवयाः औपचारिक शिक्षा बिइगु चलन मदुनिगु थुगु इलय् बाखंयात मनोरञ्जन व धार्मिक आस्थाया प्रतीक जक मयासे समाजय् ज्ञान बुद्धि हवलेगु छगू सशक्त प्रचार प्रसार माध्यमया रुपय् नं छयःगु खनेदु । थ्व हे कथं प्राचीन न्ह्यागु नं बाखनय् नीति उपदेशं छुं नं छुं थाय् कयाच्चंगु दु । सत्यया विजय असत्यया अन्तया सिद्धान्तय् प्राचीन बाखनं हा कयाच्चंगु दु । थाय् बाय् ई स्वयाः थीथी बाखं, थीथी इलय् थीथी व्यक्ति विशेष कनेगु, न्यैकेगु प्रचलन दु । बाखं थुगु इलय् तसर्क हे लोकहवाःगु विषय खः धयागु खं छगू हे बाखंया सफूया तःगु प्रति लुयावःगु यथासत्य स्पष्ट याः ।

थौया आधुनिक बाखंया तुलनाय् प्राचीन बाखं विषयवस्तुया दृष्टिकोणं, पात्र चित्रणया दृष्टिकोणं, प्रस्तुतिकरणया दृष्टिकोणं नं आपालं पाःगु खनेदु । घटनाया प्राधान्यता, अलौकिक घटनाया वर्णन, अलौकिक पात्रया संयोजन, छपु हे बाखनय् आपालं आपाः घटनाया चित्रण आदि थुगु ईया बाखंया छगू विशेषता खः । अथे हे थौया बाखनय् थें कौतुहल, जिज्ञासा थनेगु प्रवृत्ति नं पुलांगु बाखनय् मदुगु मखु, तर पुलां बाखनय् कौतुहल, जिज्ञासा, आश्चर्य थनेगु ज्या अलौकिक घटनाया समायोजन वा पात्रतय्गु अलौकिक क्रियाकलाप पाखें जूगु दु ।

नेपालभाषाया म्ये, नाटकया च्वमित मध्ये गुलिस्थां थःपिनिगु नां न्हयब्वया वंसां तसे नेपालभाषाया बाखमितसे थःपिनिगु नां तप्यंक न्हयब्वयावंगु धाःसा खनेमदु । तर गुलिं गुलिं बाखं च्वमितसे बाखं क्वचायेके धुंकाः अप्रासांगिक जूसां थःपिनिगु मनया भाव अभिव्यक्ति, देशकाल स्थितिया टिका टिप्पणी, धाःसा यानावंगु खनेदु । ने.सं. ८८३स रचना जूगु रामायण कथा नांगु बाखं सफुली, पृथ्वीनारायण शाह नेपाः गालय् आर्थिक नाकाबन्दी तयाबिइवं थन चि, कपाय्, मल्ता आदिया हाहाकार जूगु तत्कालीन घटनाया चित्रण बाखं क्वचायेकाः न्हयाथनातःगु दु । थ्व हे कथं बाल्मीकि रामायण (ने.सं ८२३-८२९) या च्वमि दुःखि भारौ अध्यायया अन्त्य पतिकं थःगु नुगःखं ब्वयावंगु दु । थम्हं रामायण बाखं च्वयागुया उद्देश्य थुकथं न्हयथनातःगु दु

सम्बत ८२९ ... थ्व वणकाण्ड चोया दुखिया मनस माश दुख जुयाव दुख लमन मोलके अर्थन चोया । छु दुख जुरो धारसा बबु मलन वियाव ताथा तलमधि तोलस पुलको ननि छें श्री २ भूपतीन्द्र मल्ल माहालाजन दुकास्यं बिज्याजाव डातापोल देव दानं । दुखियाता भुलाछें शिव बहाल ननिस छें पलिक वियाव थ्व छेंस थ्वते चोत वया दुखी, स्त्री, काय, म्हाया, मुमा, बुबा थ्वते नापं चोडाव दुषिया मनसं मछुडापु जुयाव दुख रुमडाव थ्व दुख लमन मोलके निमितित श्री ३ रामायण वण काण्ड चोयाव श्री रामया गाम कायाव दिन हाडा जुरो, राम, राम, राम (वैद्य, ने.सं १११९, : ३)

थुकथं थुगु इलय् बाखं न्येनेगु, कनेगु जक धार्मिक आस्थां प्रभावित जुयाः मखु बाखं च्वयेगु नं पुण्य संचय यायेगु, धार्मिक उद्देश्य जूगु स्पष्ट जू । नापं बाखं आत्मअभिव्यक्तिया छगू माध्यम तथा तत्कालीन सामाजिक, राजनैतिक घटनाया संवाहक तर्क जूगु दु ।

**प्रकार :** प्राचीन नेपालभाषाया बाखंयात क्वय् विया कथं ब्वथलाः अध्ययन यायेछि -

- धार्मिक बाखं
- औपदेशिक बाखं
- लौकिक बाखं
- न्यैकै बाखं

**धार्मिक बाखं :** धार्मिक बाखं नेपालभाषा गद्ययागु छगू मूल विषय कथं अप्वः प्रचलनय् वयाच्चंगु विधा विशेष खः । व्यवहारय् थज्याःगु बाखं कनेगु, न्येनेगु प्रचलन छगू साहित्यिक विधा अध्ययन याये कथं वा मनोरञ्जन काये कथं, परलोकय् सुख प्राप्ति व मोक्ष प्राप्तिया लं मालेगु, पुण्य संचय यायेगु संस्कार कथं जूगु दु । थुलि जक मखु थज्याःगु बाखनय् न्हयलुइम्ह पात्रयात देवदेवी कथं श्रद्धा भक्ति यायेगु, बाखनय् उल्लेख जुइगु थाय्यात तीर्थ स्थल



भा:पिङ्गु प्रचलन थौ तर्क नं दनि । नेपालभाषाय् खनेदुगु धार्मिक बाखंया थीथी आधार श्रोत थथे खनेदु -

पुराण : नेपालभाषाया धार्मिक बाखंया मू आधारभूमि पुराण नं खः । थथे पुराणय् आधारित नेपालभाषाया थुगु ईया बाखं खः - श्रीभागवत् पुराण (ने.सं ६२५) स्वस्थानी (ने.सं ७२३), लिंग पुराण (ने.सं ७४९) पशुपति पुराण (७५२), मार्कण्डेय पुराण (७३७), ब्रम्ह पुराण (ने.सं ८९५), स्वयम्भू पुराण (८६५) आदि । थुपि मध्ये श्री भागवत् पुराण नेपालभाषाया न्हापांगु बाखं सफू जूगु दुसा पशुपति पुराण नेपालयागु थःगु हे धायेवहगु बाखं सफू खः । थ्व स्कण्डपुराणया बाखंया लिधंसाय् ज्यानातःगु खनेदु । थुगु ईया दकलय् लिपा पिदंगु व न्ह्यथने वहगु मेगु सफू स्वयम्भू पुराण खः । थ्व बाखनय् नेपाल उपत्यकाय् बस्ति आवाद जूगु बाखंया नापं थनया राजनैतिक, सांस्कृतिक चित्रण दुगुलिं थ्व नं नेपाःया थःगु हे पुराण जूगु दु । नेपालभाषाया पुराणया सफू मध्ये छगू अलग्ग हे उद्देश्यं प्रेरित जुयाः रचना जूगु बाखं सफू खः स्वस्थानी । खयेत ला थ्व नं धार्मिक आस्थां प्रेरित बाखं हे खः, अथे खःसां नं 'स्वदेश' प्रेमया भावना अभिप्रेरित यायेगु कुतः नं थ्व बाखनय् खनेदु । धातये ला देवी प्रसादवाद व पुरोहितवाद छुं छुं अंशय् मुक्त जुयाः छें य् छें य् थःपिसं न्यनेकने जिउगु स्वदेश प्रेम, स्वजाति भावना स्वधर्म प्रति श्रद्धा नेपाःया जनजीवनय् धार्मिक दृष्टिकोण हे सा जननी जन्मभूमिश्च स्वर्गादपी गरियसीया मन्त्र न्यकूगु स्वस्थानी खं ग्वः दुने सुलाचंगु भावार्थ संकेत याः । (वैद्य : ने.सं १११९ पृ : २)

महाभारत : धार्मिक बाखंया छगू श्रोत महाभारत नं जूगु दु । थज्याःगु बाखंया भोलय् ने.सं. ७२९ यागु सभापर्व न्ह्यथने वह जू ।

जातक/ अवदान : जातक अवदान बाखंया भोलय् विचित्र कर्णिकावदान (ने.सं ७७९), जातक संग्रह (ने.सं ८७०) आदि न्ह्यथने वह जू । थज्याःगु बौद्ध जातक अवदान बाखनय् नेपालभाषाया मेमेगु धार्मिक बाखनय् स्वयाः अज्ञात च्वमिपिसं नेपाल उपत्यकायागु धार्मिक भावना व उपत्यकाया जनजीवन नापं स्वापू क्यने कथं स्थानियता लुइकातःगु दु । थज्याःगु बाखं संस्कृत पालिभाषाय् चंगु बाखं स्वयाः पाःगु व थुकिइ च्वमिपिसं मौलिक खं न्ह्यब्वयेहःगु नं खनेदु ।

रामायण : रामायणया लिधंसाय् नं आपालं बाखं प्राचीनकालय् रचना जूगु दु । थुपि गुलिं रामायणया तःगु काण्डय् आधारित जूगु दुसा गुलिं छगू निगू काण्डया आधारय् रचना यानातःगु दु । बाल्मिकी रामायण (ने.सं. ८२३-८२९), रामायण (ने.सं ८४७-८७२), आध्यात्म रामायण आदि थुगु इलय् खनेदुगु रामायणय् आधारित बाखं खः ।

थुपि बाखं बाहेक नेपालभाषाया बिलं पौ (किपा बाखं)या छगू अलग्ग परम्परा नं दु । थ्व भोलय् ने.सं ७५७ स सिद्धिनरसिंह मल्लं कृष्ण देगः दयेकूवल्य् छिदिया तल्लाय् कियातःगु रामायण व चव्यया तल्लाय् कियातःगु महाभारतया किपाबाखं उल्लेख यायेवह जू । थथे चव्य उल्लेखजूगु थीथी कथंया धार्मिक बाखनं व्यावहारिक जीवननाप स्वापू तयेगु बाहेक नीति व दर्शन आदिनाप नं प्रत्यक्ष रुप स्वापू तःगु खनेदु ।

औपदेशिक बाखं : नेपालभाषाय् खनेदुगु औपदेशिक बाखं अप्वः धयाथे मेगु भाषाया टीका अनुवादया रुपय् खनेदु । नैतिक उपदेश विङ्गु नैतिक आचरण भिंकेगु थज्याःगु बाखंया मूलभूत उद्देश्य जूगु दु । थज्याःगु गुलिं गुलिं औपदेशिक बाखनय् कथावस्तुया माध्यमं तय्यंक सन्देश विङ्गु याःगु दुसा गुलिं गुलिं बाखनय् संवादया माध्यमं स्यनेकने यानातःगु दु । थज्याःगु बाखं लाय्कुली जुजु मन्त्रीया कायपित राजनीति, समाजनीति या ज्ञान विइत, तत्कालीन सर्वसाधारणयात जीवन सुथालाक न्ह्याकेत माःगु अर्ति उपदेश विइत च्यातःगु खनेदु । थुगु ईया नेपालभाषाया औपदेशिक बाखं थथे खनेदु -

तन्त्राख्यान (ने.सं ६३८) : थ्व पञ्चतन्त्रं प्रभावित बाखं खः । थुकिइ न्हापां छपु संस्कृतया सिलः बियाः उकिया नेपालभाषानुवाद विइकाः अर्नालि वनाप स्वापू दुगु बाखं बियातःगु दु । थ्व बाखं सफू नेवाःतयगु जनजीवनय् तसकं हे लोककाःगु खनेदु । थ्व सफूयात ल्ह्ययाः व्वनेगु परम्परा लिपा तर्क न्ह्यानावंगु खनेदु ।

कुशोपदेश (ने.सं ६७५) : थ्व रामचन्द्रया काय् कुशयात अडगद, सुग्रीव व तारां उपदेश बियातःगु च्यापु च्यापु सिलःया ग्रन्थ खः ।

धर्मलक्ष्मी सम्वाद (ने.सं ६९१) : थ्व धर्मराज व लक्ष्मीया दथुइ धन तःधं लाकि ज्ञान तःधं धइगु वारेया नीतिबाखं खः । थ्व सफू मुक्कं नेपालभाषां जूसां, थुकिया आधारश्रोत महाभारतया सम्वाद खः ।

युधिष्ठिर नारद सम्वाद (ने.सं ८३५) : थ्व सफूया खास लक्ष्य जुजु जुइपित राज्य शासन संचालन यायेत माःगु ज्ञान विङ्गु खः । थ्व सफू मुक्कं नेपालभाषां जूसां थुकिया आधारश्रोत नं महाभारत हे जूगु दु ।

हितोपदेश (ने.सं ६९९) : थ्व सफूयात हायन्स जोगेन्सन ने.सं. ४८९ पाखे यागु खः धकाः नालाद्दीगु दु । थ्व हे ल्याखं नेपालभाषाया न्हापांगु सफू कथं हितोपदेशयात नालायकूगु खः । तर मयजु ज्वाला स्थापितया अनुसन्धान कथं थ्व हितोपदेश सफू ने.सं ६९९ यागु खः धयागु सीदःवःगु दु । थ्व बाखं बंगालया पण्डित 'नारायण' दयेकूगु संस्कृतया हितोपदेशयात स्वयाः



नेपालभाषां स्वतन्त्र रूपं च्वःगु बाखं सफू खः । थथे हे हितोपदेश नायागु मेमेगु बाखं नं नेपालभाषां च्वयातःगु लुयावःगु दु ।

**लौकिक बाखं :** नेपालभाषाया धार्मिक, औपदेशिक बाखं स्वयां लौकिक बाखं यक्व हे पाःगु खनेदु । थीथी रोमाञ्चक घटना न्हयब्वयाः कौतुहलता, जिज्ञासा थनाः च्वमिपित छगू कथं आनन्द विङ्गु हे थज्याःगु बाखंया तातुना खः । उकिं मेमेगु बाखनय् स्वयाः थज्याःगु बाखनय् च्वमिया कल्पना तसकं हे च्वन्ह्याः । थथे यइपुगु अजू चायापुगु बौद्धिक कसरत, नैतिक शिक्षा जाःगु विषयवस्तु नेपालभाषाया बाखनय् दुत हयेगुलिइ भारतय् मुस्मांतयगु आक्रमणया कारण ईसं १४ गूगु शताब्दी पाखे नेपालय् बिस्युं वःपिं बुद्धिजीवीतयगु ल्हाः दुगु खनेदु । थुमिसं ज्वनावःगु सफू पाखे नेपालभाषाय् थज्याःगु लौकिक बाखंया रचना जूगु खनेदु । नेपालभाषाया अप्वः धइथे लौकिक बाखंया आधारश्रोत ईपूया गुणादयं च्वःगु बृहत्कथा जूगु दु । नेपालभाषाया धार्मिक औपदेशिक बाखंया तुलनाय् लौकिक बाखनय् च्वमिया सृजनात्मक प्रवृत्ति आपालं न्हयलूगु व नेपाःया सामाजिक सांस्कृतिक परिवेशय् थज्याःगु बाखं निर्माण जूगु खनेदु । उकिं मेमेगु बाखंया तुलनाय् थज्याःगु लौकिक बाखंया सफू तसकं लोकंवाःगु व थज्याःगु बाखंया सफू ल्हासाय् वनेज्याय् वनीपिसं तकं ज्वनावनेगु याःगु दु । नेपालभाषाय् प्रचलित थीथी लौकिक बाखं थुकथं खनेदु -

बेताल पञ्चविंशतिका (ने.सं ७४०) : बेताल पञ्चविंशतिका धकाः अष्टसिद्धि लायेत सफल जूम्ह जुजुयात बेताल कंगु नीन्यापु बाखंया पुत्रः खः । थज्याःगु बाखनं छुं कथं तत्कालीन समाजय् बौद्धिक कसरत याकेगु ज्या याःगु दुसां धर्म प्रति श्रद्धा बजायेकेगु नैतिक उपदेश विङ्गु प्रवृत्तियात नं त्वःतूगु खनेमदु ।

वत्तिस पुतलिका सिंहासन व्दात्रिशिका (ने.सं ८२९) : थ्व सिंहासन पिहांवःपिं स्वीनिम्ह लापाचिया बाखं खः । थ्व सफूया छगू संस्करण हायन्स जोर्गेन्सन (ई.सं. १९३९) पिकाःगु दु । अति रोमाञ्चक, कौतुहलता जाःगु घटना न्हयब्वयाः न्यनीपित उत्सुक यानाः न्हयाइपुकेगु थज्याःगु बाखंया उद्देश्य जूगु दु । जुजु जुइपिके बुद्धिमता, पराक्रम, त्याग आदि थज्याःगु गुण दयेमाः धयागु खं न्हयथने कथं बाखं हनातःगु दु ।

शुक बहत्तरी (ने.सं ८५६) : थ्व बाउँभतुं छम्ह वनियाया कलाःयात कंगु न्हयनिपु बाखंया संग्रह खः । शुक बहत्तरी बाखंया श्रोत संस्कृतया शुक सप्ततौ जूगु दु । नेपालभाषाया प्राचीन लिखित बाखं मध्ये दकल्य सृजनामूलक बाखं सफू 'शुक बहत्तरी' जूगु दु । नेपाःया सामाजिक परिवेशय् शुक बहत्तरीया निर्माण जूगु दुसा नैतिक शिक्षा प्रचार यायेगु समाजय् विद्यमान अनैतिकतायात पनेगु उच्च वर्गीय परिवारया कुकृति, कुभावना, दुराचार आदिया

भण्डाफोर यायेगु शुक बहत्तरी बाखंया विशेषता जूगु दु । शुक बहत्तरीया ने.सं. ८६६ यां संस्करणयात भाजु प्रेमबहादुर कसाःनं ने.सं. १९०० स सम्पादन यानाः पिकयादी थुंकूगु दु ।

मुद्रा राक्षस कथा (ने.सं. ८२९) : राजनीतिया ज्ञान विङ्गु संस्कृत प्याखंया बाखं मुद्रा राक्षस कथा खः । थुंकिया ने.सं. ८३९ या संस्करण भाजु छत्रबहादुर कायस्थ (ने.सं. १९०८) सम्पादन यानाः पिकयादीगु दु ।

चव्य न्हयथनागु लौकिक बाखं सफू बाहेक न्हयच्वःगु प्राचीन कालय् मेगु नं लौकिक बाखंया सफू पिदंगु दु गथे - वीरशिखा कथा (ने.सं ७८३), मन्त्र बुद्धि कथा (ने.सं ७८३) आदि ।

**न्यैक बाखं :** लिखित रुपय् मखु मौखिक रुपय् छगू पुस्तां मेगु पुस्तां जुयाः न्हयानाच्वंगु नेवाः जनजीवनय् प्रचलित जुयाच्वंगु बाखंयात प्रेमबहादुर कसाःजुं न्यैक बाखं धकाः नां छुनादीगु खः । नेपालभाषाया मौलिक सृजना मध्ये थज्याःगु बाखं नं छगू जूगु दु । नेपाःया सामाजिक सांस्कृतिक परिवेशय् निर्माण जूगु थज्याःगु न्यैक बाखनं प्राचीन नेपाःया जनजीवनयात ब्वयेगु याःगु दु । प्राचीन नेपाःया सामाजिक, आर्थिक, सांस्कृतिक, राजनैतिक, धार्मिक आदि स्थितिया अध्ययन यायेत थज्याःगु बाखं मू वंगु ज्वलं जुइफु । न्यैक बाखं तत्कालीन प्रचलित शुक बहत्तरी, बत्तीस पुतलिका आदि बाखनं प्रभावित जूपिं नेपालभाषापिसं थःपिसं हे सृजना याःगु खनेदु । भीथाय् प्रचलित न्यैक बाखं खः -

- टावाः अजिया बाखं
- धौचल्यचिया बाखं
- सिन्हःपता मयजुया बाखं
- कां, खू, धुसिया बाखं आदि

थज्याःगु बाखनं मनोरञ्जन विङ्गुया लिसें समाजय् नैतिकता, बौद्धिकता, लगनशीलता, सत्यताया प्रचार यायेगुलिइ तिवः ब्यूगु दु । तर नेपालभाषाय् न्यैक बाखंयात लिखित रुपय् तयाः संरक्षण यायेगु ज्या ने.सं. १०७८ निसंे तिनि जुल । थथे न्यैक बाखंयात न्हापां प्रकाशनय् हयादीम्ह च्वमि खः - कर्णकार वैद्य । थ्वय्कलं नेवाः जनजीवनय् प्रचलित न्यैक बाखं संकलन यानाः न्यागू भाग तकया सफू पिकयादीगु दुसा प्रेमबहादुर कसाः, केशरलाल आदि च्वमिपिसं नं पुलां बाखं संकलन यानाः पिकयादीगु दु ।

थुकथं नेपालभाषाया प्राचीन बाखं, साहित्यिक अध्ययनया दृष्टिं जक मखु थनया धर्म, संस्कृतिया अध्ययनया दृष्टिं नं महत्वपूर्ण जूगु दु । थौया बाखनं थें प्राचीन बाखनं तत्कालीन मनूतय्गु जनजीवनयात ब्वयेगुलिइ उलि च्यूताः



मतःसां प्राचीन बाखं भीगू धर्म संस्कृतिया छगू अभिन्न अग जुइधुकूगू दु । थौया आधुनिक बाखं नाप अभ्यस्तपिं जुयाः नं भीसं माघबलय् स्वस्थानी बाखं कनेगु, गुलाबलय् बौद्ध जातक अवदानया बाखं न्यनेगु, सुं सित कि छैय्गरूड पुराणया बाखं ककेगु संस्कारयात थौतक नं त्वःतेमफुगु हे थुकिया छगू दसु खः ।

## न्हयच्चःगु प्राचीनकालया म्ये

नेपालभाषाया काव्य साहित्यय् दकलय् न्हापां खने दुगु काव्य प्रकार म्ये जूगु दु । उकिं भीगु प्राचीन काव्य धयागु हे प्राचीन म्ये खः । विविध देवदेवीपिनिगु भजन, स्तुति म्ये, सुख दुःखया अनुभूति प्वकातःगु मुक्तक म्ये, इतिकथात्मकता दुगु बाखंम्ये, देश वर्णन राज वर्णन दुगु प्याखंम्ये आदि प्राचीन म्येया विविध रुप खः । जुजु, प्रजा, मिसा मिजं समाजया फुक्क वर्गया सामूहिक सहभागितां ब्वलंगु प्राचीन म्ये साहित्य थौ भीगु भाषा साहित्यया प्राचीन गौरव जूगु दु, भीगु प्राचीन श्रृजनशीलताया प्रतीक जूगु दु, भीगु प्राचीन स्वाःपाः स्वयेगु छपाः यचुगु न्हाय्कं जूगु दु ।

**विकास :** म्ये हालेगु, म्ये न्यनेगु परम्परा भी नेवाःतय् आपालं पुलां खनेदुसां आःतकयागु अनुसन्धान कथं म्येयात लिखित रुपय् पिब्वयेगु ज्या ने.सं. ६९० या दशकय् वयाः तिनि जूगु दु । थथे नेपाल संवत् ६९०या दशक पाखे खनेदुगु म्ये खः-

- प्रनमति श्री जुगपति ... ने.सं. ६९४ स च्युगु ।
- अमल सहभ्रनाम श्री बुंगलोक्येश्वर  
( ने.सं. ६९४ स चोगाम क्वाथ दंबलय् चिंगु )
- ने.सं. ६९९ या अपूर्ण म्ये

थुपिं स्वपु म्ये यलया तिभय जुजुपिं - नरसिंह देव, पुरन्द्रसिंह देव, उद्धवसिंह देव (ने.सं. ६८०-७१७) पिनिगु विजय यात्रा सम्बन्धी वीर रसं जाःगु काव्य खः । तर थ्व म्येया रचनाकारतय्सं धाःसा थःपिनिगु नां न्हयथना वंगु खनेमदु । अथे हे मेगु महेन्द्र मल्लया नं (६८०-६९४) नां न्हयथनातःगु, तर च्वःगु ई उल्लेख मज्जु निपु म्ये - १) कपटि मायानं केन्या हे रामा २) मेव मदु जित छि शरण... लुयावःगु दु । थथे लुयावःगु महेन्द्र मल्लया म्येया छपु नमूना खः -

राग विभाष । ताल - प्रताल

कपटीया मायान केन्या हे रामा ॥धु॥

न्हयवस जी दोन्या छिपाली मजोन्या सुखया रसतु लेन्या ।

लोभसतु दोन्या थिर तासे चोन्या जमया पास मखन्या ॥१॥

हितन जि कन्या न्हसस मथन्या आव नुगल मछिन्या

अनारी मनन लिमल मखन्या मखुल लपुस दुबिन्या ॥२॥

पुराण आदिन तंत्र मन्त्र जपतप दक जीन बोन्या

न्हिनीछिया दिन खिउजुसेवन छि नाम काय मलान्या ॥३॥

छुयाय दासनि छेमा जी पापीया कृष्णया दासनं ल्हान्या ॥४॥

(तुलाधर : ने.सं. १०७७ : १)

थुकिइ अनेक विधि नं नरया पति नं मल्ल महिन्द्र नं ल्हान्या धकाः न्हयथनातःगुलिं थ्व म्येया रचनाकार महेन्द्र मल्ल खः धयागु सी दु । रचना जूगु तिथि मिति न्हयव्वया मतःसां, महेन्द्र मल्लया नां न्हापां उल्लेख जूगु व थौ तक् नं विभिन्न दाफा भजनय् थुपिं म्ये हालेगु परम्परा दुगुलिं आःतकया परम्परा कथं नेपालभाषाया न्हापांम्ह कविया रुपय् महेन्द्र मल्लयात हे कायेगु जूगु दु । खयेत ला महेन्द्र मल्लया ई स्वयाः नं आपालं न्हयःयागु रचना समय न्हयथनातःगु नेपालभाषाया म्ये नं लुयावःगु दु । तर थज्याःगु म्ये अभिलेख पाखें प्राप्त जूगु मखुसे हालेगु परम्परा पाखें प्राप्त जूगुलिं थज्याःगु तिथियात जक प्रमाणित आधार नालाः म्येया प्राचीनता क्वःछी मछि । कारण व हे म्येयात छगू भजन सफलइ छगू ई न्हयथनातःगु दु सा मेगु भजन सफलइ मेगु हे ई न्हयव्वयातःगु दु । गथे प्रभुजन गन जि लुमनी धयागु म्ये सल (७) किसि (८) रंग (५) साल अर्थात् ने.सं. ५८७ स रचना जूगु खः धकाः राइट पिकाःगु History of Nepal उल्लेख जूगु दुसा व हे म्येयात सिगफ्रेड लीन हार्डजु पण्डित अमृतानन्द (ने.सं. १२०-१५९) च्वःगु धकाः न्हयथनादीगु दु । अथे हे गुलिस्थां नेपालभाषाया दकलय् न्हापांम्ह कवि कथं जुजु रण मल्ल (ने.सं. ६०२-६४५) यात नालेमाः धायेगु नं याःगु दु, कारण वय्कःया नां न्हयथनातःगु कालीमाई देवीया स्तुति सम्बन्धी छपु म्ये लुयावःगु दु । तर रण मल्लया म्ये सम्बन्धी गनं अभिलेख आदि छुं उल्लेख मज्जु, गनं दाफा भजनय् हालेगु परम्परा खनेमदुगु तथा कालीमाई देवीया छपु म्ये बाहेक मेगु म्ये रण मल्लया छपु हे आःतक गनं मलूनिगुलिं आःयात नेपालभाषाया न्हापांम्ह कवि कथं महेन्द्र मल्लयात निं नालेगु जूगु दु ।

थथे १६ शदिइ आःतकयागु अनुसन्धान कथं न्यापु म्ये लूगु दु । थुपिं न्यापु म्येया आधारय् तत्कालीन काव्यया विषययात थुकथं ब्वथले छि - १) भक्ति काव्य २) वीर काव्य ३) ध्याचू आदि । संख्याया दृष्टिं थुगु समयावधिइ म्ह हे जक 'म्ये' खनेदुसां काव्य स्तरया दृष्टिं कम मज्जु, धाथे धायेगु खःसा थुगु ईया म्येयात प्रारम्भिक ईया म्ये धायेमछि ।

महेन्द्र मल्लया ल्यू तःदं तक नं सृजनामूलक म्ये छपु हे खनेमंत । लिपा १७ शदिइ जगतज्योति मल्लया इलय् वनाः तिनि नेपालभाषाया काव्य धाः अटूट रुपं न्हयात । १७ शदी नेपालभाषाया काव्यया इतिहासय् तसकं महत्वपूर्ण ई खः । थ्व ई काव्यया स्तरीयता, विषय विविधता, व्यापकता नापं काव्यया



संख्या, च्वमिपिनिगु सहभागिता आपालं दुगु, उल्लेख यायेवहगु ई खः । जगतचन्द, सिद्धिनरसिंह मल्ल, प्रताप मल्ल थेंज्याःपिं सिद्धहस्त कवित थ्व हे युगयापिं खः । मिजं च्वमिपिंसं जक मखु, मिसा च्वमिपिंसं काव्य सृजनाय् ब्वति कायेगु ज्या नं थ्व हे युगनिसं सीदयेक न्ह्यात । लानी राजलक्ष्मी, ऋद्धिलक्ष्मी, भुवनलक्ष्मी, जयलक्ष्मी आदिपिं थुगु ईया प्रमुख मिसा च्वमित खः । लाय्कू खलकं जक मखु जनसाधारण पाखें न केशव उदास, जगत्केशरी, वृषहर्ष थेंज्याःपिं कवित पिदन । मुक्तक म्ये, भजन म्येया परम्परा जक दयाच्वंगु थासय् इतिकथात्मकता दुगु 'बाखं म्ये', देश वर्णन, राज वर्णन आदि थें ज्याःगु प्याखंम्येया परम्परा नं सीदयेक न्ह्यज्यात । लोक म्येयात तकं शास्त्रीयतां छायापाः हालेगु चलन नं जगत केशरी थें ज्याःपिं कवित पाखे जुल । फलतः थ्व युगं थःत नेपालभाषा साहित्यया स्वर्ण युग धायेकल ।

१८ शदी वनाः नेपालभाषाया प्राचीन काव्यया विकासया धालय् छुं छुं शिथिलता खनेदत । काव्य सृजनाय् जुजु लानीपिंसं ब्वति कया यंकू दुसां १७ शदीया तुलनाय् इमिपाखे स्तरीय काव्य सृजना उलि मजुल । तत्कालीन नेपाःगालय् पिज्वःगु राजनैतिक अस्थिरताया प्रभाव नेपालभाषाय् नं लात । थुगु इलय् काव्य सृजनाय् सक्रियता जुजु लानिपिंसं स्वयां नं लाय्कुलिइ आश्रित पण्डित कवितसें व सर्वसाधारण कवितसें अप्वः क्यन । मानवीय, राष्ट्रिय व सामूहिक दुःख संकट मुक्त जुइगु व समृद्धि भित्तुनेगु प्रवृत्ति हे थुगु शदीया मूलभूत काव्य प्रवृत्ति जूवन ।

**स्वरूप :** नेपालभाषाय् पुलांगु काव्य फुक्क म्येया रुपय् दु । थुपिं थौं भजन, तुतः, सिलः मुक्तक म्ये, बाखंम्ये, प्याखंम्ये, सिन्हाज्याम्येया रुपय् न्हयलुयाच्वंगु दु । संगीतात्मकता थुगु ईया काव्यया मूल रुप जूगुलिं, विविध राग ताल सुरय् थुगु ईया काव्यया संचरना जूगु दु । म्ये बुद्धिपक्षयात स्वयां नं 'हृदय' पक्षयात अप्वः थीगु याःगु दु । उकिं प्राचीन इलय् रचनाकारयाके भावाभिव्यक्ति बीगु कुशलता दयां जक मगाः वयाके राग ताल आदि संगीत सम्बन्धी ज्ञान नं अनिवार्य रुप दयेमाःगु जुल ।

प्राचीन काव्यय् भक्ति, श्रृंगार, देशप्रेम, ध्याचू, समसामयिक घटनाया खं प्वलेगु प्रवृत्ति खनेदुसां भक्ति, श्रृंगार हे त्वाःमदयेक न्हयानाच्वंगु मूलभूत काव्यया विषय जूगु दु । सिफ्रेड लीन हार्डजुं थःगु सफू Songs of Nepal (Lienhard, B.S. 1992) य् प्राचीन म्येयात १) धार्मिक २) मतिना व ब्याहा ३) बाखंम्ये ४) उपदेशात्मक व ५) दुर्बोध काव्य कथं न्यागू खण्डय् ब्वथलादीगु दु सा डा. जनकलाल वैद्यजुं विषयवस्तुया आधारय् प्राचीन म्येयात च्याब्वय् ब्वथलादीगु दु । गथे - १) धार्मिक म्ये २) मतिनाया म्ये ३) देशभक्ति म्ये ४) प्रशस्ति म्ये ५) उपदेश म्ये ६) ध्याचू म्ये ७) सिन्हाज्या म्ये व ८) शोक म्ये आदि ( वैद्यः, ने.सं १९०६) । थ्व हे कथं भक्ति रस, श्रृंगार रस, वीर रस हे थुगु ईया काव्यया

प्रमुख रस जूगु दु । भक्ति रसय् नं ... सगुन भक्ति, निर्गुण भक्ति निता कथं काव्य रचना जूगु दु । नेपालभाषाया प्राचीन साहित्यय् दकल्य् अप्वः सृजनात्मक प्रवृत्ति न्हयलुगु विधा म्ये खः । तत्कालीन कवितसें रामायण, महाभारत पाखें भाव त्यायेकाःसां तप्यंक अनुकरण मयासे थःपिनिगु कल्पना तनाः मौलिक सृजनाकथं पिब्वयेगु याःगु दु । थुगु युगया कवितय् गीतगोविन्दया कवि जयदेव व मैथिली कवि विद्यापतिया प्रभाव अप्वः लाःगु खनेदु । कवि जगतचन्दपिंसं थःपित न्हूल जयदेव' धाये ययेकूगु खं उगु ईया कवित जयदेवपिं पाखें आपालं प्रभावित जू धयागु स्पष्ट जू ।

आत्मपरकता थुगु ईया काव्यया छताजि मू प्रवृत्ति खः । इतिकथात्मक बाखंम्ये तकं विषयपरक मजुसें आत्मपरक जुयाच्वंगु दु । काव्य अप्वः स्वान्त सुखायया नितिं धैथें जूगु खने दु सा तत्कालीन समाजया विभिन्न समुदायपाखें जुइगु गलत ज्याखं यात कुखिनातःगु लोकचरित्र गीत (जयप्रकाश मल्ल) थें ज्याःगु थौंया भाषा प्रगतिशील धायेवहगु म्येया नं रचना जूगु दु (सिंह, ने.सं. १९९८) । प्रबन्धात्मक काव्य- महाकाव्य, खण्डकाव्य धाःसा थुगु इलय् खनेमदु । वरु थुकिया पलिसा बाखंम्ये, लोकम्ये, ऋतुम्ये व सिनाज्या म्ये आदि लुयावःगु दु । छता खं - देवदेवीपिनिगु भजन स्तुति बाहेक सुं नं प्राचीन च्वमितसें ध्यवा, पद आदिया लोभं सुं नं व्यक्ति विशेषया स्तुति प्रशंसाया म्ये चिनावंगु धाःसा खनेमदु । वरु थःगु दुःख कष्ट प्वंके कथं निर्भिक जुयाः तत्कालीन शासक, सामन्ततय्गु शोषण, अन्याः अत्याया यथार्थ चित्रण यानावंगु दु । संसारया कारण, सिलुतिथं आदि बाखंम्येया च्वमितसें तत्कालीन यथास्थितिया चित्रण नापं थनया सामाजिक, आर्थिक, सांस्कृतिक अझ राजनैतिक परिवेशयात नं ब्वयेगु याःगु दु । थुकथं नेपालभाषाया प्राचीन काव्य नेपाःया प्राचीन जनजीवनया छपाः न्हाय्क नं जूगु दु । प्राचीन कवितसें समकालीन जनजीवनय् प्रचलित नेपालभाषाया थःगु हे खं त्वाः खं भाय् छुनाः सरल सहज रुपं काव्याभिव्यक्ति बीगु याःगु दु । वार्षिक छन्दय् म्ये चिनेगु चलन तसकं म्ह जक खनेदु । अथे हे मेगु भाषाया खं ग्वः दुथ्याकीबलय् नं नेपालभाषाया भाषिक स्वरुप हनन जूगु खनेमदु । अलंकारिक भाषा छ्यलेगुली प्राचीन च्वमित गाकं पोख्त खनेदु (वैद्यः ने.सं. १९०६) ।

अथे हे नेपालभाषाय् प्राचीन साहित्यय् दकल्य् अप्वः च्वमितसें ब्वति काःगु साहित्यिक विधा म्ये खः । यें, यल, ख्वपया प्रत्येक धया थें जुजुपिंसं म्ये चिनेगु याःगु खनेदु । जुजुपिंसं जक मखु लानिपिंसं तक नं म्ये चिनेगु यानावंगु दु । जनसाधारण पाखें नं थःपिनिगु नां न्हयथनाः साहित्य सृजना यानावपिं प्राचीन च्वमित नं थ्व हे विधाय् जक धैथें खनेदु ।

प्राचीन इलय् आपालं म्येया सृजना जूगुया मूलभूत कारण थथे खनेदु - क) जात्रा, उत्सव, दाफा भजन, पूजा आदि नेवाःतय्गु सांस्कृतिक जीवनया महत्वपूर्ण पक्ष जूगु व थज्याःगु पर्वया नितिं म्ये चिनाः ब्रह्मायेगु परम्परा दुगुलिं नं आपालं म्येया रचना प्राचीनकालय् जूगु खः । ख) भीथाय् न्हापानिसं नाटक



चव्येगु परम्परा दुगु व नाटक्य अनिवार्य कथं देश वर्णन, राज वर्णन, लाय्कू श्रृंगारिक म्ये, नान्दी म्ये आदि दुथ्याके माःगु कारण न आपाल म्ये रचना जूगु खः । ग) प्राचीन इलय जुजु लानीपिनि न्ह्याइपुकेगुया नापं अध्ययन व अभ्यासया छता मू विषय ' संगीत' जूगुलिं न जुजु लानी व लाय्कू कवितसे आपाल म्ये चिनेगु याःगु खः । घ) थःपिनिगु दुःख सुख प्वकेगु छगू दकलय सवल व सक्षम माध्यम म्ये जूगुलिं आपाल प्राचीन च्वमितसे चाहे सामूहिक दुःख सुख जुइमा वा वैयक्तिक जुइमा, म्ये विधायात हे अभिव्यक्तिया माध्यम कथं छयःगुलिं न आपाल म्येया रचना जुइफुगु खः (वैद्य, ने.सं. ११०६ : ८-१०) ।

## प्रमुख कवि/ कवयित्री

थौ प्राचीन म्येया श्रोत धयागु हे दाफा भजन, प्राचीन नाटक, पौभाः, अभिलेख जूगु दु । थज्याःगु हे श्रोत पाखे मानदासजुं १००० पु म्ये मुंकादीगु दुसा, सीग्रेड लीनहार्डजुं १०० पु म्येया संकलन यानाः नेवारी गीतिमञ्जरी पिकयादीगु दु । अथे हे मानदास तुलाधर, ठाकुरलाल मानन्धर, प्रेमबहादुर कंसाकार, छत्रबहादुर कायस्थपिसं न आपाल प्राचीन म्ये मुंकाः पिकयादीगु दु । डा. जनकलाल वैद्यजुं ला नेपालभाषाया पुलांगु म्येया सृजनात्मक प्रवृत्ति विद्यावारिधि हे यानादिल । थय्कलं थःगु शोध ग्रन्थय प्राचीन कालया च्वमित धकाः लाय्कू खलकं पिदीपिं भिन्च्याम्ह जुजु कवित, न्हय्म्ह लानि कवयित्रीत तथा जनसाधारण पाखे न्याम्ह कवितयगु ना न्हयथनादीगु दु । थय्कःपिं फुकसिगु अध्ययन अनुसन्धान कथं नेपालभाषाया मुख्य मुख्य प्राचीन म्ये च्वमित थुकथं न्हयलूगु दु -

महेन्द्र मल्ल (ने.सं. ६८०- ने.सं. ६९४) :- महेन्द्र मल्लयात नेपालभाषाया न्हापांम्ह कविया रुपय नं नालातःगु दु । थय्कःया लूगु निपु म्ये ब्वनेवल्य थय्कःयात आध्यात्मिक दर्शन पाखे धेचूम्ह छम्ह प्रौढ कवि धाये छि । थय्कःया म्येय लुयाच्वंगु भाव गाभिर्य कवितात्मकता व संगीत माधुर्य अतिकं च्वछाये बह जू । थुकिं नेपालभाषा उवल्य निसं काव्यया क्वातुगु माध्यमया रुपय ब्वलने धुकूगु क्यं । (वैद्य, ने.सं. ११०६ : ५४)

जगज्योति मल्ल (ने.सं ७३३-७५६) :- जगज्योति मल्ल ख्वप लाय्कूलिं पिदंम्ह न्हापांम्ह कवि खः । जगज्योति मल्लया इलनिसें नेपालभाषाया प्राचीन काव्य निरन्तरता प्राप्त यात । थय्कलं थः लाय्कूया मैथिली विद्वान कवि वंशमणि भ्ना लिसे जानाः भरत नाट्यशास्त्रया लिधंसाय संगीत चन्द्र (बी २८८।२२) धाःगु व्याख्या नं दुगु टीका ग्रन्थ नेपालभाषां च्वया थकूगु दु । थ सफू संगीतया सैद्धान्तिक ज्ञान सम्बन्धी आःतक स्यूगुलिइ नेपालभाषाया न्हापांगु सफू

नेपालभाषा साहित्यया इतिहास/५०

खः । गीत पन्चाशिका (बी २८८।१२) व सप्तताल गीत ( आशा सफू कुथि) अनया प्रख्यात म्ये सफू खः । थय्कःया नानार्थ पन्चदश गीत (२८६।९) नांगु १५ पु म्ये संग्रह राष्ट्रिय अभिलेखालयय लुयावःगु दु । वय्कःया म्ये दाफा भजन खलःया सफुलिइ नं दुथ्याना च्वंगु दु ।

किन्चित कउतुक (कौतुक) नेपालया भास

मुख्या हास गुणिया अभिलास (वैद्य, ने.सं ११०६ : १२५)

धकाः दकलय न्हापां नेपालभाषा नं कौतुकपूर्ण काव्य सिर्जना यायेज्यू धकाः धयावंम्ह कवि थय्कः हे खः । जगज्योति मल्लया म्ये अध्ययन यायेवल्य अनया मेया मू विषयवस्तु व प्रवृत्ति श्रृंगारिकता व नैतिकता खने दु । छखेर वय्कःयात संस्कृत साहित्यया श्रृंगारिकता व नैतिक काव्यया प्रभाव लानाच्वंगु दु सा मेखेर अनया श्रृंगारिक काव्यया भाव व शैलीया प्रभाव अनया लिपाया कवि जगचन्द्र अर्थात जगत प्रकाश मल्लयात लाःवंगु खने दु (वैद्य, ने.सं ११०६ : १४०) ।

सिद्धिनरसिंह मल्ल (ने.सं ७३९ - ने.सं ७८१) :- यलया जुजु सिद्धिनरसिंह मल्लयात आःतक ज्वः मदुम्ह कृष्ण भक्ति परम्पराया कवि कथं नालातःगु दु । थय्कःया म्येय भागवत् पुराण, गीत गोविन्द, विद्यापति पदावलिया प्रभाव गाक्कं लाःगु दुसां, थव तप्यक अनुसरण मखुसे भाव जक त्यासा कयातःगु खः । थय्कःया म्ये निर्गुण भक्ति काव्यया छगू नमूना जूगु दु । थय्कःया नेपालभाषाया ३१ पु म्ये व कृष्ण लिला सन्बन्धी रंगीन पौभाः थौ तक नं कृष्ण देगलय ज्याःपुन्ही कुन्हु ब्वयेगु याःनि । अथे हे मेगु न्यापु म्ये कृष्ण देगःया भजन सफुली व यल मंगःया भिद्यःया भजन सफुली सुरक्षित जुयाच्वंगु दु । पौभाःया म्ये व उकिया विस्तृत विवरण नापं हालय श्रीग्रेड लीनहार्डजुं The Divine Play Of Lord Krishna नामं पिकयादीगु दु । कृष्ण लिला सम्बन्धी काव्यय रस, गुण व अलंकार काव्यशास्त्र कथं दुथ्यानाच्वंगु दु । दर्शन चिन्तनया समागमन जुयाच्वंगु थय्कःया काव्य आत्मानुभूतिमूलक जू । काव्य प्रस्तुतिइ वर्णनात्मक व इतिकथात्मक प्रवृत्ति स्वयाः नाटकीय प्रवृत्ति अप्वः सशक्त जू । काव्यय विषयभूमि व संगीत छस्वा छधी जुयाः न्हयानाच्वंगु दु । थय्कःया काव्यया प्रभाव लिपायापिं मेमेपिं कवि, कवयित्रीत ऋद्धिलक्ष्मी, आदिपित तर्क लाःगु खनेदु (वैद्य, ने.सं ११०६:२७२) ।

श्री निवास मल्ल (ने.सं ७४७- ने.सं ८०७) :- श्री निवास मल्ल सिद्धिनरसिंह मल्ल धुंकाः यलया लाय्कूलिं पिदंम्ह नेपालभाषाया छम्ह उत्कृष्ट कवि खः । थय्कःया फुक्क धया थें म्येय लोकनाथया आराधना यानातःगुलिं श्री निवास मल्ल लोकनाथया उपासक खः धयागु स्पष्ट जू । थय्कःया अबुजु सिद्धिनरसिंहया म्ये अप्वः धया थें निर्गुण भक्ति जाः थें, थय्कःया म्ये वात्सल्य भक्ति जाःगु खनेदु । थय्कःया अमर कृति दशावतार नाटक खः, गुगु नाटक फुक्क पद्य च्वयातःगु दु । थय्कलं चिना थकूगु आपाः धया थें म्ये, थय्कःया

नेपालभाषा साहित्यया इतिहास/५१



दशावतार नाटक संग्रहलय् दुथ्याना चवंगु दु । नारायण सुरगन संसार न भिन  
थ्वय्कःया दकलय् ताहाकःगु व रचनाया दृष्टि तःजिगु म्ये खः । भक्ति, श्रृंगार,  
नीति, दर्शन व देश वर्णन थ्वय्कःया म्येया मू विषय जूगु दु ।

प्रताप मल्ल (ने.सं ७६१- ने.सं ७९४) :- मैथिली कवि विद्यापतिया श्रृंगार  
प्रवृत्ति प्रभावितम्ह येंया जुजु प्रताप मल्लयात नेपालभाषाया प्राचीन श्रृंगारिक  
कविया रूपय् म्हसीकेगु याः । थःत कवीन्द्र धायेके यःम्ह प्रताप मल्लं नेपालभाषां  
४० पुं मल्याक म्ये चिनावंगु दु । तर थ्वय्कःया म्ये सिद्धिनरसिंह मल्लपिनिगु म्ये  
थें स्थानीय दाफा भजनय् उलि हालेगु याःगु खनेमदु । भक्ति, उपदेश, लाय्कू  
श्रृंगार, ऋतु वर्णन थ्वय्कःया म्येया मू विषयवस्तु जूगु दु । श्रृंगारिक म्येय् कृष्ण  
राधाया मतिनाया म्ये हे अप्पः खनेदु । थुकथं प्रौढ स्तरीय भाषां तःजिगु लाय्कू  
श्रृंगारिक म्ये व बौद्धिकतां जाःगु उपदेशात्मक म्ये चिनादीम्ह प्रताप मल्ल १७ गूगु  
शदीया नेपाःया छम्ह सशक्तम्ह कवि जूगु दु ।

जगतप्रकाश मल्ल (ने.सं ७६४ - ने.सं ७९३) :- संस्कृतया रीति  
परम्पराया काव्य धाः नेपालभाषाय् न्ह्याकूम्ह ख्वपया जुजु जगतप्रकाश मल्ल १७  
शदीया संयोग श्रृंगार पक्षया छम्ह स्पल्लाम्ह कवि खः । जयदेव, विद्यापति थें  
ज्याःपि कवित पाखें प्रभावितम्ह जगतप्रकाश थःत न्हूम्ह जयदेव धकाः नं चवयेगु  
याः । थ्वय्कः थें ज्याःपि कवितय्गु प्रादुर्भावं तत्कालीन नेपालभाषाया काव्यं छगू  
स्तरीयता प्राप्त यात । थ्वय्कलं नेपालभाषां जक मखु मैथिली, संस्कृत भाषां नं  
आपालं कविता चव्यादीगु दु । रीति गुणं जाःगु म्ये चिनेगुली १७ शदीया छम्ह  
सशक्त कवि थ्वय्कः नं जूगु दु । जगतप्रकाश मल्ल व थ्वय्कःया मन्त्री चन्द्रशेखर  
निम्हं जानाः जगतचन्द्र धकाः नां न्हयथनाः चवःगु ५१९ पु म्ये संग्रह नेपालभाषा  
गीत (संगीत भाषा) थौं प्राचीन काव्यया छगू स्पेल्लाःगु दसु जूगु दु । थ्व मुना दुने  
दुथ्याःगु अष्टनायिका गीत काव्यया मिखां स्वयेबलय् तसकं च्वछाये वहजू । थुपिं  
नायिका भेद वर्णन सम्बन्धी च्यापु म्ये ख्वप लाय्कूया नाग पुखुलिइ छगू  
शिलाभिलेखय् सचित्र किइकाः पलिस्था यानातःगु दु । थ्वय्कःया नेपालभाषा गीत  
म्ये संग्रहस दुथ्याःगु आपालं म्ये थ्वय्कःया मूलदेव शशीदेव नाटकय् दुथ्यानाचवंगु  
दु । प्राचीन काव्यय् यक्व विषय-वस्तु ज्वनाः म्ये चिनाथकूपिं कवित मध्ये  
जगतचन्द्रससिं नं खः । भक्ति, श्रृंगार, देश प्रेम बाहेक राजवंशया वर्णन, उपदेश,  
शोक, ऋतु वर्णन, समसामयिक खँ व सांस्कृतिक ज्याखँया वर्णन थें ज्याःगु  
विषययात नं थःगु काव्यय् दुथ्याकेगु ज्या थ्वय्कलं यानादीगु दु । अथे हे काव्यया  
भाव अनुकूल जुइक संगीत ध्वनि व माधुर्यता थ्वय्कःया काव्यय् दु । थ्वय्कःया  
श्रृंगारिक म्ये अप्पः धयाथें रति विलास ग्वाकिगु कथंयागु जूगु दु ।

जितामित्र मल्ल (ने.सं ७९३-ने.सं ८१३) :- थःगु नांया न्हयःने सुमति  
धकाः न्हयथनादीम्ह ख्वपयाम्ह जुजु जितामित्र मल्लया संस्कृत मैथिलि चव्यातःगु

आपालं म्ये लुयावःसां नेपालभाषां चव्यातःगु आःतक च्यापु म्ये जक लुयावःगु दु ।  
थ्वय्कलं चव्यादीगु म्येय् लाय्कू श्रृंगारिक म्ये हे अप्पः खनेदु ।

ऋद्धिलक्ष्मी (ने.सं ८००- ने.सं ८०७) :- थ्वय्कः येंया जुजु पार्थिवेन्द्र  
मल्लया कलाः तथा भूपालेन्द्र मल्लया मां खः । थौं तकयागु उपलब्धी कथं लानी  
ऋद्धिलक्ष्मी नेपालभाषाया जक मखु नेपाःया हे छम्ह न्हापांम्ह कवियित्री कथं  
परिचित जूगु दु । काव्यशास्त्रया परम्पराकथं चव्यातःगु सोव सोव रसिकन स्वव  
वसन्त नांगु थ्वय्कःयागु लुयावःगु म्ये थ्वय्कःया काव्य प्रतिभा स्पष्ट यानाव्यूगु  
दु ।

जयलक्ष्मी (ने.सं ८०५-८२६) :- थ्वय्कः यलयाम्ह जुजु योगनरेन्द्र मल्लया  
छम्ह लानी खः । थ्वय्कःया निपु म्ये लुयावःगु दु । आत्मपरकता हे थ्वय्कःया  
म्येया मूलभूत प्रवृत्ति खः । थः भाःतं मेपिनिगु चुकलि खँ न्यनाः थःत तापाका  
हःगुलिं थःत जूगु दुःख आदियात प्वकातःगु थ्वय्कःया म्ये पुरुष प्रधान समाजय्  
मिसातय्गु स्थिति व थाय्यात ब्वयेगु याःगु दु ।

भुवनलक्ष्मी (ने.सं ८०७-८२१) :- थ्वय्कः येंया जुजु भूपालेन्द्र मल्लया  
लानी व जुजु भाष्कर मल्लया मां खः । थ्वय्कःया स्वपु म्ये - जय देवी सोगुलि  
भुवनया थकुरानी नांगु दुर्गा भवानी स्तुति म्ये, हादे अतिन सुन्दर देश कान्तिपुरी  
नाम हाय स्वय नांगु देशया सौन्दर्ययात च्वछायातःगु देश प्रेमया भावनां जाःगु  
म्ये, छि छम्हस्या आस दास भेव मदु जित गति धकाः आत्म आलोचना यानातःगु  
आत्मपरकतां जाःगु म्ये लुयावःगु दु । म्येया माध्यमं देया गौरव गाथा नापं  
स्थानियता न्हयब्वयेगु, ज्या न्हापां थ्वय्कःया म्येय् जूगु दु ।

कुमुदिनी देवी (ने.सं ८४२-८७७) :- कुमुदिनीदेवी येंया जुजु जगज्जय  
मल्लया लानी व जयप्रकाश मल्लया मां खः । थ्वय्कलं थः भाःत जगज्जय मल्ल  
नाप जानाः श्रृंगार व भक्ति रसं जाःगु म्ये चिनेगुया नापं थम्हं नं अलग हे म्ये  
चिनावंगु दु । थ्वय्कःया भवानी छि चरण शरण सदान म्ये छपु उल्लेख यायेबहगु  
म्ये खः । गुगु म्ये थौं तक नं स्वनिगःया विभिन्न दाफा भजन खलकं हालेगु याः  
नि । भक्ति उपदेश थ्वय्कःया म्येया मूलभूत विषय जूगु दु । गाम्भीर्य भाव,  
पाय्छिगु उपमा, माधुर्य संगीतात्मकतां जाःगु थ्वय्कःया म्ये, थ्वय्कःयात  
नेपालभाषाया छम्ह प्रतिभा सम्पन्न कवियित्री कथं परिचित याकूगु दु ।

रणजित मल्ल (ने.सं ८४२- ने.सं ८९०) :- नेपालभाषां दकलय् अप्पः  
प्याखं चव्यावम्ह ख्वपया जुजु रणजित मल्ल प्याखं म्ये च्वमि कथं जक मखु देश  
प्रेमया भावनां जाःगु म्ये च्वइम्ह च्वमिकथं नं न्हयलू गु दु । हाय हाय राम  
थ्वय्कःया तसकं हे चर्चित म्ये खः ।

नेपालभाषा साहित्यया इतिहास/५३



**वृद्धिलक्ष्मी (ने. सं ८४२-ने.सं ८९०) :-** स्वप देयाम् वृद्धिलक्ष्मीदेवी जुजु रणजित मल्लया लानी खः । थ्वय्कःया खुपु म्ये लुयावःगु दु । अप्वः धया थें म्ये भक्ति रस प्रधान जूसां, भक्ति प्रवृत्ति नापं श्रृंगारिकता, उपदेश तथा ध्याचूयात म्येया विषय कथं कःघाःगु दु । थ्वय्कःया गुलिं गुलिं म्येय् तत्कालीन राजनैतिक घटनाया नं संकेत दु । थ्वय्कःया प्रत्येक म्येय् थः काय्या हक अधिकार सुरक्षित यायेगु, सरक्षण यायेगु निमित्त सः थ्वयाच्वंगु दु । वृद्धिलक्ष्मी च्वयादीगु म्ये मध्ये **क ख ग घ** या म्ये न्हयथने बह जू । थ्व म्ये वृद्धिलक्ष्मीया काव्य प्रतिभा यचुक व्वयाव्यूगु दु । थुपिं म्ये स्वप व थिमिया दाफा भजनय् थौं तक नं हालेगु याःनि ।

**जयप्रकाश मल्ल (ने.सं ८५५-ने.सं ८९०) :-** ये देया अन्तिम जुजु जयप्रकाश मल्ल थःगु ईया छम्ह स्येल्ताःम्ह कवि खः । धयागु खँ वय्कःया **रत्नेश्वर प्रादुर्भाव, वीरध्वजोपाख्यान** नाटकय् च्वंगु प्याखंम्ये स्पष्ट याः । थ्वय्कःया आत्मपरक स्तुति म्येय् थःगु जीवनया किचः जक मखु देया राजनैतिक स्थिति या संकेत नं दु ।

**दयालक्ष्मी (ने.सं ८५५-८७०) :-** दयालक्ष्मी देवी येँया जुजु जयप्रकाश मल्लया लानि खः । वय्कःयात छम्ह आत्मपरक कवयित्रीया रुपय् परिचित यायेछि । ने.सं ८६६ निसं ८७० तक लाय्कूया तःधी काजीपिनिगु खँ न्यनाः जुजु जयप्रकाश मल्लयात लानि दयालक्ष्मी राज्यच्युत यानातःगु खः । लिपा जुजु थःगु शासनभार लितकार्सेलि लानियात सासना वीगु ज्या यात । थुगु इलय् दयालक्ष्मी थः प्रभुयाके क्षमा पचनाः म्ये चिनाः हालातःगु खनेदु । थज्याःगु हे छपु म्ये **चित्त तसे प्रभु विनत्ति खँ ल्हाये** खः । थ्व म्येय् कवयित्री थःगु द्विविद्वं वाचायेकाः **निरवुद्धि तिरि जाति धकाः थःत थम्हं आत्म आलोचना** यानाः थः भाःतयागु न्हापाया माया लुमंका च्वंगु खनेदु । अथे हे कतःया खँ न्यनाः रानी दयालक्ष्मी थःत अन्याय व विश्वासघात याःसां जुजु जयप्रकाश प्याखं व म्येचिने बलय् थः मायात स्वया नं दया लक्ष्मीया नां लुमंका म्ये चिनेगु याःगु दु । (वैद्य, ने.सं ११०६: ८७६) ।

लाय्कू खलकं बाहेक जन साधारण पाखें नं प्राचीन काव्य भण्डार जायेकेगुली तिवः जूगु दु । थथे जन साधारण पाखें पिदपिं प्रमुख कवित खः

**केशव उदाश (ने.सं ७२०-७३२) :-** हनुमान प्याखंया कथात्मक म्येया समाप्ति वाक्यय् 'ल्हाकम्ह'या रुपय् खनेदुम्ह केशव उदास, आःतकयागु अनुसन्धान कथं नेपालभाषाया बाखंम्येया दकलय् न्हापांम्ह जात कवि खः । केशव उदास चिना थकूगु म्येया मू प्रवृत्ति श्रृंगारिकता खःसा, भक्ति गौण प्रवृत्ति कथं न्हयलूगु दु । नेपालभाषाया पुवाज्या म्ये थें जाःगु लोक म्येयात काव्य शास्त्रीय लक्षणं जाःगु माया मतिना सम्बन्धी बाखंम्येया रुपय् छयलादीम्ह कवि थ्वय्कः हे खः ।

नेपालभाषा साहित्यया इतिहास/५४

**जगतकेशरी (ने.सं ७९८) :-** भौत देय्या जनसाधारण पाखें पिदम्ह कवि जगतकेशरीया नां उल्लेख जूगु **चण्डेश्वरी स्तोत्र** शीर्षकया छपु स्तुति म्ये लुयावःगु दु । थ्व म्ये भौतय् थौं नं वैशाख लच्छि यंकं व विशेष यानाः चण्डेश्वरीया जात्राबलय् स्वन्हु तक पाठ व भजन यायेगु चलन दु । थ्व पौराणिक बाखंया लिधंसाय् चिनातःगु स्तोत्र जुयाः नं थुकिया शैली थुकियात मौलिक स्वतन्त्र रचना थें च्वंकाव्यूगु दु ।

थथे च्वय् उल्लेख जूपिं कवि, कवयित्रीत बाहेक प्राचीन इलय् मेपिं नं आपालं लाय्कुलिं नापं जनसाधारण पाखें पिदपिं कवि, कवयित्रीत दनि । गथे - **नृपेन्द्र मल्ल, पार्थिवेन्द्र मल्ल, योगनरेन्द्र मल्ल, भूपतिन्द्र मल्ल, योगप्रकाश मल्ल, विष्णु मल्ल, राज्यप्रकाश मल्ल, भाष्कर मल्ल, जगज्जय मल्ल, सदाशिव मल्ल, चन्द्रलक्ष्मी, वृषमानन्द, विलदातासिंह नागनसाध्वज** आदि । धाथें धायेगु खःसा, म्ये चिना मवीपिं शासकत थुगु इलय् मदु हे धाःसां ज्यू । तर जनसाधारण पाखें धाःसा म्ये चिनावीपिं कवितय्गु नां म्ह हे जक लूगु दु । थथे जनसाधारण पाखें म्ह हे जक च्वमित खनेदुगुया कारण छुं अवश्य दयेफु । संगीत शास्त्रया ज्ञान मदयेकं म्ये चिने मफइगु व थज्याःगु शास्त्रीय ज्ञान सर्वसाधारणयाके मदइगु, सामन्ति मनोवृत्तिया कारणं जुजु लानिपिनीगु म्ये जुल कि जुजु लानिपित लय्तायेकेभनं दाफा भजनय् हालीगु तथा सुरक्षित यानातइगु, सर्वसाधारण च्वमितय्सं हीनताबोधया कारणं, थपिनिगु नां मतसे म्ये रचना यानागु ईया शासकतय्गु नां जक बिइगु आदि यानाः तत्कालीन इलय् सर्वसाधारण कवित आपाः खने मदुगु जुइफु ।

थौं नेपालभाषाया प्राचीन म्ये छगू पुलांगु साहित्यिक विधा जुयाः जक महत्वपूर्ण जूगु मखुसे भीगु धर्म संस्कृति या छगू अभिन्न अंग नं जुइधुंकूगु दु । विविध थपिनिगु विविध भजन स्तुति हालेगु, विविध नखः पर्वबलय् विविध राग तालया म्ये हालेगु चलन थौं तकं ल्यनाच्वंगु थुकिया दसु खः । अथे हे प्राचीनकालं निसं थौं नं म्ये आत्म अभिव्यक्तिया छगू सशक्त व सवल माध्यम जुयाः भीगु जीवन नाप भ्यले पुनाच्वंगु दु ।

## न्हयच्वःगु प्राचीनकालया नाटक

थौं जक मखु प्राचीनकालं निसं साहित्यया तःजिगु विधा नालातःगु मध्ये नाटक नं छगू खः । नेपालभाषाय् नाटक शब्दया पर्याय कथं प्याखंयात कायेगु याः । तर प्याखं धायेबलय् नेपालभाषाय् **नाटक** जक मखु, **हुलाप्याखं, भावनृत्य** आदियात नं थुइकेगु चलन दु । तर अथे खःसां थन प्याखं धकाः नाटकयात जक थुइकेगु जुइ । नेपालभाषा साहित्यय् नं नाटक प्राचीनकालं निसं छगू तःजिगु व

नेपालभाषा साहित्यया इतिहास/५५



लोकंकाः गु साहित्यिक विधा जूग दु । थुकिया पुष्टि स्वयम तत्कालीन मल्ल शासकतयसं नाटक च्यावांगु, नाटक म्हितावंगु, लायकूया विविध उत्सवय् नाटक क्यनावंगु ऐतिहासिक तथ्य याः गु दु । अथे हे साहित्यिक दृष्टि नं सृजनात्मक सशक्ततां भयविउगु प्राचीन विधा म्येयां लिउ नाटक हे जूग दु ।

**विकास :** आतकयागु अनुसन्धान कथं नेपालभाषाय् बाखं, म्ये, च्वयेगु परम्परा न्हायेधुंकाः तिनि नाटक च्वयेगु जूग खनेदु । नेपालभाषां लिखित रुपय् नाटक खनेदये न्ह्यः हे हुलाप्याखं, भावनृत्यं जक मखु मेगु भाषाया नाटक नं थनया जनजीवनय् क्वात्तुक हा कायेधुंकूग खः । थ्व खं यात थनया अभिलेख, वंशावलीं पुष्टि याः गु दुसा, यै, यल, ख्वप लायकूया न्ह्यःने दुगु दबू त्वाःत्वालय् दुगु दबूचा थुकिया दसि जुयाव्यूगु दु ।

नाटक सम्बन्धी थौं तकया अनुसन्धान कथं जलदःया नामं पिकाइगु हरिसिद्धि प्याखं नेवाः संस्कृति, दुने प्रचलनय् वयाचवंगु प्याखं मध्ये दकलय् पुलांगु प्याखं खः (कसाः १०८४:४) । थ्व हरिसिद्धि पुराण कथं ई.पू. १५० स्वयां न्ह्यः पिदंगु प्याखं खः । देववंशावली कथं जुजु विक्रमादित्यं उग्रतारा देवीया उजं कथं थ्व प्याखं दयेकूग (पौडेल, वि.सं. २०२०: ६४) खः । हरिसिद्धि प्याखं न्हापां नाटकया रुपय् दुगु, तर लिपा ने. सं. ६०५ य् वनाः नृत्यया रुपय् हिलावंगु खः धयागु धारणा दु । लिपा दथुइ त्वाःदला वंसां नं प्रताप मल्लया पालनिसें थौं तक जलया नेवाःतय्सं हरिसिद्धि प्याखं प्रदर्शित याना वयाचवंगु दु । थौंकन्हय् थ्व नाटकया रुपय् मखु, भावनृत्यया रुपय् दु ।

पूर्व मध्यकाल निसं हे नेवाःतयगु जनजीवनय् नाटकं महत्वपूर्ण थाय् काः गु खनेदु । थुगु इलय् जुजुपिनि मचा जंक्व, जन्मन्हि, इहिपा व्रतवन्ध आदिया उत्सव तथा सतः, देगः, जःधुं, हिति, बही आदि निर्माण, जिर्णोद्धार याइगु लसताय् नाटक क्यनेगु चलन दुगु खं वंशावली तथा अभिलेख आदि पुष्टि याः गु दु । ने.सं. ३७६ स जयदेव जुजुया मेनंटुन्य नागपटुवन्धविधि विधान याः बलय् नन्ही प्याखं क्यंगु धर्म मल्ल देवया जन्मोत्सवया लसताय् चतुरङ्ग नाटक हुइकूग, अथे हे धर्म मल्लया इहिपाया लसताय् ने.सं. ५०३ पौषकृष्ण एकादशी कुन्हु 'भैरवानन्द प्याखं क्यंगु (बज्राचार्य, ने.सं. १९९२ : ४४-४५) खं वंशावलिइ उल्लेख जूग दुसा ईबहीया अभिलेखय् ने.सं. ५४७ जेष्ठ शुक्ल एकादशी कुन्हु ईबहिइ लुं गजू छाःगु व ध्वंय् ब्वयेकूग लसताय् जुजु ज्योतिर मल्ल विज्याकाः रामभारो च्वःगु वीरवाहु प्याखं क्यन धयागु खं उल्लेख जूग दु । थथे थुगु इलय् विविध पर्व, उत्सवय् प्याखं क्यनेगु जक मखु, जुजुपिं थःपिसं हे प्याखनय् ब्वति काः गु नं खनेदु । पण्डित शंखलखु च्वःगु रत्नागत प्याखं (ने.सं. ४४०) जुजु जयरुद्र मल्ल थम्हं हे ब्वति कयाः हुइकूग खं गोपालराज वंशावलिइ (पृ. ४७) उल्लेख जूग दु ।

पूर्व मध्यकालय् मन्चन जुल धकाः वंशावलिइ, अभिलेखय् उल्लेख जूग गुलि नं नाटक थौं लुयावःगु दु, व दक्कं नेपालभाषां च्यावातःगु मजुसे संस्कृत, मैथिली, आदि भाषां च्यावातःगु खः । ईबहीया अभिलेखय् उल्लेख जूग वीरवाहु

प्याखंयात नेपालभाषां च्यावातःगु नाटक खः धकाः पण्डित हेमराज शाक्य धयादीसां थुकिया पाण्डुलिपि थौं तक लुइके मफुनिगुलिं 'वीरवाहु' प्याखंयात नं नेपालभाषां च्यावातःगु प्याखं खः धकाः क्वःछिनाः धायेमछिनि । थथे पूर्व मध्यकालय् थनया जनजीवनय् नाटकया प्रचलन दुसां थुगु इलय् नाटकय् नेपालभाषाया प्रयोग खनेमदु । उत्तर मध्यकालय् थ्यंकाः वलुहं वलुहं बंगाली, मैथिली, संस्कृत आदि भाषा नाप नेपालभाषा नं ल्वाकज्यानाः नाटक पिदन । नाटक च्वयेगु ज्याय् न्हापां नेपालभाषायात निर्देशन बिइगु माध्यम कथं जक निं छयलेगु यात । थथे नेपालभाषाया न्हापां प्रयोग जूग नाटक जुजु जयस्थिति मल्ल ईया मैथिली भाषाया नाटक रुक्माङ्गद चरित्र (१२३ पौषा थ्यासफू, रा.अ.) खः । थथे हे ने.सं. ५३२ स ज्योतिर्मल्लया पालय् जुजु स्वयम्भू ल्हवंबले हुइकूग चतुरङ्क रामायणय् नं नेपालभाषायात निर्देशन माध्यम कथं छयलातःगु दु । लिपा तिनि मुक्कं नेपालभाषां नाटक च्वयेगु जुल । थथे नेपालभासं च्यावातःगु नाटक मल्ल जुजुपिनिगु इहिपाया लसताय् हुइकीगु जक मखु, प्याखंया धेंधेंबल्लाः यानाः सिरपाः बिइगु परम्परा तर्क उत्तर मल्लकालय् खनेदु । भूपतिन्द्र मल्लया इहिपाःबलय् प्याखंया धेंधेंबल्लाः यानाः यँया प्याखंयात २०१- तका, थिमि सक्व, गोल, चांगु आदि थासं हःगु प्याखंयात ६६ मोह सिरपा बिल (बज्राचार्य, ने.सं. १९९२ : १५) धकाः भूपतिन्द्र मल्लया धरःपतिइ उल्लेख जूग दु । थुकथं उत्तर मल्लकालय् वयाः नेपालभाषाया नाटकया आपालं विकास जुल । गुलि नाटक नेपालभाषां जक च्वयेगु जुलसा आपालं नाटक मैथिली, संस्कृत, बंगाली हिन्दी आदि भाषा नाप ल्वाकछ्याना नं च्वयेगु जुल । नेपालभाषां नाटक च्यावातःपिं च्वमित मध्ये आपालं च्वमितसे मेगु भाषा मैथिली, संस्कृत आदि भाषां नं नाटक च्यावांगु खनेदु ।

अथे हे आतकयागु अनुसन्धान कथं नेपालभाषां दकलय् न्हापां नाटक च्वयेगु ज्या यलया जुजु सिद्धिनरसिंह मल्ल याः गु खनेदु । वय्कःया एकादशीव्रत (ने.सं. ७५३) छ्वाःप्याखं नेपालभाषाया न्हापांगु नाटक जूग दु । एकादशी व्रतया महिमायात कयाः च्यावातःगु थ्व छ्वाःप्याखं, श्री निवास मल्लयागु देशअवतार नाटक संग्रहलय् दुथ्यानाचवंगु दु । एकादशीव्रत प्याखंया छ्कू नमूना थथे खः -

ॐ नमः श्री नृत्यनाथायः नमः ॥ शून्य ॥ गौरी ॥ ज ॥ कपूर पुरस ओस ॥  
॥ ..... सिद्धिनरसिंह मल्ल सहित समान । मंगलमय प्रस (२) जुय कृपान ॥ इति एकादशी व्रत नाटक समाप्त ॥११॥ (रा.अ, माइको. फि नं. ए ३४६।१८)

अथे हे थ्व नाटक च्वःगु संवत् न्हयथनेत - शिवदिस्ति, शिव सतुर, असतर । मुन सहित नेपार संवत्छर धकाः (ने.सं. ७५३) न्हयथना तःगु दु ।

सिद्धिनरसिंह मल्लया लिउ यलं हे श्री निवास मल्ल, योगनरेन्द्र मल्लपिं खनेदत । श्री निवास मल्लं पद्यात्मक भाषां दशअवतार नाटक संग्रह जक च्वःगु मखु, सिद्धिनरसिंह मल्लं नीस्वंगु काति प्याखनय् बालकथ (बाथः प्याखं) प्याखंया नं



प्रयोग यात । अथे हे योगनरेन्द्र मल्लं विक्रमादित्य प्याखं च्याः प्राचीन प्याखं वल्लंकेगुलिइ तिबः विल ।

स्वपं जगतप्रकाश मल्लं मूलदेव शशीदेव थें ज्याः गु ग्यसुलाः गु पूधाः प्याखं च्याः तत्कालीन प्याखं परम्पराय हे छगू कथं हिउपाः हल । जगतप्रकाश मल्लं थः गु मेमेगु नाटकय थें धार्मिक वाखं वा आख्यान पाखें कथावस्तु मकासे उगु ईया सामाजिक परवेश कथं थम्हं कथावस्तु सृजना यानादिल, नापं नाटकया मू पात्र जुजु व राजकुमार मयासे छम्ह साधारण ब्रम्हूयात छयल । इच्छा व कुतःया बलं छम्ह साधारण मनुखं नं थः गु मंतुना पूर्वकं फु धयागु सन्देश विल (माली, वर्ष ३ : अंक ३) तर थथे सामाजिक विषयवस्तु ज्वनाः सर्वसाधारण मनुयात नाटकया नायः कथं व्वयेगु ज्या गुगु मूलदेव शशीदेव नाटकय जुल थ्व छगू प्रयोग कथं जक जुल, प्रवाह जुयाः धाः सा न्ह्यायेमफुत । अथे हे थ्व मूलदेव शशीदेव प्याखं नेपालभाषाया जक मखु नेपालया हे आतक सिउ कथं दकलय न्हापांगु वियोगान्त नाटक खः । जगतप्रकाश मल्लयां लिपा स्वप लायकुलिं हे भूपतीन्द्र मल्लं नेपालभाषां जक ४ गू नाटक च्यावन सा, रणजीत मल्लं १४ गू नाटक च्याः कीर्तिमान तयावन । अथे हे ३० गू अंक, २४६ पत्र दुगु महानाटक शनैश्चररोहिणी (ने.सं ८६२) च्याः रणजीत मल्लं थः गु प्रतिष्ठा जक जायेकेगु यानामवंसे नेपालभाषा नाटकया हे गौरव थकयावन ।

अथे हे यें पाखें भूपालेन्द्र मल्ल, जगज्जय मल्ल, जयप्रकाश मल्ल थेज्याः पिं नाटककारत पितन । भूपालेन्द्र मल्लं चोर चक्रवर्ती, जगज्जय मल्लं सुन्दर कुमार थें ज्याः गु नाटक च्यावन सा येंया दकलय लिपायाम्ह जुजु जयप्रकाश मल्लं राजनैतिक अस्थिरताया बावजुद नं प्यंगू नाटक च्याः, नाटक च्वयेगु परम्पराय निरन्तरता बियावन । थ्वयकःया रत्नेश्वरया प्रादुर्भाव, वीरध्वजोपाख्यान नाटक थौं प्रकाशनय वये धुंकूगु दु । तर जुजु जयप्रकाश मल्लया लिपा मल्ल जुजु खलकं नाटक च्वयेगु ज्या दित धाः सां जिउ ।

**स्वरूप :** थौया नाटकया दृष्टिं प्राचीन नाटक आपालं पाः सां गुलिं गुलिं खँय आपालं ज्वः लाः गु नं दु । थौं थें प्राचीनकालय नं छधाः प्याखं पूधाः प्याखंया चलन दुगु खनेदु । छम्ह हे च्वमिं पूधाः प्याखंया नापं छधाः प्याखं नं च्वयेगु याः गु दु । पूधाः प्याखंया भोलय २ गू अंक दुगु धन्यावति थें ज्याः गु नाटक निसें ३० गू अंकया शनैश्चररोहिणी थें ज्याः गु नाटक नं खनेदु । प्रत्येक अंक दुने दृश्य विभाजन याये कथं 'लू' धकाः विभाजन यायेगु चलन दु । छगू हे अंकय तः गू लू खनेदु । तर छगू अंक दुने थुलि हे 'लू' दयेमाः धयागु छुं निश्चित नियम मदुसां न्हापांगु अंक स्वयां लिपाया अंकय 'लू'या ल्याः अप्वः जुइमाः धयागु दु ।

प्राचीन कालय छगू हे नांया नाटक तःम्ह जुजुपिंसं च्यावंगु खनेदु । तर नाटकया नां समान जूसां नाटकया अंक, लू, पौ, फरक फरक खनेदु, नापं नाटकया प्रस्तुति नं अलग्ग अलग्ग कथंयागु जूगु दु । नेपालभाषा व मैथिली भाषा, ल्वाकछ्यानाः भूपतीन्द्र मल्लया इहिपाया लसताय जितामित्र मल्लं ने.सं

८०७ य च्वः गु मदालसा हरण नाटक, श्री निवास मल्लं नं व हे इलय व हे नाटक च्वल । अथे हे योगनरेन्द्र मल्लं नं व हे मदालसा हरण नेपालभाषा व मैथिली भाषां हे नाटक च्वल । तर थुमिगु प्रस्तुति छम्हसिया मेम्ह नाप गाक्कं पाः गु दु ।

थौया नाटकया भाषा अप्वः थें गद्य जूसां शास्त्रीय नियम कथं नाटक काव्य विधा दुने लाः । काव्ययषु नाटक रम्यम् धैगु धापुतिं नाटक काव्यया छगू अंग खः धैगु स्पष्ट जू । तर अथे ख्याः नं नेपालभाषाया गुलिं गुलिं प्राचीन नाटक गद्यभाषां च्यातः गु नं दु सा गुलिं गुलिं नाटक पद्य भाषां नं च्यातः गु दु । खयेत ला प्राचीन नाटकय राजवर्णन, देश वर्णन, नान्दी म्ये आदि पद्यात्मक भाषां हे जुइ, तर अथे खः सां गुलिं गुलिं नाटकय सम्वाद आदि तर्क गद्यं मजुसे पद्यं हे जूगु दु । दशअवतार, रत्नेश्वर प्रादुर्भाव आदि पद्यात्मक नाटकया नमूना खः ।

प्राचीन नाटक मुक्कं नेपालभाषां स्वयाः नं अप्वः थें नेपालभाषा व मैथिली भाषा ल्वाकछ्यानाः च्यातः गु दु, थथे नेपालभाषा नापं मेमेगु भाषा छयलातः गु नाटक मध्ये ८५ गू स्वयाः अप्व प्राचीन नाटकय मैथिली भाषा छयलातः गु दु । अभ्र छगू हे नाटकयात स्वता प्यता भाषां, गथे : संस्कृत, मैथिली, बंगाली, हिन्दी, नेपालभाषा आदि ल्वाकछ्यानाः च्यातः गु नं खनेदु । नेपालभाषा नाप नापं मेमेगु भाषा छयलाः नाटक च्यातः गुलिइ मूलतः नाटक प्रस्तुति यायेगु दबू, पात्र अभिनय आदि निर्देशित वाक्य फुक्क नेपालभाषां जुयाः पात्रतयगु खँ ल्हाबल्हा जक मेगु भाषां च्यातः गु खनेदु । अथे हे छम्ह हे च्वमिं विविध भाषां नाटक च्वयेगु याः गु नं अप्वः खनेदु । थ्व हे कारणं नाटककारत आपाः खनेदयाः नं अले नाटकया सफू आपाः दयां नं मुक्कं नेपालभाषां च्यातः गु नाटक प्राचीन इलय उलि खनेमदु । थौं तकया अनुसन्धान कथं मुक्कं नेपालभाषां जक च्यातः गु नाटक ४० ति लूगु दु । थथे मुक्कं नेपालभासं च्यातः गु नाटक गुगुं छधाः प्याखंया रुपय दुसा गुगुं पूधाः प्याखंया रुपय दु । थुपिं मध्ये ३८ गू लायकू खलकं च्वः गु दुसा २ गू जक जनसाधारण पाखें च्वः गु लुयावः गु दु ।

प्राचीन नाटक थौं तर्क गुलि नं लुयावः गु दु, अप्वः थें संस्कृतया नाटक परम्परा नाप ज्वः लाः सां, सूत्रधार वयाः पात्र परिचय बीगु, राजवर्णन, देश वर्णनया म्ये हालेगु आदि थः गु हे कथं जूगु दु । थुगु इलय नाटकया प्रयोजन व्वनेत वा व्वकेत मखुसे स्वयेत वा क्यनेत जूगुलिं तत्कालीन नाटकया संरचना थ्व हे कथं जूगु दु । मनोरञ्जन बिइगु हे थुगु ईया नाटकया मू ध्येय जूगुलिं नृत्य, संगीत, वाद्यवादन आदि प्राचीन नाटकया अनिवार्य तत्व जूगु दु । थथे प्राचीन नाटकय नृत्य अनिवार्य तत्व जूगुलिं जुइ, नेपालभाषाय 'नृत्य' नाटक नितान्यात नं छगू हे शब्द 'प्याखं' धायेगु याः गु खः - (श्रेष्ठ, ने.सं १०८८) थथे हे थौकन्हय्या हिन्दी प्याखनय थें प्राचीन नाटकय नं देशवर्णन, राज वर्णन, पुरुष उक्ति, सुन्दरी स्त्री उक्तिया रुपय प्याखं दुने म्ये हालेगु प्रचलन दु ।

प्राचीन नाटककारत आपाः सिनं थम्हं हे नाटकया कथावस्तु सृजना याः गु खनेमदु । उगु ईया प्रचलित पुराण, आख्यान आदिपाखें कथावस्तु कयाः थः पिनिगु



नं कल्पना छ्यलाः नाटक रचना याः गु खनेदु । धाथे धायेगु खःसा थुगु ईया नाटक धयागु हे आख्यानयात दबुलिइ क्यने जिइक न्ह्यब्वयातः गु खः । थ्व हे कथं गुलिखे पुलांगु नाटकया नां **वीरविरणी कथा**, **षड्दर्शन कथा** धकाः तकं तयातः गु दु ।

थुगु ईया नाटकया कथानकया मूल आधार **रामायण**, **महाभारत**, **जातक**, **अवदान**, **पुराण** आदि जुगू दु । मेमेगु भाषाया प्राचीन नाटक थें नेपालभाषाया प्राचीन नाटक धयागु हे मू पात्रं याः गु छुं ज्याया वर्णन वा वयात जुगु छुं घटना चित्रण कथं जुगु दु । नेपालभाषाया अप्वः नाटकया कथावस्तु तत्कालीन प्रचलित उपाख्यान पाखें काइगु जुगुलिं **प्याखं** शब्द नं **पाख्यान** पाखें हे वः गु खः धयागु धापू नं गुलिं गुलिं छि नितयगु दु । वास्तवय् **प्याखं** खं ग्वः धाःसा संस्कृत **प्रेक्षण**, प्राकृत **पेक्खन** न्ह्यपुलां नेपालभाषाय् **पेखन** जुजुं **प्याखं** जुगु खनेदु । नाटकया कथावस्तु छुं पाख्यान पाखें कयातः गु खः, उकिया नामं नाटकया शीर्षक छुइगु चलन दु ।

अथे हे प्राचीन नाटकय् कार्यव्यापार (Action) तथा खं ल्हाबल्हा स्वयां नं नृत्य व संगीतं अप्वः ई कयाचंगु खनेदु । पात्रतयसं पलाः छपलाः तकं संगीतया ताल शास्त्रीय विधि कथं छिइमाः । प्याखनय् छुं दृश्य वयेत्यन, छुं घटना जुइत्यन धयागु खं म्येया बोल, वाजंया तालं हे सिइदु । थुकथं प्राचीन नाटक छगू कथं संगीत नृत्यया धुकू धाःसां जिउ । थथे संगीत नृत्य सम्बन्धी शास्त्रीय ज्ञान माः गु बाध्यता नं प्राचीनकालय् जनसाधारण पाखें अप्वः नाटककारत पिदने मफुगु खः ।

पूर्वीय परम्पराया प्रभाव लाः गु नेपालभाषाया नाटकय् नाटकया नायः धीर वीरम्ह जक मखु, अलौकिक शक्ति तकं दुम्ह जुइगु ला स्वाभाविक खः । तर थुलि जक मखु समाजया विविध वर्गयापिं फुक्कं मनूत नं नाटकय् प्रतिनिधित्व याकेगुया नापं, देव दैत्यत नं नाटकया पात्र कथं हे दुथ्याका तः गु खनेदु । अले नाटकय् दुथ्याकातःपिं देव/देवी पात्रतय् धाथें हे देव देवी भाःपा भक्ति श्रद्धाया आस्थां स्वयेगु जक मखु, पूजा तकं यायेगु नं चलन दु । थथे आपालं आपाः पात्रत दुथ्याकेगु चलन दुगु नेपालभाषाया नाटकय् पात्रतय्गु परिचय नाटकया खं ल्हाबल्हां मजुसे सूत्रधारं वा पात्रत थः हे दबुलिइ वयाः परिचय बिइगु चलन दु । थ्व नेपालभाषाया नाटकया थः गु हे विशेषता खः । तर परिचय बिइगु क्रमय् 'छं धाः गु खव' धकाः वहे वहे खं पु तःक्वः लिसा लिसा कायेका तइगुलिं धाःसा थौंया मिखां स्वयेबलय् प्राचीन प्याखंया खं ल्हाबल्हाय् गाकं हे फ्यासु पहः खनेदु । तर अथेसां पात्रतय्गु स्तर हैसियत अनुसार खं ल्हाबल्हा याकातः गु खनेदु । तर संस्कृत भाषाया नाटकय् उच्चवर्गया मिजंतय् संस्कृत भासं नवाका, मिसा वा निम्न वर्गयापिं मनूतय् प्राकृत भासं नवाकी थें नित्ता भाषाया प्रयोग यायेगु चलन नेपालभाषाया नाटकय् खनेमदु । तर छता खं, नाटकया पात्रत-पो, च्यामखलः आदितसें थःत थम्हं तसकं हे क्वहंकाः थः गु परिचय बिइकातः गु खं तत्कालीन समाजय् अमि प्रतिया दृष्टिकोण स्पष्ट याः गु दु । अथे हे जुजु लानिपिसं थःपिनिगु परिचय बिइबलय् फयां फक्व च्छायाः परिचय बिइकेगु याकातः गु खं तत्कालीन सामन्त समाजया ख्वाःपाः ब्वयेगु याः गु

दु । तर असत्यया पराजय सत्यया जय क्यनेगुया नापं दर्शकतय् आनन्द, मनोरञ्जन बिइगु हे प्राचीन नाटकया मू उदेश्य जुगु दु ।

प्राचीन नाटकय् वातावरणया सृजना पात्र खं ल्हाबल्हा पाखें स्वयां नं म्ये बाजं पाखें जुइ । नाटकय् संघर्ष न्ह्यलुयाः नं थ्व विशेषत निगू देया संघर्ष, दैत्य व मनूया संघर्ष, निगू विचाःया अन्तरद्वन्द्व कथं जक जुइ, गुगु थौंया नाटकया संघर्षया रूप स्वयाः आपालं हे पाः । **समयान्वति**, **स्थानान्वति**, **कार्यान्वति** (Unity of time, place & action) जुइमाः धयागु बाध्यता खनेमदु, छुं भचा दु सा कार्यान्वति (Unity of action) जुगु खनेदु । नाटकया अन्त अप्वः थें संयोगान्त जूसां संस्कृत साहित्यय् थें संयोगान्त जक जुइमाः धयागु मदु, वियोगान्त नं जुइ फु, जगतप्रकाश मल्लयागु **मूलदेव शशीदेव**, राजेन्द्रविक्रम शाहया **महासत्त्व** प्याखं थुकिया दसु खः । तर थ्व संयोगान्त वियोगान्तया अर्थ नाटकया अन्तय् संयोग जुइगु व वियोग जुइगु दृष्टि जक खः । पाश्चात्य त्रासदी थें नायकया पतन क्यनाः करुणा व त्रास थनाः त्रासदी जुइकेगु वा मूपात्रया मूर्खतायात उलाः गिजय् यानाः कमेडी जुइके कथं मखु ।

## प्रमुख नाटककार

नेपालभाषाया प्राचीन नाटकं विषयलय् आ तक बोलाक अध्ययन अनुसन्धान जुगु मदिनि । तर अथे खयां नं आतकया मालेज्यां लूपिं न्ह्यथनेबहःपिं प्राचीन नाटककारत थथे दु ।

**सिद्धिनरसिंह मल्ल** (७३९-७८९) : थ्वय्कः नेपालभाषां न्हापां नाटक च्यादीम्ह नाटककार खः । थ्वय्कःया **एकादशीव्रत** (ने.सं ७५३) छधाः प्याखं नेपालभाषाया न्हापांगु नाटक खः । थ्व **दशावतार** नाटक संग्रहस दुथ्यानाचंगु दु । **एकादशी व्रत** नाटक च्वयेगु बाहेक थ्वय्कलं **कातिप्याखं** नेपालभाषा व संस्कृत ल्वाकछ्याना ने.सं ७६९ पाखें च्वः गु खनेदु । थ्व काति प्याखं थौं तक नं काति दबुलिइ हुइकेगु याःनि ।

**श्री निवास मल्ल** (ने.सं ७७८-८०५) : थ्वय्कलं नेपालभाषां **दशावतार** नांगु छधाः प्याखंपुचः च्यादीगु दु । खयेत ला थ्व अपूर्णगु नाटक खः । अय्सां पद्यभाषां च्यातः गु थ्व नाटकं श्री निवास मल्लया कवि प्रतिभायात ब्वयाव्यूगु दु, संगीत नापया नाटकया स्वापू क्यनाब्यूगु दु । अथे हे सिद्धिनरसिंह मल्लं प्रचलनय् हः गु काति प्याखनय् **बाथः** प्याखं समावेश यानाः काति प्याखंयात लोकप्रिय यायेगु ज्मा थ्वय्कः पाखें जुगु दु ।



**जगतप्रकाश मल्ल** (ने.सं.७६५-७९३) :- स्वयंकः छम्ह स्येल्लाःम्ह कवि जक मखु, नाटककार नं खः धयागु खँ स्वयंकःया थःगु हे मौलिकतां जाःगु **मूलदेव शशीदेव** (ने.सं. ७९२) पूधाः प्याखनं स्पष्ट याः । **मूलदेव शशीदेव** प्याखं नेपालभाषाया न्हापांगु पूधाः प्याखं जूसां छगू स्येल्लाःगु प्याखं खः । छगू कथं थ्व प्याखं सफू नेपालभाषाया प्राचीन म्येया धूकू धाःसां ज्यू ।

**योगनरेन्द्र मल्ल** (७८७-८२६) :- योगनरेन्द्र मल्लं **माधवानल कामकुण्डल** धइगु प्रेम आख्यान दुगु नाटक च्याः थकूगु न्यने दु । तर अथेसां स्वयंकलं नेपालभाषां छगू जक नाटक **विक्रमादित्य** च्यादीगु लूगु दु ।

**भूपालेन्द्र मल्ल** (ने.सं. ८०७-८२९) :- यँ पाखें नेपालभाषां न्हापां नाटक च्यावंम्ह नाटककार भूपालेन्द्र मल्ल खः । स्वयंकःया **चोर चक्रवर्ती** नांगु नाटक लुयावःगु दु ।

**भूपतीन्द्र मल्ल** (ने.सं. ८१६-४२) : स्वयंकलं नेपालभाषां ४ गू नाटक (१) **विक्रम चरित** (८२६ प्र १०९०) (२) **श्रीखण्ड चरित** (?), **स्येमन्तकोपाख्यान** (ने.सं. ८२६), **पद्मावती** (ने.सं. ८२६) नांगु पूधाः प्याखं च्यादीगु दु । **विक्रम चरित** नाटक ख्वप तलेजु देगल्य गज्जू छाःगु लसताय् क्यंगु नाटक खः । मल्ल जुजुपिं मथ्ये दकल्य् अप्वः २९गुलिं मल्याक नाटक च्यावंम्ह जुजु स्वयंकः हे खः । तर थुपिं नाटक नेपालभाषां जक च्यातःगु मखु ।

**रणजीत मल्ल** (८४२-९०) :- रणजित मल्ल नेपालभाषाय् नाटकया संख्याया दृष्टिकोणं दकले अप्वः १४ गुलिं मल्याक नाटक च्या वंम्ह नाटककार जक मजुसँ प्राचीन नेपालभाषाया नाटकय् दकल्य् ताःहाःगु महानाटक च्याथकूम्ह नाटककार नं खः । स्वयंकःया नेपालभाषा नाटक खः - (१) **शनैश्चर रोहिण्युपाख्यान** (ने.सं. ८६२) (२) **चन्द्रागदोपाख्यान नाटक** (ने.सं. ८६५) (३) **हरगण कथा** (ने.सं. ८७५) (४) **ययात्सुपाख्यान** (ने.सं. ८८५) (५) **गणेश दिक्पाल** (ने.सं. ८८५) (६) **वीर वीरिणी कथा** (ने.सं. ८८५) (७) **कृष्ण चरित्रोपाख्यान** (८) **मदन चरित्र नाटक** (९) **गोरक्षोपाख्यान** (१०) **दिक्पाल गणेशोपाख्यानम्** (११) **पृथुपाख्यानम्** (१२) **सुब्रम्हण्योपाख्यानम्** (१३) **षड्दर्शन नाटक** (१४) **भानुमति हरणोपाख्यान** । स्वयंकःया दकल्य् ताःहाःगु नाटक ३० गू अंक दुगु, 'शनैश्चर रोहिण्युपाख्यान' खः । थ्व नाटक न्हि छगू अंक हुइकेगु ल्याखं च्वःगु खनेदु ।

**जगज्जय मल्ल** (ने.सं. ८४२-८५५) :- यँ पाखें नेपालभाषां नाटक च्यावंम्ह छम्ह नाटककार जगज्जय मल्ल नं खः । **सुन्दर कुमार** स्वयंकलं च्यादीगु नाटक खः ।

**जयप्रकाश मल्ल** (८५६-८८८) :- स्वयंकलं नेपालभाषां प्यंगू नाटक च्यादीगु दुसा निगू नाटक थौं पिदने धुकूगु दु । थुपिं खः - **रत्नेश्वरया प्रादुर्भाव** (८८०, प्र १०८४), **वीरध्वजोपाख्यान** (च्व ८७७ प्र १११५) । अथे हे पिमदंगु नाटक खः (१) **भैरव प्रादुर्भाव** (ने.सं. ८८०) (२) **स्वस्थानी व्रतकथा** खः । **रत्नेश्वरया प्रादुर्भाव** पद्यभासं च्यातःगु प्रतीकात्मक कथंया नाटक खः सा **वीरध्वजोपाख्यान** तत्कालीन परम्परा कथंयागु नाटक खः । थुपिं नाटक छगू कथं प्राचीन म्येया धूकू धाये बहजू ।

**रत्न बज्राचार्य** (?) :- मल्लकालय् लायकू खलकं बाहेक, आतकया अध्ययन कथं जनसाधारण पाखें पिदम्ह छम्ह नाटककार रत्न बज्राचार्य नं खः । स्वयंकःया **वसुन्धरा** नांगु नाटक लुयावःगु दु । तर थ्व नाटक निगू मितियागु लुयावःगु दु । थथे लूगुलिइ छगू ने.सं. ७६४ यागु खः सा मेगु ने.सं. ८१६ यागु खः ।

**रुद्रसिंह दैवज्ञ** :- स्वयंकः जुजु महेन्द्र सिं (ने.सं. ८२१-८४२) या ईयाम्ह नाटककार खः । स्वयंकलं **धन्यावती** नांगु नाटक च्यावंगु खनेदु ।

थुकथं आतकया अध्ययन कथं यँ, यल, ख्वप लायकू खलकं ९ म्ह नाटककारत व जनसाधारण पाखें २ म्ह नाटककारत लुयावःगु दु । दकल्य् अप्वः नाटक च्वयेगु ज्या ख्वपया जुजुपिसं यानावंगु दु । नेपालभाषाया च्वय् उल्लेख जूपिं नाटककारत बाहेक मेमेपिं नं नाटककारत व नाटक सफू लुया वयेफुगु आपालं सम्भावना दु ।

प्राचीन नाटक साहित्यया बांलाक ब्वँज्या मजुनिगुलिं सु गुम्ह नाटककार छु गथे च्वं धकाः बांलाक ध्वाथुइके मफुनि । प्राचीन नाटक विधाय् मिसापिं च्वमित आतक लूगु मनुनि, नापं जनसाधारण पाखें नं नेपालभाषां प्याखं च्यावंपिं मेपिं च्वमित नं उलि खने मनुनि । अथे हे लुइ धुकूगु नेपालभाषाया प्राचीन नाटकया सफूत नं थौतक विभिन्न कारणं बांलाक प्रकाशनय् हयेमफुनि । थथे प्राचीन नाटक नेपालभाषाया नितिं जक मखु नेपाःया नितिं हे प्राचीन गौरवया विषय जुयां नं थौं तकया दुने छगू दर्जन तक नं प्राचीन नाटकया सफू प्रकाशित यायेमफुगु दुःखया खँ खः । प्राचीन नाटक नेपालभाषाया भाषिक साहित्यिक दृष्टिकोणं जक मखु, नेपाःया धर्म, संस्कृति व नृत्य संगीतया अध्ययन दृष्टिकोणं नं उलि हे महत्वपूर्ण जूगु दु ।



## लिचवःगु प्राचीनकाल (ने.सं. ८८८-९६७)

मल्ल शासनकालया अन्तं निसं जंगबहादुरया प्रधानमन्त्रीकाल शुरु जुइ न्हयः तकयागु समयावधियात नेपालभाषा साहित्यया इतिहासय् लिचवःगु प्राचीनकाल कथं नालेगु जूगु दु । नेपाःगाःया शासन सत्ता मल्ल शासकतय्गु ल्हातिं शाह जुजुपिनिगु ल्हातय् लाःवने धुंकाः नं नेपालभाषाया साहित्यय् मल्लकालीन साहित्यिक प्रवृत्ति हे मूलरुपं कायम जुयाचवंगुलिं थुगु ईया साहित्ययात लिचवःगु प्राचीनकालया साहित्य कथं नालेगु जूगु खः । खयेत ला अतः परं देश भाषा, स्वदेश भाषा आदि धकाः गुगु थाय् नेपालभाषां मल्लकालय् कयावःगु खः, व थाय् शाह जुजुपिनिगु उदय निसं काये मखन, साहित्य सृजनाया ज्याय् लाय्कू खलकं न्हापा थें सक्रिय रुपं व्वति कायेगु ज्या मजुल, सरकारी ज्याखंय् नेपालीभाषा, देवनागरी लिपिं थाय् कयाहल, अथे खयां नं तत्कालीन जनजीवनय् धाःसा थ्व भाय्या प्रभुत्व ल्यना हे च्वन । नेपालभाषा मातृभाषा मखुपिसं नं थ्व भाय्यात निगूगु भाषा (Secondary language) कथं नालेगु जुल । थुकथं शाह जुजुपिसं राजनैतिक रुपं थ्व स्वनिगलय् विजय प्राप्त याःसां थनया साहित्य, कला, संस्कृतियात हुया छवयेगु ज्या थुगु इलय् तक मजुन । वरु थःपिसं तक थुकियात नालाकायेगु याःगु खनेदु । जुजु प्रतापसिंह शाहया पालय् नेपाःया भोट नाप जूगु सन्धी (ने.सं ८९५) पत्रय् नेपालभाषा छयःगु, रणबहादुर शाहं नेपालभाषां म्ये चिनावंगु, राजेन्द्रविक्रमं नेपालभाषां महासत्व प्याखं च्यावंगु थुकिया दसु खः । अथे हे नेपालभाषा साहित्यं थनया धर्म संस्कृतिलिसे नं क्वातुक हा कायेधुकूगुलिं धार्मिक, भृंगारिक, ख्यालि, ध्याचूया म्ये, मुक्तक म्ये, बाखंम्ये आदि चिनेगु हालेगु, विविध नखः जात्रा उत्सवय् विविध कथंया बाखं कनेगु न्यनेगु, विविध जात्रा उत्सवय् प्याखं क्यनेगु परम्परा जनसाधारणय् मन्दगतिं सां न्ह्याना हे च्वन । थ्वया साहित्यिक स्वरुपय् नं ईया हिउपाः कथं छुं कथंया हिउपाः खने दःसां न्हापाया परम्परा, प्रवृत्ति मूल रुपं कायम हे जुयाच्वन । थुकथं नेपालभाषाया साहित्य विकासया निम्ति अनुकूल अवस्था मदुसां थ्व प्रति तत्कालीन शासकतय्गु नकारात्मक दृष्टि मजुनगुलिं थुगु इलय् नं साहित्य सृजनाया ज्या थःगु कथं न्ह्यानां च्वन । थुगु ईया साहित्यय् खनेदुगु विधा खः -

म्ये

बाखं

नाटक

## लिचवःगु प्राचीनकालया म्ये

लिचवःगु प्राचीनकालया साहित्यय् न दकलय् उपलब्धमूलक विधा काव्य खः । थुगु ईया काव्य धयागु हे मल्लकालय् थें म्ये खः, गुगु - बाखंम्ये, भजनम्ये, सिलः, तुतः, मुक्तकम्ये, सिन्हाज्याम्ये, ख्यालि ध्याचूम्येया रुपय् दु । थुगु ईया म्येया रचनाकारतय् न्हापा थें जुजु लानिपिं मजुसे फुक्क धया थें जनसाधारण हे जूगु दु, म्हो हे जक रचनाकारतय्सं थःपिनिगु नां न्हयथनावंगु दु, अप्ठः धया थें म्येया रचनाकारतय्सं थःपिनिगु श्रद्धाभक्ति देछाये थें तत्कालीन शासकतय्गु नां न्हयथना वनेगु याःगु दु । म्येया रचना समय न्हयव्वयेगु भोलय् न न्हापा मल्लकालय् थें आपाः चर्चामपिसं सकेतात्मक रुपं तिथि मिति न्हयव्वयेगु नं याःगु दु ।

नेपालभाषाया काव्य साहित्यया इतिहासय् थःगु हे मौलिक सृजना कथं खनेदुगु मल्ल कालनिसं न्ह्यानाचवंगु बाखंम्येया विकास थ्व हे इलय् आपाः जूगु दु । बाखं नं घानाः म्ये हाले छिंका चिनातःगु लयवद्ध रचना विशेष हे बाखंम्ये खः । बाखं दुनेया घटना भ कलाक क्यनायकेगु थज्याःगु कथात्मक काव्यया विशेषता खःसां थुगु ईया बाखंम्येय् घटना भ कलाक व्वयायकेगु प्रवृत्ति उलि खनेमदु । रचनाकारतय्गु नां न्हयमथंसे रचना जूगु ईया शासकतय्गु नां जक न्हयथनातःगु थज्याःगु अज्ञात कविपिनिगु बाखंम्येय् तत्कालीन, सामाजिक, आर्थिक राजनैतिक, सांस्कृतिक अवस्थाया सशक्त चित्रण दु । थुगु ईया बाखं साहित्य उलि क्यनेमफुगु तत्कालीन जनजीवनया किपा बाखंम्ये व्वयेगु याःगु दु । थःपिनिगु सुख दुःखयात निर्भिक व स्वतन्त्र रुपं अभिव्यक्त यायेगु ज्या थज्याःगु बाखंम्येय् जूगु दु । जुजु प्रतापसिंह शाह निसं जुजु राजेन्द्रविक्रम शाहया शासनकाल तकया समयवधिइ दुने थज्याःगु सामाजिक यथार्थपरक बाखंम्येया आपालं रचना जूगु दु । शासक तथा सामन्ततय्गु अन्याः अत्याःया भण्डाफोर, लजगाःया लागी परदेशय् वनेमाःपिं मिजंतय् कलाःपिनिगु आलाप विलाप आदि थज्याःगु हे बाखंम्येया मू विषयभूमि जूगु दु । अथे हे समसामयिक घटनाया सूचंया रुपय् नं थुगु ईया कवितसे बाखंम्येयात छयःगु खनेदु - सितलामाजु, रानी विजयालक्ष्मी बाखंम्ये थज्याःगु हे थुगु ईया राजनैतिक सामाजिक यथास्थितिया सूचं विइगु म्ये खः । इतिकथात्मक शैलिइ मल्लकालय् चिनातःगु रणजीत मल्लया रामायण म्ये, जगतकेशरीया चण्डेश्वरी स्तोत्र, अज्ञात कविपिनिगु मणिचूड, सुलोचना माधव आदि शीर्षकया बाखंम्येया तुलनाय् भाव अभिव्यक्तिया दृष्टिकोण थुगु ईया सामाजिक यथार्थपरक बाखंम्ये आपालं च्वन्ह्याःगु खनेदु (वैद्य, ११०६ : ६५७)।



वाखम्ये बाहेक थुगु इलय् मल्लकालय् थें आपालं उपास्य देव देवीपनिगु सिलः तुतःया रचना जूगु दुसा कृष्णभक्तिया म्ये नं थुगु इलय् आपालं पिदगु खनेदु । भक्ति व श्रृंगार जाःगु थज्याःगु म्ये नेपालभाषाया तत्कालीन काव्ययात समृद्ध यायेगुली आपालं तिबः ब्यूगु दु । थथे खयां नं सिद्धिनरसिंह मल्लया भक्ति श्रृंगारया म्ये ति थुगु ईया कृष्णभक्तिया म्ये उलि गहन उलि स्तरिय जूगु मदु । भक्ति काव्य बाहेक श्रृंगार तथा नारी हृदयया करुण, क्रन्दन दुगु मुक्तक म्ये नं थुगु इलय् आपालं रचना जूगु दु । थुगु ईया मुक्तक म्येय् अप्वः थें रुप यौवनं जाःमह नायिकाया नखशिख वर्णन, नायक नायिकाया नौकभोक लिलाया वर्णनया नापं लिथु हयाः भाःतं वाका चवनेमाःपिं, भाःत परदेश बनाः वाया चवनेमाःपिं, लमिया जालं चण्डालमह भाःतनाप हवनेमाःपिं मिसातय्गु करुण क्रन्दन दु । मेमेगु म्येय् स्वयां नं थज्याःगु म्येय् उगु ईया जनजीवनया घात प्रतिघात सशक्त रुपं अभिव्यक्त जूगु दु । नाप थज्याःगु म्येय् शास्त्रीय संगीतया पलेसा सरल व स्वभाविक लोकलय्या प्रयोग जुयाच्वंगु दु ।

मल्लकालीन काव्यया तुलनाय् लिच्वःगु प्राचीनकालया काव्यया अभिव्यक्ति पक्षय् छुं हिउपाः वःगु खनेदु । थुगु ईया काव्यय् शास्त्रीय संगीतं थाय् कया हे च्वंगु दु सां, वार्णिक छन्दं नं बुलुहुं बुलुहुं थाय् कयाहःगु दु ।

## प्रमुख कवि

थुगु इलय् अप्वः थें कवितसैं थःपनिगु नां न्हयथनावंगु मदु, तर निम्ह प्यम्ह नां सीदुपिं कवित थुकथं दु -

सुन्दरानन्द (ने.सं. ११३-१५३ दुने) :- सुन्दरानन्द थःगु ईयाम्ह छम्ह प्रख्यात बौद्ध पण्डित खः । थ्वय्कलं काव्य व मेमेगु विषयया नं छुं च्वयेगु यानादीगु दु । थ्वय्कलं नेपालभाषा, नेपाली, संस्कृति, हिन्दी आदि विविध भाषां काव्य च्वयेगु यानादीगु दु । मल्लकाल लिपा खनेदुम्ह नेपालभाषाया न्हापांम्ह जात कवि थ्वय्कः हे जूगु दु । जुजु श्री ५ राजेन्द्रविक्रम शाह, रानी त्रिपुरासुन्दरी व मन्त्री भीमसेन थापाया गुण वर्णन, श्री ५ पृथ्वीनारायण शाह निसं श्री ५ राजेन्द्रविक्रम शाहया शासनकाल तकया कीर्तिगाथा व थःगु दुःख, सुखया अनुभूति जाःगु थीथी मार्मिक म्ये मुनाः थ्वय्कलं त्रिरत्न सौन्दर्य गाथा नाम सफू च्वयाथकादीगु दु । थ्व सफुलिइ नेपालभाषां चिनातःगु ४ पु म्ये नं दुथ्याःगु दु । कवि सुन्दरानन्दया म्येया मू विषयवस्तु थः आश्रयदातापनिगु गुण, यश, कीर्ति वर्णन यायेगु जूगु दु । थ्वय्कःया त्रिरत्न सौन्दर्य गाथा सफुलिइ च्वंगु प्यपु म्ये प्रशस्ति काव्यया प्रतिनिधि म्ये धायेवह जू । सुन्दरानन्द छम्ह प्रशस्ति कवि खयाः

नं मिथ्या प्रशंसा, खुशामद कृतिमतां थ्वय्कःया काव्यय् थाय् कयाच्वंगु खनेमदु । थ्वय्कलं फुक्क धया थें म्ये वार्णिक छन्द चिनावंगु दु (वैद्य, ने.सं ११०६) ।

लक्ष्मीसुनन्दन (ने.सं ११९ पाखेयाम्ह) :- थःगु नांया न्हयःने विप्र धकाः न्हयथनादीम्ह लक्ष्मीसुनन्दन आतक सूकथं नेपालभाषाय् दकलय् न्हापां वार्णिक छन्द म्ये चिनेगु यानावंगु कवि खः । थ्वय्कलं वार्णिक छन्दय् उपास्यदेवी शारदा यागु थीथी नां, रुप, गुण वर्णन यानाः ४/४ पादया गुंगू श्लोक दुगु शारदा स्तोत्र चिना थकादीगु दु । थ्व स्तोत्र वय्कलं संस्कृत परम्परागत स्तोत्र रचना पद्धति कथं चिनातःगु दु । थ्व हे स्तोत्र स्वयाः नेपालभाषाया लिपाया कवित वैकुण्ठप्रसाद लाकौलपिसं छन्दय् कविता चिने सयेकूगु खः (वैद्य, ने.सं ११०६) ।

अमृतानन्द (ने.सं १२०-१५१ पाखेयाम्ह) :- अमृतानन्द मल्लकाल धुंकाः पिदम्ह छम्ह प्रमुख कवि जक मजुसे उगु ईया बौद्ध साहित्य तथा नेपालभाषाया छम्ह तःधम्ह विद्वान नं खः । थ्व खंया दसि वय्कलं नेपालभाषां अनुवाद यानादीगु चरपतिपाद स्तोत्र, हनुमान नाटक तथा तत्कालीन ब्रिटिश रेजिडेन्ट ब्रायन हजसन हफ्टनयात च्वयाव्यूगु नेपालभाषा व्याकरण (ने.सं १५१) आदि सफू खः । थ्वय्कलं आपालं रचनाय् पूर्वक थःगु नां न्हयव्वयेगु यानादीगु मदु । आःतकया दुने थ्वय्कःया १४ पु ति म्ये विभिन्न बहाः बहीया दाफा भजनय् लुयावःगु दु । थथे लुयावःगु अप्वः थें म्ये बौद्ध तथा शक्ति उपास्य देव देवीपनिगु भजन स्तुति म्ये जूगु दु (वैद्य, ने.सं. ११०६) । भजन स्तुतिया म्ये बाहेक थ्वय्कःया सिन्हाज्याम्ये छपु नं लुयावःगु दु । नेपालभाषां इतिकथात्मक म्ये चिनादीपिं च्वमिपिं मध्ये थ्वय्कः नं छम्ह खः । थ्वय्कलं वार्णिक छन्द नं छयलेगु यानादीगु दु । थथे उपास्य देवदेवीपनिगु भक्ति आराधना यायेगु थ्वय्कःया काव्य प्रवृत्ति स्वयेबलय् थ्वय्कः मल्लकालीन कवित नाप ज्वःलाःगु दु सा वार्णिक छन्द काव्याभिव्यक्ति विङ्गु स्वयेबलय् माध्यमिककालया कवित नाप सतिङ्गु खनेदु । थ्वय्कःया बौद्ध धर्म सम्बन्धी म्ये संकलन यानाः भाजु छत्रबहादुर कायष्टं पिकयादीगु (ने.सं. १११२) दु ।

विजयानन्द (ने.सं १२८ पाखेयाम्ह) :- विजयानन्द जुजु गीर्वाणयुद्धया लाय्कुलिइ दुथ्याःम्ह कवि खः । थ्वय्कलं इष्ट देवदेवीपनिगु स्तुति म्ये, श्रीकृष्णया चरित्र लिला सम्बन्धी म्ये, देश वर्णनया म्ये आदि चिना थकादीगु दु । थ्वय्कलं चिनाथकादीगु फिखुपुं मयाक म्ये यल भिद्यःयाथाय्, बुंगद्यःयाथाय् च्वंगु भजन सफुतिइ लुयावःगु दु । थ्वय्कःया फुक्क धयाथें म्ये परम्परागत स्तुति शैली कथंयागु जूगु दु ।

मक्षध्वज (ने.सं १३७-१६७) : मक्षध्वज जुजु राजेन्द्रविक्रम शाहया शासनकालीन कवि खः । थ्वय्कःया निपु उपास्य देवदेवीपनिगु स्तुति म्ये



लुयावःगु दु । स्तुति म्ये जूसां थःगु दैन्य स्थितियात व्वयातःगुलिं थ्वय्कःया म्येय् आत्मपरकताया गुण नं पिज्वःगु दु ।

**विश्वहर्ष (ने.सं. ९५५ पाखेयाम्ह) :** विश्वहर्ष यलया छम्ह नांजाःम्ह बौद्ध पण्डित खः । थ्वय्कः अमृतानन्द, सुन्दरानन्दया समकालीन कवि खः । आतक थ्वय्कःया ४ पु म्ये यलया बौद्ध विहार व भोजपुरया शाक्यमुनि विहारया दाफा सफुलिइ लूगु दु । थुपिं म्ये स्तुति, भक्ति सम्बन्धी जूगु दु । थ्वय्कःया काव्यय् भक्ति व श्रृंगार रसयात स्येल्लाक ह्वनातःगु खनेदु (वैद्य, ने.सं ११०६) ।

थुकथं लिच्वःगु प्राचीनकालया म्ये मल्लकालीन म्ये नाप आपालं ज्वःलानाः न न्हापा द्यः, देश आदिया जक स्तुति म्ये खनेदुथाय् थुगु इलय् वयाः जुजु भारदारपनिगु नं कीर्ति गाथाया म्ये खनेदत ।

## लिच्वःगु प्राचीनकालया बाखं

लिच्वःगु प्राचीनकालया साहित्यय् संख्यात्मक दृष्टिं दकलय् अप्वः साहित्य सृजना जूगु विधा बाखं खः । संख्यात्मक दृष्टिं आपालं बाखं सफू थुगु इलय् पिदनेगु जूसां गुणात्मक दृष्टिं मल्लकालीन बाखंया तुलनाय् थुगु ईया बाखनय् छुं खास भिन्नता खनेमदु । थ्वहे कथं थुगु इलय् नं बाखंया मू विषय धार्मिक जूगु दु । न्हापायागु हे लौकिक, औपदेशिक बाखंयात थीथी इलय् ल्ह्ययाः व्वनेगु कनेगु नं जूगु दु सा गुलिं न्हून्हुगु नं धार्मिक बाखं थुगु इलय् च्वयेगु जूगु दु । थथे आपालं ई न्ह्यानाः नं आपालं बाखं पिदनाः नं बाखंया विषयभूमी, बाखंया प्रस्तुतिइ हिउपाः मवःगुया मू कारण - थुगु इलय् तक नं बाखं साहित्यिक अध्ययनया दृष्टिं च्वयेगु, व्वनेगु मजुसे धार्मिक, सांस्कृतिक, नैतिक दृष्टिं बाखं कनेगु, च्वयेगु, व्वनेगु जूगुलिं खः । थुगु इलय् विशेषतः **बौद्ध अवदान** जातक **बाखं विकासया समयावधि** कथं नं नालेबह जू । मल्लकालीन बाखंया तुलनाय् थुगु ईया बाखनय् आपालं नेपाःया थाय्बाय्था नां रीतिथिति नखःचखः आदिया खं उल्लेख जूगु दु । थुगु इलय् खनेदुगु छुं छुं बाखं खः -

- सप्तकाण्ड रामायण (ने.सं. ९३८, रा.अ.)
- अध्यात्म रामायण (ने.सं ९४९, रा.अ.)
- रामायण (ने.सं. ९६६, रा.अ.)

नेपालभाषा साहित्यया इतिहास/६८

- भीष्म-युधिष्ठिर सम्वाद (ने.सं ९०३, जातः १३९-४०)
- रामायण (ने.सं. ९०४, जातः १४०-४३)
- अष्टमी व्रत महात्म्य (ने.सं ८९७, जातः १३६-८)
- गुणकारण्डव्यूह (ने.सं. ९४६, जातः १५८-६०)
- वीरकुशावदान (अमृतानन्द कृत, जातः १६०)
- कुशावदान (ने.सं. ९५४, जातः १७१-२)
- उपोषद व्रत कथा (ने.सं. ९५९, जातः १७४-५)
- अहोरात्र व्रत कथा (ने.सं. ९६०, जातः १७५-६), आदि

अथे हे न्हापा मल्लकालय् खनेदयेधुंकूगु - **तन्त्राख्यान, धर्मलक्ष्मी संवाद, बत्तीसपुतलिका कथा, द्वात्रिंशतिपुत्रिका, विचित्रकर्णिकावदानोद्धृत, वीरसिखा, सहस्ररजनी** आदि बाखंयात नं हानं हानं ल्ह्ययाः पिकयातःगु नं थुगु इलय् आपालं खनेदु ।

## लिच्वःगु प्राचीनकालया नाटक

थ्व लिच्वःगु प्राचीनकालय् तसकं हे म्हो जक प्याखं च्वयेगु जूगु दु । छगू निगू प्याखं च्वयेगु जूगु नं मल्लकालीन प्याखं परम्परा कथं हे जूगु दु । थुगु इलय् रचना जूगु नाटक खः ।

**हनुमान नाटक (ने.सं ९२०) :** थ्व अमृतानन्द संस्कृत मूल नापं तयाः नेपालभाषां हिलादीगु खः । सफूया लिउने च्वयातःगु कथं थ्व सफू अमृतानन्द पात्पाया जुजु पृथ्वीपाल सेनयात यलय् कुनातःबलय् अनयात नेपालभाषा स्यने कथं च्वयेगु जूगु खः ।

**महासत्वोपाख्यान (ने.सं. ९५१) :** लिच्वःगु मल्लकालय् रचना जूगु छगू जक नाटक **महासत्वोपाख्यान** खः । जुजु राजेन्द्रविक्रम शाहं रचना यानादीगु थ्व महासत्वोपाख्यान प्राचीन मल्लकालीन नाटक परम्परा कथंयागु हे प्याखं खः । तर मल्लकालीन शास्त्रीय नाटक परम्परा कथं च्वयातःगु जूसां थौया समाजया आपालं चित्रण थ्व प्याखनय् खनेदयेधुंकूगु दु । महासत्व नाटक महासत्व राजकुमारया दानशीलता विषययात कयाः च्वयातःगु बौद्ध जातकय् आधारित नाटक खः । तर थ्व नाटक मल्लकालीन आपालं प्याखं थें संयोगान्त मजुसे

नेपालभाषा साहित्यया इतिहास/६९



वियोगान्त जूगु दु । थ्व प्याखनं लिपा नेपालभाषाय् शास्त्रीय परम्पराया प्याखं च्वयेगु क्वचाल धाःसां जिउ ।

घंठ सफल (ने.सं १५६) : थ्व यलय् काति दबुलिइ क्यनीगु प्याखं व बाथः प्याखंया संग्रह खः । थ्व न्हापांनिसैंया परम्परा कथंयागु नाटक खःसां, थ्वयात च्वयाः पिकायेगु लिपा जक जूगु खनेदु ।

थुकथं लिच्वःगु प्राचीनकालया साहित्य समयावधिया हिसाबं ताहाः जुयाः नं उपलब्धिया दृष्टिकोणं म्हो हे धायेमाः । नापं छुं खास न्हूगु प्रवृत्ति प्रवाह थुगु ईया साहित्यं ब्वलंके फुगु मदु । तर अथे खयाः नं नेपालभाषा साहित्यया धाःयात त्वाःमदयेक न्हयाका यंकेगु ज्या धाःसा जूगु दु ।



महाकवि सिद्धिदास महाजु

(ने. सं. १८७-१०५०)



## माध्यमिककालया च्वमिपिनिगु छुं किपा



सरदार हरिभक्त माथेमा  
(ने. सं. १४३-१००५)



पं. निष्ठानन्द बज्राचार्य  
(ने. सं. १७८-१०५५)



रामजी प्रधानाङ्ग  
(ने. सं. १९४-१०६६)



मास्टर जगतसुन्दर मल्ल  
(ने. सं. १००३-१०७३)



कवि योगवीर सिंह  
(ने. सं. १००६-१०६२)



शहीद शुक्रराज शास्त्री  
(ने. सं. १०१३-१०६१)



धर्मादित्य धर्माचार्य  
(ने. सं. १०२२-१०८३)



भिक्षु धम्मालोक महास्थविर  
(ने. सं. १०१३-१०८८)



बौद्ध ऋषि महाप्रज्ञा  
(ने. सं. १०२१-१०९९)

## माध्यमिककाल (ने.सं १६७-१०६१)

नेपाःया राजनैतिक इतिहासय् मल्ल शासनकालयात माध्यमिककाल तथा शाह जुजुपिनिगु उदय निसं थुखेया ईयात आधुनिककाल नालातःगु दुसां नेपालभाषा साहित्यया इतिहास कथं राणाकालया शुरु ने.सं १६७ निसं राणाशासनया अन्त जुइ न्ह्यः ने.सं १०६१ तकया समयावधियात माध्यमिककाल नालेगु जूगु दु । खयेत ला नेपालभाषाय् माध्यमिककालया सीमा निर्धारण वारे छगू मत मजू । चित्तधर 'हृदय' जुं नेपालभाषां थासा आखलं सफू पिदंगु (ने.सं १०२९) ई न्ह्यःतकया साहित्ययात पुलांगु साहित्य भाःपाः पुलांगु नेपालभाषा साहित्यया जातः (ने.सं १०९१) हे पिकयादिलसा, डा. जनकलाल वैद्य, नर्मदेश्वरमान प्रधान, इन्द्र माली, काशीनाथ तमोट आदिपिसं कोतपर्व लिपां (ने.सं १६७) निसं थुखेया ईयात माध्यमिककाल शुरु जूगु भाःपियादीगु दु । मल्ल शासकतय्गु ल्हातं शासन सत्ता शाह जुजुपिनिगु ल्हातिइ लाःवंसां राणा शासन शुरु जुइ न्ह्यः तक नेपालभाषा व थुक्रिया साहित्ययात प्रत्यक्ष रुपं दमन यायेगु कुतः मजू । फलतः नेपालभाषा साहित्यं न्हूगु प्रवाह प्रवृत्ति ज्वनेमफुसां थःगु हे गतिं न्ह्यज्यायेगु यानांच्वन । तर राणा शासन शुरु जुइवं नेपालभाषा साहित्ययात राज्य पाखें हे प्रत्यक्ष रुपं क्वत्यलेगु, न्हंकेगु कुतः जुयावल । फलतः नेपालभाषा साहित्यय् छुं ई तक थज्याःगु प्रतिकूल परिस्थितिं नकारात्मक प्रभाव लाकूसां इलं थःगु मातृभाषा व साहित्ययात जूगु दमन व असमान व्यवहारया विरोधय् प्रतिरोध याइपिं जक मखु थ्वया प्रवाह प्रवृत्तिइ हे सीदयेक ह्यूपाः हयाः न्हूगु युगया शुरुवाट याइपिं युगपुरुषत बुइकल । थ्व हिउपालं नेपालभाषा साहित्ययात प्राचीन माध्यमिककालय् फपुइकल । थथे नेपालभाषा साहित्यं प्राचीन साहित्यिक प्रवाह प्रवृत्ति स्वयाः पाक्क, मेगु लेंपु ज्वनेगु शुरु याःगुलिं थ्व इलं निसं माध्यमिककाल शुरु जूगु नालेगु जूगु खः । थ्व माध्यमिककालयात नं निव्वय् थलाः थ्वया साहित्यिक गतिविधिया अध्ययन यायेगु चलन दु ।

- पुनर्जागरणकाल न्ह्यःया साहित्य (ने.सं १६७ - ने.सं १०२९)

- पुनर्जागरणकालया साहित्य (ने.सं १०२९ - ने.सं १०६१)

नेपालभाषा साहित्यया इतिहास/७१



## पुनर्जागरणकाल न्ह्यःया साहित्य (ने.सं १६७-ने.सं १०२९)

शाह जुजुपित हे शक्ति तापाकाः राणा शासन न्ह्याःगु जंगबहादुरया इलं निसैं नेपालभाषायात जूगु दमनया प्रतिरोध यायेकथं नेपालभाषां थासा आखलं सफू पिकाये न्ह्यः (ने.सं १०२९) अर्थात् चन्द्रशमशेरया निरंकुश शासनया ई तकया साहित्ययात पुनर्जागरणकाल न्ह्यः बा न्ह्यच्चःगु माध्यमिककालया साहित्य कथं अध्ययन यायेगु चलन दु । ने.सं १६७ स थन जूगु कोटपर्व लिपा नेपाःया शासन सत्ता जंगबहादुरया ल्हातिइ लासेलि नेपालय् निरंकुश राणातन्त्र शुरु जुल । राणातन्त्रया शुरुवात लिसैं नेपालभाषा साहित्यया विकासय् नं सिइदयेक अवरुद्ध जुजुं वल । थःपिनिगु शासन सत्ता कायम यानातयेगु नितिं फयांफतले जनतायात अन्धकारय् तयेत स्वइपिं राणा शासकतय्सं नेपालभाषा साहित्यया उत्थानय् नं अनेक पंगः थनेगु यात । नेपालभाषायात विनाश यायेगु हे तातुनाः चन्द्रशमशेरया शासनकालय् ने.सं १०२६ निसैं थुखे नेपालभाषां च्यातःगु छुं नं भों अइडा अदालतय् प्रमाण लगे जुइमखु धकाः नेपालभाषायात बहिष्कार यायेगु ज्या जुल । फलस्वरूप नेपालभाषाया साहित्य सृजनाय् जक मखु साधारण च्वज्या व ब्वनेज्याय् तकं गाकं हास वल । नेपालभाषा साहित्यया गतिइ गाकं शिथिलता खनेदत । थज्याःगु स्थितिं साहित्यया प्रवृत्ति व स्वरूपय् नं हिउपाः हयाबिल । फलत थुगु ईया साहित्य लिच्चःगु प्राचीनकालया साहित्य स्वयाः पात । थुगु ईया साहित्य सम्बन्धी आपालं खँ सिइके मफुनिगुलिं थुगु समयवाधियात नेपालभाषा साहित्यया अन्धकार युग नं धायेगु याः । पुनर्जागरणकाल न्ह्यःया साहित्य सम्बन्धी आ तकया मालेज्या कथं थुगु इलय् खनेदुगु मुख्य विधा म्ये जूगु दु सा पुलांगु हे परम्पराया जातक अवदान बाखं नं छुं पिदंगु दु ।

### पुनर्जागरणकाल न्ह्यःया म्ये

पुनर्जागरण न्ह्यःया साहित्यय् उल्लेख यायेवहःगु विधा काव्य खः । मल्लकालय् काव्य सृजनाया ज्याय् लाय्कू खलकं अप्वः सक्रियता क्यनेगु याःगु दु सा थुगु इलय् अप्वः लाय्कूलिइ दुथ्याःपिं भाइभारदारतसैं काव्य सृजनाय् ब्वति काःगु दु । नेपाःया लाय्कूलिइ शासक खलकय् थवंथवय् शासन शक्ति थःथःगु ल्हातिइ लाकेगु नियतं जूगु विविध कथंया षडयन्त्र व थःपिनिगु शासन सत्ताय

प्रभुत्व कायम यानावं तयातयेत छगू भाषा छगू धर्मया नीति ज्वनाः देशय् जागरण व चेतनाया लहरयात जिउथाय् तक पनेगु कुतः याइपिं तत्कालीन शासकत पाखे त्रसित जूपिं उगु ईया जनतां थःपिनिगु सृजना प्रवृत्ति अप्वः भक्तिकाव्य पाखे न्ह्याकिइगु स्वभाविक खः । थ्व हे कथं थ्व पुनर्जागरणकाल न्ह्यःया कवितसैं थःपिनिगु च्वसा मूलतः भक्तिकाव्यया सृजनाय् न्ह्यज्याकल । थथे खयाः नं प्राचीनकालया कवितय्गु भक्ति प्रवृत्ति व थुगु ईया कवितय्गु भक्ति प्रवृत्ति सिइदयेक हे पाःवन । उपास्य देव देवीपिनिगु स्तुति आराधनाया पलेसा सन्त उपदेशात्मक प्रवृत्तिं जाःगु काव्य थुगु ईया कवितसैं सृजना यात । साधु सन्तया रुपय् थुमिसं निर्गुण भक्तिकाव्यया धाः न्ह्याकल । अध्यात्मिक चिन्तन व परलोकया चिन्तां थुमित अप्वः प्रभावित यात । मुक्ति मोक्ष हे थुमिगु काव्यया मू तातुना जुल । थ्व काव्य प्रवृत्तियात पुनर्जागरणकाल न्ह्याये धुंकाः नं गुलिखय् कवितसैं न्ह्याकां च्वन । फलतः थ्व प्रवृत्तिया तःम्हमछि कवित ईया हिसाबं पुनर्जागरणकालया कवितय्गु समकालीन जुयाः नं थुमिगु काव्य प्रवृत्ति तथा काव्य साधनाया तातुना सिद्धिदास पुचःया च्वमित लिसे पाः वन । च्वयेगु हे याना वंसौ तत्कालीन भाषिक, साहित्यिक जागरणया ज्याय् संलग्न जूगु दु धकाः थुमित धायमछि ।

### पुनर्जागरणकाल न्ह्यःया प्रमुख कवि

स्वामि अभयानन्द (ने.सं १२४-१८३) : अभयानन्द विभाषी पुचलं पिदंम्ह नेपालभाषाया दकलय् न्हापांम्ह सन्त परम्परायाम्ह कवि खः । अभयानन्द प्रधानमन्त्री भीमसेन थापाया (ने.सं १२४-१५९) चीधिकम्ह किजा रणवीर थापा स्वामि जुइधुंकाःया नां खः । तत्कालीन नेपाःया राजनैतिक घटनां विरक्त जुयाः स्वामि जुयादीम्ह थ्वय्कलं, नेपालभाषां म्ये चिनेगु ज्या नं 'स्वामि' जुइधुंकाः हे जक यानादीगु खः । थ्वय्कःया नेपालभाषाय् ९ पु म्ये लूगु दु । वेदान्त दर्शन पाखे धेचूम्ह स्वामि अभयानन्दया अप्वः म्येय् सन्त उपदेशात्मक प्रवृत्तिं थाय् काःगु दु । अथे खयां नं आत्मपरकताया नापं जीवनवादी सुधारवादी भावनां जाःगु म्ये नं थ्वय्कलं चिनादीगु दु । गृहस्थ जीवन हनाः नं मनुष्यसं ब्रम्हाया अनुग्रह प्राप्त यायेफु, इलय् हे भी सचेत जुयाः पुण्य कर्म यायेमाः, थम्हं यानागु भूलयात हानं लिसा काये मज्यू धयागु जोसमति मतय् दिक्षित जुयादीम्ह अभयानन्दया म्येया सार खः । थुकथं वेदान्त दर्शनयात नं सरल भाषां ध्वाथुइकादीम्ह कवि अभयानन्द खः । थ्वय्कःया प्रभाव लिपायापिं कवितय्कतनं नं सिइदयेक लाःगु खनेदु । 'मायान केनकाव तल हे जगत' हानं थथिं ज्याःगु जन्म काये दइमखु रे आदि थ्वय्कःया तसकं लोकहवाःगु म्ये खः । थ्वय्कःया मे लगं, ओमबहाःया दाफा भजनय् अप्वः हालेगु याःगु दु ।

नेपालभाषा साहित्यया इतिहास/७३



सरदार हरिभक्त माथेमा (ने.सं १४३ - १०१५) : हरिभक्त माथेमा न्ह्यच्चः गु माध्यमिक ईया छम्ह न्हयलुवा कवि खः । तत्कालीन राणा शासकत पाखें सरदार उपाधि काये खम्ह हरिभक्त माथेमाया हिन्दी काव्य सफू भजन माला (ने.सं १०४९) पिदंगु दु । थ्व म्ये सफुलिइ ७ पु नेपालभाषाया म्ये नं दुथ्यानाच्वंगु दु । उकिइ थःत थमन मसिया व दुःख सिया च्वना रे , ज्ञानी मयजु थन भासँ छितः नाप लाये रे थें ज्याः गु आत्मज्ञान आत्मचेतना थनेगु कथंयागु म्ये दुथ्याः गु दु । थ्व म्ये तत्कालीन समाजय् तसकं हे लोकह्वाः गु खनेदु ।

खरदार मानबहादुर जोशी (ने.सं १६७-१०३७) : मानबहादुर जोशी पुनर्जागरणकाल न्ह्यःयाम्ह छम्ह च्वन्ह्याःम्ह साहित्य सृजक खः । थ्वय्कःया न्यागू भाग दुगु राग माला (म्ये सफू) छगू लुयावः गु दु । थ्वय्कःया म्ये नं फुक्क धया थें वेदान्त दर्शनं प्रभावित जूगु दु । पद्य रचना बाहेक थ्वय्कलं गद्यय् नं स्वस्थानी सार, शिवरात्री महात्म्य आदि बाखं च्वयादीगु दु ।

सुब्बा वीरबहादुर मल्ल (ने.सं. १६८-१०२४) : नेपाःया बहुभाषिक नेवाः कविपिं मध्ये सुब्बा वीरबहादुर मल्ल नं छम्ह खः । थ्वय्कःया हिन्दी, नेपाली, नेपालभाषाया म्ये दुथ्याः गु निर्गुण सागर नांगु मे सफू छगू ने.सं. १०१९ स वनारसं पिदंगु दु, गुकिइ निपु नेपालभाषाया म्ये दुथ्यानाच्वंगु दु । थ्वय्कलं थःगु म्येय् सांसारिक जीवन खनाः वैराग्य व इलय् चेतना दयेकाः ईश्वर भजन यायेमाः गु भाव प्वकादीगु दु । हरिया नाम लोमना वो व्यरथन फुत थो जोवन थ्वय्कःया छपु लोकह्वाः गु म्ये खः (माली, ने.सं. ११०९ : २०) ।

डिट्ठा मोतिलाल श्रेष्ठ (ने.सं १७१-१०४० पाखे) : मोतिलाल श्रेष्ठ स्वनिगःया पिने प्यूठानं पिदंम्ह पूर्व पुनर्जागरणकालया छम्ह सशक्त कवि खः । थ्वय्कःया ज्ञान भजन नांगु भजन म्ये सफू छगू ने.सं १०३४ स वनारसं पिदंगु दु । थ्व सफू शरदचन्द्र शर्माजुं वनारसं लुइका हयादीगु खः । थ्व सफुलिइ नेपालभाषाया ८ पु म्ये नापं नेपाली, हिन्दीया १०० पुं मल्याक म्ये दु । नेपालभाषाया म्येय् विभिन्न देवदेवीपिनिगु भक्ति स्तुतिया म्ये दुथ्यानाच्वंगु दु । थ्वय्कःया म्ये विशेषतः आध्यात्मिक दर्शन पाखे धेचूगु व सगुण भक्ति रसं भयब्यूगु जूसां तत्कालीन मेपिं कविपिनिगु भजन म्येय् थें निराशाया सः थ्वयाच्वंगु मदु । नापं ज्ञान गुणया खं जक बिलिबिलि जायाच्वंगु नं मदु, युगानुकूल चेतनाया प्रवाह दु, न्हूगु उपमा उपमेयया प्रयोग दु (माली, ११०९ : १३२-१४३) । स्थीर मज्जु यौवन चोनि मखु थो थ्वय्कःया थज्याः गु हे म्येया दसि खः ।

रामजी प्रधानांग (ने.सं १९४-१०६६) : नक देशय् जन्म जूम्ह रामजी प्रधानांग नं पुनर्जागरण न्ह्यःया कवितयूगु भवलय् छम्ह न्ह्यथनेबहम्ह कवि खः । थ्वय्कलं नेपालभाषा नापं नेपाली व हिन्दी भाषां नं चिनाखँ च्वयादीगु दु ।

थ्वय्कःया काव्य सम्बन्धी लुयावः गु छगू सफू खः रत्नमाला । थुकिइ नेपालभाषाया नं आपालं कविता दु । खयेत ला थ्वय्कः सिद्धिदास स्वयाः नं लिपायाम्ह कवि खः, तर थ्वय्कःया काव्यं म्येया रुप मखु चिनाखँया रुप ज्वने धुक्सां न्हापाया भक्ति परम्परायात धाःसा हाचां मगाःनिगु खनेदु । थ्वय्कःया चिनाखँ अप्वः थें उपदेशात्मक जूसां सिद्धिदासयागु थें नीति मूलक मजुसे सन्त परम्परा कथंयागु जूगु दु । उकिं थ्वय्कःयात पुनर्जागरण न्ह्यः व पुनर्जागरणकाल दथुया संक्रमण ईयाम्ह कवि कथं नं नाले छि ।

दारोगा बखतबहादुर (ने.सं १९५-१०७१) : बखतबहादुर कवि योगवीर सिंहया समकालीन खयां नं थ्वय्कःया काव्य परम्परा भक्ति प्रवृत्ति पाखे क्वसाः गु दु । नेपालभाषां चिनादीगु थ्वय्कःया ७ पु म्ये फुक्क धया थें आत्म आलोचना आत्म निवेदन कथंयागु जूगु दु । मायान केनकाव तल रे जगत , हे मैजु ज्ञानी छि जिके वःसा थामे याये कुल आदि थ्वय्कःया लोकं हवाः गु म्ये खः ।' वक्रोक्ति अभिव्यक्ति थ्वय्कःया जक मखु तत्कालीन कविपिनिगु हे छगू कथं शैलीगत विशेषता जूगु दु ।

मानलाल मास्के (ने.सं १९७-१०३७) : मानलाल मास्के नेपालभाषाया पुनर्जागरण ईया कवित सिद्धिदास, योगवीरसिंह आदिपिनि समकालीन खयां नं थ्वय्कःया काव्य प्रवृत्ति धाःसा न्ह्यच्चः गु माध्यमिककालया कविपिनिगु प्रवृत्तिनाप ज्वःलाः गु दु । थ्वय्कलं चिनादीगु नेपालभाषाया ९ पु म्येय् गनं वार्षिक छन्दसा गनं मात्रिक छन्द गनं गजल छन्द छयलादीगुलिं मानलालजु छन्दया छयलाय् गाकं निपूण धयागु सीदु । धिक धिक भी जनम थ्वय्कःया छपु नांजाः गु म्ये खः । थ्वय्कःया म्येय् छखे उपदेशात्मक प्रवृत्ति खनेदु सा मेखेर जीवन व जगत प्रतिया दृष्टिकोण नं यचुक सिइदु । 'भीसं इलय् हे थःगु कर्तव्य पूर्वकेमाः, कर्म यायेमाः' धयागु थ्वय्कःया म्येया मू सन्देश जूगु दु ।

रत्नलाल 'रत्न' : माध्यमिककालया अज्ञात कविपिं मध्ये रत्नलाल 'रत्न' नं छम्ह खः । थ्वय्कःया नेपालभाषां च्वयातः गु निपु म्ये संगीत चन्द्रोदय (ने.सं १०३३)स दुथ्यानाच्वंगु दु । थुपिं म्ये तत्कालिन भजन खलःयात हालेछिंक च्वयातः गु खनेदु । थिर जुइ मखु थुगु जोवन, स्वव स्वव कृष्णजुया चाला थ्वय्कःया म्ये खः (माली, ने.सं १११९ : २४) ।

थथे च्वय् उल्लेख जूपिं कवित बाहेक मेपिं नं थुगु ईया न्हयथनेबहपिं कवित दनि गथे - पृथ्वीमानन्द, गजव, अनङ्गमान आदि । थुकथं थ्व पुनर्जागरणकाल न्हयःया काव्य प्रवृत्तिया कवितसें गहन दार्शनिक भक्तिकाव्यया सृजना याः गु जक मखुसे, काव्याभिव्यक्तिइ नं हिउपाः हः गु दु । थुमिसं वार्षिक, मात्रिक छन्द छयः गु दुसा सरल व स्वाभाविक अभिव्यक्तिया प्लेसा छायावादी, रहस्यवादी, वक्रोक्ति धंगं अभिव्यक्ति वीगु याः गु दु । थुगु प्रवृत्तिया कवितसें गहन



दार्शनिक भक्तिकाव्यया सृजना याःगुलिं, थुमित नेपालभाषाया भक्त कवित नं धायेगु याः । अथे हे थ्व न्ह्यःचःगु माध्यमिककालया काव्यया मू प्रवृत्ति सन्त उपदेशात्मक कथंयागु जूगुलिं थुगु ईयात सन्त परम्पराया काव्यकाल कथं नं नालेबहः जू ।

## पुनर्जागरणकाल न्ह्यःया बाखं

पुनर्जागरणकाल न्ह्यःया साहित्यय् खनेदुगु मेगु विधा बाखं खः । थुगु इलय् गुलि नं बाखं पिदन, न्हापा प्राचीनकालीन बाखंया परम्परा कथंयागु हे जक पिदन । अप्वः थें न्हापा न्हापाया हे बाखंयात न्ह्यःया कायेगु हे आपाः जूवन । उकिं उगु ईया बाखं साहित्यं नेपालभाषाया बाखं साहित्य ख्यलय् छुं न्हूगु तनेगु याःगु खने मदु । थुगु इलय् विशेषतः बौद्ध जातक अवदानया बाखं नापं, स्वस्थानी, शिवरात्री महात्म्य आदि बाखं पिदंगु दु । थुगु ईया प्रमुख बाखं सफू खः -

|                                  |                        |
|----------------------------------|------------------------|
| अष्टमी व्रत महात्म्य (ने.सं ८९७) | कवीर कुमार             |
| विश्वन्तर (ने.सं ९८८)            | स्वस्थानी सार          |
| स्वयम्भू पुराण (ने.सं ९९७)       | शिवरात्री महात्म्य आदि |
| सिंहसार्थबाहु                    |                        |

थुकथं न्ह्यःचःगु माध्यमिककालया साहित्यिक उपलब्धि तसकं हे म्हो जूसां थ्व इलय् नं नेपालभाषा साहित्यया धाः त्वाःमदः । फाटफुट पिदंगु काव्य व बाखं सफुलिं जूसां नेपालभाषा साहित्यया धाःयात निरन्तरता बियातल । धाथें ला थुगु ईया साहित्य सम्बन्धी बांलाक अध्ययन अनुसन्धान आः नं मज्जिन । उकिं थ्व न्ह्यःचःगु मध्यकालया च्वमित व सफू च्वय् न्ह्यथना ति हे जक खः धकाः अवश्य धायेमछिं । तत्कालीन शासकतय्गु ख्याचलं वा सफूयात बांलाक संरक्षण यायेगु व्यवस्था वा प्रवृत्तिया अभावं गुलिखे थुगु ईया सफू नष्ट जुयावंगु नं जुइफु, गुलिखे थौं नं भीगु छैय् छैय् अथें वायेत्यः पवाःयेत्यः जुयाः लानाच्वंगु नं जुइफु । थज्याःगु सफू मालाः पिब्वये फःसा भीगु माध्यमिक कालया इतिहास अभ्र चकनीगु तिनि ।

## पुनर्जागरणकालया साहित्य

(ने.सं. १०२९-१०६१)

पुनर्जागरणकालया साहित्य धकाः पण्डित निष्ठानन्दयागु एकविंशति प्रज्ञापारमिता देवीयागु सफूया प्रकाशनं निसें (ने.सं. १०२९) नेपालभाषाया कवितय् जेलय् स्वथंगु (ने.सं. १०६१) ई तकया साहित्ययात थुइकेगु जुइ । राजनैतिक रुपं थ्व देव शम्शेरया सुधारवादी पलाः न्ह्याःगु इलं निसें जुद्ध शम्शेरया निरंकुश शासनया समयावधी तक लाः वः । ने.सं. १०२९ स नेपालय् दक्खिसिबय् न्हापां गोरखापत्र पिदन । थुकिं यक्व कथंया च्वयेगु व पिकायेगु ज्याय् लिचः लाकल । थ्व हे भूवलय् नेपालीभाषाया कवि राजीव लोचनया (ने.सं. ९३८-१०५०) छपु नेपालभाषाया कविता, थ्वय्कःया हे केदारकल्प (ने.सं. १०२४) सफुलिइ पिदनसा, सिद्धिदासया छपु विन्दु समस्या नांगु कविता तत्कालीन सुन्दरी (ने.सं. १०२६) पत्रिकाय् पिदन । अथे हे ने.सं. १०२७स स्तोत्र सम्मुच्चयया विज्ञापन थासा आखलं पिदन गुगु नेपालभाषाया न्हापां थासा आखलं पिदंगु गद्य सामग्री खः । ५० पाः पिकाःगु उगु विज्ञापनय् तत्कालीन च्वमिपिसं च्वइगु सफू व ब्वनीगु स्तोत्रय् एकरुपता मवःगु कारणं शुद्धाशुद्धीया नितिं नं आह्वान यानातःगु दु । थथे फुट्कर च्वसु पिदने धुंकाः नेपालभाषां दक्खिसिबे न्हापां देवनागरी लिपिं थासा आखल एकविंशति प्रज्ञापारमिता सफू (ने.सं. १०२९) पण्डित निष्ठानन्द वज्राचार्य पाखें पिदन । एकविंशति प्रज्ञापारमिताया प्रकाशनं केवल निष्ठानन्दयात जक हानं वना आखलं मेगु सफू पिकायेगु प्रेरणा वःगु मजुसे नेपालभाषाय् थासा आखलं सफू पिकायेगु परम्परा हे न्ह्यानावन । थुकथं थासा आखलं सफू पिहांवःगु इलं निसें नेपालभाषाय् पुनर्जागरणकाल शुरु जुल धकाः नालेगु जूगु दु । थुगु इलय् पिदंगु साहित्य न्हापाया स्वयाः पाःगु जक मजुसे, न्हूगु जागरण, न्हूगु उत्साह ज्वनाः थःगु भाषा साहित्ययात छुं याये धयागु भावनां प्रेरित जुयाः सृजना जूगुलिं नं थुगु ईयात पुनर्जागरण काल धायेगु याःगु खः । थथे थुगु ईयात पुनर्जागरण (ने.सं. १०८४) धकाः खं ग्वः छयलेगु ज्या न्हापां यानादीम्व वि.न.डा. कमलप्रकाश मल्ल खः । अनंलि थुगु न्हूगु हिउपाः वःगु ईयात नेपालभाषाय् पुनर्जागरण काल धायेगु यानाहःगु खः ।



## पुनर्जागरण धायेगुया औचित्य

पुनर्जागरण या शाब्दिक अर्थ खः हानं दनेगु । थ्व खँ खः दकलय् न्हापां १४ गू गु शदी रेनाँ सा (Renaissance) या नाम इटालीइ तत्कालीन मनूतय्के ईश्वर व धर्मय् जक अति मोह दयाच्चंगुया विरोधय् मानवीय सृजनाप्रति आस्था बजाइगु, साँस्कृतिक, सामाजिक जागरणयात छयःगु खः । युरोपय् थ्व पुनर्जागरण अभियानयात जीवन्त यायेगुलिइ तत्कालीन प्रिन्टिङ्ग प्रेसया आविष्कारं (ई.सं १४७६) तसकं हे तःधंगु भूमिका म्हितूगु जुयाच्वन । ग्रीसेली प्राचीन ग्रन्थत अनेक भासं अनुवाद यानाः पर्थसेलि युरोपवासीतय्गु चिन्तन शैलीइ हे तःधंगु ह्यूपाः हयाबिल । फलतः थ्व साँस्कृतिक पुनर्जागरण इटालीइ जक लिक्नुना मच्चंसे विश्वया आपालं थासय् न्यनावन । अथे हे ने.सं. १९८ निसं ने.सं. १०२० तक भारतय् भारतेंदु हरिश्चन्द्रया नेतृत्वय् राष्ट्रियता, सामाजिक सुधार, भाषिक सुधार व समृद्धिया ज्याखँ छगू आन्दोलन कथं हे न्हायात । थुकियात हे भारतया पुनर्जागरण आन्दोलन नालेगु यात । भारतय् वःगु थज्याःगु राजनैतिक सामाजिक, भाषिक चेतना तथा जागरणया प्रभाव नेपालभाषाभाषिपित नं लात । थःगु भाषा साहित्यया निरिति नं छुं यायेमाल धयागु चेतना इमिके ब्वलन । प्राचीनकालय् तसकं हे च्वन्हाये धुंकूगु नेपालभाषा साहित्यया गति शाहकालय् वयाः शिथिल जुलसा राणाकालय् वयाः ला थ्वया अस्तित्व तक न्हावनीगु अवस्थाय् थ्यन । नेपालभाषा साहित्य थथे मरणान्त स्थितिइ थ्यवने त्यंगुया मू कारण मध्ये छुखे तत्कालीन राणा शासकतय्गु नेपालभाषा प्रतिया नकारात्मक दृष्टिकोण खःसा मेखेर नेपालभाषा साहित्ययात ईया हिउपाः कथं न्हायेगु ज्या मजुगुलिं नं खः ।

ने.सं १०२९ न्हयः तक नेपालभाषां गुलि नं सफू च्वयेगु जुल फुक्क हस्तलिखित रुपय् जक जुल । ल्हातं च्वयेमाःगु कारण थज्याःगु सफूया ल्याः तसकं हे म्हा जुयाः न्यकभनं थ्यनेमफुत । फलस्वरुप नेपालभाषाया सफू सकभनं प्रचारय् वयेमफुगु जक मजुसे, छुं कारण थथे छगू निगू दुगू सफू स्यन, तन धाःसा हानं अज्याःगु सफू मदइगु जुल । अथे हे नेपालभाषाया सफू थुगु इलय् तक गुलि नं च्वयातःगु दु व फुक्क धयाथें विविध प्राचीन लिपिं च्वयातःगु जुयाच्वन । तर शाह जुजुपनिगु उदयलिसं चलन चल्तिइ देवनागरी लिपि छयलेगु जूगुलिं प्राचीन नेवाः लिपि सर्वसाधारण ब्वने मफया वन । प्राचीन लिपिं च्वयातःगु सफू ब्वनेगु गुभाःजु, बःभाजु, जोशी आदिपनिगु जक ज्या जुल । नेपालभाषाया सफू च्वयेगु ब्वनेगु ज्या सर्वसाधारणपाखें तापापां वन । नेपालभाषा खँ ल्हाबल्हाये हे जक धै थें

लिक्नुना वन । लिच्चःकथं ईया अन्तराल लिसें लिखित भाषा व बोलिचालिया भाषाय् नं भिन्नता खने दयावल । थुक्थं न्हापा सफुलिइ छयलातःगु लिपि जक मथुगुलिइ आः वयाः सफूया भाय् तकं सर्वसाधारण ब्वीमं मथुया वन । फलतः लिखित भाषा प्रति आकर्षण म्हो जुजुं वन । थज्याःगु स्थितिइ थ्यनाच्चंगु नेपालभाषायात राजनैतिक रुपं नं प्रत्यक्ष धंगं निर्मूल यायेगु ज्या तत्कालीन राणा सरकारपाखें जुल । चन्द्रशम्शेरया पालय् ने.सं १०२६ स नेपालभाषां च्वयातःगु भोयात मान्यता मविइगु जुलसा लिपा वयाः थःपिनिगु धर्म, संस्कृति कथं बःयात छायेत छपु निपु सिलः, तुतः च्वःपिं च्वमितय् तकं ज्वनाः कुनाः 'हानं नेपालभाषां थथे च्वये दइमखु' धकाः तत्कालीन राणा शासनकतय्सं ख्याच्वः, धम्कि बियाहयेगु यानाहल । लिच्चःकथं साधारण जनमानसय् नेपालभाषा छयलाबुला म्हो जुजुं वन । दरवार, अड्डा, अदालतय् जागीर नयाच्वपिं नेवाःतय्सं थः मचाखाचातय् तकं नेवाः भाय्या पलेसा नेपाली भाय् ल्हाकेगु यानाहल । फलतः नेवाःभाषां च्वयेगु ब्वनेगु धयागु हे तत्कालीन सरकार तथा व्यवस्थायात हे छगू हाथ्या बिइगु थें जूवन, गैरकानुनी ज्या यायेगु थें जूवन ।

तर इलं निष्ठानन्द, सिद्धिदास, जगतसुन्दर मल्ल, योगवीरसिंह, धर्मआदित्य थें ज्याःपिं युगपुरुषत बुइकल । नेपालभाषाया थज्याःगु दयनीय अवस्थायात वाःचायेकाः थ्वय्कः महारथीपिसं मरणान्त स्थितिइ थ्यवनेत्यंगु नेपालभाषायात मृत्यु सञ्जीवनी वुटी त्वंके थें तत्कालीन वस्तुस्थिति आवश्यकतायात नं मनन यासं नेपालभाषाया पुनर्उत्थानया ज्या न्हाकल । नेपालभाषायात हानं विकासया लँपुइ पलाः छिकल । थज्याःगु कृतलं नेपालभाषा साहित्यं नं न्हूगु रुप धारण यात, न्हूगु प्रवृत्ति, प्रवाहया विकास यात । थ्व जागरणया कृतः स्वतःस्फूर्त खः, वैयक्तिक खः, छुं संगठनात्मक प्रयास मखु । थथे राणातय्गु निरंकुश शासनया तिन्हिनय् नं नेपालभाषाया पुनर्जागरण अभियान न्ह्याःगु ऐतिहासिक क्रमया छगू तःधंगु ब्यंग धाःसां ज्यू (मल्ल, ने.सं. १०९६ :७) ।

थ्व युगया युगपुरुषतसं नेपालभाषा साहित्ययात न्हूगु रुप, न्हूगु मोड ज्वंकेगु निरिति थःथःकथं हे प्रयास यात । पं. निष्ठानन्द वज्राचार्य (ने.सं. १७८-१०५५) हस्तलिखित परम्पराय् लिक्नुनाच्चंगु नेपालभाषायात छापा आखलं सफू पिकायेगु संस्कार ब्वलंकाः नेपालभाषायात प्रचार प्रसार जुइके बिल सा देवनागरी लिपि, बोलिचालिया भाषां सफू च्वयेगु परम्परा न्हाकाः नेपालभाषायात जनग्राह्य जनरुचिया विषय जुइके बिल । आधुनिक गद्यया नमूना छुनाः लिपायापिं च्वमितय् लँपु क्यनाबिल । महाकवि सिद्धिदास साहित्यय् मौलिकता विविधता हयाः नेपालभाषा साहित्ययात छगू स्तरीय साहित्य दुगु भाषा जुइके बिल । कवितायात समाजय् चेतना जागरण ह्वलेगु ज्यावः कथं छयलाबिल । अथे हे मास्टर जगतसुन्दर मल्ल मातृभाषां शिक्षा बिइगु संस्कार स्वन, बाखंया माध्यमं नैतिक सुधार यायेगु चेष्टा यात । योगवीरसिंहजुं कविताया माध्यमं मातृभाषा अनुराग तथा सामाजिक जागरण व सुधारया सः प्रतिध्वनित



यात । नेपालभाषा जिर्ण जूगु, अलि मचासे भिक्ने, भारतीय शास्त्र भवन मान श्वइत बीकेनु धकाः नेपालभाषायात हानं थनेगु जक मखु, थ्वयात अझ विकास यायेगु निरति शंखनाद यात । शुक्रराज शास्त्री नेपालभाषा वर्णमाला, नेपालभाषा व्याकरण सफू च्वयाः नेपालभाषायात स्तरीयता विइगु कुतः यात । धर्म आदित्य बुद्ध धर्म व नेपालभाषा पत्रिका पिक्याः भाषिक साहित्यिक चेतनाया जः हवलेगु, पत्रकारिता नीस्वनेगु यात । भाषिक साहित्यिक उत्थानया ज्याय संगठनात्मक रुप पलाः न्ह्याकेगु कुतः यात । 'नेपालभाषा व थ्वया साहित्य' नांगु अन्वेषणात्मक लेख च्वयाः नेपालभाषायात स्वदेशय जक मखु विदेशय म्हसिइके विइगु यात । तत्कालीन बौद्ध विद्वानतयस नं बौद्ध धर्मया महायानी ग्रन्थयात लोकभाषां हिलाः धर्मया शील व पवित्रताया जः समाजय खयेकेगु यात । थुगु इलय गुलि नं रचना पिदंगु खः, व फुक्कयसनं जागरणया सः दु, न्हूगु जोश दु, उमंग दु, मातृभाषानुराग दु, नेपालभाषायात न्हयज्याकेगु आतुरता दु । उकिं ने.सं. १०२९ निसं ने.सं. १०६१ या समयावधिंयात पुनर्जागरणकाल धाये ल्वः । तर छगू खं थन स्पष्ट यायेमाःगु दु, इटालीइ पुनर्जागरणया गुगु लहर न्ह्यात, उकिं प्राचीन ग्रीक, रोमया साहित्ययात हानं म्वाकेगु याः थें नेपालभाषाया पुनर्जागरण उगु अर्थय मजुसे नेपालभाषाय हानं साहित्यिक गतिविधि न्ह्याकेगु, नेपालभाषायात हानं विकसित व समृद्धशाली यायेगु, थ्वयागु प्रतिष्ठा, सम्मान थकायेगु हे नेपालभाषाया पुनर्जागरणया मू कुतः जूगु दु । उकिं नेपालभाषाया पुनर्जागरण प्राचीन साहित्यया पुनर्जागरण मखु, प्राचीनकालय भाषा साहित्यया उत्थानया ज्याय दुगु उत्साह उमंगया पुनर्जागरण ख, नेपालभाषा व थ्वया साहित्ययात जुरुजुरं थनेगु खः ।

## पुनर्जागरणकालया महारथी

नेपालभाषाया पुनर्जागरण अभियानयात न्हयज्याकेगुलिइ आपालं च्वमितयगु देन दु । थ्व अभियानया अग्रपंक्तिइ खनेदुपिं महारथीत खः -

- पं. निष्ठानन्द वज्राचार्य (ने.सं. १७८-१०५५)
- महाकवि सिद्धिदास अमात्य (ने.सं. १८७-१०५०)
- माष्टर जगतसुन्दर मल्ल (ने.सं. १००३-१०७३)
- कवि योगवीर सिंह (ने.सं. १००६-१०६२)
- शहीद शुक्रराज शास्त्री (ने.सं. १०१३-१०६१)
- धर्मआदित्य धर्माचार्य (ने.सं. १०२२-१०८३)

नेपालभाषा साहित्यया इतिहास/८०

पं. निष्ठानन्द वज्राचार्य (ने.सं. १७८-१०५५):-

ने.सं. १७८ स मां थकुमती व अबु मुक्तानन्दया कोखं येँया ओमबहाः त्वालय जन्म जूम्ह निष्ठानन्द वज्राचार्य नेपालभाषा पुनर्जागरण अभियानया दकलय थकालिम्ह महारथी खः । म्हुतु आम्हान यानाः मखु, थःगु ज्याखं नेपालभाषाया पुनर्जागरण अभियान न्ह्याकावम्ह निष्ठानन्द वज्राचार्य, मनूया मूल्यांकन खं मखु, ज्यां जुइ धयागु सत्यया छगू दसु जुयाव्यूगु दु ।

नेपालभाषाय थासा आखलं सफू पिदनाः थ्व भाषां च्वयेगु-व्वनेगु न्हगु उत्साह, उमंगया शुरु जूगु ईयात पुनर्जागरणया शुरुवात जूगु ई कथं नालातःगु दु । गथे इटालिइ शुरु जूगु Renaissance यात जीवन्त यायेगु तथा थुनियात युरोपया आपालं थासय प्रचार प्रसार जुइकेगुलिइ क्याकस्टनया (ई.सं. १४६७) प्रिन्टिङ्ग प्रेसया आविष्कारं महत्वपूर्ण तिबः बिल । अथे हे नेपालभाषा साहित्यय छापा आखलं सफू पिदंसेलि थ्वया प्रचार प्रसारय तीव्रता बल । थथे नेपालभाषाय थासा आखलं सफू पिकायेगु परम्परा दकलय न्हापां न्ह्याकादीम्ह व्यक्ति निष्ठानन्द वज्राचार्य खः । वज्राचार्य कूलय जन्म जुयाः नं शिक्षा दीक्षा बांलाक आर्जन यायेगु ज्या थः कायनापंतुं निष्ठानन्दं यानादिल धैगु खं न्यनेदुसां (हृदय, ने.सं. ११०२ :२७), थ्वयकः थःगु ईया बौद्ध धर्म तथा दर्शन सम्बन्धी गहन अध्ययन दुम्ह विद्वान जुयादीगु दु । थःगु कुलायन पेशा कथं थ्वयकलं भिदं तक धया थें थाय्थासय बाखं कनेगु यानादिल । थम्हं कनागु बाखनं तत्कालीन जनसमुदाय तसकं हे आकर्षित जूगु व थःत व हे बाखं थाय् थासय कनेत आपालं इनाप वःगुलिं, तत्कालीन जनसमुदायया मानसिकता थुइकाः थज्याःगु बाखंयात लिखित रुप बिइगु दूरगामि विचाः थ्वयकलं यानादिल । तर थ्व इलय नेपालभाषाय थासा आखलं सफू थानाः पिकायेगु चलन मदुनिगु, ल्हातं हे च्वयाः सफू पिकायेगु परम्परा कायम हे जुयाच्वंगु जुयाच्वन । थथे ल्हातं सफू च्वइबलय छगू निगु हे जक सफू पिदनिइगु व लिपा यःयःपिसं, माःमाःपिसं जक ल्हयया काइगु जुयाच्वन । फलस्वरुप सफू जनसमुदायय न्यंकभनं थ्यंकेत तसकं हे थाकुइगु व आपालं हे ई काइगुलिं, सफूया माग दयां नं थ्वया प्रसारण मजुइगु जुयाच्वन । थज्याःगु हे समस्यायात थुइकाः थ्वयकलं ल्हातं मखु थासा आखलं सफू थानाः पिकायेगु विचाः यानादिल । तर उगु इलय थौं थें प्रेसया सुथालाःगु व्यवस्था थन मदु, भारतय वनाः छापे यायेत नं आपालं खर्च जुइगुलिं, थम्हं हे थासा दयेकाः छैय् हे सफू थायेगु क्रान्तिकारी पलाः छिनादिल । थ्वयकलं पिकयादीगु न्हापांगु सफू - श्री प्रज्ञापारमिता देवीयागु एकविंशति श्लोकया भाषा सहितं (ने.सं. १०२९) खः । थुनियात चिहाकलं एकविंशति प्रज्ञापारमिता धायेगु याःगु दु । थ्व सफू बौद्ध नवग्रन्थ मध्ये छगू ग्रन्थ सहस्रिका प्रज्ञापारमिताया दकलय न्हापांया नीछपु सिलःयात संस्कृत मूल नापं तयाः नेपालभाषां अनुवाद यानातःगु खः । एकविंशति प्रज्ञापारमिता निष्ठानन्दया जक न्हापांगु सफू मजुसे नेपालभाषाया हे न्हापांगु छापा आखलं पिदंगु सफू जुयाबिल । खयेत ला थ्व सफू स्वयां नं न्हयः राजीव लोचन जोशीयागु छपु कविता (ने.सं. १०२४) केदार कल्प धयागु सफुलिइ व

नेपालभाषा साहित्यया इतिहास/८१



सिद्धिदासया छपु कविता सुन्दरी पत्रिकाय् (ने.सं. २०२६) छापा आखलं पिदने धुंकू दुसा, मखं बहाःया शाक्यमुनि कपिलमुनिपिसं संस्कृत बौद्ध स्तोत्र सफूया विज्ञापन नेपालभाषा छापा आखलं पिकयादीगु दु । तर नेपालय् निष्ठानन्द बज्राचार्यया एकविंशति प्रज्ञापारमिता सफूया प्रकाशननिसं तिन नेपालभाषाया सफू थासा आखलं थानाः पिकायेगु परम्पराया सूत्रपात जुल । थुकथं नेपालभाषायात याकनं प्रचारप्रसार याये फइगु लैपु चाल ।

एकविंशति प्रज्ञापारमिताया लिपा निष्ठानन्द हानं मेगु बौद्ध नवग्रन्थ ललितविस्तर सफू नं थम्हं हे ने.सं. १०३० निसं १०३४ तक प्यदं विक थानाः पिकयादिल । अथे हे मेगु बौद्ध ग्रन्थ बोधिचर्यावतार (ने.सं. १०४२) व बोधिज्ञान (ने.सं. १०४३) नं थ्वयकल थथे हे थासा आखलं थानाः पिकयादिल । थुपिं सफू मध्ये निष्ठानन्दया दकलय् महत्वपूर्ण योगदान ललितविस्तर सफूया प्रकाशन खः । ख्वीन्यागू अध्याय दुगु थ्व ललितविस्तर सफू संस्कृतया ललितविस्तरया तप्यंक अनुवाद मजुसे, मूगू महायानि बौद्ध ग्रन्थ सूत्रं निसं स्वयम्भू पुराण थें ज्याःगु अनेक सफूया भावार्थ फुक दुध्याकाः छगू हे सूत्रय् हनातःगु बौद्ध बाखं खः । 'ललितविस्तर' बुद्धया जीवन सम्बन्धी बाखंया सफू (छगू दशकं मल्याक बाखं कनाः अनुभव मुकाः आपालं मनूतयूगु इनाप कथं दयेकूगु सफू) खः, अभि न्हापा लिपा थज्याःगु सफू गब्लें पिमर्दनगुलिं तत्कालीन बौद्धतयूगु नितिं थ्व सफू तःधंगु आकर्षणया कंगु विषय जुइगु हे जुल । न्ह्याक्व न्यसां मगाःगु त्वाःत्वालय ललितविस्तर बाखं सफूया रुपय् हे पिदंगु तथा पवित्रगु ग्रन्थ छैय् तयेमाः धइगु धार्मिक संस्कार कथं नं थ्व ललितविस्तर सफूया माग तत्कालीन समाजय् व्यापक रुपं जुल । ल्हाःतं मखु थासा थानाः पिदंगु जूगुलिं तत्कालीन जनसमुदायया मागकथं ललितविस्तर सफू याकनं हे छैखा छैखा पतिं थ्यन । खयेत ला थ्व सफू न्हापां न्यागू भाग यानाः ५० गू जक पिकाःगु धाइ, तर भिदं लिपा न्हापायागु हे मिति तयाः हाकनं मेगु संस्करण पिकाःगु खः । ललितविस्तर सफू ब्वनेगु लोभं नं नेपालभाषाया सफू ब्वनेगु जुल, नेपालभाषाया प्रचार प्रसारय् तःधंगु तिबः जुल । थुकथं थ्व ललितविस्तर सफुलिं छखे बुद्धया जीवनीयात प्रकाशनय् हयाविल सा मेखे नेपालभाषाया प्रचार प्रसार यानाविल । फलतः नेपालभाषाय् न्हूगु युग पुनर्जागरणया सूत्रपात जुइत तिबः जुल ।

निष्ठानन्द ललितविस्तरया रचना 'संस्कृतया ललितविस्तर'या आधारय् यानातःगु खःसां थ्व तप्यंक अनुवाद मखु, थाय् थासय् व्याख्या विप्लेख नं दुगु च्वमिया सृजनाशीलतां भयव्यूगु स्वतन्त्र गद्यकृति खः । निष्ठानन्द थ्व ललितविस्तर सफू तत्कालीन जनसमुदायया अभिरुचियात ध्यान तयाः उकियात पूर्वकेत हे च्वःगु जूगुलिं थ्व सफुलिइ नं तत्कालीन जनभाषायात हे छयलादिल । थम्हं बाखं कनेबलय् श्रोतातय् गज्याःगु भाय् छयलेगु खः अज्याःगु हे भाय् छयलादिल । सफू च्वयेबलय् शास्त्रीय भाय् छयलेगु तत्कालीन परम्परायात हाचां गायादिल । ललितविस्तर सफूया प्रकाशन न्हयः तक सफू च्वइपिसं न्हापा न्हापाया सफुलिइ गज्याःगु भाय् छयलातइगु खः, अज्याःगु हे भाय् छयलिइगु

जुयाच्चन । फलतः ईया हिउपाः लिसं नेवाःतय्स सफूया नेवाःभाय् मथुया वन । नेवाः भायूया सफू साधारण जनतां कम हे ब्वनिइगु जुयावन । थज्याःगु असंगतिपूर्ण स्थितियात नियन्त्रण यायेगु नितिं ललितविस्तर सफुलिइ शास्त्रीय भाषा मखु, तत्कालीन जनभाषा छयलेगु क्रान्तिकारी, समयानुकूल पलाः निष्ठानन्द ल्हवनादिल । थथे बोलिचालि भाषाया प्रयोगं तत्कालीन नेवाःतय् ललितविस्तर सफू ब्वने अःपुइका बिउगु जक मखु, नेवाः भायूया सफू ब्वने मास्ति वयेकाविल, सफू ब्वनेगु बानि यानाविल, नाप जनभाषां नं सफू च्वये जिउ धयागु लहर न्ह्याकाविल । थ्व ललितविस्तर सफुलिइ तत्कालीन जनभाषाया प्रयोग जूगु जक मखुसे उगु ईया पुराण, अवदान, जातक आदि सफुलिइ छयलातःगु गद्यया तुलनाय् आपालं परिमार्जित व परिस्कृत गद्य छयलातःगु दु । फलतः लिपायापि नेपालभाषाया गद्यकारतयूगु नितिं ललितविस्तर सफूया गद्य छगू नमूना थें जुल । उकिं निष्ठानन्द बौद्ध ग्रन्थ जक च्वःगु जूसां वय्कःयात आधुनिक गद्यया नायः नालेगु जूगु दु । थौं नेपालभाषाया ख्यलय् निष्ठानन्दयात गद्य गुरु या नामं म्हसिइकेगु जूगु दु ।

नेपाःया बुद्ध धर्मय् पुनर्जागरण हःपि मध्ये निष्ठानन्द बज्राचार्य नं छम्ह खः । बुद्धया जीवनी नापं बुद्धया अनेक शीलाचरणादि, धर्म सम्बन्धी उपदेश नं दुध्याःगु थासा आखलं थानातःगु याउंक हे न्याये दइगु ललितविस्तरया प्रकाशनं तत्कालीन समाजय् भाषिक जागरणया नाप नाप धार्मिक जागरण नं हयाविल । पुरोहितवादं ग्रस्त तत्कालीन बौद्ध धर्मय् सुधार हयेत ललित विस्तरया प्रकाशनं अतिकं प्रभावकारी भूमिका म्हितल (प्रधान, १९९८: ३५) । थुकथं बौद्ध धर्मया लैपु नेपालभाषायात प्रचार प्रसार यायेगुलिइ निष्ठानन्द सफल जुयादिल सा तत्कालीन जनताया आवश्यकता, अभिरुचि कथंया भाषा लिपिया वःकयाः बुद्ध धर्म प्रति हे छगू न्हूगु जागरण, न्हूगु दृष्टिकोण ब्वलंकेगुलिइ नं निष्ठानन्द सफल जुयादिल । चित्तधरयात सुगत सौरभ महाकाव्य च्वयेगु प्रेरणा नं न्हापां निष्ठानन्दया हे 'ललितविस्तर' पाखे वःगु खनेदु । नापं 'ललितविस्तर'या छुं छुं प्रभाव नं सुगत सौरभ महाकाव्यय् लाःगु दु । थथे हे साहित्य सुता कर्मस्थानाचार्य तथा बौद्ध ऋषि महाप्रज्ञापित भिक्षु जुइत प्रेरणा बिउगु सफू नं थ्व हे ललितविस्तर खः धकाः वय्कःपिसं थःपिनिगु आत्मकथालय् न्हयथनादीगु दु ।

थुकथं निष्ठानन्द बज्राचार्य बौद्ध धर्मया प्रचारया सिलसिलाय् नेपालभाषाया आधुनिक गद्य शैलीया निर्माण यानादीम्ह, थासा आखलं सफू थानाः नेपालभाषाया सफू अःपुक छैखा छैखा पतिं थ्यंकेवियाः नेपालभाषायात व्यापक प्रचार प्रसार यायेगुलिइ महत्वपूर्ण योगदान वियादीम्ह, तत्कालीन जनताया मानसिकतायात थुइकाः देवनागरी लिपि व जनभाषा छयलाः नेपालभाषायात हानं जन अभिरुचिया विषय जुइकाविउम्ह छम्ह क्रान्तिकारी, दूरदर्शी व्यक्तित्व खः । अंग्रेजी साहित्यय् बाइबलया अनुवादक जोन वीक्लीफया गुगु थाय् दुगु खः अज्याःगु हे थाय् नेपालभाषा साहित्यय् निष्ठानन्दयागु दु (प्रधान, ने.सं. १९९८ :३५) । थुकथं थौं थ्वय्कःया देनयात कदरयाना, यँया ऊवहाः त्वालय् थ्वय्कःया



साहित्यिक स्थापना जूगु दुसा, दय् दसं थय्कःया वुदिया लसताय् नमचा उलेगु, साहित्यिक कार्यक्रम न्यायेकेगु ज्या जूगु दु ।

### महाकवि सिद्धिदास अमात्य (ने.सं. १८७-१०५०)

ने.सं. १८७ स मां हर्षलक्ष्मी व बौ लक्ष्मीनारायणया कोखं जन्म जूम्ह येँया क्वाछे त्वाल्य च्वम्ह सिद्धिदास अमात्य नेपालभाषा साहित्यया पुनर्जागरण आन्दोलनया छम्ह सक्रिय महारथी खः । थःगु पारिवारिक, आर्थिक आदि अनेक समस्याया बावजूद नं थःगु मातृभाषाया निरति तन मन बियाः सेवा यानावम्ह छम्ह साहित्य सृजक सिद्धिदास महाजु खः ।

नेपालभाषाया गद्य विधाया पुनरुत्थान यायेगु निरति पं. निष्ठानन्द. गुगु योगदान बियादिल प्रायछि उक्तं हे सिद्धिदास नेपालभाषाया पद्य विधाया पुनरुत्थानया निरति युगान्तकारी पलाः छिनादिल । सिद्धिदास महाजु नेपालभाषाया जक कवि मजुसे नेपाली भाषाया नं माध्यमिक युगयाम्ह छम्ह कवि खः । उगु इलय् बनारस पिदनीगु सुन्दरी पत्रिकाय् (ने.सं. १०२६ पाखे) समस्यापूर्ति कविता च्यादीपि मध्ये सिद्धिदास महाजु नं छम्ह खः । थय्कलं नेपालभाषा नं समस्यापूर्ति च्वयेगु यानादीगु दु । कवि सिद्धिदासयाके नेपालीभाषा साहित्यया नं बांलाक ज्ञान दुगु नापं नेपाली भाषाया कविपिनाप नं संगत दुगु खनेदु । थ्व हे कथं भानुभक्त रामायण च्वयाः नेपाली भाषायात तत्कालीन जनमानसय् व्यापक व विस्तृत जुइकाबिउ थें थय्कलं नं नेपालभाषायात अप्ठः प्रचार प्रसार जुइकेगु तातुनाः सिद्धिरामायण महाकाव्य च्यादीगु खनेदु । तर अभाग्यवश थौतक थ्व सफूया फुक्क काण्ड प्रकाशनय् वयेफुगु मदुनि । सिद्धिदास महाजुया दकलय् न्हापां पिदंगु चिनाखं उबलयया सुन्दरी पत्रिकाय् पिदंगु बिन्दु समस्या (ने.सं. १०२६) खः । थ्व चिनाखं सिद्धिदासया जक न्हापांगु प्रकाशित कविता मजुसे नेपालभाषाया हे न्हापां न्हापांगु छपा आखलं पिदंगु रचना खः । ४४ गुलिं मल्याक सफू च्याथकादीम्ह सिद्धिदास महाजु थःगु जीवनकालय् छगू हे जक सफू सज्जन हृदयाभरण (ने.सं. १०४०) पिकायेफत । थौ तकया दुने थय्कःया १४ गू सफू पिदने धुक्कू दु सा मेगु ११ गू सफूया पाण्डुलिपि नेपालभाषा परिषदय् मुनाच्वंगु दु । थय्कलं च्यादीगु छुं छुं सफू खः -

- सज्जन हृदयाभरण (चवःगु : ने.सं. १०४०)
- आत्मकथा (चवःगु : ने.सं. १०४१)
- सिद्धिरामायण (चवःगु : ने.सं. १०३०-१०३५ या दुने)
- सर्ववन्धु (चवःगु : ने.सं. १०४४, प्रकाशन ने.सं. १११२)
- शिवप्रियास (चवःगु : ने.सं. १०५०)
- सत्यसती (चवःगु : ने.सं. १०३३, प्रकाशन ने.सं. १०८३)
- शारदा भजन (चवःगु : ने.सं. १०३५)
- रम्भा शुकुलम्भा सम्वाद (चवःगु:ने.सं. १०४२, प्रकाशन ने.सं. १०८७)

- संवाद (चवःगु : ने.सं. १०३७, प्रकाशन ने.सं. १०८६)
- सक्तता माः (चवःगु : ने.सं. १०४१)
- स्वंगू ऋण (चवःगु : ने.सं. १०३९)
- सप्तमित्र तथा सप्तस्तुति (चवःगु : ने.सं. १०३९)
- संचय प्रकाशन (प्रकाशन : ने.सं. ११०२)
- सनातन धर्म प्रकाशन (प्रकाशन : ने.सं. ११०४)
- सिद्धिदास थःगु मिखाय् व शिवविलास बाखं(प्रकाशन ने.सं. १०८७) आदि

थये सिद्धिदास महाजु च्यादीगु आतक पिदंगु सफू मध्ये दकलय् च्वन्हायाःगु सफू सत्यसती खः । थ्व सफू छगू समस्यापूर्ति खयां नं शास्त्रीय नियम पालना मयासे नं बांलाःगु खण्डकाव्यया रचना जुइफु धयागुया छगू नमूना जुयाबिउगु दु । बाखं हनाः चिनातःगु थ्व खण्डकाव्य उबलयया सामाजिक, सांस्कृतिक जीवनया किपा जक च्वयेगु मयासे सिद्धिदासया कवि प्रतिभा नापं थय्कःया जीवन व जगत प्रति या दृष्टिकोण नं च्वःगु दु ।

सिद्धिदास साहित्यिक विषयया जक मखु रचनात्मक विषय गथे छन्दशास्त्र, कामशास्त्र, ज्योतिष, गणित आदि विषयया नं चिचिधंगु सफूचा च्वया थकादीगु दु । थय्कःया कृति सम्बन्धी मूल्यांकन यायेबलय् थय्कःया विशिष्टता काव्य विषयस खनेदु । थय्कलं नेपालभाषां सफू च्वयाः जक नेपालभाषाया पुनर्जागरण अभियानयात न्हायाकादीगु मखुसे तत्कालीन युवा विद्यार्थीतय्त कविता च्वयेगु स्पनाः कविता च्वके बियाः न्हूगु पुस्तायात नं साहित्यिक संस्कार बलंकेगुलिइ महत्वपूर्ण योगदान बियादीगु दु । सिद्धिचरण श्रेष्ठ, ठाकुरलाल मानन्धर, बैकुण्ठप्रसाद लाकौलपिंत काव्य सृजनाय् न्हापां न्हापां प्रेरणा, प्रशिक्षण बियादीम्ह व्यक्ति सिद्धिदास महाजु हे खः ।

नेपालभाषा साहित्यय् सिद्धिदास महाजुयात आधुनिक पद्यया नायःया रुपय् माने यानातःगु दु । थ्व हे कथं वय्कःयात पद्यगुरु नं धायेगु जूगु दु । सिद्धिदास स्वयाः न्हयः नेपालभाषाय् गुलि नं काव्य पिदन, फुक्क धया थें गीति परम्पराय् म्येया रुपय् जक पिदन । भजन, तुतः, सिलः, ख्यालिम्ये, ध्याचूम्ये, बाखंम्ये, प्याखंम्ये आदिया रुपय् जक लिक्नुनाच्वंगु नेपालभाषा काव्य धाःयात चिनाखँया रुप बिइगु ज्या न्हापां सिद्धिदास पाखें हे जुल । दोहा चौपाइया नियम कथं च्यातःगु सज्जन हृदयाभरण (ने.सं. १०४०) थय्कःया जक न्हापां पिदंगु सफू मजुसे नेपालभाषाया हे न्हापांगु चिनाखँया सफू जूगु दु । थ्व सफुलिं निसं नेपालभाषाय् चिनाखँया परम्परा शुरु जुल । थय्कःया कुतलं काव्यया सृजना संगीत साधनाया निरति जक मजुसे ब्वनेत व ब्वकेत नं खः धयागु परम्पराया नी जुल । काव्य आत्म-अभिव्यक्तिया विषय जक मजुसे बौद्धिक ज्वलनय् नं दुथ्यात । नेपाःया सामाजिक, सांस्कृतिक परिवेशयात बिचाः यानाः उपदेशात्मक, शिक्षात्मक प्रवृत्ति कथंयागु काव्य चिनाः सिद्धिदासजुं काव्यया मूलभूत प्रवृत्ति नं हिउपाः



हयाविल। सिद्धिदासया काव्य रचना न्हापाया कवितयगु काव्य स्वयाः पाःगु जक मखु काव्यात्मक दृष्टिकोणं नं गाकं परिमार्जित व परिस्कृत जूगु दु। सिद्धिदासया थज्याःगु काव्य प्रवृत्तिया प्रभाव लिपायापि कवितयत नं लाःवन, थ्व छगू प्रवाहया रुपय् न्हयज्यात। थुकथं सिद्धिदासया आगमनं नेपालभाषाया प्राचीन काव्यया धालं सीदयेक फुपुल, न्हूगु काव्य परम्पराया नी जुल, न्हूगु युगया शुरुवात जुल।

सिद्धिदास महाजु नेपालभाषा साहित्यय् विविध विधा, विविध विषयया प्रयोक्ताया रुपय् नं न्हयलूगु दु। सिद्धिदास स्वयाः न्हयः नेपालभाषाय् बाखं, प्याखं व म्ये त्वःताः मेगु साहित्यिक विधा खनेमदु। काव्य ख्यलय् सिद्धिदासं सत्यसती सफू च्याः खण्डकाव्यया शुरुवात यानादिल सा, सिद्धि रामायण च्याः महाकाव्यया शुरुवात यानादिल। गजल परम्परायात न्हयाकेगु ज्या नं राग गजल कौवालि (ने.सं. १०४० ज.खः) नांगु पर्चा पिक्याः यानादिल। अथे हे शिवविलास बाखं च्याः गद्य विधाय् आधुनिक बाखंया पूर्वाधार तयार यानादिल सा सर्ववन्धु सफू च्याः नेपालभाषाय् आधुनिक निबन्धया पूर्वाधार दयेकादिल। अथे हे सिद्धि व्याकरण च्याः व्याकरण परम्परा न्हयाकादिल सा आत्मकथा च्याः आत्मकथा च्येगु परम्पराया नीस्वनादिल। सिद्धिदासया साहित्यिक विशिष्टता काव्य विधाय् खयाः नं गद्य विधाय् नं म्हो मजू। निष्ठानन्दया ललितविस्तरया गद्यया तुलनाय् सिद्धिदासया गद्य आपालं परिमार्जित खनेदु। थुकिया दसु वय्कःया 'शिवविलास' बाखं खः। अथे हे नेपालभाषा साहित्ययात विधिव विषयं छाय्पिङ्गु ज्या नं न्हापां सिद्धिदास पाखें हे शुरु जुल। पुराण, आख्यान, उपाख्यान, जातक, अवदान, आदिया धार्मिक विषयभूमि जक लिधनाच्वंगु नेपालभाषा साहित्ययात समसामयिक जीवनय् ज्या वङ्गु थीथी विषयवस्तु जायेकेगु ज्या सिद्धिदास यानादिल। वय्कःया सत्यसती, शिवविलास, सर्ववन्धु आदि सफूया विषयवस्तु थज्याःगु हे सामाजिक विषयभूमि लिक्कयातःगु च्वमिया थःगु हे स्वतन्त्र सृजना खः। थुकथं सिद्धिदासया इलानिसे सिद्धिदयेक नेपालभाषा साहित्यय् सृजनात्मक सशक्तता तिब्र जुल। कविता, बाखं आदिया विषयभूमि, च्वमिं थःगु हे कल्पना निर्माण यायेगु परम्परा कायम जुल। फलतः नेपालभाषा साहित्यय् विधागत विविधता जक मखु, विषयगत विविधता, मौलिकता नं खनेदत।

सिद्धिदास महाजु नेपालभाषाया छम्ह जनमुखी अले जातिय च्वमि नं खः। सिद्धिदासं गुलि नं च्यादिल, निगू उद्देश्यं प्रेरित जुयाः च्यादिल - १) पर उपकार २) मातृभाषानुराग। थ्व हे कथं सिद्धिदासया फक्क धया थें च्वज्या विषयपरक उपदेशमूलक जूगु दु। 'स्वान्तः सुखायः' यात मूलभूत आधार नालाः न्हयानाच्वंगु नेपालभाषाया काव्य परम्परायात सिद्धिदासया आगमनं काव्य 'परान्त सुखायः' परहीतया निती नं छयलेगु जुल (मल्ल, ने.सं. १९१० : ३९)। सिद्धिदास जर्जर राणाकालय् पिदंम्ह कवि खयाः नं वय्कलं उबलय् शासकतय्गु स्तुति प्रशंसा यानाः कविता गबलें च्यामव। वरु जीवनय् ज्या वङ्गु नीतिमूलक, ज्ञानपरक साहित्य साधना यानाः समाजय् शिक्षा, चेतना व नैतिकताया जः ह्वलेगु कुतः यानावन। थुलि जक मखु तत्कालीन समाजयात माः थें ताःगु, थम्हं

फुगु चाःगु थीथी विषयया सफू च्याः जनतायात थम्हं फुथे चाः थें सुसूचित, सुस्कृत यायेगु चेष्टा सिद्धिदासं यानावन।

अथे हे सिद्धिदासं गुलि नं च्यावन, नेपालभाषां हे दकले अप्वः च्यावन, नेपालभाषा थकायेगु निती हे च्यावन नापं छम्ह नेवाः च्वमिया धर्म नं पालन यानावन। सिद्धिदासं थःगु साहित्यया माध्यमं थःगु देया भौगोलिक वातावरणया चित्रण, नेवाः जातिया जीवनशैली, धर्म, संस्कृति, मूल्य, मान्यतायात नं उलि हे संशक्त रुप च्यावन, नेवाःजातियात अमर यानातयेत महत्वपूर्ण योगदान बियावन। उकिं सिद्धिदास छम्ह जन च्वमि व जातिय च्वमि नं खः।

थौ सिद्धिदास न्हूपिं च्वमिपनिगु निती छम्ह क्लासिक जुयाः नं वय्कः थः हे छम्ह स्वच्छन्दवादी च्वमि खः। सिद्धिदासं शास्त्रीय काव्ययात नं थःगु हे पहलं च्वये जिउ धयागु नमूना क्यनावन। वय्कःया 'सत्यसती' खण्डकाव्य शास्त्रीय नियम प्रति हे छगू चुनौति खः। शास्त्रीय नियम पालना मयासे नं बांलाःगु खण्डकाव्य सृजना यायेफू धयागुया दसु थ्व सत्यसती खण्डकाव्य खः। अथे हे समस्यापूर्ति खास यानाः फुटकर कविता जुइगुलिइ सिद्धिदासं उकिइ हे बाखं हनाः खण्डकाव्य च्वःगु थ्व सत्यसती खण्डकाव्य समस्यापूर्ति या इतिहासय् नं न्हापांगु प्रयोग खः। थुकथं तत्कालीन काव्यशास्त्रया नियम पालना मयासे थःगु कथं नं साहित्य सृजना यायेजिउ धयागु बिचाःयात प्रयोग यानाः क्यनावंम्ह सिद्धिदास महाजु छम्ह स्वच्छन्द प्रवृत्तियाम्ह च्वमि नं खः।

सिद्धिदासयात छम्ह सरल व स्वाभाविक भाषाया प्रयोक्ताया रुपय् नं म्हसिइके छिं। गद्य विधाय् खल्लाबल्हाया भाय् निष्ठानन्दजुं ललितविस्तरय् न्हापां छयलादिलसा पद्य विधाय् लोकभाषायात छयलेगु परम्परा नं सिद्धिदासं हे न्हयाकादिल। सिद्धिदासं थःगु काव्यय् सरल, सुललित, सुकोमल भाषा छयलाः नेपालभाषायात जन ग्राह्य जुइगु कथं जनप्रिय भाषाया रुपय् प्रतिष्ठापित यानाः नेपालभाषायात अप्वः प्रचार प्रसार जुइकेविल।

थुकथं सिद्धिदास महाजु तथ्यक पुनर्जागरणया निती आवाहन याना मदीसां थुकियात न्हयज्याकेत थम्हं तःधंगु त्याग, बलिदान बियादिल। थज्याःगु हे सिद्धिदासया योगदानयात कदर यानाः न्हापां ने.सं. १०८६ स भाजु राजा शाक्य कम्भेनर जुया नी स्वंगु सिद्धिदास बुदिं खलकं सिद्धिदासया बुदिया लसताय् दैय् दसं नसंचा उलेगु, साहित्यिक कार्यक्रम न्यायकेगु परम्पराया शुरुयाःगु दु। थ्व हे कथं ने.सं. १०८७ स नेवाः जनतां च्वसापासाया तत्वावधानय् सिद्धिदासया १०० दै बुद्धि तःजिक हन। बुदिं हनेगु भवलय् सिद्धिदास सम्बन्धी स्वंगु कार्यपत्र १) सिद्धिदासया ई निसें नेपालभाषाया काव्य प्रवाह (च्वमि- सुन्दरकृष्ण जोशी) २) सिद्धिदासया जीवन दर्शन (च्वमि- जनकलाल वैद्य) ३) सिद्धिदासया नेपालभाषा काव्य सृजना (च्वमि- ईश्वरानन्द) प्रस्तुत जुलसा सिद्धिदासं च्वःगु छगू सफू किष्कन्धाकाण्ड (सिद्धिरामायणया छगू काण्ड) काव्य व सिद्धिदास सम्बन्धी विवेचनात्मक कृति सिद्धिदास म्हासीके, सत्यसतीया विवेचना आदि पिकायेगु ज्या जुल। अथे हे सिद्धिदास नेवाःतय् जक कवि मखु नेपाःया हे छम्ह



विभूति खः धयागु ल्याखं श्री ५या सरकारं सिद्धिदासया नामं हलाक टिकट नं पिकयाबिल । छम्ह नेवाः च्वमियात सम्मान यायेकथं पिदंगु थ्व न्हापांगु हलाक टिकट खः ।

**माष्टर जगतसुन्दर मल्ल** (ने.सं. १००३-१०७३)

ने.सं. १००३ स मां जगतलक्ष्मी व बौ विष्णुधर मल्लया कोखं ख्वपया क्वाथ त्वाल्य जन्म जूम्ह जगतसुन्दर मल्ल, नेपालभाषाया पुनरुत्थानया नितिं महत्वपूर्ण भूमिका म्हितावम्ह छम्ह महारथी खः । थ्वय्कःया योगदान मेमेपिं नेपालभाषाया व्यक्तित्वपिनिगु स्वयाः पाः ।

नेपालय शिक्षाया जः पिज्वये हे मलाःगु इलय नं अंग्रेजी शिक्षा प्राप्त यानादीम्ह छम्ह व्यक्तित्व जगतसुन्दर मल्ल खः । थथे खयां नं जगतसुन्दर मल्ल उबलयया भाइभारदारतय मचातयत आखः ब्वंकाः वा शासकतय चाकडी यानाः तःधंगु जागिर नयाः मान, धन प्राप्त यायेगु पाखे न्हयचिलामदी । बरु थुकिया पलेसा थःगु ज्ञान शिक्षायात जनसाधारणया मचातयत स्यने कनेगुलिइ छयलादिल । कलकत्ताया **स्कटिसचर्चर्ज** स्कूल **इन्ट्रेन्स** पास यानादीम्ह जगतसुन्दर मल्ल दकलय न्हापां **ख्वपया खौमा** त्वाल्य नेपालभाषां अंग्रेजी ब्वंकेगु स्कूल चायेकादिलसा वयां लिपा थ्वय्कः यैया बालकुमारिइ च्वंभासेलि अन नं थ्वय्कलं त्वाःवाःया मचातयत नेपालभाषां ब्वंकेगु यानादिल । फलतः थ्वय्कः **माष्टर साहेब**या नामं परिचित जुयादिल । खयत ला थुगु इलय नं छैय् छैय् आखः ब्वंकिइपिं माष्टर छम्ह निम्ह मदुगु मखु, दु, तर अंग्रेजी ब्वंकिइपिं माष्टर धाःसा द हे मदु धाःसां ज्यू । थज्याःगु इलय थ्वय्कलं अंग्रेजी ब्वंकेगु यानादीगु जक मखु, थःगु हे छगू निश्चित सिद्धान्त, निश्चित लक्ष्य ज्वनाः आखः ब्वंकेगु यानादिल । **गुगु जातिया गुगु भाषा जुया च्वन उगु हे भाषां ज्ञान ब्युसा याकनं ज्ञान थुइका काइ** (हृदय, ने.सं. ११०२ : ८७) धयागु थ्वय्कःया सिद्धान्त खः । थ्व हे सिद्धान्त कथं थ्वय्कलं नेवाः मचातयत नेवाःभासं हे आखः ब्वंकेगु यानादीगु खः । थथे नेवाः भासं आखः ब्वंकेगु जूबलय छखे नेवाः विद्यार्थीतयसं याकनं शिक्षा आर्जन यायेफतसा मेखेर नेवाः भाय्या अप्वः प्रचार प्रसार जुल, नेवाः भासं शिक्षा बिइगु संस्कारया नी जुल । थुलि जक मखु थम्हं ब्वंकापि विद्यार्थीतयसं मेपित नं नेवाःभासं आखः ब्वंकेमाः धयागु वय्कःया शर्त खः । थथे वय्कःया विद्यार्थीतयसं नं नेपालभासं आखः ब्वंकीगु जूबलय नेपालभाषाया प्रचार प्रसारय अर्भं तिब्रता वइगु स्वाभाविक खः । फलतः शिक्षाया प्रचारया नापं भाषाया नं प्रचार जूवन । मातृभाषा प्रतिया ममता, सचेतता ग्वाकेगु ज्या जुल । फलतः हासोन्मूख अवस्थाय् थ्यनाच्वंगु उबलयया नेपालभाषाया नितिं थज्याःगु क्रियाकलाप संजीविन बूटि थें जुल । थौया दृष्टिं स्वयेबलय जगतसुन्दर मल्लया थ्व ज्याखं उलि तःधंगु मखु थें तायेफु, तर उगु ईया परिवेश, पृष्ठभूमिइ दुहां वनाः स्वयेबलय थ्व कम क्रान्तिकारी, कम युगान्तकारी ज्याखं मखु । थौ मातृभाषां शिक्षा बिइमाः धयागु खैय् निगू मत मजुइ धुंकल । तर थौ स्वयाः ग्वीदँ ग्वीन्यादँ न्हय, गबलय

नेपालभाषा साहित्यया इतिहास/८८

मचातयत आखः ब्वंकेमाः धयागु चेतना तर्क दना मवनि, दुगु दरवार स्कूल छगू नं दरवारया मचात व भाइभारदारया कायमचातयगु नितिं जक जुयाच्वंगु, थःपिनिगु शासन सत्ता ल्यंका तयेत शिक्षाया जः जिउथाय तर्क लिक्का तइगु सरकारी प्रयास जुयाच्वंगु, अर्भ नेपालभाषा ला शासकतयगु नितिं मिखाया धू थें जुयाच्वंगु इलय नं नेवाः मचातयत नेवाः भासं हे शिक्षा बिइमाः धकाः धारणा प्वंकेगु जक मखु, थःगु हे छैय् स्कूल चायेकाः थम्हं हे नेवाः भासं आखः ब्वंकेगु धयागु उबलयया सरकार व व्यवस्था प्रति हे छगू तःधंगु हाथ्या खःसा नेपालभाषाया नितिं छगू युगान्तकारी पलाः खः । थथे नेवाः मचातयत न्हापां इमिगु मांभासं आखः ब्वंकेमाः धकाः आव्हान यानादीम्ह जक मखु, थम्हं हे नेवाःभासं आखः ब्वंकाः कीर्तिमान तयादीम्ह व्यक्तित्व जगतसुन्दरसं मल्ल खः ।

जगतसुन्दर मल्ल नेवाः भासं आखः ब्वंकाः उबलयया जनमानसय नेवाः भाय्या प्रचारप्रसार जक यानावंगु मखु, वय्कलं उबलय नेपालीभाषाय नं स्कूलीय पाठ्यपुस्तकया अभाव खनाः विद्यार्थीतयगु सुविस्ताया नितिं अंग्रेजीया नेपालीभाषां माने व नेपालीभाषाया अंग्रेजी माने तयाः **डिक्सनरी च्वयादीगु** दु धाइ सा रोमया ऐतिहासिक उपन्यास **पेटर पार्लि** धाःगु सफू छगू नं अनुवाद यानादीगु दु धाई । माघबलय कनिइगु **गोमयजुया बाखं** नं थासं थाययागु मुंकाः व फुक्क स्वयाः छगू थम्हं हे ग्वयाः च्वयाः तयादीगु दु । अथे हे थ्वय्कलं विश्व प्रसिद्ध बाखं **‘इसपस फेबल्स’**या अनुवाद यानाः **इसपं दयेकातःगु बाखं** धकाः ने.सं. १०३५ य थासा आखलं पिकयादीगु दु । थुकी ४७ पु बाखंचा दुथ्याकातःगु दु । जगतसुन्दर मल्ल थ्व सफलइ थःगु नां **जे.एस. मल्ल** धकाः न्हयव्वयादीगु दु । थौ वय्कःया कृति कथं ल्यनाच्वंगु थ्व हे **‘इसपं दयेकातःगु बाखं’** सफू खः । अंग्रेजी भाषाया नेपालभाषां अनुवाद जूगु थ्व नेपालभाषाया न्हापांगु सफू खः । थुकथं पाश्चात्य साहित्यय पिदंगु थीथी अंग्रेजी भाषाया बाखं नेपालभाषां अनुवाद यानाः नेवाःतयत विश्व बाखं नाप परिचित याकाबिउम्ह वय्कः अंग्रेजी भाषाया न्हापांम्ह अनुवादक जुयादीगु दु । थ्व **इसपं दयेकातःगु बाखं** सफलइ **हसना** धकाः भूमिका वियातःगु दु । थ्व जगतसुन्दर मल्लया जक स्वतन्त्र गद्य रचना मजुसे उगु ईया गद्यया छगू दापू धायेवह जू । थुकिं उगु ईया ख्वप भाषिकाया प्रतिनिधित्व याःगु दु । थ्व **‘हसना’** शिर्षकया भूमिका जगतसुन्दर मल्लयागु भाषा सम्बन्धी दृष्टिकोण व्याब्युगु दु । **गुगु जातिया गुगु भाषा जुया चोन उगु हे भासं ज्ञान ब्युसा याकनं ज्ञान थुइका काइ** अर्किं व सकसिया थुकी भिनै भाव लुया वइमखु..... थअगु भाषायागु सफू थउ कन्हये मरुगुलि सेनेगु लिपा ला वन् थअपिनिगु हे भाषे मेमेपिं बुद्धि दुपिं जातितएगु ज्ञान दुगु सफू दु सा आपाःसित अःनं पुइ, ई नं आपा सितिं वनि मखु (मल्ल, ने.सं. १०३५ : भूमिका) । थुकथं जगतसुन्दर मल्ल मचातयत मातृभाषा शिक्षा बिइमाःगुलिइ वः वियादीगु जक मखु कि मेमेगु भाषाया सफू नं थःगु भाषाय अनुवाद यानाः दुत हयेमाःगु समयोचित विचाः नं प्वंकादीगु दु । अथे हे थ्व भूमिकाय सअपिसं निवा भासं सफु मचोगु कारण नागरि आख व आ थउकन्हे मसिया निवा आखः धकाः माने याना तअगु आख नं थो भाषेत बां लाका

नेपालभाषा साहित्यया इतिहास/८९



**मजोगुलि ख** (मल्ल, ने.सं. १०३५ : भूमिका) धकाः न्हयथंसे नेवाः भासं च्वयेगु ज्या मजुगु छगू कारण लिपि नं जूगुलिं नेवाः लिपि धकाः नं मोह कया च्वने मजिल धकाः नेपालभाषाया प्रचार प्रसारया निति लिपि सम्बन्धी नं नरम नीति ज्वनेगु आग्रह यानादीगु दु । थुकथं देवनागरी लिपि नेपालभाषां ज्वनेमाःगुया वास्तविकता न्हयथनादीम्ह न्हापाम्ह बौद्धिक व्यक्तित्व जगतसुन्दर मल्ल हे जूगु दु । थये नेपालभाषा उत्थानया निति सही मार्गदर्शन यानाः पुनर्जागरणया लहर न्ह्याकेगुलिइ जगतसुन्दर मल्ल महत्वपूर्ण भूमिका म्हितादीगु दु ।

जगतसुन्दर मल्ल थःगु ईयाम्ह छम्ह शिक्षाविद्, बौद्धिक व्यक्तित्व जक मजुसे नेपालभाषाया सफू छैय् छैय् थ्यंकेबियाः थ्वया प्रचार प्रसारय् जोड बियादीम्ह भाषा प्रचारक नं खः । नेपालभाषाया सफू छैखा छैखापतिं थ्यंकेमाः, नेपालभाषा फुक्कस्यां ब्वंकेमाः धयागु थ्वय्कःया धारणा खः । थ्व हे धारणा कथं उगु ईया छम्ह तःधंम्ह विद्वान् जुयाः नं जगतसुन्दर मल्लं थम्हं च्वयागु सफू थःगु छैक्वय् हे बेंपसः तयाः सां गबले तित्थल्य च्वनाः थम्हं हे मिडगु यानादिल । सफू न्यायेत ध्यबा मदु धाईपित बछि धेवां अभ् गुलिसित सितिकं नं सफू बियाछवयादिल । थुकथं नेपालभाषाय् पुनर्जागरण अभियान न्ह्याकादिल । थौं थ्वय्कःया देनयात कदर यानाः नेपालभाषाया माध्यमं ब्वंकिइगु छगू स्कूलया नां नं जगतसुन्दर ब्वनेकुथि धकाः थ्वय्कःया नामं तःगु दु । अथे हे थ्वय्कःया जन्मस्थान ख्वपया खोपा त्वाल्य थ्वय्कःया लुमन्तिइ सालिक धस्वाकूगु दु । थ्वय्कःया जीवनकालय् छुं यायेमफुसां थौया नेपालभाषाभाषीतसें थ्वय्कःयात थौं श्रद्धा व भक्ति लुमंकेगु याःगु दु ।

**कवि योगवीरसिंह** (ने.सं. १००६-१०६२)

ने.सं. १००६ स मां लक्ष्मीनानी, बौ चैत्यवीरसिंहया कोखं येंया क्वाछें त्वाल्य जन्म जूम्ह योगवीरसिंह सिद्धिदास धुंकाःयाम्ह पुनर्जागरणकालया छम्ह सशक्त कवि खः । साहित्यया माध्यमं सामाजिक चेतना, भाषिक जागरण, धार्मिक सुधारया सः थ्वयेकेगु यानादीम्ह योगवीरसिंहयात न्हापां साहित्य सृजना प्रति समर्पित जुइत श्री महावीर प्रसाद द्विवेदिया सम्पादकत्वय् पिदंगु तत्कालीन सरस्वती पत्रिकाया पठन पाठन व कलकत्ताया बंगालीतय्के खनेदुगु मातृभाषा अनुराग, साहित्य प्रतिया निष्ठा पाखें प्रेरणा दयावःगु खनेदु । वय्कःया साहित्य प्रतिया अभिरुचिया कारण वय्कः छम्ह साहुया कायमचा जुयाः नं वय्कःया संगत सिद्धिदास, लेखनाथ, शम्भुप्रसाद, चक्रपाणी आदि थें ज्याःपिं साहित्यिक व्यक्तित्वत लिसे जुल । नापं बरोबर थःगु कापः पसल्य कवि सभा, समस्यापूर्ति आदि थें ज्याःगु साहित्यिक क्रियाकलाप नं जुइगु जुयाच्वन । थुगु इलय् च्वःगु थुपिं कवितय्गु थीथी कविता उगु ईया सरकार लाइब्रेरी पर्वय् (१०४०) जफत याःसां, थुखें उखें ल्यनाच्वंगु छुं छुं नेपालभाषा व नेपाली भाषाया कवितायात, भाजु शरदचन्द्र भट्टराईजुं सम्पादन यानाः जोगमण्डलीका कवि र कविता (ने.सं. १११६) या नामं पिकयादीगु दु । योगवीरसिंह नेपाली भाषाय् जोगवीर उदासया नामं

च्वयेगु यानादीगु खः । थुकथं योगवीरसिंह नेपाली भाषाया माध्यमिक युगया नं छम्ह कवि खः ।

शुरु शुरुइ योगवीरसिंहजुं नेपालभाषां कविता च्वयादीगु खःसां लिपा 'बुद्ध धर्म नेपालभाषा' पत्रिका पिदसेलि नेपालभाषां नं थ्वय्कःया कविता पिदन । इलय् व्यलय् च्वयातःगु थीथी कविता थ्वय्कलं तत्कालीन 'बुद्ध धर्म व नेपालभाषा पत्रिका'य् धमाधम पिकायेकादिल । 'नेपालभाषा', 'धर्मसार', 'रानी मन्दिराया विलाप', 'मनया उद्गार' 'अहिंसा' आदि थ्व पत्रिकाय् पिदंगु योगवीरसिंहया बाबांलाःगु कविता खः । 'बुद्ध धर्म व नेपालभाषा' पत्रिकाया छगू विशेषता थ्वय्कःया कविता नं जूगु दु । सिद्धिदासया इलनिसें सिद्धदेवक ब्वलंगु जीवनमुखी विषय थियाः काव्य सृजना यायेगु प्रवृत्ति थ्वय्कःया काव्यय् वयाः अभ् व्यापक व विस्तृत जुल । उपदेश व नैतिकताया थासय् सामाजिक सुधार, भाषिक अनुराग, चेतना व जागृतिता सः तिव्र जुल । काव्यया माध्यमं भाषिक जागरण, सामाजिक चेतनाया जः ह्वलेगु, आर्थिक, शैक्षिक विषयय् चिन्तन यायेगु प्रवृत्ति ब्वलन । सिद्धिदासया काव्यय् नीति उपदेशं अप्वः थाय् काःगु दु सा थ्वय्कःया काव्यय् सुधारवादी चेतनां महत्वपूर्ण भूमिका म्हितल । थ्वय्कलं च्वयादीगु आपालं कविता तत्कालीन 'लाइब्रेरी पर्व'य् (ने.सं. १०४९) जफत जूगुलिं आपाः थें थ्वय्कःया रचना थौं पिदने मफुत । भचा भचा थुखें उखें लानाच्वंगु ल्यंदुगु नेपालभाषाया कवितायात थ्वय्कःया शिष्य चित्तधर 'हृदय' योगसुधा या (ने.सं. १०७१) नामं पिकयादिल । थ्व 'योगसुधा' सफलइ दुध्याःगु छुं छुं कवितां जक नं योगवीरसिंहया भाषा सम्बन्धी अवधारणा, धर्म सम्बन्धी दृष्टिकोण, देय्या उद्योगधन्दा सम्बन्धी विचाः, शिक्षा सम्बन्धी सचेतता स्पष्ट याः । अथे हे थ्व 'योगसुधा' सफलइ दुध्याःगु सिनाज्याया बूँइ थें ज्याःगु चिनाखें परम्परागत सिनाज्या म्येय् खनेदइगु उच्छुखलता, अशिललताया पलेसा, शिष्ट स्वच्छन्द रुपं नं सिनाज्या थें ज्याःगु म्ये चिनेज्यू धकाः क्यनाव्यूगु दु सा नेपालभाषा काव्यय् लिपा ब्वलंगु स्वच्छन्दवादी प्रवाहया प्रारुप नं क्यंगु दु । थुकथं सिद्धिदासं शुरु यानादीगु चिनाख विधायात विषयगत विविधता, शैलीगत विविधतां छायापाः अभ् परिमार्जित यायेगु, काव्ययात जीवनमूलक जीवनमुखी जुइकेगु ज्या योगवीरसिंहपाखें जूगु दु ।

छखे कवि योगवीरया मन साहित्य सृजनाप्रति न्हयज्याःगु दु सा मेखेर सामाजिक सुधारवादी क्रियाकलाप पाखें नं उलि हे नुगः क्वसाःगु दु । उगु इलय् माधवराजया आर्यसमाज प्रचार आन्दोलन (ने.सं. १०४०), तुल्सीमेहरया चर्खा प्रचार आन्दोलन (ने.सं. १०४५-४६), कसाः गुथिया पुनः संचालन, लाइब्रेरीया स्थापना (ने.सं. १०४९), आदम्बर मतया प्रचार (ने.सं. १०५०) आदि तत्कालीन विविध सामाजिक क्रियाकलापय् नं थ्वय्कलं सक्रिय भूमिका निर्वाह यानादीगु दु । थज्याःगु क्रियाकलापय् ब्वति काःगु कारणं थ्वय्कलं तत्कालीन राणा शासकतपाखें तःक्वःमछि यातना फयेमाल, बं पुलेमाल । थये नेपालभाषां च्वःगु, सामाजिक सुधारया ज्याय् संलग्न जूगु कारणं जेल यातना फयेमाः न्हापांम्ह नेवाः थ्वय्कः



हे जूगु दु । धर्मसार नांगु नेवाः म्ये छापे यानाः इनाब्यूगु द्वपनय् थ्वय्कःयात १०/- तका दां वं पुइकल । थ्वय्कःया सुधारवादी व्यक्तित्वया प्रतिविम्ब थ्वय्कःया योगसुधा सफुलिइ दुध्याःगु प्रवासी पत्निया बसन्त , धर्मसार , उद्योग चिनाखँय् गाकं खनेदु । थ्वय्कःया सक्रियतां हानं धस्वाका थकूगु 'कसाः गुथि' थौं नं 'कसाः समुदाय'यात संगठित यानाः थ्वया उत्थानया निम्ति रचनात्मक तथा सुधारात्मक क्रियाकलापय् निरन्तरता बियाच्वंगु दु ।

योगवीरसिंहयात नेपालभाषाया पुनर्जागरणया शंखनाद याःम्ह न्हापांम्ह साहित्यकारया रुपय् नं म्हसिइकेगु जूगु दु । न्हापा मल्लकालय् नेपालभाषा साहित्य लेखनय् गुगु जागरण व उत्साह पिदंगु खः, मल्लकालया अन्त लिपा वयाः शिथिलता खनेदत सा, राणाकालय् वयाः निष्कृय व नकारात्मकता खनेदत । थज्याःगु नेपालभाषा साहित्यया स्थलय् पिज्वःगु निष्कृयता, हासोन्मुखताया थासय् न्हगु उत्साह व जागरण हयाः नेपालभाषा व थ्वया साहित्ययात हानं च्वन्हाकेगु निम्ति आह्वान यानादीम्ह छम्ह व्यक्तित्व योगवीरसिंह कसाः खः । थुखे थःगु बनेज्याया सिलसिलाय् कलकत्ता बनेबलय् अन बंगाली भाषाय् सफू पत्रपत्रिका पिदनाच्वंगु अले बंगालीतय्गु थःगु भाषाप्रति दुगु ममता व उबलयाया कविपिनिगु भाषा साहित्यप्रति समर्पणया भावनां प्रभावितम्ह योगवीरसिंह थःगु मातृभाषायात नं हानं उत्थान यायेगु, थ्वया साहित्य लेखनय् जागरण हयेगु मनं तुनादिल । अले थः छम्हेसिगु कुतलं जक छुं मजुइगु खनाः थ्व जागरणयात सामूहिक अभियान कथं न्हायेकेगु निम्ति वय्कल नेपालभाषा धैगु म्ये चिनादिल । खयेत ला थ्व म्ये चित्तधरया धापू कथं योगवीरसिंहया शकुन्तला नाटकय् दुध्याःगु छप्पु म्ये खः (हृदय, ने.सं १०७१), तर थ्व म्ये बुद्ध धर्म व नेपालभाषा पत्रिकाय् पिक्याः उबलयाया युवातय्त भाषिक चेतना, मातृभाषा प्रति अनुराग थनेगु कुतः योगवीरसिंह यानादिल । थ्वय्कः स्वयाः न्हयःयापि च्वमित निष्ठानन्द, सिद्धिदासपिसं नं नेपालभाषाया पुनर्जागरण अभियानयात न्हयज्याकेत आपालं महत्वपूर्ण ज्या यानावंगु दुसां नेपालभाषाया पुनरुत्थानया निम्ति स्पष्ट रुपं दकलय् न्हापां आह्वान यानादीम्ह थ्वय्कः हे खः ।

**नेपालभाषा जिर्ण जूगु अलि मचासे भिंकेनु**

**भारतिय शास्त्र भवनं मान थ्वइत बीकेनु । (योगसुधा : ने.सं. १०७०:१)**

थ्व पक्तिं नेपालभाषाया पुनरुत्थानया निम्ति शंखनाद याःगु स्पष्ट जू । थुलि जक मखु थ्व 'नेपालभाषा' कविताया माध्यमं मातृभाषाया विकासया महत्ता तत्कालीन जनमानसय् न्हयब्वयाः थ्वया उत्थानया निम्ति, शिक्षण संस्थां मान्यता बिइकेगु निम्ति तर्क आह्वान यानातःगु दु । खयेत ला थौया दृष्टि थ्व 'बिचा' छुं तःधंगु मखु थें तायेफु, तर उगु ईया परिवेश उगु ईया शैक्षिक संस्कारपाखे मिखा ब्वयेबलय् भाषा, साहित्य उत्थानया निम्ति थुलि बिचाः यायेफुगु, थुलि आह्वान यायेफुगु कम महत्वया खँ मखु । उकिं योगवीरसिंह छम्ह साहित्यकर्मि,

भाषानुरागी जक मखु, भाषिक उत्थानया निम्ति सामाजिक जागरणया निम्ति सही नेतृत्व बीफुम्ह, सही दीशाबोध यायेफुम्ह व्यक्ति नं खः ।

**शहिद शुक्रराज शास्त्री (ने.सं. १०१३-१०६१)**

'हे जक मस्त दे दे मिखा निगल केँ कं, तुति निपां चु चु' धकाः राणा शासनया इलय् नं नेपाली जनतायात चेतना थनेगु आत्मनिर्भर जुइकेगु निम्ति आह्वान यानादीम्ह अमर शहीद शुक्रराज शास्त्री नेपाःया राजनैतिक इतिहासया जक स्वर्णिम पौ मजुसे नेपालभाषा पुनर्जागरण आन्दोलनया नं छम्ह त्वःफिके मजिउम्ह व्यक्तित्व जूगु दु । बौ पं. माधवराज जोशी व मां रत्नमायाया कोखं ने.सं १०१३ श्रावण पुन्हि कुन्हु जन्म जूम्ह शुक्रराज शास्त्री बखुंबहाःया जोशी कूलया कायमचा खः । तत्कालीन आर्य समाजया नेपाली नेता पं. माधवराज जोशी थनया राजनैतिक कारणं तःक्वःमछि भारतय् निर्वासित जुयादी माल । थ्व हे कथं शुक्रराज शास्त्रीया कर्मस्थल नेपालभूमि जुयां नं जन्मस्थल भारतया बनारस शहर जुयाबिल । माधवराजजुं थः मचातय्त भारतय् हे शिक्षादीक्षा बियादिल । थ्व हे कथं शुक्रराज देहरादूनया सिकन्दरावाद गुरुकुलय् च्वनाः वेदान्तय् शास्त्री पास यानादिल । शास्त्री परीक्षाय् प्रथम श्रेणीइ प्रथम जूगुलिं उगु ईया भारत सरकारं वय्कःयात विद्याभूषण धयागु विभूषण विभूषित यात । थनं निसैं वय्कःया नांया लिउने शास्त्री तयेगु जूगु खः ।

शुक्रराजजुं थःके दुगु ज्ञान, बुद्धि, विवेकयात नेपालभाषा व थ्वया साहित्यया उत्थानया निम्ति नं छयलादिल । वय्कःया जन्मस्थल भारतभूमि खयां नं वय्कलं थःगु कर्मभूमि, मातृभूमि नेपालयात हे नालादिल । वय्कलं नेपाली जनताया स्वाधिनता स्वतन्त्रताया निम्ति जक थःत पयानादीगु मखुसे थः मातृभाषा नेपालभाषाया निम्ति नं तत्कालीन आवश्यकता कथंयागु सफू च्वयाः थ्वया पुनरोत्थानय् महत्वपूर्ण योगदान बियादिल । नेपालभाषा नेपाःया छगू प्राचीनकालं निसैं हे साहित्य सम्पन्न भाषा खयाः नं थ्वया स्तरीय व्याकरण मदु । छुं नं भाषायात स्तरिय जुइकेगु ज्याय् व्याकरणया तःधंगु थाय् दयाच्वनी । व्याकरणया अभावय् भाषिक स्वरुपया ज्ञान मदइगु व थुकिया पठनपाठनय् जटिलता खने दइगु स्वाभाविक खः । हासोन्मुख स्थितिइ लाःवनेत्यंगु तत्कालीन नेपालभाषायात हानं पुनरोत्थान यानाः प्रचार प्रसारय् हयेगु निम्ति नेपालभाषाय् व्याकरण च्वयेमाःगु आवश्यकता शास्त्रीजुं महशुस यानादिल । थ्व हे अनुरूप शुक्रराज शास्त्रीजुं नेपालभाषा व्याकरण च्वयाः ने.सं. १०४८ स पिकयादिल । लिपायापिं च्वमिपित नं व्याकरण च्वयेगु प्रेरणा बियादिल । नेपालय् रेजिडेण्ट जुयावःम्ह ब्रायन हट्टन हजसनं नेपालभाषाय् व्याकरणया सफू मदु धाःगु थ्याक्क सच्छि दँ लिपा शुक्रराजयागु व्याकरण सफू पिदन । थ्वया लिपा डेनमार्कयाम्ह हायन्स जोर्गेनसनं नं नेपालभाषायागु व्याकरण (ने.सं १०६०) च्वयादिल । तर थ्व सफू नेपालभाषां मजुसे अंग्रेजी भाषां रोमन लिपिं च्वयातःगु खः । उकिं थ्व सफू नेवाःतय्गु निम्ति मजुसे विदेशी छि नतय्गु निम्ति जक जुल । शुक्रराजयागु



व्याकरण थें जोर्गेन्सनया व्याकरण नेवाःतय्गु पुचलय् न्यने मफुत । नेपालभाषा व्याकरण शुक्रराजजु थः शास्त्री परीक्षाय पास जुइधुकाः थन नेपालय हे नेपालीभाषा प्रकाशनी अड्डाय ज्या यानादीबल्य च्यादीगु खः । नेपालभाषा पुनर्जागरण आन्दोलनया छगू मू उद्देश्य नेपालभाषायात स्तरीय भाषाकथं प्रतिष्ठापित यायेगु खः । थ्व हे अनुरूप तत्कालीन स्वम्ह छि नतयसं (सिद्धिदास, शुक्रराज शास्त्री, धर्मआदित्य धर्माचार्य) वैयक्तिक रुपं थःथःगु कथं व्याकरण च्वयेगु ज्या याःगु जुयाच्वन, तर शुक्रराज च्यादीगु नेपालभाषा व्याकरण (ने.सं. १०४८) छगू त्वःताः मेगु व्याकरण सफू पिदंगु खनेमदु । थ्व 'नेपालभाषा व्याकरण' सफू ने.सं. १०४६ स च्यादीगु खःसा ने.सं. १०४८ स जक पिदन । थ्व सफूया मू उद्देश्य खः - समकालीन चलनचलितया नेपालभाषाया लिधंसाय व्याकरण दयेकेगु, नेपालभाषाय भ्रष्ट व विकृत रुप मवयेमा धयागु उद्देश्य व्यावहारिक व्याकरण नियम दयेकेगु, समकालीन चलनचलितया नेपालभाषायात आधार दयेकेगु आदि । न्वःसःयात हे मू लिधंसा दयेकाः येँया नेपालभाषायात स्तरीय भाषा नालाः च्यातःगु जूगुलिं थ्व नेपालभाषा व्याकरणय येँय छयलिइगु कथंया खंग्वः, हिज्जे पदावली, वाक्य गठनया प्रयोग जूगु दु । थौंया दृष्टि स्वयेबल्य थ्व व्याकरणय आपालं कमि कमजोरी दयेफु, तर उगु इलय नं भाषा वैज्ञानिक सिद्धान्तयात आधार नालाः व्याकरण च्वयेफुगु कम महत्वया खं मखु । थुकथं शुक्रराजजु नेपालभाषायात वैज्ञानिक व्याकरण बियाः थ्व भाषायात अप्वः प्रचार, प्रसार जुइकेगुलिइ तिबः बियादिल, छगू स्तरीय भाषा दयेकेगु आधारभूमि ज्यानादिल, व्याकरणया दृष्टिकोण अध्ययन मनन् यायेगु परिपाटी स्वनादिल ।

शुक्रराज शास्त्री नेपालभाषां व्याकरण पिकयादीम्ह न्हापांम्ह व्यक्ति जक मजुसे नेपालभाषाय बाल साहित्यया निर्माण यानादीम्ह न्हापांम्ह च्वमि नं खः । भारतय संस्कृत साहित्यया प्रचार ला न्हापां निसें हे दु, शुक्रराज शास्त्रीया इलय तर्क पाश्चात्य देशया साहित्य नं भारतय चलन चलितइ वयेधुकल । प्रौढ साहित्य जक मखु, बाल साहित्य नं भारतया फुक भाषाय दुथ्याये धुकल । थ्व हे स्वयाः खनाः शुक्रराज शास्त्री नेवाः मचातय्गु लागी थःगु मांभासं हे ब्वने दइकथं पश्चिमी पहवःगु मचा सफू च्वयेमाःगु आवश्यकता खंकादिल । थुगु इलय नेपालभाषाय बाल साहित्य धयागु मनुनि, मेगु भाषाय दुगु सफू नं शास्त्रीय परम्परा कथंयागु जक जुयाच्वन । थ्व हे कथं शास्त्रीजु मचातय्गु निति 'वर्णमाला' निसें रीडर तक नं तगिं तगिं यानाः च्या यंकेगु ग्वसाः ग्वयादिल । थ्व हे ग्वसाः कथं शुक्रराज शास्त्री नेपालभाषा वर्णमाला (ने.सं. १०५०), नेपालभाषा रीडर भाग -१, २ (ने.सं. १०५०) च्याः भारतय हे छापे यानाः नेपालय दत हयादिल । नेपालभाषा वर्णमाला प्रारम्भिक ईया आखः स्यनिइपिं मचातय्गु निति जुलसा नेपालभाषा रीडर मचातय्क बाखं, निबन्धया माध्यमं नैतिकताया जः ह्वलेगु, च्वयेगु ब्वनेगुलिइ अभिरुची अभ्यास दयेकेगु निति जूगु दु । थुकथं मचातय्गु लागी बाल साहित्य मनु धकाः सुनानं च्वयेगु कुतः हे याःगु मनुनिगु इलय नेपालभाषां दकलय न्हापां बाल साहित्यया रचना यानाः नेवाः

मचातय्क अःपुक, न्हयइपुक शिक्षा ग्रहण याकेगु कुतः शुक्रराज शास्त्री यानादिल । माष्टर जगतसुन्दर मल्ल मचातय्क मातृभाषा शिक्षा विइमाः धयागु धारणा ज्वनाः थम्हं हे नेवाः भासं आखः ब्वंकेगु गुगु अभियान न्हयाकादिल, उकियात सफल यायेगु निति मचासफू च्याः आधारभूमि तयार यायेगु कुतः शुक्रराजजु यानादिल । थुलि जक मखु, थौं नेवाःतयसं ल्हाइगु नेपालभाषायात विभाषितयसं 'नेवारभाषा' 'नेवारी भाषा' धकाः नं धायेगु याःसां, थ्व भाषायात नेपालभाषा हे धायेमाः धकाः जिकिर यानादीम्ह छम्ह विद्वान शुक्रराज शास्त्री नं खः । थ्वहे कथं थ्वय्कलं थःगु सफूया नां नेपालभाषा व्याकरण, नेपालभाषा वर्णमाला, नेपालभाषा रीडर आदि धकाः तयादिल ।

थुकथं शुक्रराज शास्त्री नेपालभाषा व्याकरण व बाल साहित्यया सफू च्याः भाषा जागरणयात क्वातुका यंकेगुलिइ महत्वपूर्ण भूमिका म्हितादिल । उकिं वय्कःयात नेपाःया छम्ह अमर शहीदया रुपय जक मखु, नेपालभाषा पुनर्जागरण युगया छम्ह सारथी कथं नं नालेगु जूगु दु ।

### धर्मआदित्य धर्माचार्य (ने.सं. १०२२-१०८३)

नेपालभाषा पुनरोत्थानया निति सशक्त भूमिका म्हितादीम्ह छम्ह महारथी धर्मआदित्य धर्माचार्य नं खः । थ्वय्कःया न्हापाया नां जगतमान वैद्य खः । थ्वय्कः यल च्यासः त्वाःया चिकं बही (सप्तपुर महाविहार)याम्ह भाजु वृषमान व मयजु मुनीथकुंया कोखं ने.सं. १०२२ वछलाथ्व १४ कुन्हु जन्म जूगु खः । वृषमानया मू लजगाः वैद्य ज्या जूगुलिं थःपिं सप्तपुर महाविहारया शाक्य (भिक्षाचार्य) खयाः नं थःपिनिगु थर शाक्य मतसे वैद्य हे तयेगु वृषमानं यात । थ्व हे कथं 'जगतमान', 'शाक्य' कूलया काय्मचा जुयाः नं 'जगतमान वैद्य' जूवन । तःधीपिं काय्पित थें राजवैद्य वृषमान थः कान्छाम्ह काय जगतमानयात नं दरवार हाइस्कूलय भिगू तगिं तक ब्वंकाः लिपा उच्च शिक्षाया निति कलकत्ताय ब्वंके छवयादिल । कलकत्ताया तत्कालीन वातावरणं विद्यार्थी जगतमानया जीवनय आपालं प्रभाव लाकल । अबलय भारतय स्वराज्यया भावना दना वयाच्वंगु खः । थ्व हे भवलय बंगाल स्वतन्त्रता आन्दोलनया प्रभाव वय्कःयात नं लात राष्ट्रिय भावना, स्वजातिय संस्कृति, धर्म प्रतिया मतिनां वय्कःया नुगलय नं गाक्कं थाय काल । थुगु हे इलय स्थविरवाद बुद्धधर्म प्रचारया सिलसिलाय कलकत्ताय भाया च्वनादीम्ह अनागारिक धर्मपाल नाप नं धर्मआदित्यया सत्संगत जुल । अनागारिक धर्मपालया प्रभाव स्वरुप वय्कः बुद्धधर्मय प्रव्रजित जुयाः जगतमान वैद्ययां धर्मआदित्य धर्माचार्य जुयादिल । धर्मआदित्य धर्माचार्य कलकत्ता युनिभर्सिटिइ ब्वनाच्वंगु उगु इलय आशुतोष मुखर्जी अनया भाइस चान्सलर जूगु जुयाच्वन । भाइस चान्सलर आशुतोष मुखर्जी छम्ह मातृभाषा अनुरागीम्ह विद्वान खः । वय्कःया हे कुतलं कलकत्ता विश्वविद्यालय मातृभाषायात छगू मुख्य विषय कथं म्याट्रिक निसें अनिवार्य रुपं पाठ्यक्रमय तयेगु जुल । थथे बंगाली, हिन्दी आदि भाषायात कलकत्ता विश्वविद्यालय भर्नाकुलर विषय कथं ब्वंकेगु यासेंलिं,



तत्कालीन कलकत्ता विश्वविद्यालय परीक्षा बिइपि नेपाली विद्यार्थीत न नेवाः भाषयात न भर्नाकुलर विषयकथं मान्यता बिइकेगु नितिं भाइस चान्सलरयाथाय डेलिगेशन वन । थ्व डेलिगेशनया नेतृत्व धर्मआदित्य धर्माचार्य हे यानादिल । सन् १९९८ स छगू विज्ञप्ति पिकयाः कलकत्ता विश्वविद्यालय नेपाली भाषायात मान्यता बिल, तर नेपालभाषायात पाठ्यसफू मनुनि धकाः मान्यता मबिल । थथे कलकत्ता विश्वविद्यालय नेपालभाषाय् पाठ्यसफू मनु धकाः नेपालभाषायात भर्नाकुलर विषयया रुपय् दुमथ्याकूगु कारण धर्मआदित्यया नुगलय् तच्चःगु घाः लात । थथे थःगु मातृभाषायात जूगु अवहेलनां मर्माहीत जूम्ह धर्मआदित्य थःत नेपालभाषाया उत्थानया नितिं छयलेगु प्रण यानादिल, प्रवासय् च्वनाः न नेपालभाषा उत्थानया आन्दोलन न्ह्याकादिल, थुकिया समुन्नति, समृद्धिया नितिं थःगु जीवनया महत्वपूर्ण ई फुकादिल ।

बहुआयामिक, बहुप्रतिभाया धनी धर्मआदित्य धर्माचार्यया दकलय् न्हयथनेबहगु व्यक्तित्व मातृभाषानुरागीया व्यक्तित्व खः । 'आः नं भी नेपालीतय थःगु भाषा व साहित्ययात उन्नति यायेगुलिइ कुतः मयातसा भीत तःधंगु पाप लायि' धयादीम्ह धर्मआदित्य धर्माचार्ययात थ्व हे मातृभाषानुरागीया व्यक्तित्व, मेमेगु व्यक्तित्व नं ब्वलकूगु दु । वयकलं थःगु जीवनय् बुद्ध धर्म व नेपालभाषाया पुनर्उत्थानया ज्यायात छगू रथया निगू घःचाः थें नापनापं न्ह्याकादिल, छगूया पूरक थें मेगुयात छयलादिल ।

नेपालभाषाया पुनरोत्थानया नितिं ज्या यानादीपि उगु ईया साहित्यकीर्मीपि मध्ये दकलय् सशक्त रुपं योजनाबद्ध धंगं ज्या यानादीम्ह व्यक्ति धर्मआदित्य धर्माचार्य खः । थ्वयकः स्वयाः न्हयः नेपालभाषा पुनरोत्थानया नितिं गुलि नं ज्या जुल, वैयक्तिक रुपं, थःथःगु कथं जुल । 'नेपालभाषाय् पाठ्यसफू यायेबहगु सफू मनुनिगुलिं कलकत्ता विश्वविद्यालय नेपालभाषायात भर्नाकुलर विषयकथं दुथ्याके मछिनि' धैगु कलकत्ता विश्वविद्यालयया लिसल मर्माहीत जूम्ह धर्म आदित्य थःगु जक कुतलं मखु सामूहिक सहभागितां जक नेपालभाषायात विश्वविद्यालयय् मान्यता बिइकेगु नितिं माःगु सफू पिकाये फइगु महशुस यानादिल । थथे नेपालभाषाय् आपालं च्वमित दयेकेगु, न्हून्हुगु कृति पिकायेगु नितिं तत्कालीन समाजय् भाषिक, साहित्यिक जागरण हयेमाःगु व थुकिया नितिं दकलय् उपयुक्त व सशक्त माध्यम पत्रिकाया प्रकाशन खः धयागु खँ धर्मआदित्य वाःचायेकादिल । तर थुगु इलय् तक नेपालभाषाय् पत्रिका पिकायेगु परम्परा हे मनुनिगु व छुं नं जागरण व उत्साहया ज्यायात तत्कालीन राणा सरकारं याके मबिइगु जूगुलिं धर्मआदित्य कलकत्ता हे नेपालभाषाया पत्रिका पिकयाः नेवाःतयत भाषा साहित्य उत्थानया ज्याय् सामूहिक रुपं सहभागी जुइके बिइगु निर्णय यानादिल । थ्व हे कथं धर्मआदित्य चन्द्र शम्सेर थें ज्याःम्ह निरकुंश प्रधानमन्त्रीया शासनकालय् हे जूसां **बुद्धधर्म** नामं ने.सं १०४५स कलकत्ता पत्रिका पिकयादिल । नेपालभाषाय् नं पत्रिकाया परम्परा न्ह्याकादिल । नेपालभाषाया न्हापांम्ह पत्रकार थः जुयादिल । नेपालभाषाया भाषिक साहित्यिक उत्थानय् सामूहिक सहभागिता

ग्वाकेगु तातुनाः धर्मआदित्य बुद्धधर्म पत्रिका पिकयादीगु खःसां थ्व पत्रिकाया सम्पूर्ण ज्याया अभिभारा धर्मआदित्य थः याकःचां जक क्वबिइमाल । थः हे सम्पादक, थः हे व्यवस्थापक, थः हे प्रकाशक जक मखु, पत्रिकाया निति सम्पादकीय निसं मगाःगु मचाःगु फुकक च्वसु थम्ह हे च्वयाः पत्रिकायात म्वाकेगु ज्या धर्मआदित्य यानादी माल । थुकथं थःगु देशय् संघ संस्था दयेके मनुगु, धार्मिक स्वतन्त्रता मनुगु, थःगु भासां च्वयेगु, ब्वनेगु अधिकार मनुगु, देशया साहित्य संस्कृति, धर्म न्हास जुयावं वनाच्वंगु इलय् नं विदेशय् च्वनाः नेपालभाषाया पत्रकारिताया नीस्वनेगु, थः याकःचिगु कुतलं पत्रिका चले यायेगु ज्या गुगु धर्मआदित्य यानादिल थ्व कम महत्वया खँ मखु (श्रेष्ठ १०९२, पौ ८) । धर्मादित्य **बुद्ध धर्म** पत्रिका नेपाः देशं पिने च्वनाः पिकयादीगु खःसां, थुकिया बहसंख्यक ब्वमि नेपाःमित हे जूगुलिं तत्कालीन राणा सरकारया कुदृष्टि बचे जुइगु नितिं थ्व पत्रिकायात न्हापां **बुद्धधर्म** धकाः जक नां छुनाः धार्मिक पत्रिका थें च्वक बुद्धधर्म सम्बन्धी धार्मिक लेख तथा समाचार बिइगुनिं यात । निगू अंक पिदने धुंकाः लिपा ने.सं. १०४७ निसं तत्कालीन ल्याय्महतयगु सल्लाह तथा समयया माग कथं थ्व पत्रिकाया नां **बुद्धधर्म व नेपालभाषा** जुल । **नेपालभाषा** नां घायेवं थ्व पत्रिकाया रुप गुण सिइदयेक पात । थ्व धार्मिक नापं साहित्यिक च्वसु नं पिकया यंकल । नेवाः जातिया भाषा, साहित्य, संस्कृति, धर्मया उत्थान हे थ्व पत्रिकाया मू आजु जुल । बुद्धधर्म व नेपालभाषाया मुखपत्रया ज्या थ्व यात । थ्व पत्रिका तत्कालीन युवातयत नेवाःभासं च्वयेगुलिइ उत्साहित यात सा च्वयातःगु लेखयात पत्रिकाय् प्रकाशित यानाः नेपालभाषा साहित्यया प्रचारप्रसार जुइके बिल । थुकथं धर्मआदित्य थःगु बुद्धधर्म पत्रिका मार्फत उबलय् ल्याय्मह पुस्तायात नं च्वयेगु प्रेरणा व पिकायेगु थाय् बियाः भाषा साहित्य छयलय् साला हयादिल । सामूहिक रुपं नेपालभाषाया पुनरोत्थान यायेगु ज्या न्ह्याकादिल । योगवीरसिंह, वैकुण्ठप्रसाद लाकौल, इन्दुनाद, फत्तेबहादुर सिंह, चित्तधर 'हृदय', लक्ष्मीनानी, महाप्रज्ञा, हरिकृष्ण, तुल्सीमेहर, रत्नमान, पूर्णमान शाक्य, सिद्धिरत्न आदिपिं न्हापां थ्व हे पत्रिका परिचित याकूपिं च्वमित खः । थ्व पत्रिकाय् पिदंगु योगवीरसिंह, वैकुण्ठप्रसाद लाकौलपिनिगु कवितां नेपालभाषायात विशुद्ध साहित्य सृजना पाखे न्हयज्याकेगु युगान्तकारी पलाः छिकेगु जक याःगु मजुसे वैकुण्ठप्रसाद लाकौलयागु थ्व बुद्ध धर्म व नेपालभाषा पत्रिकाय् पिदंगु **वसन्त वाणी**, **हवयेत्यंगु स्वांयात** थें ज्याःगु कवितां नेपालभाषाय् स्वच्छन्दवादया प्रयोग तक जुइके बिल । धर्मआदित्य थ्व **बुद्ध धर्म व नेपालभाषा** पत्रिका पिकयादीगुया मू उद्देश्य नेपालभाषाया पाठ्य सफू ताःलाकेगु जूगुलिं ने.सं. १०४७ अर्थात निगू अंक पिदने धुनेवं थ्व पत्रिकायात **गद्य विद्या व पद्य विद्या** ब्वथलाः पिकयादिल । अथे हे थ्व पत्रिकायात **गद्य विशेषांक**, **पद्य विशेषांक** कथं पिकयाः गद्य पुचः, पद्य पुचःया रुपय् सफू दयेकाः पाठ्याशय् दुथ्याकेगु योजना नं थ्वयकलं दयेकादिल । तर थ्व योजना सफल जूगु खनेमदु । लिपा ने.सं १०७२ स वीरगंजया **नेपाल राष्ट्रिय विद्यापीठ**या परिक्षाय् नेपालभाषायात नं मान्यता बिसेलिं थुकिया पाठ्याश दयेकेगु



नापं अध्यापन यायेगु ज्या धर्मआदित्य थम्हं हे यानादिल । थुकथं योगवीरसिंहजु 'नेपालभाषा जिर्ण जूगु अलि मचासे भिंकेनु, भारतिय शास्त्र भवनं मान थुइत बीके नु' धकाः प्वंकादीगु उद्गारयात कार्यान्वयन यायेगु प्रयास न्हापा धर्मआदित्यपाखें हे जुल ।

धर्मआदित्य धर्माचार्य छम्ह भाषा अनुरागी जक मखु छम्ह साहित्यिक प्रतिभा सम्पन्न व्यक्ति नं खः । थ्वय्कलं नेपालभाषाया गद्य, पद्य निगू विधाय नं ल्हाः न्ह्याकादीगु दु । पद्य क्षेत्रय् वय्कलं न्हापा 'बुद्ध धर्म' पत्रिकाय् बौद्ध धर्म सम्बन्धी चिनाखं च्यादीगु दु सा लिपा देश प्रेम, राष्ट्रिय स्वाभिमान, सुधारवादी भावनां जाःगु चिनाखं नं च्वयेगु यानादिल । थुकथं पद्य विधाय पुण्य भूमी जन्म जूयिगु थ्वहे खः भिंगु .....फेरि यदि जि जन्म जुलसा जन्म थन हे जुयि (बुद्धधर्म व नेपालभाषा, ४:१,२ पौ ४) धैगु विचाः प्वंकाः चिनाखं च्यादीम्ह धर्मआदित्ययात छम्ह सुधारवादी, उदारवादी, राष्ट्रिय अखण्डता व गौरव प्रति आस्था दुम्ह कवि कथं परिचित यायेछि । थये पद्य विधाय नं थ्वय्कलं थःगु च्वसा न्ह्याकादीगु खयाः नं थ्वय्कःया योगदान गद्य विधाय विशेष न्ह्यथनेवह जू । गद्य लेखनय् थ्वय्कः छम्ह - च्वखं च्वमि, अन्वेषक, समालोचक, अनुवादक, पत्रकारया रूपय् परिचित जूगु दु । बुद्ध धर्म व नेपालभाषा पत्रिकाय् पद्य विधाय मेपि च्वमिपिसं न ल्हाः न्ह्याकेगु याःगु दु सां गद्य विधाय गुलि नं लेख पिदन व दक्व धर्म आदित्यया च्वसां हे पिदन । गद्य लेखनय् थ्वय्कलं अप्वः थें धार्मिक विषययात ज्वनादीसां व्यवहारिक विषयसं नं नेपालभाषाया गद्ययात छ्यलेगु थ्वय्कलं यानादिल । नेपालभाषा व बुद्ध धर्म पत्रिकाय् पिदंगु थ्वय्कःया सम्पादकीय, व धार्मिक सांस्कृतिक च्वसुं धार्मिक, भाषिक, सामाजिक चेतनाया जः हवलेगु जक याःगु मजुसे नेपालभाषाय् आधुनिक गद्यशैलीया निर्माण यायेगुलिइ नं महत्वपूर्ण तिवः विउगु दु । अथे हे पाली, संस्कृत भाषाया बौद्ध साहित्ययात नेपालभाषा भाय् हिइकाः, नेपालभाषाय् अनुदित साहित्य ब्वलंकेगुलिइ नं धर्मादित्यया योगदान म्हो मजू । तर गद्य क्षेत्रय् थ्वय्कःया दकल्य् मूवगु च्वसु नेपालभाषा व थ्वया साहित्य (दं- १:१-२) खः । थुगु च्वसुइ नेपालया उत्पत्ति, नेपाल खँग्वःया छ्यलावुला निसं कयाः नेपालभाषाया उत्पत्ति, नेवार खँग्वःया विश्लेषण, नेपाल लिपि, नेपाल संवत्या चर्चा आदि यानातःगु दु । अथे हे थ्व लेखय् नेपालभाषाया भाषिक परिचय जक मखु प्राचीन साहित्यया परिचय नं विइगु याःगु दु । तत्कालीन घण्टाघर पुस्तकालयय् दुगु नेपालभाषाया सफू, पाश्चात्य लेखकतय्सं पिकयातःगु बंगालया एसियाटिक सोसाइटीइ च्वंगु सफू धलःया लिधंसाय् प्राचीन सफूया धलः ब्वयाः, प्राचीन नेपालभाषा कृतिया इतिहास ब्वयेगु ज्या नं धर्मआदित्य नेपालभाषा व थ्वया साहित्य लेखय् यानादीगु दु । थ्व लेखय् ति नेपालभाषाया भाषा, साहित्य, लिपि आदि सम्बन्धी अध्ययन अनुसन्धान यानाः विस्तृत रुपं न्ह्यब्वयेगु ज्या थ्व स्वयाः न्ह्यः सुं विद्वानपाखें नं जूगु मदुनि । उकिं धर्मआदित्य धर्माचार्य नेपालभाषाया, प्राचीन वांगमय तथा साहित्ययात न्हापां म्हसिइके विउम्ह नेवाः अनुसन्धाता नं खः । अथे हे नेपालभाषा व थ्वया

साहित्य लेखय् प्राचीन नेपालभाषाया सफूयात विषयगत विधागत रुपं ब्वथलाः, गुगु सफू छु छु विभागय् दुथ्याके ज्यू धकाः थःगु गुगु पारख यायेगु, विश्लेषण यायेगु खुबि धर्मआदित्य क्यनादिल, थुकिं धर्मआदित्ययात नेपालभाषाया न्हापांम्ह समालोचक कथं नं प्रतिस्थापित याकेविल ।

नेपालभाषाया साहित्यिक जागरण नापं भाषिक जागरण, भाषिक चेतना थनेगुलिइ नं धर्मआदित्यया तःधंगु देन दु । थुकिया निति वय्कलं भाषिक चेतना थनेगु भाषा सुधार यायेगु, भाषा प्रचार यायेगु ज्यायात योजनावद्ध रुपं सही धंगं न्ह्यज्याकादिल । उवल्यया नेवाः जनमानसय् भाषिक जनचेतना थनेगु थःगु योजना कथं धर्मआदित्य बुद्धधर्म व नेपालभाषा पत्रिका मार्फत 'बुद्धधर्म व नेपालभाषाया संचार विचार' धकाः नां तयाः नेपालभाषायात जुयाच्वंगु उपेक्षापूर्ण व्यवहारयात न्ह्यब्वयाः नेवाः जातिया नुगलय् नेवाःभाय् प्रति आत्मियताया भाव ग्वाकेगु यानादिलसा मेखेर मांभाय् प्रतिया कर्तव्यबोध नं थुकथं याकादिल - १) न्हापा आजुपिसं थें तुं नेपालभाषायात हानं उद्धार यायेगु २) कायम्हयाय्पित नेपालभासं शिक्षा बीगु ३) थ्व भाय्या उन्नतिया नितिं न्हिं छधौ ई बीगु आदि (दं ४:१,२, पौ ६) । अथे हे भाषा सुधारया नितिं बुद्धधर्म व नेपालभाषा पत्रिका'य् नेपालभाषा च्वयेगु नियम नं ब्वयादिल । अझ थम्हं नं संक्षिप्त नेपालभाषा व्याकरण' (ने.सं १०४८) सफू च्वयादिल । थ्व सफूया चर्चा बुद्धधर्म व नेपालभाषा पत्रिकाय् जूसां, प्रकाशनय् धाःसा वःगु खनेमदु । भौगु भाषा साहित्य व संस्कृतिया गरिमामय इतिहास न्ह्यब्वयाः नेवाःतयगु नुगलय् जातिय अभिमान ग्वाकेगु, थःगु भाषा साहित्य सम्बन्धी सुसूचित जुइकेगु, विदेशीतय्त नं नेपालभाषा व थुकिया साहित्यया परिचय विइगु अले भारतया थीथी विश्वविद्यालय पाखें नेपालभाषायात मान्यता विइकेगु नितिं ई.सं १९२८ (ने.सं १०४७) स अलाहाबादय् जूगु अखिल भारतीय पण्डित महासभाय् थम्हं नं ब्वति कयाः नेपालभाषा व थ्वया साहित्य नांगु कार्यपत्र न्ह्यब्वयादिल । लिपा थ्व हे कार्यपत्रयात बुद्ध धर्म व नेपालभाषा पत्रिकाय् नं पिकयादिल । थ्व कार्यपत्रय् धर्मादित्य धर्माचार्य प्राचीन नेपालभाषाया सफू, न्ह्यब्वयादीगु जक मखु, नेपालभाषाया वास्तविक नां नेवारी मखु नेपालभाषा हे खः धकाः आपालं प्रमाण नं वियादीगु दु । नेपालभाषायात नेवारी मखु नेपालभाषा हे धायेमाः धकाः दकले न्हापां सप्रमाण जिकिर जक यानादीम्ह व्यक्ति मखु, नेपाल संवत् यात नालेमाः न्हर्दयात स्वतन्त्रता दिवसया रुपय् राष्ट्रिय पर्व कथं हनेमाः धयादीम्ह न्हापांम्ह व्यक्ति नं धर्मआदित्य खः । थ्व खं धर्मआदित्य थःगु पत्रिकाय् पिदंगु - नेपाल सम्बत्, म्हपूजा व राष्ट्रिया उत्सव (दं ५:१-३) नांगु च्वसुइ ब्वयादीगु दु । थुकथं नेपालय् दकले न्हापां नेपाल संवत् नालेमाः, म्हपूजायात न्हर्द कथं हनेमाः धकाः (ने.सं. १०४८)सः तयादीम्ह विद्वान नं धर्मआदित्य धर्माचार्य हे जूगु दु ।

नेपालभाषा उत्थानया अभियानयात सामूहिक रुपं संगठनात्मक धंगं न्ह्यज्याके माः धकाः वाःचायेका दीम्ह धर्मआदित्य धर्माचार्य नेपालभाषा विकासया नितिं दकलय् न्हापां संघ संस्था स्वनेगु याःम्ह व्यक्ति नं खः । थ्वय्कलं ने.सं.



१०४६ श्रीपंचमी कुन्हु कलकत्ताया धर्मराजिक विहारय् स्वनादीगु नेपालभाषा साहित्य मण्डल नेपालभाषाया दकल्य् न्हापांगु विशुद्ध साहित्यिक संस्था खः । थ्व साहित्य मण्डलया अध्यक्ष धर्मआदित्य हे जुयादीगु दुसा, पद्म सुन्दर मल्ल उपाध्यक्ष अले लोकमानसिं, पुष्पलाल प्रधान आदिपिं थ्व संस्थाया सदस्य जुयादीगु दु । विदेशय् नेपालभाषा व भाषा साहित्य रक्षा, प्रकाश व प्रचार यायेगु, पुलांगु व न्हूगु नेपालभाषा व मेमेगु सफू मालाः अनुसन्धान यायेगु, मू वंगु सफू प्रकाशनय् हयेगु, नेपाल तथा भारतय् मातृभाषा शिक्षा बिइकेगुलिइ जोड यायेगु आदि थ्व संस्थाया मू लक्ष्य जूगु दु । खयेत ला थ्व संस्थापाखें नेपालभाषा साहित्यया उत्थानया निंतिं छुं न्हयथनेबहःगु ज्या जूगु खनेमदु अथेसां थ्व संस्थां लिपायापित संस्थागत रुपं भाषिक साहित्यिक अभियान न्ह्याकेगु परम्पराया शुरुवात यानाव्युगु दु । नेपालभाषा साहित्य मण्डल बाहेक धर्मआदित्य मेगु नं आपालं धार्मिक, सामाजिक संघ संस्थात स्वनादीगु दु । थुपिं संघ संस्थात स्वयाः नं नेवाःतय्त थःगु धर्म भाषाया निंतिं संगठित रुपं न्हयज्याकेत सफल जूगु संस्थागत पलाः हे बुद्ध धर्म व नेपालभाषा पत्रिका जूगु दु ।

थथे थःगु भाषा, साहित्य, संस्कृति, धर्मया उत्थानया निंतिं थःत समर्पित याःम्ह धर्मआदित्यया ज्याखँ तत्कालीन राणा सरकारयात मनन । थःगु भाषा थःगु धर्मया अधिकार थम्हं हे कायेत, न्हयचिउगु अले थ्व हे हेतुया मुखपत्र धकाः घोषणा यानातःगु बुद्धधर्म व नेपालभाषा पत्रिकायात जनताया विद्रोहया पत्र थें तायेकाः धर्मआदित्य धर्माचार्ययात न्यायात बलिसं क्यंके थें 'खरदार' जागीरया लोभ क्यनाः ने.सं १०५० स बुद्ध धर्म व नेपालभाषा पत्रिकायात दिकेबिल । न्यादँया दुने फिक्कः जक थ्व पत्रिका पिहांवःगु खःसां छगुलिइ हे आपालं अंक ल्वाकछुयानाः पिकाःगु ल्याखं स्वयेबलय् थ्व पत्रिकाया प्रकाशन - १९ अंक थ्यंगु दु । थथे न्यादँ हे जक थ्व पत्रिका पिदंगु जूसां भाषिक साहित्यिक जागरण हयेगु व पत्रकारीताया नीस्वनेगु ज्याय् धर्मआदित्य सफल जूगु दु । थौं धर्म आदित्य धर्माचार्य नेपालभाषा साहित्यया इतिहासय् गबले हे महुइगु नां जूगु दु ।

च्वय् उल्लेख जूपिं खुम्ह महारथीत निष्ठानन्द बज्राचार्य, सिद्धिदास महाजु, जगतसुन्दर मल्ल, योगवीरसिंह, शुक्रराज शास्त्री, धर्मआदित्य धर्माचार्यपिं बाहेक नं नेपालभाषाया पुनरोत्थानया ज्याय् तिवः बियावपि मेमेपिं व्यक्तिपिं नं दनि । थ्व भवलय् बौद्ध ऋषि महाप्रज्ञा, भिक्षु धम्मालोक, डा. इन्द्रमान वैद्य, जीवरत्न, अमृतानन्द आदिपिनिगु नां दुथ्याके छि । जीवरत्नया अपरिमिता (ने.सं १०३७), दानगाथा (ने.सं १०३९), डा. इन्द्रमान वैद्यया धम्मपद, (ने.सं १०५१) महाप्रज्ञाया स्वचित्त शुद्धिमार्ग (ने.सं १०५६), धम्मालोकया अनुत्तर विजय (ने.सं १०५७), अमृतानन्दया त्रिरत्न वन्दना (ने.सं १०५८) आदि सफू पिदन । थ्वय्कःपिसं नेपालभाषा बौद्ध साहित्य सृजना यायेगु नापं नेपालभाषा बौद्ध जागरण हयेगुलिइ महत्वपूर्ण योगदान बियादीगु दु ।

पुनर्जागरणकालय् साहित्यिक माध्यमं जक भाषिक चेतना, जागरण हयेगु ज्या मजुसे, धर्म संगीतया माध्यम नं तत्कालीन नेवाः जनमानसय् भाषिक

अनुराग थनेगु ज्या जूगु दु । थ्व सन्दर्भय् भद्रकाली रेकर्ड हाउसं ने.सं १०५४ स पूर्णमान शाक्यया थीथी म्ये रिकर्ड यानाः पिकाल । थुपिं म्ये मध्ये गुलित बांलाः नेपालभाषा सरल अति ल्हाय् अःपु छपु लुमकेबहगु म्ये खः । अथे हे ने.सं १०५५ स स्थापना जूगु स्वयम्भू ज्ञानमाला भजन मण्डलया योगदान नं न्हयथनेबह जू । संगीतया माध्यमं नेपालभाषायात मनूया नुगः नुगलय् थाकातयेत, देया कुं कुलामय् न्यंकेबिइत ज्ञानमाला भजन मण्डल सक्षम जूगु दु । नेपालभाषाया प्रचार प्रसारय् सामूहिक रुपं पलाः ल्हवनेगु ज्या न्हापां ज्ञानमाला भजन मण्डल पाखें हे जूगु दु ।

पुनर्जागरणकालया अन्त पाखे वैकुण्ठप्रसाद लाकौल (ने.सं १०२६) व वय्कःया स्कूलया पासापिसं थवंथवय् स्यनेकने यानाः च्वयेगु याःगु कविता नं लुमकेबह जू । अज्याःगु कविता मध्ये छुं छुं ल्यं दुगु कविता ने.सं १०७४ स थुलिंचा नामं पिदंगु दु । अथे हे फत्तेबहादुरं नं तत्कालीन प्रतिनिधि कवितय्गु कविता मुनाः राणा शासनया जर्जर इलयनं नेपाली विहार ने.सं १०५९) सफू पिकाल । थ्व हे सफू पिकाःगुलिं उबलय्या नेपालभाषाया च्वमिपित जेलय् स्वथंगु खः । चित्तर 'हृदय' जुं कलकत्तां छापे याकाहःगु पद्यनिकुञ्ज (ने.सं १०५३) व हृदय कुसुम (ने.सं १०५३) सफू नं सरकार भंसारय् हे जफत यात । लिपा थ्व हे सफल दुथ्याःगु 'मां' नांगु कविताय् अनेक राजनैतिक रहस्य खंकाः वय्कःयात नं जेल यातना बिल ।

थुकथं चेतना व जागरणयात जिउथाय तक पनेत स्वइगु राणाशासन कालय् नेपालभाषाया उत्थानया ज्याय् संलग्न जुइगु कम साहस व त्यागया खँ मखु । थज्याःगु ग्यानापुगु स्थितिइ नं तन मन धन बियाः उबलय्या भाषा साहित्यकर्मितसे नेपालभाषायात हानं गति बिल, विकासया लँपुइ न्हयज्याकल ।







## थौं मदयेधुंकूपिं आधुनिककालया अग्रज च्वमिपिनिगु छुं क्पिपा



फत्तेबहादुर सिंह  
(ने.सं. १०२२-११०३)



मोटिलक्ष्मी उपासिका  
(ने.सं. १०२९-१११७)




सिद्धिचरण श्रेष्ठ  
(ने.सं. १०३२-१११२)



ठाकुरलाल मानन्धर  
(ने.सं. १०३२-११११)




धर्मरत्न यमि  
(ने.सं. १०३५-१०९५)



केदारमान 'व्यथित'  
(ने.सं. १०३५-१११८)



रत्नध्वज जोशी  
(ने.सं. १०३६-११०९)



प्रेमबहादुर कसा:  
(ने.सं. १०३७-११११)



स्वयम्भुलाल श्रेष्ठ  
(ने.सं. १०५१-११०७)

## आधुनिककाल (ने.सं १०६१ निसं)

नेपालभाषा साहित्यय् आधुनिककालया शुरुवात गबलेनिसं जुल धयागु खं छगू मत खनेमदु । गुलिसिनं पुनर्जागरणकाल न्ह्यासां निसं धा:सा गुलिसिनं १९९७ सालया काण्डं निसं सा, गुलिसिनं २००७ साल लिपा जक थ्व न्ह्या:गु ख: धका: नालात:गु दु । मल्लकालीन साहित्य स्वया: पा:गु सिद्धिदासकालीन साहित्ययात भीसं माध्यमिककालया साहित्य कथं नाले धुनेवं आधुनिककालया साहित्य धायेबलय् माध्यमिककालया साहित्य स्वया: पा:गु जुइमाल । २००७ सालया राजनैतिक परिवर्तनं नेपाली जनतायात वैचारिक तथा अभिव्यक्ति स्वतन्त्रता जक बिउगु मजुसे विश्वया साहित्यिक गतिविधि नाप प्रत्यक्ष रुपं परिचित जुइगु मौका नं बिल । थ्व हे कथं नेपालभाषाया साहित्यय् नं विभागत, विषयगत, विचारगत तथा प्रवाह प्रवृत्तिगत रुपं नं सिद्धिदासकालीन साहित्यया तुलनाय् २००७ साल लिपाया साहित्यय् स्पष्ट रुपं हिउपा: खनेदत । तर थ्व हिउपा:या प्रारम्भ २००७ साल न्ह्य:हे नेपालभाषा साहित्यय् जुइधुंकूगु ख: । दरबार स्कूलया स्थापना अंग्रेजी शिक्षाया प्रचार प्रसार जूगु तथा बंगाली हिन्दी साहित्य सम्बन्धी थीथी सफू व पत्रपत्रिका तत्कालीन थनया साहित्यकारतय्सं खुया: सुला:सां व्वनिइगु जूगुलिं, थुकिया प्रभाव इमित लाइगु नं स्वभाविक हे ख: । थ्व हे कथं ने.सं १०६१ अर्थात् नेपालभाषाया कवितय्त जेलय् त:गु इलं थुखें निसं नेपालभाषाया काव्य, कहानी, नाटक आदि ख्यलय् न्हून्हुगु आयाम व प्रवृत्ति खनेदत सा महाकाव्य, निबन्ध, समालोचना, थें ज्या:गु न्हू न्हूगु साहित्य विधाया नं प्रादुर्भाव जुल । यद्यपि थुमिगु विकास २००७ सालया क्रान्ति लिपा द्रुत गतिं जूगु ख:सां ने.सं. १०६१ थुखे निसं थथे नेपालभाषाय् न्हू न्हूगु आयामया नापं न्हू न्हूगु विधा खनेदये धुंकूगुलिं ने.सं. १०६१ अर्थात् जेलकालं निसं थुखेया ईयात नेपालभाषा साहित्यया आधुनिककाल कथं नालेगु जूगु दु । तर नेपालभाषा साहित्यय् थ्व ह्यूपा: हयेत, आधुनिकतां छायेपीत, थ्वया साहित्यया उत्थानया नितिं वैयक्तिक तथा संस्थागत रुपं थीथी इलय् थीथी कथंया ज्याभव: न्ह्या:गु दु । थज्या:गु गतिविधिया ज्ञान मदयेकं नेपालभाषाया आधुनिक साहित्यया अध्ययन पूवनी मखु । उकिं आधुनिक साहित्यया अध्ययनया क्रमय् विभागत अध्ययनया नापं विविध साहित्यिक भाषिक गतिविधिया नं अध्ययन यायेगु आवश्यक जू ।

नेपालभाषा साहित्यया इतिहास/१०२



## नेपालभाषा साहित्ययात आधुनिकतां छायेपित तिबः जूगु छुं गतिविधि

नेपालभाषा व थ्वया साहित्ययात थौया रुपय् हयेगुलिइ विविध संघ संस्थाया स्थापना, सफू पत्र पत्रिकाया प्रकाशन, थीथी ईया वैयक्तिक तथा सामूहिक प्रयास आदिया नं तःधंगु भूमिका दु । थज्याःगु छुं छुं उल्लेख याये बहगु गतिविधि खः -

### थीथी ईया वैयक्तिक तथा सामूहिक प्रयास

नेपालभाषा व थ्वया साहित्यया उत्थानया नितिं थीथी इलय् वैयक्तिक तथा सामूहिक रुपं थीथी ज्याःभवः न्ह्याकूगु दु, गुकिं थौया आधुनिक साहित्यया निर्माणय् महत्वपूर्ण योगदान विउगु दु । थज्याःगु छुं छुं न्हयथने बहगु क्रियाकलाप खः -

#### थुलिंचा पुचःया साहित्य साधना

(ने. सं. १०४७ पाखे)

नेपालभाषा व थ्वया साहित्यया उत्थानया नितिं जूगु छगू सामूहिक कुतः मध्ये थुलिंचा पुचःया साहित्य साधना नं खः । **थुलिंचा पुचः** धयागु छुं विधिवत् स्वंगु संघ संस्था मजुसे थौ स्वयाः न्हयदँ, न्हयछदँ न्हयः पाखे थःगु भाषा साहित्ययात तत्कालीन शासन व्यवस्थां दमन यानातःगुया विरोधय् जातीय अभिमान तथा मातृभाषानुरागया भावनां दनावःपिं तत्कालीन दरवार स्कूलया नेवाः विद्यार्थीतय्गु छगू पुचः खः । थ्व पुचःया मुख्य मुख्यपिं विद्यार्थीत खः- **वैकुण्ठप्रसाद लाकौल, कृष्णलाल डंगोल, शंकरलाल, गोरक्ष बहादुर, भवानिभक्त, चूडानन्द, इन्दुनाद, मूर्णनारायण, विक्रमानन्द** आदि । थुपिं विद्यार्थीतय्गु ल्यंपुत्यं दुगु कविता दक्क मुनाः **थुलिंचा** (ने.सं.१०७४) नामं छगू कविता संग्रह वैकुण्ठप्रसाद लाकौलजुं पिकयादीगु दु । थ्व हे कथं थुपिं विद्यार्थीतय्गु पुचःयात चित्तधर हृदयजुं **थुलिंचा पुचः** धकाः थ्व सफूया समीक्षा यानादीबलय् नां छुनादीगु खः । उगु इलय् दरवार स्कूलय् भिगू कक्षा तक व्बंकाः विद्यार्थीतय्गु म्याट्रिक

जांच विइकेत 'कलकत्ता' वा 'पटना' विश्वविद्यालय छवइगु जुयाच्चन । म्याट्रिकया पाठ्यांशय् १०० नम्बर मातृभाषा (भर्नाकुलर)यात बियातःगु जुयाच्चन । थथे भारतया विश्वविद्यालय म्याट्रिक जांच विउवनीपिं छपुचः नेवाः विद्यार्थी तथा **थुलिंचा पुचः** नं नेपालभाषा भर्नाकुलर कथं जांच विइगु योजना दयेकाच्चंगु जुयाच्चन । तर इमिगु आकांक्षायात म्वाय् चुइके थें मातृभाषा कथं नेपालभाषा मखु नेपालीभाषां जांच विइमाःगु बाध्यता इमित जुल । फलस्वरुप शुषुप्त रुपय् च्वनाच्चंगु जातीय अनुराग, भाषा अभिमान इमिके दनावल । थःगु थर-नेवार धकाः तयेगु, नेवाः भाय् जक ल्हायेगु, नापं स्कूलय् विदा कुन्हु महाबौद्धय् वैकुण्ठप्रसाद लाकौलया छेंय् थःथःपिं पासापिं मुनाः नेपालभाषां साहित्य साधना यायेगु धकाः थ्व नेवाः विद्यार्थीतय्सं प्रण यात । थ्व हे प्रण कथं वैकुण्ठप्रसाद लाकौलया महाबूत्वाःया कोथा साहित्य साधना यायेगु साधनागारया रुपय् परिणत जुल । पासां पासायात नेपालभाषां च्वयेगु, ब्वनेगु, स्यनेगु, पुलां पुलांगु श्लोक नेवाः भासं अनुवाद यायेगु व नेपालभाषां कविता, चिठ्ठी पत्र च्वयेगु ज्या थ्व पुचलं यात । थ्व नेवाः विद्यार्थीतय्गु कुतःयात हौसला बिइ थें इमिगु रचना पिकायेगु ज्या तत्कालीन बुद्ध धर्म पत्रिकां यात सा योगवीरसिंहं न्ह्याबलें थ्व विद्यार्थीतय्गु ज्याखँयात च्वछायाः मेमेगु नं च्वयेगु हःपाः बिइगु जुयाच्चन । अथे हे सिद्धिदासं नं थःथाय् वइपिं दरवार स्कूलया विद्यार्थीतय्गु कविता च्वयेगु स्यनाविइगु जुयाच्चन । थ्व हे पुचःयापिं विद्यार्थीतय्गु इनाप कथं हे बुद्ध धर्म पत्रिकाय् विशुद्ध साहित्यिक च्वसुयात नं दुथ्याकल । पत्रिकाया नां नं बुद्ध धर्म व नेपालभाषा जुल । वैकुण्ठप्रसाद, इन्दुनाद आदिपिनिगु कविता बुद्धधर्म पत्रिकाय् पिनद । तर थ्व ल्याय्म्ह पुचःयागु साहित्य साधनायात तत्कालीन राजनैतिक सामाजिक परिस्थितिं ताः ई तक न्ह्याके मबिल । छेखे थ्व पुचःया सक्रिय कार्यकर्तात कृष्णलाल थें ज्याःपिनिगु स्वर्गवास जुल सा मेखेर तत्कालीन **बम काण्ड, लाइब्रेरी काण्ड १९९७** सालया राजनैतिक घटनां वैकुण्ठप्रसाद थें ज्याःपिं साहित्यकारत नं निस्किय जुयाः च्वनेमाल । थुखे बुद्ध धर्म व नेपालभाषा पत्रिका नं प्रकाशनय् जक वयेमफुगु मखु, थुकिया सम्पादक व थ्व पत्रिकाय् च्वसु च्वःपिं फुक्कसितं ज्वनाः यातना विउगु जुयाच्चन । च्वमितय्गु छेंय् खःगु नं मखुगु नं भों सफू जफत यायेगु ज्या जुल । थ्व घटनां फुक्कसितं ख्यात । फलस्वरुप वैकुण्ठप्रसाद व वय्कःया पासापिसं च्वयातःगु फुक्क रचना नं छवयेका छवयेगु ज्या जुल । थुकथं थ्व पुचःया साहित्य साधना फुक्क धया थें होमय् जुल । लिपा प्रजातन्त्र धुंकाः स्व. चित्तधरया इनाप कथं वैकुण्ठप्रसाद लाकौल 'बुद्ध धर्म व नेपालभाषा' पत्रिकाय् पिदंगु व थुखें उखें जुयाः ल्यनाच्चंगु पासापिनिगु कविता नं तयाः **थुलिंचा** धयागु कविता संग्रह छगू ने.सं. १०७४स पिकयादिल । थौ थ्व **थुलिंचा पुचः**या साहित्य साधनाया दसु हे **थुलिंचा** सफू जुयाविउगु दु ।

स्त्रीनिपु कविता व श्लोकया संकलन दुगु थ्व **थुलिंचा** सफलइ निद्या दु । न्हापांया द्याय् वैकुण्ठप्रसादयागु कविता लानाच्चंगु दु साः निगूगु द्याय् **थुलिंचा पुचः**या मेमेपिं पासापिनिगु कविता दुथ्याकातःगु दु । मातृभाषानुराग, सुधारवादी



भावना, देशभक्ति, उपदेशात्मक प्रवृत्ति आदि थुगु काव्यया छगू पक्ष जूगु दु सा सौन्दर्य उपासना कल्पनाशीलता स्वतन्त्र विषय चयन आदि मेगु पक्ष जूगु दु । उकिं थुगु ईया काव्य साधनायात पुनर्जागरण ई व पूर्व आधुनिक ईया दथुया काव्य कथं नाले जिउ । गथे वैकुण्ठप्रसादया 'वसन्त वाणी' कविताय विश्वप्रसिद्ध रोमान्टिक कवि शेलिया West Wind य् थें 'धाकु फय्' यात न सुधार व परिवर्तनया प्रतीक कथं ब्याताःगु दुसा 'हवयत्यंगु स्वांयात' कविताय 'स्वांयात' मांयागु ऋण पूसा जक जन्म सार जुइ धकाः सिद्धिदासकालीन उपदेशात्मक प्रवृत्तियात लिसा कयाच्वंगु दु । अथे हे 'इन्दुनाद' यागु 'बुद्ध स्तोत्र' कविताय बुद्धयात मानवतावादी दृष्टिकोण मूल्यांकन यानातःगु दु । थुकथं थुलिचा पुचःया साहित्यिक योगदानयात पुनरुत्थानकाल व पूर्व आधुनिक कालया काव्यया स्वापू कथं मूल्यांकन यायेछि (प्रधान, ने.सं. १११८ : ४४)।

## नेपाली विहार सफूया प्रकाशन

( ने.सं.१०५९ )

छगू चिकिचा धंगु सफूया प्रकाशन न साहित्य ख्यलय् तःधंगु परिवर्तन हयेफु धयागुया दसु नेपाली विहार सफू जुया विउगु दु । खयेत ला नेपाली विहार छगू चिकिचा धंगु कविता संग्रह खः, तर नेपालभाषा साहित्यया ख्यलय् हिउपाः हयेगुलिइ थ्वया विशेष भूमिका दु । नेपाली विहार सफू पिकाःगु तोह तया हे तत्कालीन राणा सरकार नेपालभाषाया च्वमितय् जेलय् स्वथंगु खः । गथे बुरिम्ह मांयात वया कायपिसं वास्ता मयासैं वांछ्वयातइ अथे हे छिमिसं न पुलांगु भाषा नेपालभाषायात वास्ता मयासैं वांछ्वयातःगु खनाः जिगु नुगः ख्वल धयागु खँ न्हयथनाः फ्रान्सयाम्ह इतिहासकार सिल्भां लेभिं धर्मादित्य धर्माचार्ययात च्वयाहःगु पतिं मर्माहित जुयाः फत्तेबहादुर सिंह ने.सं १०५९ स 'नेपाली विहार' सफू पिकयादिल । थौंया मिखां स्वयेबलय् थःगु भासं छगू कविता संग्रह पिकायेगु धयागु छुं मखु थें च्वनेफु, तर राणा शासनया जर्जर इलय् न छम्ह इस्पेक्टर थें ज्याःगु तत्कालीन सरकारी सेवय् च्वनाच्वम्ह छम्ह व्यक्ति फत्तेबहादुर सिंह उगु ईया सरकारयात हाँक विइ थें अमि मयःगु ज्या-सफू पिकायेगु, थःगु छेंय स्कूल चायेकेगु, इमिगु नीतिया कुंखिनेगु धयागु कम आँटया खँ मखु, मातृभाषा प्रति कम त्याग, कम समर्पणया खँ मखु । सफू छापे यायेगु खःसा बेतियाय् वनाः छापे याका हजि धयागु सिद्धिदासया सल्लाह कथं भारतया बेतियां १००० प्रति छापे याकाहःगु 'नेपाली विहार' सफू ५०० गू ति चुइ धुंकाः तत्कालीन राणा सरकार थ्व सफू जफत यात + सम्पादक नापं थ्व सफुलिइ लेख दुपि च्वमितय् जेलय् तल । लिपा ने.सं १०९६ स हानं थ्व सफूया निगूगु संस्करण पिदन ।

नेपालभाषा साहित्यया ख्यलय् विविध युगया विविध कवितयगु कविता मुनाः पिहां वःगु दकलय् न्हापांगु सफू थ्व 'नेपाली विहार' खः । खयेत ला बुद्ध धर्म पत्रिकाय नेपालभाषा पद्य संग्रह छापे जुइ धुंकूगु दु, धयागु समाचार पिदंगु दुसा

नेपालभाषा साहित्यया इतिहास/१०५

पद्य संग्रहया सफू धाथें पिदंगु खने मदु । उकिं नेपाली विहार धर्माचार्यजुया अपूर्ण इच्छाया पूर्ति धाये छि (मल्ल ने.सं १०९८ : १९७) । नेपाली विहार सफुलिइ निचा दु - (१) न्हापांगु छाय् ९ पु कविता दु, गुगु - सिद्धिचरणया - ३ पु, फत्तेबहादुरया - ४ पु, पूर्णबहादुर नेवाःया - १ पु, श्री निवास मल्लया - १ पु दु । (२) निगूगु छाय् - सिद्धिदास, वैकुण्ठप्रसाद लाकौल, योगवीरसिंह, हरिकृष्ण, तारा, रत्न, शुभ, वदिना आदिपिनिगु छपु छपु यानाः १० पु कविता दु, गुगु बुद्धधर्म व नेपालभाषा पत्रिकाया उगु थुगु अंकं लिक्कयातःगु खः । थुकथं नेपाली विहार प्राचीनकाल माध्यमिक काल तथा आधुनिक काल स्वतां युगया कवितयगु प्रकाशित अप्रकाशित १९ पु काव्यया संकलन खः ।

नेपाली विहार जेलकालीन काव्य व सिद्धिदास-युगया काव्यया छगू स्वापू खः । थ्व सफुलिइ दुथ्याःगु फत्तेबहादुरया स्वां व कं, सिद्धिचरणया वर्षा, गंगु खुसि वैकुण्ठप्रसादया हवयत्यंगु स्वांयात, वसन्तवाणी आदि अंग्रेजी स्वच्छन्दवादी कवितयगु प्रभाव लाःगु कविता खयां न नेपालभाषाया पुनरुत्थानकालया कवितयगु प्रभावं मुक्त जूगु कविता मखु । छखे भाषानुराग, देशप्रेम, उपदेशात्मक प्रवृत्ति थेंज्याःगु सिद्धिदासकालीन काव्य विशिष्टता थुकी ल्यहें पुया च्वंगु दुसा मेखे स्वतन्त्र विषयचयन, कल्पनाशीलता, सौन्दर्यया उपासना आदि थें ज्याःगु प्रारम्भिक आधुनिक कालया कवितयके खनेदुगु स्वच्छन्दवादी प्रवृत्ति न गाकं पिज्वःगु दु । थ्व अर्थय नेपाली विहार न त मुक्कं पुनरुत्थान युगया काव्य सफू खः न पूर्वआधुनिक युगया जक खः । निगू कालया काव्य प्रवृत्तियात प्रतिनिधित्व याःगु थ्व सफू छगू कथं संक्रमण कालया ख्वाःपाः जूगु दु । नेपालभाषा कविताया इतिहासकारयात नेपाली विहारया भिंगुपु कविताय यको मूवंगु ज्वलं लुइ फुसां गुगुं गुगुं सफुलिइ सफू स्वयाः न उकिया भूमिका मू वना च्वं थें तुं थन फत्तेबहादुरजुं न्यागु दशक न्हयः च्वयादीगु कविता स्वयां न भूमिका अप्वः प्रासांगिक जू (मल्ल, ने.सं. ११०३ : ११०) सम्पादक फत्तेबहादुरया मातृभाषा प्रतिया अनुराग, भाषिक सजगता थ्व सफूया भूमिकाय ल्यहें पुयाच्वंगु दु । वास्तवय् थ्व सफूया न्हापांगु संस्करण जफत जूगु, थुकिया कवितयत जेल यातना विउगुया मू हुनि, थ्व सफुलिइ दुथ्याःगु कवितां जक मखुसे थुकिया भूमिकां न खः । राणा शासनया जर्जर इलय् सफूया भूमिका कथं 'थौं भीगु भाषायागु सम्मान देश मिटेजुया चोन ..... उकियात जवरजस्तिं दवे याना तल .... ल्हाइपिं जीवित जुया च्वंक न अमिगु भाषायात थथे मृत भाषाया नामं सम्बोधन जुया च्वन' न्हयब्वयेफुगु सम्पादक फत्तेबहादुरया तःधंगु साहस तथा मातृभाषा प्रतिया दुग्यःगु मतिनाया दसु खः । थुलि जक मखु नेपालभाषा गद्ययात 'नेपाली विहार' या भूमिका मार्फत् गुगु वेग, तागत, स्फूर्ति व व्यक्तित्व सम्पन्न यायेत फत्तेबहादुर सिंह सफल जुयादिल, उलि थ्वयां न्हयः छुं जूगु खनेमदु । नेपालभाषाया गद्य ख्यलय् न विषय व शैली कथं न स्वच्छन्दवाद्या शुरुवात थ्व हे भूमिकाय च्वंगु गद्य न्हयाकूगु दु धायेबलय् अत्युक्ति जुइ मखु (प्रधान, ने. सं १११४:११) । थुकथं नेपाल विहार सफू नेपालभाषाया भाषिक

नेपालभाषा साहित्यया इतिहास/१०६



आन्दोलनया दृष्टिकोणं जक मखु साहित्यिक अध्ययनया दृष्टिकोणं नं छगू मू वंगु सफू जूगु दु ।

## जेल दुने व पिनेया साहित्य साधना

(ने.सं. १०६१-१०७१)

भाषा साहित्ययात गुलि क्वत्यलेत स्वल उलि हे दनावइ धयागुया छगू दसु नेपालभाषा साहित्य नं जूगु दु । देशय् जागरण व चेतना बलनक थःपिनिगु शासन सत्ताय् आँच वइ धकाः ग्याःपिं तत्कालीन राणा शासकतय्गु निंति थःपिनिगु मां भासं छुं च्वयाजूपिं च्वमित तथा धर्म देशना यानाजूपिं भिक्षुत तकं आतंककारी जूवन । फलस्वरूप खःगुं मखुगुं अनेक दोष बियाः थुपिं मध्ये गुलिसितं जेलय् स्वथनेगु यातसा गुलिसितं देशं पितिनेगु यात । थज्याःगु राणा शासकतय्गु अमानवीय क्रियाकलापं यानाः छखे भन थुमिके थःगु भाषा साहित्य प्रति समर्पणया भावना बलंकल सा मेखेर थुमित भन अःखः साहित्य साधनाया बातावरण चूलात । अले ला न्हापा गबलें हे मजुनि कथंयागु साहित्य साधना थुगु इलय् जुल, गुगु थौया नेपालभाषाया आधुनिक साहित्यया विकासय् महत्वपूर्ण तिबः सावित जूगु दु । थुकथं ने.सं १०६१ निसं १०७१ या समयावधि नेपालभाषा साहित्यया इतिहासय् छगू महत्वपूर्ण समयावधि सावित जूगु दु । थुगु ईया साहित्य साधनायात जेल दुने व पिनेया साहित्य साधना कथं ब्वनेगु चलन दु । थ्व हे' इलं निसं नेपालभाषा साहित्यय् आधुनिकताया सूत्रपात जूगु माने यानातःगु दु ।

जेल दुनेया साहित्य साधना (ने.सं १०६१-१०६५) : नेपालभाषाया साहित्ययात आधुनिक रुपय् हयेगुलिइ जेल दुनेया साहित्यिक गतिविधिया नं महत्वपूर्ण भूमिका दु । नेपालभाषा साहित्यया इतिहासय् जेलकाल धकाः ने.सं १०६१ माघ निसं ने.सं १०६५ जूला तकयागु समयावधियात नालातःगु दु । नेपालभाषा साहित्य उत्थानया दृष्टिकोणं जक मखु, नेपाःया हे साहित्य, संगीत, कलाया दृष्टिकोणं उलि हे महत्वपूर्णगु समयावधि थ्व खः । ख ला नेपालभाषाया साहित्यकारतय् तथ्यक नेपालभाषा च्वःगु तोह तयाः जेलय् छ्वःगु मखु । प्रजापरिषद (ने.सं १०५६), नेपाल नागरिक अधिकार समिति (ने.सं १०५७) नांगु राजनैतिक दल भूमिगत रुपं चायेकाः तत्कालीन शासन व्यवस्थायात क्वःथलेगु प्रयास याःगु, महावीर स्कूल (ने.सं १०६०), लाइब्रेरी ने.सं १०५० आदि चायेकाः तत्कालीन जनतायात क्वःपवाःगु पाः यानाः ने.सं १०६१ स गंगालाल, टंकप्रसाद, शक्रराज शास्त्री, धर्मभक्त माथेमा, दशरथ चन्द आदिपिं नापं बुद्धधर्म व नेपालभाषा पत्रिका, नेपाली विहार सफुलिइ कविता च्वःपिं व पत्रिका, सफू सम्पादन यानादीपिं, च्वयादीपिं गथे :- योगवीरसिंह, फत्तेबहादुर सिंह, चित्तधर हृदय, सिद्धिचरण श्रेष्ठपिं नं गिरफ्तार यात । थथे राजनैतिक कारणं साहित्यिक

कारणं जेलय् लाःपिं थ्वय्कःपिं मध्ये प्यला ति दयेकाः प्यम्ह शहीद जुयादिल सा, गुम्हेसितं फाया ला नकाः सँ पाचुक खाकाः जातं च्यूत यात । योगविरसिंह छम्हेसित स्वला ति कुनाः तसकं म्हं मफुगु व बूढा जुइ धुकुगुलिं त्वःता हल । त्वःता हयाः छुं ई लिपा हे थ्वय्कः मन्त । मेमेपिं सर्वस्व हरण, आजन्म कैदया सजाय बियाः जेलय् कुनाबिल । तर प्यदँ लिपा फुक्कसितं जेलं त्वःताहल । थुगु समयावधिइ जेलय् लाःपिं ३२ म्ह जेलबन्दीत मध्ये नेपालभाषाया कवि लेखक कथं ल्यया कायेबलय् (१) चित्तधर हृदय (२) सिद्धिचरण (३) फत्तेबहादुर सिंह (४) केदारमान व्यथित (५) धर्मरत्न यमि (६) हरिकृष्ण श्रेष्ठ (७) पूर्णनारायण आदिपिं खः । थुपिं मध्ये नं केदारमान व्यथित, धर्मरत्न यमि, हरिकृष्ण श्रेष्ठ, पूर्णनारायणपिं जेलय् वनाः तिनि साहित्य साधना यानादीपिं खः । थ्वय्कःपिं नेपालभाषा च्वकेगु ज्याय् कवि चित्तधर 'हृदय', सिद्धिचरण श्रेष्ठ, फत्तेबहादुर सिंहपिनिगु तःधंगु देन दु । कवि प्रतिभा दयाः नं नेपालभाषा काव्य साधना याना मदीनिपिं केदारमान 'व्यथित', धर्मरत्न यमि, पूर्णनारायण, हरिकृष्णपिं च्वयेगु प्रेरणा नापं छन्द आदिया प्रशिक्षण थ्वय्कःपिंसं हे बियादिल । जेलय् दुने गबलें कवि गोष्ठी सा गबलें साहित्य सम्बन्धी ट्यूटरल क्लास जुइगु जुयाचन । खयेत ला न्हापा जेलय् छुं च्वयेगु ब्वनेगु निषेध यानातःगु खः, तर कलाकार चन्द्रमान मास्के हेंगवाः व सिन्हलं हनुमानया मूर्ति च्वयातःगु खनाः जेलया कप्तान लय्तायाः व थःगु किपा च्वकेगु निंति च्वसा कापि सफू विइगु यात । अले ला बुलुहुं बुलुहुं खुयाः खुयाः सफू कापि आदि जेलय् दुथ्यन, जेलय् च्वपिं मेमेपिं बन्दीतय्सं नं खुयाः खुयाः साहित्य साधना यायेखन । थुकथं कारागार उगु ईया साहित्य कला संगीतया साधनागार थें जुल । नेपालभाषाय् न्हापा गबलें मजुगु उलिमछि सफू च्वयेगु ज्या थ्व प्यदँया जेलकालय् जुल । थुगु इलय् च्वःगु सफू खः -

### (१) चित्तधर "हृदय"

- सुगत सौरभ (महाकाव्य, प्र ने.सं. १०६९)
- हृदय कथा (कविता मुना प्र, ने.सं. १०६७)
- अन्तर ध्वनि (कविता मुना प्र, ने.सं. १०६९)
- गौतम बुद्ध (खण्डकाव्य प्र, ने.सं. १०६७)

### (२) फत्तेबहादुर सिंह

- वनवासया छगू खँ (खण्डकाव्य, प्र ने.सं. १०६८)

### (३) सिद्धिचरण श्रेष्ठ

- सीस्वां (कविता मुना प्र, ने.सं. १०६८)
- उत्तराविलाप (अपूर्ण-अभिमन्युवध महाकाव्यया ५ सर्ग, प्र ने.सं. १११३)

नेपालभाषा साहित्यया इतिहास/१०८

नेपालभाषा साहित्यया इतिहास/१०७



#### (४) केदारमान "व्यथित"

- ख्ववि प्याःगु मे (कविता मुना प्र, ने.सं. १०६७)
- प्रतिक्षा (कविता मुना प्र, ने.सं. १०६६)
- दिवस चित्र (कविता मुना प्र, ने.सं. १०६७)
- रामायण (महाकाव्य, निगू सर्ग, ने.सं. १११५ नेपाल ऋतुपौ ५९)
- अभिसारिनी (गीतिकाव्य, अपूर्ण)

#### (५) धर्मरत्न यमि

- अर्हतनन्द (महाकाव्य, प्र ने.सं. १०७२)

#### (६) हरिकृष्ण श्रेष्ठ

- ख्ववि (कविता मुना, प्र ने.सं. १०७०)

#### (७) सुब्बा पूर्णनारायण

- सत्यनारायण ब्रत कथा (अ.प्र.)
- भर्तृहरि नीति शतक (अ.प्र.)
- हितोपदेशया छुं (अ.प्र.)

#### (८) गणेशमानसिंह

- शब्दकोश (अपूर्ण, बिस्युं वंसेलि जेलय् हे तंगु)

थुकथं जेलकाल नेपालभाषाया च्वमितय्सं यातना फयेमाःगु, सरकारी स्तरं नेपालभाषायात दकल्य् अप्वः दमन यायेत स्वःगु ई खयाः नं साहित्य सृजनाया दृष्टिकोणं तैसकं हे उपलब्धीपूर्ण समयावधि सिद्ध जूगु दु । थुलि चीहाःगु ईया दुने नं थुलिमछि सफू च्वयेगु अभूतपूर्व ज्या जूगु ई जक थ्व मखुसे, नेपालभाषाया साहित्ययात हे छगू दिशाबोध याःपिं केदारमान 'व्यथित', धर्मरत्न 'यमि' थें ज्याःपिं साहित्यकारत बुझ्कूगु समयावधि थ्व खः ।

जेलकाल मूलतः काव्य सृजनाया काल खः । थःपिनिगु परिवारलिसे बायाः कठोर जेल यातना फयेमाःपिं तत्कालीन युवा च्वमितय्सं काव्ययात हे थःपिनिगु आत्म अभिव्यक्त यायेगु सवल व सक्षम माध्यम कथं नालाकाल । अले काव्यया विषयभूमि कथं थःपिनिगु वियोग वेदनायात हे मूलरूप ब्वल । फलस्वरूप थुगु ईया काव्यय् अन्तरमुखी प्रवृत्ति हे अप्वः सशक्त जुल । सिद्धिदास युगं थनाहःगु भाषिक संस्कारं ब्वलपिं थुपिं च्वमितय्सं भाषिक उत्तरदायित्व वहन यायेगुलिइ हे थःपिं केन्द्रित यात । छु विषय च्वये, गज्याःगु च्वये धयागु स्वयां नं नेपालभाषां गुलि च्वयेफत धयागुलिइ तक्यन । फलस्वरूप जेल दुनेया काव्य साधना उगु ईया राजनैतिक घटनाया उपज खयां नं तत्कालीन राजनैतिक

सामाजिक यथास्थिति बोध उकिइ उलि जूगु खने मन्त । राजनैतिक कारणं जेलय् लाःपिं कवित केदारमान 'व्यथित' धर्मरत्न 'यमि' पिनिगु काव्यय् तकं थज्याःगु बहिर्मुखी मखु अन्तरमुखी प्रवृत्ति हे अप्वः प्रतिध्वनित जूगु दु । वरु थ्व ईया कवितय्सं स्वच्छन्दवादी काव्य धाराया विकास यानाः नेपालभाषाया साहित्ययात आधुनिक युगय् मूपुइकेत धाःसा तिबः बिल । पुनर्जागरणकालया साहित्यय् खने दुगु 'धर्म' 'नीति' थें ज्याःगु मूलभूत प्रवृत्तियात चतक्क त्वःताः स्वतन्त्र विषय चयन, उच्च कल्पना, प्रेम, प्राकृतिक सौन्दर्य अले सांस्कृतिक चेतनां थाय् काल । थुकथं थ्व समयावधिं स्वच्छन्दवादी काव्यकाल कथं थःत परिचित याकल । थननिसें नेपालभाषाय् आधुनिक काव्यया सूत्रपात जुल ।

जेलं पिनेया साहित्य साधना (ने.सं १०६१ - १०७१) : नेपालभाषा नेपाः देया छगू आदि भाषा खयां नं गुगुं इलय् थ्व भाषाया साहित्यिक गतिविधि नेपाः पिने वनाः न्ह्याकेमाःगु घटना जूगु नं दु । थ्व घटना विशेषतः ने.सं. १०६१ - ने.सं. १०७१ दशकया खः । ने.सं. १०३४ स निष्ठानन्द बज्राचार्यया ललित विस्तर सफूया प्रकाशनं निसें नेपाः गालय् बुद्धधर्मया नाप नापं नेपालभाषाप्रति नं जनअभिरुचि अप्वः खने दयावल । अभ्र धर्मादित्य धर्माचार्यया 'बौद्धधर्म व नेपालभाषा' पत्रिकाया प्रकाशनं तत्कालीन समाजय् धार्मिक जागरणया नापं भाषिक चेतनायात नं ग्वाकल । नेपालभाषां छुं च्वयेमाः, ब्वनेमाः धयागु भावना नेवाः जनमानसय् ब्वलकल । फलस्वरूप उगु ईया सचेत ल्याय्महतय्सं थन नेपालभाषां छुं च्वयेगु, सफू पिकायेगु कृतः यात । तर तत्कालीन निरंकुश राणा शासकतय्सं थज्याःगु कृतःयात थन सफल याके मविउ । नेपालय् दुने छगू निगू सफू पिकायेत स्वःसां समितिं छेकिं तइगु, पिनें पिहांवःगु पत्रिकाय् च्वसु च्वःगु सिलधाःसां ख्यानाः कुने यंकिइगु, बं पुइकिइगु, अले देशं पिनें सफू छापय् यानाहःसां भन्सार अड्डा व हुलाकं पनातइगु जुयाच्वन । अथे खःसां थुगु ईया भिक्षुपिं व सचेत ल्याय्महतय्सं देशं पिने वनाः नं नेपालभाषाया भाषिक तथा साहित्यिक गतिविधियात न्ह्याकेगु यात ।

ने.सं. १०४४ सालय् लामा धर्मय् प्रव्रजित जूपिं महाप्रज्ञा, महाचन्द्र, महाज्ञान, महाक्षान्ति, महावीर्य आदि भिक्षुपिं तत्कालीन सरकारं देशं पितिना छ्वये धुंक्कूगु खःसां हानं ने.सं. १०५१-५२ सालं निसें नेपाः गालय् थेरवादी बुद्ध धर्म वुलुहुं हा कयाहल । कर्लशील भन्तेया आगमनं वुलुहुं थनया मनूत थेरवादी बुद्धधर्म प्रति आकृष्ट जुल । भन्तेया प्रेरणा व ग्वाहालिं निम्ह प्यम्ह यायां थनया मनूत भारत, श्रीलंका, बर्मा आदिया थीथी थासं प्रव्रजित जुयावल । थथे प्रव्रजित जुयावःपिं धम्मालोक, शाक्यानन्द, अमृतानन्द, सुबोधानन्द, अनिरुद्र, सुमंगल प्रज्ञारश्मि भन्तेपिं मध्ये धम्मालोक, सुमंगल, सुबोधानन्द, प्रज्ञारश्मि भन्तेपिं तथा अनागारिकापिं नेपाःगालय् हे थातं च्वनेगु यात । शान्त व नाइसे च्वंगु सः, सरल स्वभाव, विनय प्रति निष्ठा, धर्म देशना आदि यानाः भन्तेपिं प्रति आपालं मनूत आकर्षित जुल । थुगु हे ताकय् (ने.सं. १०६२ पाखे) श्रीलंकाय् पाली व थेरवादी



बुद्ध धर्मया अध्ययन यांना: भिक्षु अमृतानन्द नं नेपा: लिथ्यन । वयक:या प्रभावकारी धर्म देशनाय् आपा: हे मनु मुन । अथे हे भिक्षु शरणंकर व महास्थवीर चन्द्रमणिपिसं नं नेपालय् वया: धर्म प्रकाश व व्याख्यान यात । फलस्वरूप न्हिया न्हिथं धर्म देशना न्यनेत अप्व: मनूत मुनिङ्ग जुयावल । धर्म देशनाया माध्यम नेपालभाषा जुयाचवन । तर भिक्षुपिं धर्मदेशना यांना: जक सुम्क चवना मच्चं । थन च्वयेगु, सफू पिकायेगु वातावरण मद्गुलिं इलय्ब्यलय् भारतया थीथी थासय् वना: थुपिं भिक्षुपिसं बौद्धधर्म सम्बन्धी नेपालभाषां अनुवादया रुपय् व मौलिक कृतिया रुपय् सफू पिकायेगु नं यांनां च्वन । अथे हे उगु ईया सचेत निम्ह प्यम्ह ल्याय्महतय्सं नं भारतया बेतिया, कालिपोङ्ग आदि थासय् वना: सफू पिकायेगु या:गु नं खनेदु । नेपा: देशं पिने वना: थुगु इलय् पिका:गु भिक्षुतय्गु नेपालभाषाया छुं छुं सफू ख: -

- अमृतानन्द - गृह ज्ञान दर्शन (ने.सं. १०६२)
- अमृतानन्द व धम्मालोक - ज्ञानमाला (ने.सं. १०६२)
- कर्मशील - विशुद्ध ज्ञान दर्शन (ने.सं. १०६२),  
बुद्धोपदेश (ने.सं. १०६१)  
धातु भेदानुपस्सना (ने.सं. १०६१)

थथे नेपालं सफू पिकाये मफुसां भारतया सारनाथ, कुशीनगर, चित्तागञ्ज, कालिपोङ्ग आदि थाय् थासं सफू, पिकायेगु यानाचवन । मेखेर भारतया कुशीनगरं पिदनीगु तत्कालीन 'धर्मदूत' पत्रिकाय् नं थ्व हे भिक्षुपिं व ल्याय्महतय्गु कुतलं ने.सं. १०६१ निसं नेपालभाषाया च्वसु नं दुथ्याकेगु यानाहल । अथे हे स्वयम्भूड ने.सं. १०४५ स स्थापना जूगु ज्ञानमाला भजन मण्डलं नं न्हूतूगु भजन हाला: नेपालभाषाया संगीतया माध्यमं प्रचार प्रसार जुइकेगुलिइ तिव: बियां च्वन । जनताय् चेतना, जागरण बल कि थ:पिनिगु शासन सत्ता वःदली धका: ग्या:पिं राणा शासकतय्गु नितिं थज्या:गु क्रियाकलाप असह्य जुल, आतंकया विषय जुल । फलस्वरूप 'ज्ञानमाला भजन मण्डल'या फुक्क सदस्यतय् ने.सं. १०६३ स ज्वना: दाच्छ मल्याक तारिखय् भुल्य् यांना: सास्ति यातना बिलसा सफू मिइम्ह भाक्तवहादुर बुक्सेलरयात पस: तकं तयेके मबिल । अथे हे भिक्षुपिं नं विहारय् बुद्ध पूजा याये दइमखु, धर्म देशना याये दइमखु धका: नं नसिहत बिल । तर भिक्षुपिसं थज्या:गु सरकारी ख्याचव:यात छुं भचा हे च्यूता: तयामच्चं । ख्यानां जक मजिसेलि जुद्धशम्शेर तम्बयेका: भन्तेपित जनताया मिखां कुतुवनीगु कथं चरित्र दोष बिया: ने.सं. १०६४ गुंलाथ्व १० कन्हु वर्षावास च्वनाच्वपिं भिक्षु श्रामणेरपिन्त देश पितिना छवत । थथे पितिना छव:पिं भन्तेपिं ख: - भिक्षु प्रज्ञानन्द, भिक्षु धम्मालोक, भिक्षु सुबोधनन्द, भिक्षु प्रज्ञारश्मि, श्रामणेर प्रज्ञारस, श्रामणेर रत्नज्योति, श्रामणेर अगधम्म, श्रामणेर कुलार (लिपा काश्यप) ।

अनागारिकापित जक धर्मदेशना याये मखु, बुद्ध पूजा याये मखु धका: भो च्वका: थन हे तल । नेपालं थथे भिक्षुपिं पितिउगु थ्व निक्क: खुसी ख: । पितिना छव:पिं भिक्षुपिं गुम्ह ला चटगाउं, वर्मा व श्रीलंका थ्यक नं वन । थथे उखेला: थुखेला: मद्गुपिं भन्तेपिनि थाय् व वाय्या बन्दोवस्त यायेत महास्थवीर चन्द्रमणिपिं अध्यक्षताय् सारनाथय् ने.सं. १०६४ स धर्मोदय सभा स्थापना जुल । थ्व सभाया त:गू योजना मध्ये बुद्ध धर्म तथा नेपालभाषाया प्रचार प्रसार यायेगु नं छगू ख: । थ्व हे योजना कथं भारतया भूमीइ च्वनां नं निर्वासित भिक्षुपिसं नेपालालभाषा बुद्ध धर्मया प्रचारया नितिं ज्या यात । तत्कालीन धर्मदूत पत्रिकाय् नेपालभाषां बुद्ध धर्म सम्बन्धी च्वसुच्वयेगु यानाहल । थ्व पत्रिकाय् मुख्य रुपं च्वसु बियादीपिं भिक्षुपिं अमृतानन्द, महाप्रज्ञा, धम्मालोक व सुबोधनन्द आदिपिं ख: । खयेत ला नेपालं नं मोतिलक्ष्मी 'उपासिका' व मेमेपिं निम्ह प्यम्ह च्वमिपिसं नं धर्मदूतय् च्वसु बिइगु या: । तर ने.सं. १०६१ या जेलकाण्डय् नेपालभाषाया उगु ईया फुक्क धया थें च्वमित जेलय् ला:गुलिं, 'धर्मदूत'य् च्वसु बिइपिं मूलत: निर्वासित भिक्षुपिं हे जुल । थथे ने.सं. १०६१ निसं १०६८ तक 'धर्मदूत'य् नेपालभाषाया च्वसु पिकायेकेत तत्कालीन भिक्षुपिं सफल जुल । अथे हे भिक्षुपिसं इलय्ब्यलय् निगू प्यंगू बौद्ध धर्म सम्बन्धी नेपालभाषाया सफू पिकायेगु नं यानाचवन । थुगु इलय् गुलि नं च्वज्या जुल बौद्ध धर्म सम्बन्धी हे जुल । गुलि नं बौद्ध साहित्यया रचना जुल, अप्व:थें गद्यभाषां हे जुल । अले थ्व गद्य श्रृजना गुगुं अनुवादया रुपय् सा गुगुं मौलिक रचनाया रुपय् जुल । थथे नेपालं पिने पितिंका: नं गद्य साहित्यया विकासय् तत्कालीन भन्तेपिसं महत्वपूर्ण योगदान बिल । नेपालभाषाया गद्य साहित्यया इतिहासय् भिक्षुपिनिगु थ्व देन गवले महइ कथं अंकित जुल ।

थथे देशं पिने वना: भिक्षुपिसं नेपालभाषाया प्रचार प्रसार यायेगु व सफू पिकायेगु ज्याय् सक्रियता क्यनाचवनसा नेपा: देय् दुने नं जेलय् मला:पिं भाषा अनुरागी तत्कालीन छथ्व: ल्याय्महतय्सं ल्हातं च्वया: नं नेपाल (ने.सं. १०६४) नांगु पत्रिका पिकायेगु यानाचवन । थ्व पौया सम्पादक रत्नध्वज जोशी ख:सा थुकिइ विशेष च्वसु च्वयादीपिं भैरवगोपाल वैद्य, सत्यमोहन जोशी आदिपिं ख: । दछि यंकं धया थें पिदगु थ्व पत्रिकां नेपालभाषाय् भावि साहित्यकारत निर्माण यायेगुलिइ तिव: बिलसा, मेगु छगू साहित्यिक पत्रिकाया सूत्रपात यात । थथे गुलिसितं जेल यातना गुलिसितं देश निकालाया सजाय बिउगु इलय् नं थ:गु भाषा साहित्यया नितिं समर्पित जुया: ल्हातं च्वया: पत्रिका पिकायेगु, नेपालभाषां च्वयेगु धयागु कम साहस, कम मेहनत कम त्यागया ज्या मखु ।

थुखे ने.सं. १०६५ स भिच्याम्ह राजवन्दीत नेपालभाषा काव्यलोक छायापिइगु थीथी कृति ज्वना: जेलं मुक्त जुल । जुद्ध शम्शेर शासनभार त्व:तुसेलि पदमशम्शेरया ल्हातिइ शासनभार ला:वन । थुगु हे इलय् लंका नारदथेरया नेतृत्वय् ने.सं. १०६५ स व:गु छगू बौद्ध शिष्टमण्डलं पदमशम्शेरयात नापलाना: पितिनात:पिं भिक्षुपिं हानं नेपालय् दुकायेगु आदि मेमेगु खँ लिसं नेपालभाषायात नं छुं सुविधा बिइमा: धइगु खँ छुत । थ्व हे कुत:या लिचव:कथं हुलाक व भन्सारं



पनातःगु भिक्षुपिनिगु सफू नं लित बियाहल । नापं ने.सं १०६६ कौलां निसैं समिति अड्डाय् मास्टर खड्गमान मल्लयात निरीक्षक यानाः नेपालीभाषा व नेपालभाषाया सफू पास यायेत छगू विभाग नं चायेकाबिल । थ्व समितिया नां गोरखाभाषा प्रकाशन समिति खः । थ्व समिति पिकाःगु नेपालभाषाया न्हापांगु सफू रत्नध्वजया नारद मोह खः । थुखे भारतया सारनाथ भिक्षुतय्गु विशेष कुतलं व धर्मोदय सभाया तत्वावधानय् भिक्षु महानाम कोविद व अनिरुद्धया सम्पादकत्वय् नेपालभाषाया लय्पौ धर्मोदय (१०६७-८०) पिदन । थुकिं नेपाः न्यंकभन्या नेवाःतय् कःघानाः साहित्य थकायेगु ज्या यातसा आधुनिक साहित्यया सूत्रपात यात । धर्मोदय पत्रिकाया प्रकाशनं निसैं नेपालभाषाया गद्य धर्म नीतिया विषयभूमि त्वःताः बुलुहुं मेमेगु विषयवस्तुयात नं थियायंकल । थौया नेपालभाषा बाखं, प्याखं, निबन्ध, समालोचनाया विकास थ्व हे पत्रिकां निसैं जुल थथे थुगु इलय् देशं पिने नेपालभाषाय् गुलि नं गतिविधि न्ह्याःगु खः, व दक्कं तप्यंक नेपालभाषाया प्रचार प्रसारया रुपय् मजुसे धर्म प्रचार, समाज सुधारया रुपय् जुल । थुक्रिया मू हुनि तत्कालीन देशकाल परिस्थितिया नापं शैक्षिक सांस्कृतिक संस्कार नं खः धकाः मधासे मगाः । तर धार्मिक विषयभूमिं मुक्त विशुद्ध साहित्य सृजना स्वयाः नं थुगु इलय् नेपालभाषाय् गद्य शैलीया निर्माणय् उपलब्धिमूलक ज्या जुल । थुथाय् गुगु ज्या गद्यय् जुल, अले गुकथं भाषान्तर व न्हूगु रचनाया माध्यमं भाषा परिमार्जित व पिचुसे च्वच्चं वल व ज्या थ्वयां न्हापा गुगु इलय् नं थुलि चिहाकःगु ईया दुने जूगु मदु । .... थुकथं भिक्षुगणपिनिगु अनुदित व मौलिक गद्य नेपालभाषाय् साहित्यिक ज्याय् ख्यलय् जूगु भाषाया परिपक्वता हयाबिल । परिपक्व शैलि च्वयातःगु धार्मिक विषयया थज्याःगु रचनां, नेपालभाषायात आत्मविश्वास व आत्मनिर्भर जुइफुगु शक्ति बिल (मल्ल, १०९८:११६) । देशं पिनेया नेपालभाषाया साहित्य साधनां छुखे नेपालभाषा साहित्य सृजनाया धाःयात त्वाःमदयेक न्ह्याकेबिल सा मेखेर नेपालभाषाया गद्य शैलीया निर्माणय् नं महत्वपूर्ण ज्या जुल ।

थुकथं जेल दुनेया साहित्य साधनां काव्यय् न्हूगु प्रारुप ब्याः आधुनिकताया सूत्रपात यातसा जेलं पिनेया साहित्य साधनां गद्यय् आधुनिकताया आभास बिल ।

### नेपाल संवत् १०८५ ( वि.सं. २०२२ ) या भाषिक आन्दोलन

देया राजनैतिक ह्यूपाः लिसैं थःगु अस्तित्व, थःगु अधिकारया नितिं, संघर्ष यानां वयेमाःगु छगू भाषा नेपालभाषा नं खः । थौं सर्वोच्च अडालतया (नेपालभाषायात स्वनिगःया नगरपालिकाय् मान्यता मबीगु) निर्णयया विरुद्धय् जक मखु, थ्व स्वयाः, न्ह्यः नेपाल संवत् १०८५स नं रेडियो नेपालं “नेपालभाषाया

समाचार” लिकाःगुया विरुद्धय् नं नेवाः जनता सतकय् क्वहावयाः थःपिनिगु भाषिक अधिकारया नितिं संघर्ष याःगु इतिहास दु । थ्व आन्दोलन भाषिक जागरणया दृष्टिकोणं जक महत्वपूर्ण मजुसे साहित्यिक उपलब्धिया दृष्टिकोणं नं उलि हे महत्वपूर्ण जूगु दु ।

देशय् प्रजातन्त्रया स्थापनाया नितिं नेवाःतय् मगवाकूतले क्रान्ति सफल जुइमफैगु तत्कालीन राजनीतिज्ञतय्सं वाः चायेकाः रेडियो नेपालया स्थापना पश्चात हे नेपाल संवत् १०७१ पोहेलाथ्व - ११ निसैं नेपालभाषं नं समाचार प्रसारण यायेगु यात । देशय् प्रजातन्त्रया स्थापना जुल । नेवाःतय् थःपिनिगु भाषिक साहित्यिक उत्थानया नितिं ज्या यायेत न्हापा थें सरकार पाखें अपायच्चः पंगलः मन्त । छुखे रेडियो नेपालं समाचार बीगु ज्या न्ह्याना तुं च्वनसा मेखेर थाय् थासय् गथे - नेपाल संवत् १०७३ स येंया हनुमान ध्वाखाय्, नेपाल संवत् १०७३स पूर्वाञ्चलया धनकुट्टाय्, नेपाल संवत् १०७४स पश्चिमाञ्चलया पोखराय् बृहत् साहित्य सम्मेलन यानाः भाषिक, साहित्यिक जागरण हयेगु ज्या नेवाःतय् बीचय् जुयाच्वन । अथे हे नेपालभाषा विकासया नितिं विद्यार्थीतय्कें नं भाषिक चेतना, साहित्यिक संस्कार ब्वलकेमाःगु वाःचायेकाः नेपाल संवत् १०७७स पद्मोदय हाइस्कूलय् साहित्य सम्मेलन जुल । लिपा थुकिं नेपाल संवत् १०८० निसैं अन्तर हाइस्कूल साहित्य सम्मेलनया रुप कयाः न्ह्यानां वन । अथे हे उगु ईया त्रिचन्द्र कलेजया छथः उत्साही. नेवाः विद्यार्थीतय्सं अन कलेजं पिदनीगु तत्कालीन **Light** पत्रिकाय् नेपालभाषाया लेखयात नं दुथ्याकेगु माग यात । तर व पत्रिकाय् अंग्रेजी भाषायात जक थाय्बीगु धका नेपालभाषायात थाय् मब्युसेलि, कलजपाखें मेगु हे नेपालभाषाया पत्रिका पिकायेगु, वहे दैय् अन हे कलेजं नेपालभाषा साहित्य सम्मेलन नं यानां क्यनेगु धैगु खं थ्व विद्यार्थीतय्सं निर्णय यात । फलस्वरुप सुरेन्द्रसिंह अध्यक्ष, हितकरवीरसिं कसाः जनरल सेक्रेटरी जुयाः त्रिचन्द्र कलेजय् नेपालभाषा साहित्य पाःलाः नांगु उत्साही नेवाः विद्यार्थीतय्गु छगू पुचःया स्थापना जुल । थ्व हे पुचःया सक्रियताय् मेमेगु कलेजय् नं भाषिक लहर न्ह्याकेगु नितिं अन्तरकलेज नेपालभाषा साहित्य सम्मेलनया नी जुल । थ्व हे दैय् अर्थात् नेपाल संवत् १०८०, थिलागा - २, ३ व ४ स हे त्रिचन्द्र कलेजय् न्हापांगु अन्तर कलेज नेपालभाषा साहित्य सम्मेलन तसकं हे भव्य कथं जुल । थथे साहित्य सम्मेलन विद्यार्थीतय्गु पुचलं न्यायेकेमाःगुया मू हुनि नेपालभाषाया विकासया नितिं केवल विद्यार्थीतय्क जक सहभागी जुइकेगु मखुसे तत्कालीन प्रजातान्त्रिक सरकार धाःगुयात नं थ्व भाषाया नितिं छुं याके बीकेत नं खः । थज्याःगु हे कुतः अनुरुप रेडियो नेपालं, नेपालभाषाया समाचार वाहेक, नेपाल संवत् १०८० स हे वाःलय् छकः नेवातय्गु संगीत, संस्कृति, साहित्य, भाषा आदियात पिब्वयेगु कथं १५ मिनेटया नेवाः कार्यक्रम जीवन दवू यात दुथ्याकल । थ्व कार्यक्रम संचालन यायेगु भाला त्रिचन्द्र कलेजया नेपालभाषा साहित्य पाःलाःया विद्यार्थीतय्सं क्वबुल । थ्व पुचलं “जीवन दवू” कार्यक्रमयात तसकं हे सफलता पूर्वक न्ह्याकां यंकल ।

नेपालभाषा साहित्यया इतिहास/११४



२००७ सालया राजनैतिक हयूपा: लिपा, हान २०१७ साल स नेपा:या राजनैतिक स्थलय् मेगु हयूपा: वल । बहुदलीय व्यवस्थाया थासय्, पञ्चायति व्यवस्थाया स्थापना जुल । थ्व व्यवस्था "एक देश" " एक भाषाया" निति ज्वना: नेपालीभाषा छगूयात बाहेक, मेमेगु भाषायात क्वत्यलेगु ज्या यात । नेपालभाषाया सभा सम्मेलन छुं यायेत न स्वीकृति मकासे याये मज्यूगु जुल । थुलि जक मखु जनस्तरं चलेयाना वयाच्चंगु नेवा:तय्गु थ:गु कार्यक्रम "जीवन दवू" यात न नेपाल संवत् १०८३ निसं जनस्तरं चलेयाके मव्युसे श्री ५ या सरकारं सञ्चालन यायेगु यात । अले नेवा:तय्गु धर्म, संस्कृति ब्वयेगु नितिं मखु तत्कालीन व्यवस्थाया प्रचार याये कथं थ्व कार्यक्रम संचालन जुल । फलस्वरूप नेवातय् विचय् छगू असन्तोष, आक्रोस ब्वलन । थज्यागु हे स्थिति यात च्यूता: तया: अन्तर कलेज नेपालभाषा साहित्य सम्मेलनया विद्यार्थीतसे तत्कालीन नेपालभाषाया साहित्यकार तथा बुद्धजीवितय्गु छगू मुंज्या स:तल । थ्व मुंज्या चित्तधर "हृदय"या सभापतित्वय् कन्यामन्दिर हाइस्कूलय् जुल । थ्व मुंज्या नेपालभाषाया समस्याया विषयलय् खँ ल्हायेत जुजुयाथाय् छगू शिष्टमण्डल वनेगु व शिष्टमण्डलया नेतृत्व तत्कालीन अन्तर कलेज नेपालभाषाया साहित्य सम्मेलनया नाय: हितकरवीर सिं यायेगु धैगु निर्णय यात । तर थ्व मुंज्या क्व:छय्गु कथंया शिष्टमण्डल जुजुयाथाय् वनेगु मजुसे, च्वसापासाया तत्कालीन अध्यक्ष केदारमान "व्यथित"या नेतृत्वय् स्वम्ह दुज:पिं जुजुयाथाय् खँ ल्हायेत वन । थुकिं तत्कालीन नेपालभाषा अनुरागीतय्के थवं थवय् छगू असमझदारी ब्वलंकल । फलत असन्तोषपिं छपुच: युवातय्सं नेपाल संवत् १०८३ स छगू लूज: नांगु संस्थाया नी स्वनेगु यात । थ्व पुच:या दुज:पिं ख: - हितकरवीर सिं, भिक्षु सुदर्शन, ईश्वरानन्द श्रेष्ठाचार्य, पद्मरत्न तुलाधर, दुर्गालाल श्रेष्ठ, मथुराकृष्ण साय्मि, श्यामसुन्दर सैजु, रमेशचन्द्र मधु, पुष्पबहादुर चित्रकार, सत्यभामा माथेमा, सावित्री सिंह आदि । थ्व पुचलं नेपालभाषाया विकासया नितिं वृहत् रुपं क्वनिसं हे नेवा:तय्के भाषिक जागरण थनेमा:गु वा:चायेकल । फलस्वरूप प्रत्येक वा: वा पतिं त्वा: त्वालय् साहित्य सम्मेलन यायेगु थ्व पुचलं निर्णय यात । थ्व हे कथं प्रत्येक वा: पतिं धैथें थ्व पुच:या दुज:तसे थ:थ:गु लाग्ना भाला कया: साहित्य सम्मेलन न्यायेकेगु यात । थये त्वा:त्वालय् जुइगु थज्यागु साहित्य सम्मेलनया ज्याभ्व: दच्छि धैथें न्ह्याये धुंका: थ्व संस्थाया दुज:पिंत तत्कालीन सरकार पाखें ज्वनेगु वारेन्ट वल । फलस्वरूप थ्व पुच:या साहित्य सम्मेलन यायेगु अभियान शिथिल जुयावन ।

थये नेवा:तय्के थ:पिनिगु भाषिक दमनया विरुद्धय् गुगु गुनुहुं, गुनुहुं ब्वलनाच्चंगु असन्तोष विद्रोह ख:, व विद्रोहलं नेपाल संवत् १०८५ थ्यंका: छगू आन्दोलनया रुप काल । सभा सम्मेलन यायेत अनुमति मवीगु, साहित्यकारपित अनेक तोह तया: ज्वनेगु कुनेगु यानाह:गु, "जीवन दवू" कार्यक्रमयात सरकार थ:य:य: थें चलेयाना ह:गु, जक मखु, वि.सं. २०२१ साल चैत्र २७ गते ( नेपाल संवत् १०८५, चउला गा-७) या गोरखापत्रय्, २०२२ साल वैशाख १ गते निसं नेपालभाषा वीगु समाचार रेडियो नेपाल दिक्कीगु जुल धैगु खबर पिदन । थुकिं

याना: नेवा: जनता थ:पिनिगु भाषिक अधिकारया संरक्षणया नितिं सतकय् क्वहां मवंसे मगात । थ्व समाचार लिकाइगु खबर न्यना: नेवा:तय्गु थी थी संस्थां विरोध प्रस्ताव पारितयात । थ्व हे भ्वलय् न्हापां तसकं सक्रिय जुया: नं छुं दं न्हय: निसं सुसुप्त जुयाच्चंगु "लूज:" पुच: नं नेपाल संवत् १९९९ चउलागा-११ स छगू मुंज्या याना: "नेपालभाषाया समाचार लिकाइगु निर्णय नं भीत थनाव्यू थें चायेका, उकिं जनताय् नेपालभाषाया गतिविधि थुइकेत शान्तिपूर्ण पला: छीगु" धैगु निर्णय यात । अथे हे नेपाल संवत् १०८५ चउलागा-२ खुन्हु तत्कालीन भाषा अनुरागीतय् छगू मुंज्या जुल । श्री ध: विहारय् च्वंगु थ्व मुं ज्यां संघर्षया दकले सशक्तगु माध्यम साहित्य सम्मेलन तायेका:, त्वा:त्वालय् सनिवा: पतिं मुंज्या सम्मेलन याना: रेडियो नेपालया निर्णयया विरोध प्रदर्शन यायेगु क्व:छित । थज्यागु हे मुंज्याया संचालन यायेत छगू तदर्थ समिति "सेवा खल:" या नं नी जुल । थ्व खल:या दुज:पिं ख: - दुर्गालाल श्रेष्ठ, ईश्वरानन्द श्रेष्ठाचार्य, राजा शाक्य, हितकरवीर सिं, गणेश साय्मि, एम.के. कल्पित, पुष्परत्न तुलाधर, मंगलमान शाक्य, पद्मरत्न तुलाधर, विष्णु चित्रकार आदि । अथे हे चउलागा -१० च्वसापासा, त्रिचन्द्र कलेज, अन्तर कलेज नेपालभाषा साहित्य पा:ला:, नेपालभाषा न्हय्ज्या खल:, भी पुच: बोदे, लूज:, पासापुच: आदि मुना: तत्कालीन सरकारया समाचार लिकायेगु निर्णयया विरुद्धय् खेद प्रस्ताव पारित यात ।

थये थाय् थासं विरोध जुइक नं तत्कालीन पञ्चायति सरकार नेपालभाषां वीगु समाचार २०२२ साल वैशाख १ गते निसं लिकयां तु त्व:तल । थ्व पलाखं नेवा: जनतायात तच्च:गु आघात लाकल । तत्कालीन व्यवस्थाया विरुद्धय् छुं स:तयेमदुगु, शान्तिपूर्ण धंगं नं छुं सभा सम्मेलन याये मदुगु थज्यागु स्थितिइ नं नेवा: जनतां थ:पिनिगु जातिय अस्तित्वया नितिं, भाषिक अधिकारया निति छिं छिं कथं सघर्ष यानां वन । २०२२ साल वैशाख ५ गते च्वसापासां छगू मुंज्या याना:, नेपालभाषाया समाचार हानं तयेकेगु नितिं जुजुयाथाय् छगू शिष्टमण्डल वना: खँ ल्हायेगु निर्णय यात । प्रेमबहादुर कसा:या नेतृत्वय् - भिक्षु सुदर्शन, ईश्वरानन्द श्रेष्ठाचार्य, हितकरवीर सिं, परमानन्द वज्राचार्य, दुर्गालाल श्रेष्ठ, सूर्यबहादुर पिवा: पिनिगु शिष्टमण्डल जुजुयाथाय् वनीगु जुल । तर जुजु महेन्द्र ई मद्दु धका: थ्व शिष्टमण्डलयात नापलायेगु मयात ।

थये रेडियो नेपाल नेपालभाषां समाचार लिकया विसैलि श्री ध:या मुंज्याया निर्णय कथं प्रत्येक सनिवा: पतिं त्वा:त्वालय् साहित्य सम्मेलन जुजुं वन । दुर्गालालया स्वागत गान, मंगलमान, शान्तदाश, माणिकलालपिनिगु ज्वचु, न्हू न्हूपिं च्वमितय्गु रचनां तत्कालीन साहित्य सम्मेलनयात तसकं हे रोचक जुइके विल । न्हापा लूज: पाखें त्वा: त्वालय् जूगु साहित्य सम्मेलनं स्वया नं थुकिं जनसहभागिता अप्व: ग्वाकल । त्वा:त्वालय् यायेगु धा:गु सम्मेलन लिपा जुलिसे चुकय् चुकय्, बहा: बहिली थ्यंक वन । Grass Root Level निसं हे नेवा:तय्के भाषिक चेतना, भाषिक जागरण हया: भाषिक अधिकारया नितिं संघर्षय् न्हय्ज्याकेगु हे थज्यागु साहित्य सम्मेलनया मू तातुना जूगुलिं, थज्यागु सम्मेलन



यै, यल, ख्वपय जक लिमकुंसे गां, गामय तक न्यना वन । थक्वा, बलम्बु, किपू, नगां, पांगा, बसिगां आदि थासय तक साहित्य सम्मेलन जुल । अथे हे शहरय आपालं नेपालभाषाया खलः, पुचःत स्वनेगु जुल । अले प्रत्येक त्वाःत्वाल्य अनेक खलः पुचःत स्वनाः छगू त्वालं मेगु त्वाल्य पाःफया यंकेगु यात । तर तत्कालीन सरकारया कुदृष्टि बचय जुइत गवलें छुं त्वाःया बुइगल्यसा गवलें छकू कोथाय तक सम्मेलन न्ह्याकेमाःगु स्थिति नं वल । तर अथे सां तुतेमजुइक सम्मेलन न्ह्यानां वन । अथे हे मिसातयत नं आन्दोलनय सहभागी जुइकेगु निति सुवर्णकेशरी तुलाधरया सक्रियताय भी सकलें नांगु मिसा पुचःया नं, नी जुल । थ्व पुचलं नं साहित्य सम्मेलन यायेगुया नापं सिन्हाज्या नांगु पत्रिकाया निगू अंक तक लिथो यानाः पिकाल । अथे हे साहित्य सम्मेलन यायां वनेगु भोलय, थज्यागु सम्मेलनया खबर बीत वाः वाः पतिं बुलेटिन पिकायेगु नं जुल । फलत थुगु इलय आपालं नेपालभाषाया बुलेटिन नं पिदन । थज्यागु बुलेटिनया प्रकाशनं मुंज्याय सहभागी जुइ मखंपित नं भाषिक आन्दोलनया विषयलय खं सीके दत ।

रेडियो नेपालं नेपालभाषाया समाचार लिक्का विउगुया विरुद्धय साहित्य सम्मेलन मार्फत विरोध प्रदर्शन यायेगु बाहेक तत्कालीन थीथी पत्रपत्रिकां नं थःपिनिगु सम्पादकीय मार्फत, सरकारया थ्व ज्या खंया कुखिसे, हानं रेडियो नेपालं नेपालभाषाया समाचार प्रशासन यायेगु नितिं इनाप यात । थथे इनाप याःगु पत्र पत्रिका खः - नेपालभाषा, समय, मातृभूमि, समाज, नेपाली, आरती, समीक्षा, लुम्बिनी, कमनर, नेपाल टाइम्स, सितु, सिन्हाज्या आदि । अथे हे स्कूल स्कूलया विद्यार्थीतसें रेडियो नेपालं नेपालभाषाया समाचार लिक्कागुया विरुद्धय हस्ताक्षर संकलन यायेगु अभियान न्ह्याकल । संकलित हस्ताक्षर नापं पत्रपत्रिकाया सम्पादकीय फुक्कं मुनाः संचार तथा सूचना मन्त्रालययात लःल्हायेगु गुगु तत्कालीन भाषाअनुरागीतयगु तातुना खः व श्री ५ या सरकारं लःल्हाना मकासेलि पूमवन । लिपा थुकियात सफूया रुप वियाः जनताया सः रेडियो नेपालयात नामं पिकाल ।

अथे थाय् थासं विरोध जुया वसेलि, थ्व आन्दोलनं उग्र रुप काडगु खनाः तत्कालीन पञ्चायति सरकार नं ग्यात । फलत थ्व आन्दोलन न्हंकेगु नितिं सरकारं अनेक कथंया चालबाजि म्हितल । छखे थुकी सनाजूपिं सक्रिय कार्यकर्तातयत ज्वनेगु, कुनेगु, ख्याचः विइगु यातसा, मेखेर थ्व आन्दोलनकारीतय विचय मतभेद हयाः थवं थवय ल्वाकाः आन्दोलन चिच्चाः थनेगु, कुटनैतिक चाल नं म्हितल । सरकारया थ्व आकांक्षा याकन हे पूवन । आन्दोलनय सनाजूपिनिगु विचय राजनैतिक रंग हयाः थवं थवय मतभेद पिदंकेगुली सरकारया कुटनैतिक चाल सफल जुल । थथे वि.सं. २०२२ वैशाख १५ गते श्रीघः विहारं निसं अतुत रुपं वाः वाः पतिं न्ह्याना वःगु साहित्य सम्मेलन मरुवहीया साहित्य सम्मेलनय थ्यंबले कार्यकर्तातय विचय थवं थवय विवाद पिदन । अनं लिपा थ्व सम्मेलन भिंयःत्वाल्य थ्यंवल्य भन भन सेलय जुजुं वनाः दच्छि व निला दुबले थ्व सम्मेलन दिना हे वन । थुकथं लिक्काये धुंकूगु नेपालभाषाया समाचार हानं रेडियो

नेपालं बीकेगु गुगु माग खः पू हे मवंक, थ्व १०८५या भाषिक आन्दोलन भिंयला न्ह्यानाः दिना वन । तर अथे खः सां नेवाःतयगु भाषिक अधिकार संरक्षित जुइकेत दकले न्हापां नेवाःतयके भाषिक चेतना दयेकेमाः, साहित्यिक संस्कार निं ब्वलंकेमाः धैगु उद्देश्य पूर्वकगुली, धाःसा थ्व आन्दोलन गाकं हे सफल जूगु दु । थ्व आन्दोलनं नेपालभाषाया ख्यलय भाषिक जागरण जक मखु साहित्यिक जागरण नं हःगु दु । थुलिजक मखु भाषा साहित्य समुन्नतिया नितिं थःत छयलीपिसं भाषा विरोधी तत्त्वतयगु कुटनैतिक चल्तात नं थुइके माः नापं राजनीतियात थः ल्यू ल्यू यंकेमज्यू धैगु शिक्षा नं थ्व आन्दोलनं ब्यूगु दु ।

भिंयला यंकं त्वाःत्वाल्य जूगु साहित्य सम्मेलनं छखे नेपालभाषा प्रति छुं हे च्यूताः मदुपित नं थ्व क्षेत्रय आकर्षित यातसा, थःगु भाषा साहित्ययात थम्हं छुं यायेमाः धैगु भावना नं थना बिल । मेखेर न्हू न्हूपिं च्वमितयत नं सम्मेलनय रचना ब्वंके वियाः च्वयेगु ब्वनेगु थाय् बिल, हौसला बिल । फलत न्हापा गवलें मच्चःपित नं च्वके बिल । न्हू न्हूपिं च्वमित पिकायेगुली थुगु ईया साहित्य सम्मेलनं अभूतपूर्व सफलता प्राप्त यात । अथे हे नेपालभाषं मच्चसे नेपाली भाषं च्वयाच्वपिं तत्कालीन नेवाः लेखकतयत नं नेपालभाषं नं च्वयेमाः धैगु वाः चायेका बिल । थुलिजक मखु न्हापा भचा भचा जक च्वयाः थःत च्वमि धायेके धुंकूपित नं अभ अण्वः च्वयेमाःगु बाध्यता थुगु ईया लकसं ब्वलंका बिल । कवि बुद्ध साय्मि, नातिवज्र, जनक नेवाः, द्वारिकालाल दाउरे, काजीमान जवाः, जवाहर भूमि, आशाबहादुर नुगाः, श्रीकृष्ण अणु, लक्ष्मीनारायण महर्जन, राजमान, दवलकाजि, मन्दिरा श्रेष्ठ, इन्द्रकमल साय्मि, चिनिहिरा आदिपिं थुगु ईया साहित्य सम्मेलनं पितहःपिं च्वमित खः । थौं थुपिं मध्ये गुलिखे च्वमित ला नेपालभाषाया आधुनिक साहित्य ख्यलय नांदपिं च्वमित जुया पिदगु दु गथे- बुद्ध साय्मि, नातिवज्र, श्रीकृष्ण अणु, जनक नेवाः आदि । अथे हे थौं नेपालभाषाया नांदम्ह उपन्यासकार रत्नवहादुर साय्मि नं थ्व हे १०८५या भाषिक आन्दोलनं नेपालीभाषं नेपालभाषाय सालाहःम्ह च्वमि खः । अथे हे न्हापा भचा भचा च्वयाच्वपिं च्वमित गथे - मंगलमान शाक्य, भगतदाश, राजा शाक्य आदिपित अभ अण्वः च्वकेबीगु ज्या थ्व आन्दोलनं यातसा, कवि दुर्गालालयात प्रत्येक साहित्य सम्मेलनया नितिं स्वागत गान जक नं वाःलय निपु स्वपु च्वयेमाःगु बाध्य यानाबिल । थुकथं न्हूपिं पुलापिं पाखें च्वकेगु वातावरण सृजना यानाः नेपालभाषा साहित्ययात समृद्ध यायेगुली थुगु ईया साहित्य सम्मेलनं महत्वपूर्ण योगदान बिल ।

१०८५ या भाषिक आन्दोलनं केवल न्हू न्हूपिं च्वमित जक पित ह्येगु मयासे नेपालभाषा साहित्यया ख्यलय न्हू न्हूगु आयाम प्रवृत्तित नं ब्वलंकेगु याःगु दु । थुगु ईया साहित्य सम्मेलनं दकले अण्वः ब्वलंकूगु क्षेत्र- कविता व संगीत खः, खयेत ला साहित्य सम्मेलनय रचना ब्वनेगु भोलय कविता बाहेक बाखं, च्वखं नं वाचन जूगु दु । तर अथे खःसां थुगु ईया साहित्य सम्मेलनया दकले उपलब्धिमूलक विधा कविता जूगु दु । आधुनिक कवितायात छगू प्रवाहया रुपय न्ह्याकेगुलिइ थुगु ईया कविता महत्वपूर्ण भूमिका म्हितुगु दु ।



नेपालभाषाया १९९७ सालया जेलय ला.पि कवितसे स्वच्छन्दवादी काव्यधाराया विकासय महत्वपूर्ण योगदान व्यू थें, थुगु ईया कवितयसं यथार्थवादी, जीवनवादी काव्यधाराया विकासय महत्वपूर्ण योगदान व्यूगु दु । कल्पनाया असीमित संसारय चाहिलेगुली मखु, थौया यथार्थता वास्तविकता ब्वयेगुली थुगु ईया कवितयगु ध्यान केन्द्रित जूगु दु । थुगु ईया कवितयगु जन्म हे असन्तोष, विद्रोह जूगुलिं थुमिगु कविताय नं आक्रोस, विद्रोह, अनास्था, प्रतिशोध आदिं थाय काइगु स्वभाविक खः । अथे धकाः जेलकालीन कवितयगु कविताय थें आत्मगत पीडा, वेदना मखु, समष्टिगत पीडा, वेदना, बाध्यता, विवशता, आक्रोस थुगु ईया कवितयगु कविताय वानाच्चंगु दु । कवि बुद्ध साय्मिया “ मां मालाच्चना”, “ जि टेवहाःया” मचा थुगु ईया कविताया नमूना खः । तर न्ह्याथे हे असन्तोष, पीडा वेदना प्वकेगु याःसां थुगु ईया कवित न्हूगु भविष्य प्रति उलि हे आसक्त, परिवर्तन प्रति उलि हे आशावादी जूगु दु ।

अथे हे नेपालभाषाय आधुनिक कविताया विकासय नं थ्व १०८५ या भाषिक आन्दोलनं गाकं तिवः व्यूगु दु । छखे विश्व साहित्यय आधुनिक कवितयगु कवितां थाय कया हःगु मेखेर तत्कालीन व्यवस्थाया विरोधय छुं नं खं तप्यंक प्वकं मज्युगुलिं, थुगु ईया कवितसें गुलि नं भाव अभिव्यक्त यायेगु यात व तप्यंक मयासे प्रतीकात्मक रुपं प्वकेगु यात । थुकथं प्रतीकात्मक रुपं सां तत्कालीन यथार्थस्थिति, ब्वयेगुया नापं थःपिनिगु आक्रोस, विद्रोह प्वकेगु यात । श्री कृष्ण अणुया “ बुँख्याचा” द्व रिकालाल दाउरेया “ चुरथ थुत्था” आदि थज्यागु हे प्रतीकात्मक कवितात खः । तर न्हापा न्हापाया कवितसें थें थःपिनिगु भाव प्वकेत पुलांगु परम्परागत उपमा, प्रतीक छयलेगु पलिसा न्हू न्हूगु थःथः कथंयाःगु हे उपमा, बिम्ब, प्रतीकत छयलेगु याःगु दु । थुकथं थ्व आन्दोलनं नेपालभाषाया कवितायात आधुनिकताया लेंपुड न्हयज्यायेत गाकं तिवः बिल । थ्व आन्दोलनं शुरु जूगुया दच्छि लिपा हे, थ्व हे आन्दोलनया सक्रिय कार्यकतातयगु पुचः सकलें पाखें गाजलें दाःगु चा नांगु आधुनिक कविताया संग्रह पिदन ।

केवल कविता जक मखु तत्कालीन व्यवस्था तथा व्यवस्थाया हिमायतितयगु नग्न चित्र ब्वयेत तथा अमिगु निरकुशता न्ह्यावलें च्वनीमखु धैगु क्यनेत प्रतीकात्मक बाखें, च्वखेंया रचना नं थुगु इलय आपालं जूगु दु । अथे हे थुगु ईया मेगु विशेषता ब्यंग साहित्यया सृजना नं छगू खः । चाहे कविताच्चमि जुइमा, बाखेंचमि जुइमा तत्कालीन सरकार तथा व्यवस्था प्रति ब्यंग प्रहार मयासे च्वःपि च्वमित थुगु इलय मदु हे धाःसां ज्यू । श्री कृष्ण “ अणु” या “ तासया बास्सा” राजा शाक्यया “ मां मचाया क्वाःकासा” आदि थुगु ईया ब्यंग साहित्यया नमूना खः ।

थुगु ईया च्वमितसें नेपालभाषा साहित्यं दे दुनेया जक घातप्रतिघात ब्वयेगु मयासे अन्तराष्ट्रिय समस्यायात थीगु याःगुया नं नमूना क्यंगु दु । बुद्ध साय्मिया “ भियतनाम” दुर्गालालया “ बलिदेवी” आदि कविता थुक्रिया दसु खः । थुकथं नेपाल संवत् १०८५ या भाषिक आन्दोलनं छगू उपलब्धीमूलक साहित्यिक आन्दोलन नं सिद्ध जूगु दु ।

## नेपालभाषाया प्रारम्भिक पत्र पत्रिकाया देन

नेपालभाषायात थौया आधुनिक स्थितिइ हयेगुलिइ थीथी इलय पिटंगु पत्रपत्रिकाया नं तःधंगु भूमिका दु । नेपालभाषा साहित्यया इतिहासया तुलनाय थ्व भाषाया पत्रपत्रिकाया इतिहास तसकं हे न्हूगु जूगु दु । नेपालय पत्रपत्रिकाया प्रकाशन प्रारम्भ ने.सं १०२९ या दशकय नेपाली भाषाया सुधासागर (वि.सं १९६१) मासिक पत्रिकां निसें जुल । अथे हे लिपा सूक्ति सुधा (वि.सं १९६१) माधवी (वि.सं १९६५) आदि पत्रिका भारतया विभिन्न थासं पिदन । थ्वयां नौदं लिपा ने.सं. १०४५ य तिति नेपालभाषाया बुद्धधर्म पत्रिका धर्मआदित्य धर्माचार्यया सम्पादनय पिदन । थ्व नं भारतया भूमिं हे पिदन । तत्कालीन नेपालभाषा भाषितयत पत्रपत्रिका पिकायेगु प्रेरणा नेपाली भाषाया पत्रिकां प्रभावित जुयाः स्वयां नं भारतय न्ह्याःगु भाषिक साहित्यिक जागरणं प्रभावित जुयाः वःगु खनेदु । उगु इलय विद्या अध्ययन तथा बनेज्याया नितिं भारतया कलकत्ताय वनीपिं नवयुवकतयत तत्कालीन बंगाली भाषाया पत्रपत्रिका तथा बंगालीतयगु मातृभाषा प्रतिया अनुरागं गाकं प्रभावित याःगु जुयाच्चन । थ्व हे प्रभावं थःगु मातृभाषाया नितिं छुं यायेमाल धयागु भावनां हे धर्मआदित्य धर्माचार्ययात बुद्धधर्म (ने.सं १०४५) पत्रिका पिकायेके बिलसा, रत्नध्वजयात नेपाल (ने.सं १०६४, ल्हातं च्वयातःगु पौ) प्रेमबहादुरयात पासा (ने.सं १०७३), फत्तेबहादुर सिंहयात नेपालभाषा (ने.सं १०७५) पत्रिका आदि पिकायेके बिल । थुकथं नेपालभाषाय पत्र पत्रिकाया प्रकाशन प्रारम्भय साहित्यिक चेतनां स्वयाः नं भाषिक अनुरागं याके बिउगु खनेदु । थ्व हे कथं नेपाः दुने तत्कालीन राजनैतिक परिस्थिति अनुकूल मजुगुलिं नेपालभाषाया प्रारम्भिक पत्रिका न्हापां न्हापां भारतया भूमिं पिदन सा गुलिं ल्हातं च्वयाः जक नं पिदन । खयेत ला नेपालभाषाया न्हापांगु पत्रिका ‘ बुद्धधर्म’ ‘ धर्मोदय’ धकाः धर्मया स्वाःपाः पुयाः नेपालभाषाया पत्रपत्रिकाया जन्म जूगु खः, तर थुमिगु सक्कली स्वाःपाः मातृभाषानुराग खः । थुमिसं लिपा बुलुहुं साहित्यिक लें ज्वन, अले नेपालभाषाया साहित्यिक उत्थानया अभियानय महत्वपूर्ण भूमिका म्हितुं म्हितुं यंकल । थथे नेपालभाषाया आधुनिक साहित्यया निर्माणय विशेष न्हयथने बहःगु छुं छुं प्रारम्भिक पत्रिका खः -



१) धर्मदूत (ने.सं १०६१-१०६८) :- विदेशं पिदंगु जूसां नेपालभाषा साहित्यया अध्ययन यायेत छगू त्वःफिके मजिउगु पत्रिका खः - धर्मदूत । 'धर्मदूत' महाबोधि सभा सारनाथं ने.सं १०५५ स्वांयाः पुन्हिनिसं पिदंगु लय्पौ खः । 'महाबोधि सभा' श्रीलंकाया देवमित्र धर्मपालं (ने.सं ९८४-१०५३) स्थापना याःगु छगू संस्था खः । थ्व सभां न्हापां ला अंग्रेजी भाषां 'महाबोधि' नांगु लय्पौ पिकयाच्चंगु खः । लिपा हिन्दी पाठकतय् नितिं धर्मदूत नामं हिन्दी भाषां वाल्य छकः थ्व पत्रिका पिकायेगु यानाहल । थ्व पत्रिकाया अप्ठः धया थें ग्राहकत नेवाःत नं दुगु जुयाचन । पत्रिकाय् नेपाली पाठकतय्गु नितिं गोरखाभाषाया लेखयात नं छुं छुं थाय् बिइगु धयागु खबर प्रकाशित जुसेलिं नेवाः ग्राहकतय्सं गोरखा भाषां मखु नेपालभाषां च्वःगु लेखयात थाय् बिइमाः धकाः इनाप यानाः 'धर्मदूत' पत्रिकाया कार्यालयय् तारंतार पौ छवल । थथे पौ छवयेगुलिइ सक्रिय जुयादीपिं मध्ये चित्तधर 'हृदय', मोतिलक्ष्मी आदिपिं नं खः । थ्व ज्याया फलस्वरूप धर्मदूत या दै ६ ल्याः १ थ्यं ल्याः ५९ ने.सं १०६१ चिल्लां निसं धर्मरत्न शाक्यया सम्पादकत्वय् नेपालभाषाया नं लेख च्वनाः ने.सं. १०६८ तक पिदन । न्हयदँत्याया दुने 'धर्मदूत' पत्रिकाय् नेपालभाषाया ३६ म्ह च्वमितय्गु १२७ पु च्वसु पिदंगु दु । धर्मदूत पत्रिकाय् मुख्यरूपं च्वसु बियादीपिं च्वमित अमृतानन्द, महाप्रज्ञा, सुबोधानन्द, अश्वघोष व मोतिलक्ष्मी आदिपिं खः । गुगु इलय् धर्मदूतय् नेपालभाषाया च्वसुयात थाय् बिल, अबलय् नेपालभाषाया प्रमुख लेखकत जेलय् लानाच्चंगुलिं उगु इलय् च्वमि कथं खनेदये धुकूपिं चित्तधर, फत्तेबहादुरपिनिगु रचना थ्व पत्रिकाय् खने मदु । धर्मदूतय् पिदंगु दक्कं धया थें च्वसु धार्मिक त्रिषयवस्तु नाप सम्बन्धित जूगु खनेदु । मोतिलक्ष्मीया थ्व पत्रिकाय् पिदंगु न्यापु लेख मध्ये निपु च्वखँ निपु चिनाखँ व छपु बाखं खः ।

थ्व पत्रिकां नेपालभाषाया धार्मिक गद्ययात ब्वलंकेगुलिइ अप्ठः तिबः बिल । थुकथं थुगु ईया रचनां साहित्यया विविध पक्ष विविध विधयात कत्ताये मफुसां देशं दुने व पिने नेपालभाषायात म्हसिइके बिइगु ज्या जुल । साहित्य सृजना धाःयात त्वाःमदयेक न्ह्याकल ।

२) धर्मोदय (ने.सं १०६७) :- भिक्षुपिसं नेपालभाषां बुद्धधर्मया प्रचार प्रसार यानाजूगु स्वयेमफयाः तत्कालीन राणा सरकारं भिक्षुपित चरित्र दोष बियाः ने.सं १०६४ स देशं पितिना छवत । थथे देशं पितिना छवःपिं भिक्षुपिनिगु नितिं थाय्बाय्, नये त्वनेया बन्दोवस्त यायेत वि.सं १०६४ स सारनाथय् महास्थवीर चन्द्रमणिगु अध्यक्षताय् धर्मोदय सभा स्थापना जुल । थ्व सभाया तःगू योजना मध्ये पत्रिका पिकायेगु नं छगू खः । थ्व हे योजना कथं तत्कालीन नेवाः ल्हासासाहुतय्गु आर्थिक ग्वाहालिं ने.सं १०६७ स भिक्षु अनिरुद्ध व महानाम कोविदया सम्पादकत्वय् धर्मोदय पत्रिका पिदन । प्रत्यक्षरूपं थ्व पत्रिकां थःगु मू तातुना साहित्य, धर्म व शिक्षाया प्रचार यायेगु खः धकाः न्हयब्वःसां, लेखक

नेपालभाषा साहित्यया इतिहास/१२१

निर्माण यायेगु, भाषा सुधार यायेगु, जीवन उपयोगी विविध विषयया लेख च्वसु पितबिइगु ज्याय् थ्व पत्रिकां थःत छयल । धर्मोदयतय्या बुद्धधर्म व नेपालभाषा पत्रिकां पत्रपत्रिका ब्वनेगु संस्कार व वातावरण दयेकाबिइ धुकूपिं, नेवाःतय् दथुइ धर्मोदय पत्रिका याकनं हे लोकं ह्वात । अथे हे शुरुं निसं धर्मोदयया तातुना चकंगुलिं व थुकिं व्यवहारिक पक्षयात नं ध्यान तःगुलिं यानाः धर्मोदय पत्रिकाया विषयभूमि व भावभूमि दुने यक्कं लेखकतय् थाय् दत । आपालं च्वमि पिदन । नेपालभाषा साहित्यय् छगू न्हगु ईया शुरुवात जुल । फलस्वरूप नेपालभाषा साहित्य आधुनिक युगय् प्रवेश यायेत सफल जुल । थ्व पत्रिकां नेपालभाषा साहित्यया विकासया नितिं विउगु योगदानयात थुकथं न्हयब्वयेछिं -

क) विधागत विकासया पलाः - थौं नेपालभाषा साहित्यय् खने दुगु विविध आधुनिक विधाया शुरुवात थ्व हे धर्मोदय पत्रिकां जूगु खनेदु -

कहानी :- नेपालभाषाया न्हापां न्हापांगु आधुनिक बाखं चित्तधर 'हृदय'या 'पौ' ने.सं १०६७ स थ्व हे धर्मोदयय् पिदंगु खः । माधवलाल, पूर्णदास, पूर्ण पथिक आदि बाखं च्वमिपिं नं थ्व हे पत्रिकाय् न्हापां पिदंगु खः ।

निबन्ध :- नेपालभाषाय् निबन्ध/प्रबन्ध विधा ब्वलंकेगुलिइ नं धर्मोदयया तःधंगु देन दु । धर्मोदय पत्रिका पिदंसेलि गद्य विधाय् ल्हाः न्ह्याकिइपिं आपालं च्वमित खनेदया बल व नेपालभाषाया न्हापां न्हापांगु निबन्ध रत्नध्वजया च्वय्गु छाय् थ्व हे पत्रिकाय् ने.सं १०६८ स पिदंगु खःसा प्रेमबहादुर, ठाकुरलाल मानन्धरपिं नं थ्व हे पत्रिकां निसं खनेदयेकः वःपिं निबन्धकारत खः । धर्मोदय पत्रिकाया प्रकाशनं नेपालभाषाया गद्यं छगू स्तरीयता प्राप्त यात (मल्ल, ने.सं. १०९८:११८) ।

छधाःप्याखं :- एकांकी नाटक नं नेपालभाषाय् न्हू विधा कथं 'धर्मोदय' पत्रिकाय् न्हापा न्हापां हे न्हयलूगु खः । हेमलाल जोशीयागु म्वाःचो स्वयम्भूलालया हृदय परिवर्तन, सुदर्शनया अजातशत्रु, इश्वरानन्दया मिसा आदि छधाःप्याखं थ्व हे पत्रिकाय् न्हापां पिदंगु खः ।

समालोचना :- समालोचना विधा नं धर्मोदय पत्रिकां न्हापालाक न्हयब्वःगु खः । नेपालभाषाया न्हापांगु समालोचनाया लेख रत्नध्वजया 'धर्मोदयया कहानीत' थ्व हे पत्रिकाय् न्हापां (ने.सं १०६९) पिदंगु खः ।

कविता :- नेपालभाषाय् गद्य कविता धर्मोदय निसं न्हयलुयाः ब्वलंगु खनेदु । धर्मोदय पत्रिकाय् कविता च्वयाः यक्कस्यां थःगु प्रतिभा व सृजना सक्रियता न्हयब्वःगु नेपालभाषा साहित्यया नितिं छगू तःधंगु उपलब्धि खः

नेपालभाषा साहित्यया इतिहास/१२२



ख) स्तरीय नेपालभाषा दयेकेगु पला : धर्मआदित्य बुद्धधर्म नेपालभाषा पत्रिकाय् भाषिक चेतना थनेगुया नाप नेपालभाषायात स्तरीय भाषाया रुपय् स्थापित यायेगु गुगु कुतः यानादिल, थज्याःगु हे कुतःयात न्ह्यज्याकेगु ज्या धर्मोदय पत्रिकाय् न जुल । स्तरीय भाषा दयेकेगु निति उबलेया च्वमितय् दथुइ बिचाःया कालबिल जूगु खनेदु - विसर्ग (:) वा लुप्ताकार (क) तयेगु खंय् वाद विवाद, नेपालभाषा गथे याना: च्वयेगु धइगु खंय् आपाल भाषा सम्बन्धी च्वसु न थ्व पत्रिकाय् पिदन । थथे भाषा सम्बन्धी च्वसु धर्मोदय पत्रिकाय् च्वयादीपि च्वमित खः - आदिवज्र, पन्नाप्रसाद जोशी, ठाकुरलाल मानन्धर आदि । थ्वय्कःपि आपाःसिया नेपालभाषाया व्याकरण निर्माण यायेबलय् थ्व भाषाया प्रकृति व प्रवृत्तिइ ध्यान बिइमाः धयागु विचार खनेदु ।

ग) विशेषांक प्रकाशन : 'धर्मोदय' लयपति थःगु प्रकाशन कालय् (ने.सं १०६७-१०८०) प्यंगु विशेषांक पिकाःगु दु । १) नव वर्ष विशेषांक २) म्हपुजा विशेषांक ३) लुम्बिनी ४) २५०० दै क्यंगु स्वांयाःपुन्हि विशेषांक । थुकिइ मध्ये स्तरीय कहानी, नाटक, निबन्ध, कविता व बांबांलाःगु किपां जाःगु २५०० दै स्वांयाः पुन्हि विशेषांक हे दकलय् तःजिगु खनेदु ।

शुक्थं राणाशासनं क्वत्यलातःगु नेपालभाषायात नव निर्माण यायेगुलिइ थ्व स्वयाः न्ह्यःया मेमेगु पत्रिकाया तुलनाय् धर्मोदय पत्रिका गाकं धिसिलाक न्ह्यज्यात ।

३) थौकन्हे (ने.सं १०७१) :- भाजु पूर्णकाजि ताम्राकारया सम्पादकत्वय् ने.सं १०७१ बछलानिसं पिदंगु 'थौकन्हे' लयपौ नेपाः देशं पिदंगु न्हापांगु नेपालभाषाया पत्रिका खः । थ्व पत्रिकाया दैः १ ल्याः १० य् 'थौकन्हेया' उद्देश्य शुक्थं न्ह्यथनातःगु दु -

१) नेपालभाषा व लिपिया प्रचार प्रसार यायेगु

२) साहित्यिक, सामाजिक, राजनैतिक, आर्थिक, सांस्कृतिक धार्मिक आदि लेख पिब्वयेगु ।

३) नेपालभाषायात शुद्ध व थापुनिक विसं नियमबद्ध यायेगु ।

सम्पादकया च्वसा जे च्वसुया छ्यं प्रचलित लिपि च्वयातइगु 'थौकन्हे' पत्रिकाया खाःपातय् नेपालभाषाया लयपौ धकाः धयातःसां थ्व थौकन्हे पर्व पर्वय् दच्छिया प्यंगु न्यागुलिं अप्वः पिदने फुगु खनेमदु, अथेसां त्वाःमदयेक ने.सं १०७१ निसं १०७७ तक 'थौकन्हे' पिदंगु दु । ताः ई तक दिनाः लिपा ने.सं १११२ निसं थ्व पत्रिका हानं रेवतिरमणानन्द श्रेष्ठजुया सम्पादकत्वय् पुनर्जीवन कयाः पिदन । थौ 'थौकन्हेया' दै ४६, थ्यंल्याः ७६ थ्यंगु दु । विशुद्ध साहित्यिक उद्देश्यं पिदंगु थौकन्हे पत्रिकां साहित्यया विविध विधाया लेख बाहेक इतिहास संस्कृति, धर्म, भाषा, आदि सम्बन्धी लेख नं पिकायेगु याःगु दु ।

'थौकन्हे' पत्रिकाया भाषा सम्बन्धी थःगु हे दृष्टिकोण दु । थ्व विशेष यानाःसुलाच्वंगु आखःयात नं न्ह्यब्वयाः मूलरूपं हे च्वयेगु गथे लख, (लः) ससल (ससः) पसल (पसः) फस (फय्) याःगु दु । अथे हे पत्रिका मार्फत 'नेपालभाषा' च्वयेगु नियम नं न्ह्यब्वःगु दु । 'थौकन्हे' पत्रिकाया छगू आकर्षक स्तम्भ थ्वया सम्पादकीय नं खः । नेपालभाषाया भाषिक साहित्यिक ख्यलय् जूगु विविध गतिविधिया प्रतिक्रिया ब्वयेगु ज्या थ्वया सम्पादकीय जूगु दु ।

४) नेपाल (ने.सं १०७२) :-नेपालभाषा परिषदया पत्रपत्रिका पिकायेगु ग्वसाः कथं परिषद् पाखें दकलय् न्हापां पिदंगु पत्रिका नेपाल खः । नेपालभाषाया उत्साहित नवयुवकत रत्नध्वज जोशी, भैरवगोपाल वैद्यपिसं ने.सं १०६४ बछलां निसं ने.सं १०६५ चौला तक ल्हातं च्वयाः 'नेपाल' पत्रिका पिथनादी धुंकूगु खः । लिपा ने.सं १०७२ निसं नेपाल थासा आखलं हृदयचन्द्रसिंह प्रधानया सम्पादनय् पिदन । थथे ने.सं १०७२ निसं ने.सं १०७६ तक थ्व पत्रिका पिदनाः ताः ई तक दित । लिपा हानं न्हूगु व्यवस्थापक मण्डलया दयेकाः पूर्णकाजी ताम्राकारया सम्पादनय् नेपाल पत्रिका पिकायेगु ज्या जुल ।

'नेपाल' नेपालभाषाय् क्रान्ति पश्चात पिदंगु दक्कसिबें स्यल्लाःगु व साहित्यिक मिखां स्वयेबलय् दकलय् च्वन्हुयाःगु पत्रिका खः । प्यदंया दुने नेपालया नीन्यागू ल्याः पिदन । थुकिं नेपालभाषाया ख्यलय् गबलें हुइ मफइगु पालिस्वाय् त्वःता थकल । 'नेपाल' छगू विशुद्ध साहित्यिक पत्रिका जूगुलिं थुकिया तातुना हे फायांफक्व स्तरीय लेख रचना पिकायेगु खः । थ्व हे उद्देश्य कथं थ्व पत्रिकां फयांफछि न्हापा लेख च्वये धुंकूपिं च्वमितय् तं थाय् बिइगु यात ।

नेपालभाषा परिषदया छगू तातुना स्कूल कलेजयात माःगु नेपालभाषाया पाठ्य सामाग्री ताःलाकेगु नं खः । थ्व हे योजना कथं 'नेपाल' पत्रिकाय् नं आपालं समालोचनात्मक लेखयात थाय् बिल । थुगु पत्रिकाय् समालोचनात्मक लेख च्वयादीपिं च्वमित खः - रत्नध्वज जोशी, माधवलाल कर्माचार्य, चित्तधर हृदय, सिद्धिचरण श्रेष्ठ । थथे प्यदंया दुने नीछपुं मल्याक समालोचनात्मक रचना थ्व पत्रिकाय् पिदन । धर्मोदय पत्रिकाय् पिदंगु समालोचनात्मक लेख स्वयाः शुकी पिदंगु लेख अप्वः स्तरीय गुण विभागीयय् च्वलय् जूगु दु । समालोचनात्मक लेख बाहेक थ्व 'नेपाल' पत्रिकाया मेगु विशेषता खः - प्यदंया दुने ४१६ च्वसु मध्ये १५६ निबन्ध जक पिदन । थथे 'नेपाल' पत्रिकाय् च्वखं च्वयादीपिं खः - भैरवबहादुर, केदारनाथ न्यौपाने, रामहरि जोशी, जनकराज श्रेष्ठ, रत्नध्वज जोशी आदि । अथे हे स्तरीय बाखं नं थ्व पत्रिकाय् आपालं पिदंगु दु । थुकिइ चित्तधर 'हृदय' पूर्ण 'पथिक' पिनिगु बाखं न्ह्यथने बहजु । साहित्यिक रचना बाहेक 'नेपाल' नेपालभाषा सम्बन्धी गतिविधिया समाचार टिप्पणी नं बिइगु, याःगु दु, तर तत्कालीन 'पासा' पत्रिकां थें समसामयिक राजनैतिक घटनाया टिप्पणी धाःसा याःगु मदु ।



आर्थिक अभाव दिइमाः गु 'नेपाल' पत्रिकायात हानं न्हूगु व्यवस्था यानाः पिकायेगु जुसेलि थ्व पत्रिका अप्वः धया थें अनुसन्धानात्मक लेखयात थाय् बियाहल । साहित्य ख्यलय् विशेष योगदान दुपि व्यक्तित्वतयगु नामं विशेषांक पिकायेगु ज्या नं थ्व नेपालं यानाहल । थथे विशेषांक पिदपि व्यक्तित्वत खः - हायन्स जोर्गेनसन, चित्तधर 'हृदय', रत्नध्वज जोशी, मोतिलक्ष्मी, मणिहर्ष ज्योति, ठाकुरलाल मानन्धर आदि ।

५) नेपालभाषा पत्रिका (ने.सं. १०७५-११०३) :- नेपालभाषा पत्रिका नेपालभाषाय् दकले न्हापांगु समाचार प्रधान पत्रिका खः । ने.सं. १०७५ या प्रजातन्त्र लिपा वःगु हिउपालं नेपालभाषाया पत्र-पत्रिकाया प्रकाशनय् नं सकारात्मक प्रभाव लाकल । प्रजातन्त्र न्हयः नेपालभाषां बुद्ध धर्म / बुद्धधर्म व नेपालभाषा (ने.सं. १०४५-१०५०), धर्मदूत (ने.सं. १०६१-१०६८), धर्मोदय (ने.सं. १०६७-१०८०) जक पिदगुली प्रजातन्त्र पश्चात 'थौकन्हे' (ने.सं. १०७१-१०७७) नेपाल (ने.सं. १०७२-१०७६), पासा (ने.सं. १०७३-१०७५), आदि पत्रिका नं पिदने, तर थ्व फुक्क पत्रिकां साहित्यिक व धार्मिक खँयात जक नेपालभाषाया ख्यलय् छयलेगु यात । पासा बाःछिपतिं छुं भचा समाचारयात थाय् बिल, न्हिपौ कथं ने.सं. १०७७ स कृष्णचन्द्र सिंह प्रधानया सम्पादकत्वय् स्वलाति पिदनाः अथें दिनावन । न्हिपौ पिकायेगु अःपुगु ज्या मखु धैगु अनुभव थ्व पत्रिकां याके बिल । नेपालभाषाय् प्रचार तथा राजनैतिक समाचार पत्रिकाया अभाव अथें ल्यना हे च्वन । थथे न्हिपौ पिकायेगु आवश्यकता तत्कालीन नेपालभाषा भाषिपिसं अनुभव यानां नं पिकायेगु आँट याये मफयाच्चंगु स्थितिइ, राणाशासनया जर्जर इलय् नं 'नेपाली विहार' सफू पिकयाः क्रान्तिकारी पलाः छिनादीम्ह भाषानुरागी फत्तेबहादुर सिंहजुं न्हिपौ 'नेपालभाषा पत्रिका' पिकयाः अभ्र मेगु क्रान्तिकारी पलाः छिनादिल । 'नेपालभाषा पत्रिका' प्रकाशन तत्कालीन नेवाःतयगु नितिं छगू गौरव व प्रतिष्ठाया विषय जुयाबिल । नेपालभाषाय् मेमेगु साहित्यिक पत्रिका छगूयां लिउ मेगु पिदं थें 'नेपालभाषा पत्रिका' यां लिउ मेमेगु नं न्हिपौ पिदने मफुगुलिं, नेपालभाषा पत्रिकायात न्हयाथे यानासां म्वाकातयेमाःगु व थकाकां वनेमाःगु आवश्यकता नेवाःतयसं वाःचायेकल ।

छम्ह व्यक्ति विशेष बुखं प्रधान 'न्हिपौ' पिकायेगु धयागु कम आँट व कम परिश्रमया खँ मखु । तर फत्तेबहादुरजुं थ्व ज्यायात न्ह्याकां त्वःतादिल । नीन्हय्दँ तक 'नेपालभाषा पत्रिका'यात प्रकाशनय् हयेगुली सफल जुयादिल । सिरास बाज्या (सिद्धिदास) पाखें मांभाय्यात नं मां भाःपा सेवा यायेगु हःपाः कयादीम्ह फत्तेबहादुरयात नेपालभाषाया न्हिपौ पिकायेगु प्रेरणा धाःसा स्वामि कृष्णानन्द पाखें वःगु खनेदु । नेवाःत धयापिं साम्प्रदायिक, नेवाःभाय् असभ्य खः धकाः वकालत यानाजुपिं तत्कालीन अवसरवादी, संकुचित बिचाःयापिं साहित्यकारत पाखें मर्माहित जूम्ह मातृभाषानुरागी फत्तेबहादुरयात 'यदि छिमि थःगु भाषा थकायेगु इच्छा दःसा व भासं छगू न्हिपौ पिका' (तमोट, ने.सं. ११००

: पृ ४९) धयागु साहित्य स्वामि कृष्णानन्द बिल । थ्व हे साहित्य कथं फत्तेबहादुरजुं छुं संघ संस्था पाखें मखु थः हे याकःचां सां न्हिपौ, पिकायेगु तःधंगु ज्या यानादिल । अले थ्व न्हिपौयां नां नं 'नेपालभाषा पत्रिका' धकाः नेपालभाषायात 'नेवारी' धायेमाः धाडपिं उगु ईया साम्प्रदायिकत नाप प्रतिकार यायेकथं तयादिल । नेपालभाषा पत्रिका पिकायेत दर्ता जूगु पीन्हुति लिपा थः मां देवलानी (ने.सं. १९७७-१०४८) मदुगु तिथिया दिनय् लाकाः फत्तेबहादुर सम्पादक जक मखु प्रकाशक नं थः हे जुयाः ने.सं. १०७५ जंलागा पारु कुन्हु नेपालभाषा पत्रिका पिकयादिल । सम्पादक फत्तेबहादुर खःसां सहसम्पादक रेन स्यस्यः, अनं लिपा सहसम्पादकत हिहिउँ वन । गथे : - दिल्लीबहादुर श्रेष्ठ, माणिकलाल श्रेष्ठ आदि । खयेत ला नेपालभाषा पत्रिका छम्ह व्यक्ति विशेष फत्तेबहादुरया नामं प्रकाशित जूगु खःसां थ्व पत्रिका पिकायेत ७२ म्ह मनूतयसं छुं आर्थिक ग्वहालि याःगु खँ थ्व हे पत्रिकाया दँ ४ : १ स प्रकाशित जूगु दु । थथे नीनिदँ तक थ्व पत्रिका फत्तेबहादुरया नामं प्रकाशित जुइधुंकाः लिपा ने.सं. १०९७, कौला - ५, दँ २३:१३ निसं नेपालभाषा पत्रिका पिकायेगु अभिभारा नेपालभाषा पत्रिका समिति काल । थ्व समितिया दुजःपिं खः - फत्तेबहादुर सिंह, माणिकलाल श्रेष्ठ, पद्मरत्न तुलाधर, दुर्गालाल श्रेष्ठ, विष्णु चित्रकार व भूषणप्रसाद श्रेष्ठ ।

नेपालभाषा पत्रिका छगू समाचार प्रधान न्हिपौ खः, न्हिपौ जूगु नातां राष्ट्रिय, अन्तर्राष्ट्रिय समाचार पितबिइगु थ्व पत्रिकाया मू ज्या खः, अथे खःसां थ्व नेपालभाषायागु जूगुलिं थुकिं नेपालभाषाया भाषिक, साहित्यिक, सांस्कृतिक विषय सम्बन्धी बुखं पिकयाः, लेख रचनात दुध्याकाः नेपालभाषाया साहित्यया संरक्षण सम्बर्द्धनय् नं महत्वपूर्ण तिवः विउगु दु । नेपालभाषाया माध्यमं देश विदेशया बुखं न्हयब्वयाः नेपालभाषायात अप्वः प्रचार जुइके ब्यूगु दु । अप्वःसित थ्व भाय् सयेकेगुली उत्प्रेरित याःगु दु । नेवाः जाति नेपालभाषा सम्बन्धी जः हवलेगुली नं महत्वपूर्ण भूमिका म्हितूगु दु । नेपाली, अंग्रेजी भाषां जक न्हिपौ पिदनाच्चंगुलिइ नेपालभाषा पत्रिकाया प्रकाशनं नेवाःत म्वानाच्चंगुया परिचय जक मखु, नेपाः विविध भाषाभाषीया नं देश खः धयागु खँ नं क्यनाब्यूगु दु । थुकथं नेपालभाषा पत्रिकां नेपालभाषाया पत्रकारीताय् नापं नेपाःया पत्रकारिता ख्यलय् थःगु थाय् कायम यायेफत । आर्थिक संकटया नापं मेमेगु नं आपालं समस्या फयाः नं थ्व पत्रिका नीन्हय्दँ तक पिहां वया हे च्वन लिपा ने.सं. ११०३ स फत्तेबहादुर मदये धुंकाः निला तक पिदनाः थ्व पत्रिका दिनावन ।

६) भनी (१०७८) :- नेपालभाषाया न्हापां न्हापां पिदंगु लय्पौ मध्ये प्यंगूग लय्पौ 'भनी' खः । थ्व पत्रिका न्हापां ल्हातं च्वयाः पिकयाः लिपा थासा आखलं ने.सं. १०७८ स मोहननारायणया सम्पादकत्वय् नेपालभाषा विकास मण्डल थाय्मदु पाखें पिदंगु खः । लिपा थ्व पत्रिकाया सम्पादन यायेगु ज्या भाजु हेमवज्र वज्राचार्य याना दिल । न्हापां न्हापां थ्व 'भनी' पत्रिकायात पितहयेत पत्रिकाया व्यवस्थापन अभ्र वितरणया ज्या तक तीर्थलाल 'नःघःभनी' व चित्तधर 'हृदय'जुं



यानादीगु खः । लिपा भूषणप्रसाद श्रेष्ठ पत्रिकाया सम्पादनया ज्या यानादिसेलि थ्व पत्रिकाय् भचा आपाः लेख च्वन । तर ने.सं १९०५ दँ २७ थ्यं ल्याः २०३ थ्यंकाः थ्व पत्रिका खने मदयावन ।

भी पत्रिकाया पँ नेपालभाषाया मेमेगु पत्रिकाया तुलनाय् भचा चिकिचापँ, तर अथे खयां नं थ्वया स्तरीयता म्हो धाये मज्यु । नेपालभाषा, साहित्य, संस्कृतिया विकास तातुनाः पिदंगु थ्व 'भी' लयपति नं नेपालभाषा साहित्यया विधागत विकासया नापं भाषिक सांस्कृतिक ख्यलय् जागरण हयेगुलिइ नं महत्वपूर्ण भूमिका म्हितूगु दु । कृष्णचन्द्रसिंह प्रधान, रत्नध्वज जोशी, कमलप्रकाश मल्ल, जनकलाल वैद्य, माधवलाल कर्माचार्य थेज्याःपिं समालोचकतयगु लेख थुकी पिदंगु दुसा चित्तधर 'हृदय' 'तीर्थलाल नःघःभनी' राजा शाक्य मथुराकृष्ण सायमिपनिगु बाखं नं भी पत्रिकायात रोचक व आकर्षक जुइका बिउगु दु । भी पत्रिकां नेपालभाषाया आधुनिक च्वमितयगु रचना जक मखु, प्राचीन साहित्ययात नं ब्वयेगु याःगु दु । थ्व हे भवलय् मल्लकालया म्ये, बाखं नं थ्व पत्रिकां इलय् ब्वलय् न्ह्यब्वःगु दु । भी पत्रिकाय् पिदंगु सम्पादकीयं नं समाजय् भाषिक सजगता नापं अनुराग ब्वलंकेगुलिइ नं गाकं तिबः ब्यूगु दु । इलय् ब्वलय् भी पत्रिका विशेषांक नं पिकायेगु याःगु दु, थथे पिकाःगु विशेषांक मध्ये मिसा विशेषांक उल्लेख याये वहःजू ।

७) सितु (ने.सं १०८४) :- च्वसापासाया पत्रपत्रिका पिकायेगु आज्जु कथं पिदंगु निगूगु 'पौ' 'सितु' निलापौ खः । सितु छगू विशुद्ध साहित्यिक पत्रिका खः । थ्व पत्रिका दकलय् न्हापां च्वसापासाया मू संस्थापक भाजु प्रेमबहादुर कसाःया सम्पादकत्वय् ने.सं १०८४ स पिदंगु खः । लिपा व्यवस्थापक सम्पादक कथं भूषणप्रसाद श्रेष्ठजु व वयां लिपा पूर्णबहादुर वैद्यजु थुकिइ ज्या यानादिल । आर्थिक समस्याया कारणं सितुया प्रकाशनय् नियमितता बिइमफुगुलिं थुकिया व्यवस्थापकतयसं थ्व पत्रिकाया संरक्षक सहसंरक्षकत दयेकाः छगू स्थायी कोषया व्यवस्था यायेगु योजना दयेकूगु खः, तर थ्व ज्या पूर्वके मफुनि । थीथी कारणं थौं थ्व पत्रिका दिनाच्वंगु दु ।

ने.सं १०८४ निसं पिदंगु सितु पत्रिका ने.सं. १९९० या दुने अर्थात २६ दँया दुने ७७ गू अंक पिदन गुकी न्यागू अंक विशेषांक कथं पिदंगु दु - 'धर्मआदित्य धर्माचार्य स्मृति' विशेषांक (ने.सं १०८५), लेनिन सछिदँ बुदिं विशेषांक (ने.सं १०९०), बाखं विशेषांक (ने.सं १०९०), नाटक विशेषांक, अनुवाद विशेषांक (ने.सं १०९२) । नेपालभाषा भाषिक, साहित्यिक, सांस्कृतिक विकासया तातुनाः पिदंगु थ्व पत्रिकां छखे प्राचीन साहित्य वाङ्मययात म्हसीके बिइगु याःगु दुसा मेखेर न्हपिं पुलापिं फुक्कं च्वमितयगु च्वसुयात पत्रिकाय् थाय् बियाः नेपालभाषाया साहित्य धुकू जायेकेत तिबः ब्यूगु दु । थुकिं यानाः नेपालभाषाय् आपालं न्हून्हुपिं च्वमित खने दयावल । जगादिश चित्रकार, इन्द्र माली, आदि 'सितु' पत्रिकां परिचित याकूपिं समालोचकत खःसा हरिशंकर रञ्जितकार, राजा

शाक्य, भूषणप्रसाद श्रेष्ठ, मोतिलक्ष्मी शाक्य, दुर्लभलाल सिंहपिं सितु पत्रिकां म्हसीकूपिं बाखं च्वमित खः । अथे हे नेपालभाषाया काव्यय् न्हूगु हयूपाः हःपिं पूर्णबहादुर वैद्य, आनन्द जोशी, आदि आधुनिक कविपिं न्हापां पिब्वयेगु ज्या नं थ्व हे सितु पत्रिकां यात गुगु चित्तधरया पालय् नेपाल पत्रिकां याये मफुगु खः । अथे हे प्राचीन साहित्य तथा वाङ्मय नाप परिचित याकेगु भवलय् थीथी प्राचीन कवि कवयित्रीपिं -सिद्धिनरसिंह मल्ल, जयप्रकाश मल्ल, कुमुदिनी देवी, अभयानन्द आदि पिनिगु ६५ पुं मल्याक पुलांगु म्ये थ्व पत्रिकां पितहःगु दु सा, २२ पुं मल्याक पुलांवाखं, न्यँकँवाखं पिब्वःगु दु । प्राचीन दानपत्र, क्रयपत्र आदियात नं अभिलेख न्ह्यब्वयेगु भवलय् पत्रिकाय् ब्वयेगु याःगु दु । थथे सितु पत्रिकाय् प्राचीन साहित्य वाङ्मय पिब्वयेगु ज्या विशेष यानाः प्रेमबहादुर कसाः, छत्रबहादुर कायष्ठ, कमलप्रकाश मल्ल, जनकलाल वैद्य आदिपिंसं यानादीगु खः ।

सितु पत्रिकां साहित्यिक रचना जक मखु, भाषाशास्त्र सम्बन्धी रचना नं पिकयाः नेपालभाषाया भाषिक स्वरूप, स्थिति ब्वयेगु याःगु दु । नापं थ्वयात स्तरीयता बिइगु निंति नं पत्रिका मार्फत सहलह ब्याकेगु ज्या नं जूगु दु । थुकथं नेपालभाषा व थ्वया साहित्यया विकासय् सितु पत्रिकां महत्वपूर्ण योगदान बिउगु दु ।

च्वय् उल्लेख जूगु पत्रपत्रिका बाहेक थौं नेपालभाषाय् थ्वया भाषा, साहित्य, संस्कृतिया प्रचार प्रसार यायेगु तातुनाः आपालं न्हिपौ, वाःपौ लयूपौ, ऋतुपौ, दँपौ, हवाइपौ आदि पिदनाच्वंगु दु, थुपिं बाहेक थौकन्हय् थीथी जिल्ला तथा क्याम्पस आदि पाखें नं थःपिनिगु परिचय कथं पत्रपत्रिका पिकायेगु याना वयाच्वंगु दु ।



आदिपि नं थुक्रिया सदस्य जुयाः च्वयेगु, च्वकेगुली सक्रिय रुप ग्वाहालि यानादिल ।

२००७ सालयु क्रान्ति लिपा, निर्वासित जुयाचवनादीपि च्वसापासाया संस्थापकपि नं नेपाः दुहां बल, अले नेपालभाषाया प्रचार प्रसारया ज्यायु तिब्रता बल । थःगु आजु कथं ज्या यायां थ्व संस्था न्ह्यज्यात । च्वसापासां आ तकया दुने याःगु ज्याखं थथे खः -

## संस्थागत विकासया न्हापां न्हापांगु पलाः

२००७ सालयागु जनक्रान्ति राणातयुग १०४ दँ तकयागु स्वेच्छाचारी हुकुमी शासनया अन्त यानाः नेपालयु प्रजातन्त्र नीस्वन । प्रजातन्त्रया स्थापना राजनैतिक ख्यलयु जक मखु, देया साहित्यिक ख्यलयु नं हिउपाः हल । धार्मिक, सांस्कृतिक ज्याखंयात न्ह्यावले मंकाः रुपं न्ह्याकिइपि नेपालभाषा भाषितयसं भाषिक जागरण तथा साहित्यिक उत्थानया निती नं संस्थागत लँपु हे ज्वन । थ्व हे कथं भाषा साहित्य व सांस्कृतिक उत्थानया निती नेपालभाषाया प्रारम्भिक संस्थात - (१) प्रेमबहादुर कसाःया मू संस्थापकत्वयु स्थापना जूगु च्वसापासा (२) चित्तधर 'हृदय'या मू संस्थापकत्वयु स्थापना जूगु नेपालभाषा परिषद् न्ह्यथने बहजु ।

### च्वसापासा (ने. सं १०७०)

च्वसापासा ने.सं १०७० स स्वांयाः पुन्हिकुन्हु कलकत्तायु स्थापना जूगु छगू साहित्यिक संस्था खः । थुगु इलयु धर्मोदय पत्रिका साहित्यिक पत्रिकाया रुपयु पिदना च्वंगु दु सां थ्वया घोषित उद्देश्य बुद्ध धर्मया प्रचार प्रसार यायेगु खः । उकिं नेपालभाषाया प्रचार प्रसारया नापं थ्वया रचनात्मक व सृजनात्मक साहित्यिक गतिविधि अभू अप्वः न्ह्यज्याकेत कलकत्तायु निर्वासित जुया च्वनादीम प्रेमबहादुर कसाः व मदनलोचन सिंह जानाः च्वसापासाया स्थापना यानादिल । थःगु देय्या शक्ति सम्पन्न, उत्साही व लगनशील ल्यायुमहतयुग पाखें सृजनात्मक एवं रचनात्मक ज्या न्ह्याकाः नेपालभाषा व थ्वया साहित्ययात याकनं उन्नत याकेविइगु उद्देश्य थ्व संस्थाया स्थापना जूगु खः । थ्व संस्थाया वास्तविक तातुना ला नेपालभाषाया लेखकपिनिगु छगू संघ दयेकेगु खः । नेपालभाषाया सफू पिकायेगु नापं थ्व भासं च्वयेगु ब्वनेगु संस्कार दयेकेगुयात हे थ्व संस्था थःगु न्हापांगु आजु कथं ब्वल । थथे कलकत्ता पासापित थःपिनिगु संस्थाया उद्देश्य न्ह्यब्वया पौ च्वयाः च्वसापासायात अप्वः संगठित यायेगु निती प्रचार प्रसार यात । भारतयु ब्वनाच्वपि तत्कालीन नेपाली विद्यार्थीत, ल्हासा कोथी वनेत कलकत्ता जुयाः वनीपि ल्हासा नेवाःतयसं च्वसापासायात ग्वाहालि यायेगु बचं बिल । स्वयम्भूलाल श्रेष्ठ, सत्यमोहन जोशी, धूस्वां सायमि, आशाराम शाक्य

नेपालभाषा साहित्यया इतिहास/१२९

**सफू प्रकाशन :-** च्वसापासां थःगु उद्देश्य कथं नेपालभाषा साहित्ययु अभाव जुयाच्वंगु थीथी सृजनात्मक, रचनात्मक कृतियात प्रकाशनयु हयेगु ज्या यात । थथे च्वसापासां प्रकाशन याःगु छुं छुं सफू खः - समालोचनाया सिद्धान्त, सिद्धिदास छगू विवेचना, मिसा, अम्बपाली, रत्नेश्वरया प्रादुर्भाव, न्हूपुख, बाखं म्ये, ती बाखंपुचः, आदि आदि । च्वसापासाया हे सक्रियतायु थौं जापानया टोयोटा फाउण्डेसनया ग्वाहालि पुलां पुलांगु सफूया संरक्षणया नापं पुलांगु भाषाया कोश दयेकेगु ज्या नं यानाच्वंगु दु । नापं थौं राष्ट्रिय अन्तर्राष्ट्रिय जगतयु तकं चर्चित जुजुं वनाच्वंगु 'आशा सफूकुथि' नांगु सफूकुथिया स्थापना, संचालन यायेगु ज्यायु नं च्वसापासां सक्रिय भूमिका म्हितगु दु ।

**पत्रिका प्रकाशन :-** पत्रपत्रिका मध्ये वाःपौ, लय्पौ गुगु प्रकाशन यायेफत व पिकायेगु ग्वसाः कथं ने.सं १०७३ 'स' 'पासा' वाःपौ च्वसापासां पिकाल । ने.सं. १०७७ स कृष्णचन्द्रसिंह प्रधानया सम्पादकत्वयु स्वला तक न्हिपौया रुपयु नं थ्व पत्रिका पिदन । थ्व पत्रिकां साहित्यिक लेख रचना बाहेक समसामयिक राजनैतिक गतिविधिया बुखं नापं टीका टिप्पणी नं यायेगु यात । 'पासां' समसामयिक घटनायात कयाः टिका टिप्पणी यायेगुया नापं तत्कालीन च्वमितयुग बाखं, निबन्ध, चिनाखं, भाषा, संस्कृति, विज्ञान आदि सम्बन्धी लेख रचना नं पिब्वयाः नेपालभाषायात न्ह्यज्यायेगुलिइ तिवः बिल । तर पासा पत्रिका ताः ई तक पिदने मफुत । थ्वया पलेसा लिपा 'सितु' निला पौ ने.सं १०८४ निसं पिदन । सितु पत्रिका नं ५४ अंक तक पिदनाः दिनावन । थुक्रियात हानं पुर्नव्यवस्था यानाः पिकायेगु कुतः जूसां बालाक पिकाये फुगु मदिनि ।

**ऐतिहासिक साहित्यिक सम्मेलन न्यायेकूगु :-** ने.सं १०७३ स च्वसापासाया तत्वावधानयु हनुमान ध्वाखायु स्वन्हु यंकं नेपालभाषाया छगू ऐतिहासिक साहित्य सम्मेलन जुल । थ्व सम्मेलनं नेपालभाषाया चकंगु भविष्ययात ब्वयाबिल, अले नेपालभाषा छगू सम्पन्न भाषा खः धयागु खँ उगु ईया मेमेपि बुद्धजीवितयुत नं थुइकेबिल । नेपालभाषायु विधागत दृष्टि अभाव जुयाच्वंगु उपन्यास (मिसा) व नाटक (अम्बपाली) यात नं सम्मेलनयु सिरपाः बिल ।

नेपालभाषायात प्रचार प्रसारया ज्यायु छ्यलेगु कुतः-वि.सं २००७ सालयु रेडियो नेपालया स्थापना जुसेलि नेपालभाषां नं समाचार बिइगु ज्या जुल । थथे

नेपालभाषा साहित्यया इतिहास/१३०



रेडियो नेपाल नेपालभाषा समाचार प्रसारण याकेगुलिइ च्वसापासाया नं तःधंगु ल्हाः दु । अथे हे थःगु संस्कृति रेडियो मार्फत प्रसार यायेगु भवलय मेमेगु भाषा नापं नेपालभाषायात नं 'जीवन दबू' कार्यक्रमय ने.सं. १०८० स दुथ्याकल । तर अफसोचया खं खः, नेपालभाषा रेडियो नेपाल समाचार विडगु वि.सं २०२२ स दिकाविल । 'जीवन दबू' कार्यक्रम नं ने.सं. १०९१ दं लिपा दिकाछवत ।

**शिक्षण संस्थाय नेपालभाषा दुथ्याकेगु कुत :-** एस.एल.सि.या पाठ्यक्रम निसं एम. ए.या पाठ्यक्रमय तक नेपालभाषा विषययात दुथ्याकेगु नितिं तिवः विडगु ज्याय च्वसापासाया योगदान नं म्हो मजू । थज्याःगु हे प्रयास कथं वि.सं. २०११ साल निसं नेपालभाषा विषय कयाः एस.एल.सि. जाँच विडदत सा, २०१८ साल निसं महाविद्यालय, २०३९ साल निसं विश्वविद्यालय नेपालभाषा विषययात दुथ्याकल । फलस्वरूप च्वसापासां थम्हं पठनपाठनया नितिं फक्क पाठ्यसफू नं पिकयाहल । अथे हे नेपालभाषाया अप्ठः अध्ययन अनुसन्धान यायेगु उद्देश्यं जापानया टोयोटा फाउण्डेशन पाखें प्रोजेक्ट कायेगुली नं च्वसापासां सक्रिय भूमिका म्हितूगु दु । थ्व प्रोजेक्ट कथं (१) नेपालभाषाया पुलांगु, न्हूगु शब्दकोश दयेकेगु, (२) नेपालभाषाया सफू मेमेगु भाषाय अनुवाद यायेगु व मेमेगु भाषाया सफू नेपालभाषाय अनुवाद यायेगु (३) पुलांगु सफूया संरक्षण संवर्द्धन यायेगु, अले थुकिया धलःपौ दयेकेगु ज्या जूगु दु ।

**नेपालभाषा सेवा याःपित हंगु :-** नेपालभाषा व थ्वया साहित्य उत्थानया नितिं विशेष योगदान व्यूषित कदर, सम्मान याये कथं च्वसापासां विभिन्न उपाधि नं थीथी अवसरय दछ्याःगु दु । गथे -

चित्तधर 'हृदय' - साहित्य शिरोमणि

प्रेमबहादुर - भाषानिभाः

स्वयम्भू लाल - भाषाजवाः

रमापति राज शर्मा - भाषाजवाः

सिद्धिचरण - कविरत्न

धर्मआदित्य धर्माचार्य - भाषाजवाः

धूस्वां साय्मि - साहित्य सुता

रत्नध्वज जोशी - भाषाजवाः

धर्मरत्न यमि- कविरत्न

सत्यमोहन जोशी - भाषारत्न आदि ।

**सिद्धिदास बुदि हंगु :-** सिद्धिदासया १०० दं बुदिया लसताय च्वसापासाया तत्वावधानय स्वन्तु ने.सं. १०८७ स नेपालभाषाय दकलय न्हापांगु कार्यगोष्ठी जुल । (१) सिद्धिदासया जीवन दर्शन (२) सिद्धिदासया काव्य प्रवाह (३) सिद्धिदासया नेपालभाषाया काव्य सृजना या धाः विषयस स्वम्ह विद्वानतयसं

कार्यपत्र न्ह्यब्वल । अथे हे थ्व हे बुदिया लसताय सफू प्रदर्शनी, सफू पिकायेगु ज्या नं जुल ।

**व्याकरण गोष्ठी :-** नेपालभाषाया च्वज्याय एकरूपता हयेगु नितिं च्वसापासाया तत्वावधानय लच्छि यंक व्याकरण गोष्ठी जुल । भीगु भाषाय मछिना च्वंगु विषयया अर्थात वाद-विवाद जुयाच्वंगु विषयस विचार विमर्श, कार्यपत्र प्रस्तुत यायेगु ज्या जुल । थन निर्णय जूगु खं भाजु राजा शाक्यया सम्पादकत्वय 'सहलहया सुलचं' (ने.सं. १११०) नामं सफू नं पिदन ।

**श्रेष्ठ सिरपाः प्रदान :-** स्वयम्भूलालजुं स्थापना यानादीगु श्रेष्ठ सिरपाः प्रदान यायेगु अभिभारा नं च्वसापासां हे क्वविल । श्रेष्ठ सिरपाः दकलय न्हापां लःल्हाःगु सफू केदारमान 'व्यथित'या 'छ्वास' काव्य खः । थौं तकया दुने ३२ म्ह च्वमितयत थ्व संस्थां श्रेष्ठ सिरपाः लःल्हाये धुकूगु दु ।

## नेपालभाषा परिषद् (ने.सं १०७१)

ने.सं. १०७० स प्रजातन्त्रया उदय जुसेलि नेपालभाषा साहित्य उत्थानया नितिं संस्थागत धंगं पलाः छिइगु ज्या जुल । थ्व हे कथं साहित्य सेवा खलः (ने.सं १०७०), नेपालभाषा साहित्य मन्दिर (१०७३), नेपालभाषा विकास मण्डल (१०७४), आदि नामं विभिन्न साहित्यिक संस्था स्थापना जुल । थथे स्थापना जूगु संस्था मध्ये दकलय विधिवत रुपं नीस्वंगु न्हापांगु संस्था नेपालभाषा परिषद् खः । न्हापानिसं साहित्य सेवाय सक्रिय जुया च्वनादीपिं चित्तधर 'हृदय', फत्तेबहादुर सिंह, लोकमान सिंह, ठाकुरलाल मानन्धर, प्रेमबहादुर कसाः, सिद्धिचरण, रत्नध्वज जोशी, हृदयचन्द्रसिंहपिं मूदुजः जुयाः ने.सं १०७१ स थ्व संस्थाया स्थापना याःगु खः । थःगु स्थापनाकालय थ्व संस्थां थःगु आजु थुकथं न्ह्यब्वःगु दु :-

(१) नेपाल संस्कृतिया जः थःगु राष्ट्र दुने व पिने पिब्वयेगु

(२) नेपालभाषा साहित्ययात ब्वलकेगु । थुकिया नितिं सफू पत्रिका पिकायेगु ।

थज्याःगु विशुद्ध भाषा साहित्य उत्थानया आजु तातुनाः स्थापना जूगु थ्व नेपालभाषा परिषद् थौतकया दुने नेपालभाषा साहित्यया विकासया नितिं आपालं महत्वपूर्ण ज्या याःगु दु ।

**शिक्षण संस्थाय नेपालभाषायात मान्यता बिडकेगु कुत :-** नेपालभाषा परिषदया प्रयासं लोकमानसिंह शिक्षा सहसचिव जुया च्वनादीबलय ने.सं १०७५ सालय एस.एल.सि.या पाठ्यक्रमय नेपालभाषायात नं दुथ्याकेगु जुल । खयेत ला

नेपालभाषा साहित्यया इतिहास/१३२



पठन पाठनय नेपालभाषायात दुध्याकेगु ग्वसाः धर्मआदित्य धर्माचार्य हे ग्वये धुकूगु खः तर थये खयां न नेपाल अधिराज्यय नेपालभाषायात एस.एल.सि.या पाठ्यक्रमय दुध्याके विङगु ज्या थ्व हे संस्थाया कुतः पाखे जुल । नेपालभाषा परिषदं वीरगंजया नेपाल राष्ट्रिय विद्यापिठय नेपालभाषा दुध्याकेत पाठ्यक्रम दयेकेगु नापं परीक्षा कायेगु अभिभारा न थम्हं हे क्वविल । थौं महाविद्यालय जक मखु विश्वविद्यालय अझ विद्यावारिधी तकं नेपालभाषा दुध्याकेगु ज्याय "नेपालभाषा परिषदं" थम्हं फुगु कुतः याःगु दु ।

**सफू प्रकाशन :-** विद्यालयय, महाविद्यालय, अझ विश्वविद्यालय नेपालभाषा दुध्याकेगु क्रमय, थुक्रियात माःगु पाठ्य समग्री ताःलाकेगु ज्या न नेपालभाषा परिषदं थम्हं हे क्वविल । थ्व हे भवलय नेपालभाषा परिषदं गद्य पुचः, पद्य पुचः, बाखं पुचः, न्हू बाखं पुचः, भीगु साहित्य, नेपालभाषाया जातः, आदि सफू अनेक आर्थिक समस्याया बाबजूद न पिकया तुं यंकल । थ्व संस्था मेमेगु भाय्या बांवालाःगु महत्वपूर्ण छुं सफू नेपालभाषाय भाय् हिङके विलसा, नेपालभाषाया बांवालाःगु छुं सफू नेपाली, हिन्दी, अंग्रेजी आदि भाषां भाय् हिङके वियाः थःगु भाषा साहित्ययात न्यंकभनं थ्यंकेगु न कुतः यात । तिर्थराजया 'आखे' नेपालभाषाय अनुवाद जूगु सफू मध्ये छगू लुमके बहगु सफू खःसा नेपालभाषाया नःलि कविता संग्रहयात अंग्रेजीइ अनुवाद न यानाः 'Poems of Today' नाम पिकासेलि नेपालभाषाया अंग्रेजी भाषाय अनुवाद जूगु न्हापांगु कविता सफू थ्व हे जुल । थौं तकया दुने थ्व संस्था ७८ सफू पिकयाः नेपालभाषाया साहित्य सम्बन्धी दकले अप्वः सफू पिकाःगु संस्था जूगु दु । थ्व संस्था पिकाःगु चित्तधर स्मृति ग्रन्थ ने.सं. (१९०४) यात साभा पुस्तक प्रदर्शनीं उगु दया नेपालया दकलय बांलाःगु सफू धकाः 'रजत पत्र' तकं प्रदान याःगु दु ।

**पत्रिकाया प्रकाशन :-** नेपालभाषाया वाङ्मय, साहित्य, संस्कृति उत्थान यायेगु ज्याय नेपालभाषा परिषदया तसकं मूवंगु ज्या पत्रिकाया प्रकाशन न खः । थ्व परिषद पाखे ने.सं १०७२ स नेपाल नांगु ऋतुपौ पिहां वल । नेपालभाषाया ख्वाःपाः, नेपाल संस्कृतिया जः धकाः पौया बबलय च्वयातइगु थ्व 'नेपाल' पत्रिका तत्कालीन धर्मोदय पत्रिका स्वयां न अप्वः परिस्कृत व स्तरीय जू । विशेष प्रौढ लेखकतय् थाय् बियातइगु थ्व पत्रिकां नेपालभाषाया निबन्ध व समालोचना विधा बलकेत महत्वपूर्ण योगदान बिउगु दु । 'नेपाल' पत्रिका ने.सं १०७६ स पिकायेगु बन्द जूसां हानं थ्व पत्रिका पिकायेगु ज्या थौं कन्हे जूगु दु । थये पत्रिका पिकाइबलय ईव्यः कथं साहित्यिक व्यक्तित्वपनिगु न विशेषांक पिकायेगु थें ज्याःगु महत्वपूर्ण ज्या न परिषदं याःगु दु ।

**सिरपाः प्रदान :-** सफू पत्रपत्रिकाया प्रकाशन बाहेक थ्व संस्था भाषा साहित्य संस्कृति ख्यलय महत्वपूर्ण योगदान बिउपिं व्यक्ति, संघ वा संस्थायात

नेपालभाषा परिषदया संस्थापक दुजः स्व. चित्तधरया नाम चित्तधर सिरपा : (ने.सं. १९०९) अथे हे निबन्ध क्षेत्रय विशेष योगदान बिउम्हेसित स्व. ठाकुरलाल मानन्धरया नाम ठाकुरलाल सिरपा (ने.सं. १९०९) न दय् छकः लःल्हायेगु याःगु दु । अथे हे मोतिलक्ष्मीया नाम संस्थापना जूगु निदय् छकः मिसा चर्मपित प्रदान याइगु मोतिलक्ष्मी सिरपाः - ने.सं. १९१९) न थ्व हे संस्था प्रदान यायेगु अभिभारा क्वबूगु दु ।

थुकथं 'चवसापासा' व 'नेपालभाषा परिषद' नेपालभाषाया भाषा साहित्य संस्कृति उत्थानया उदेश्य संस्थापना जूगु नेपालभाषाया न्हापांगु संगठनात्मक प्रयास जक मजुसे थौतक न निरन्तरता बिया वयाच्वंगु संगठन न खः । थ्वया लिपा नेवाःतय्सं थः दुनेया भाषा साहित्य तथा जातीय अनुरागयात व्वयाः धमाधम मेमेगु संस्था न चायेकाः संगठित पलाः न्ह्याकाहल । थौं नेवाःतय् दथुइ भाषा, जातीय अधिकारया निती सः थ्वयेकीगु फुकक खलःया मंकाः प्रतिनिधित्व जुइगु 'नेपालभाषा मंकाः खलः' (ने.सं. १०९९), नेवाः साहित्य, संस्कृति व भाषा जातीय सम्बन्धय प्राज्ञिक स्तरया ज्या न्ह्याकीगु 'नेपालभाषा एकेदमि' (ने.सं. १९९२), अले नेवाःतय्गु राष्ट्रिय स्तरया संगठन 'नेवाः देय् दब' तकया संगठन संस्थापना जुइ धुकूगु दु । अझ नेपालभाषा साहित्यया उत्थानया उदेश्य विशेष हे जक तातुनाः न थीथी संस्था व प्रकाशनया संस्थापना जूगु दु । थज्याःगु थीथी संगठन विशेष रुपं स्वनिगलय केन्द्रित जूसां पूर्वाञ्चल, पश्चिमाञ्चलय न विस्तार जुइधुकूगु दु । तर थये खलः पुचः आपालं दुसां थौं तसकं हे म्हो जक संस्था सक्रिय जुइ फयाच्वंगु दु । सरकारी स्तरं जुयाच्वंगु पक्षपात, अले भीगु जाती व भाषाया स्यनावंगु स्थिति मर्माहित जूपिं नेवाःतय्सं छगू जोशय वयाः थज्याःगु खलः पुचः स्वनेगु याइ, तर लिपा जोश तनेवं अथे हे लुकुविना वनिइगु स्थिति नेपालभाषाया संगठनया इतिहासय छुं न्हूगु मखु । थुकथं थौं नेपालभाषाय आपालं संगठन दयां न सक्रिय रुपं भाषा साहित्यया उत्थानय संलग्न जूगु खलः पुचः तसकं म्हो, अले सक्रिय निगू प्यंगू खलः न विशेष रुपं प्राज्ञिक ज्याय हे जक तक्थनाच्वंगु खनेदु । उकिं थौं नेपालभाषाय न्हूगु खलः पुचः स्वनेगु स्वयां न दुगु संगठनयात निं सक्रिय व सशक्त यानायके माःगु दु ।



## नेपालभाषाया सिरपाः

नेपालभाषाया आधुनिक साहित्यया निर्माणय् थुकिया विविध सिरपाःया नं महत्वपूर्ण भूमिका दु । नेपालभाषाय् **धर्मोदय सिरपाः** (ने.सं. १०६८)या स्थापनां निसैं सिरपाःया परम्परा शुरु जूगु खयाः नं प्रोत्साहनया रूपय् ग्वाहालिया रूपय् लेखक वा संस्थायात आर्थिक ग्वाहालि यायेगु ज्या न्हापा नं छक्कः बक्कः जूगु खँ न्यने ब्वने दु । पुनर्जागरणकालय् कवि सिद्धिदासया काव्य प्रतिभां प्रभावित जुयाः सिद्धिरत्न कसाःजु सिद्धिदासया **सज्जन हृदयाभरण** सफूयात रु ५/- ग्वाहालि याःगु खँ न्यने दुसा ने.सं १०७० स च्वसापासायात पासा पत्रिका पिकायेत **स्वयम्भूलाल श्रेष्ठ** रु ५०००/- आर्थिक ग्वाहालि बिउगु खँ ब्वने दु । तर थथे खयाः नं च्वमितय्त इमिगु रचना वा सफूया प्रशंसा वा प्रोत्साहन कथं संस्थागत रुपं सिरपाः बिउगु ज्या **धर्मोदय** पत्रिकाया प्रकाशनं निसैं जुल, अले सिरपाःया परम्पराय् निरन्तरता, विविधिता बिउगु ज्या **‘श्रेष्ठ सिरपाः’**(१०७३)या स्थापना निसैं जुल । थौं नेपालभाषा व थ्वया साहित्य संस्कृति संवर्द्धनया नितिं नीस्वनातःगु छुं छुं सिरपाः थथे दु -

**धर्मोदय सिरपा** (ने.सं १०६८) : धर्मोदय सिरपाः नेपालभाषा साहित्यया इतिहासय् दकलय् न्हापांगु सिरपाः खः । **धर्मोदय सभां** नीस्वंगु थ्व सिरपाः दँयदसं उगु दँय पिदनीगु सर्वश्रेष्ठ सफूयात व धर्मोदय लयपतिइ दच्छिया दुने पिदंगु च्वसुयात छसिकथं १००/- तका व २५/- तका बिउगु खः । तर थ्व सिरपाः निर्दं तक जक न्हायेफेत । अनलि थ्व सिरपाः दिनावन ।

**श्रेष्ठ सिरपा** (ने.सं १०७३) : श्रेष्ठ सिरपाः निजी स्तरं नीस्वंगु नेपालभाषाया जक मखु नेपाःया हे दकलय् न्हापांगु व छगू तःजिगु सिरपाः खः । थ्व सिरपाःया संस्थापक **स्वयम्भूलाल श्रेष्ठ** खः । धर्मोदय लयपतिइ पिदंगु रत्नध्वज जोशीया च्वसु **‘भाषाया सिनाज्या’**पाखें थ्व सिरपाः स्वनेगु प्रेरणा कयाः स्वयम्भूलाल श्रेष्ठजुं ने.सं. १०७२ थिलाथ्व २ स थःगु नीनिर्दं बुन्हि कुन्हु दां पयानाः ने.सं १०७३ निसैं हे लःल्हायेगु व्यवस्था याःगु खः । स्वसः दांयागु थ्व

नेपालभाषा साहित्यया इतिहास/१३५

सिरपाः दकलय् न्हापांगु उगु दँया सर्वश्रेष्ठ सफू कथं **‘छ्वास’** काव्ययात ल्ययाः केदारमान **‘व्यथित’**यात लःल्हाःगु खः । ऐतिहासिक महत्व दुगु थ्व सिरपाः आः तक स्वीम्ह कृतिकारया स्वीप्यंगु कृतियात बीधुकूगु दु ।

न्हून्हुपिं च्वमितय्त हःपाः बिउगु व न्हून्हुगु सफू पिथनाः नेपालभाषा साहित्य धुकू जायेकेगु पवित्र उद्देश्यं स्थापना जूगु थ्व सिरपाः शुरुइ दां स्वसः जूसां लिपा वनाः स्वदः तक ध्यगु दु । ने.सं १०७८ निसैं दाताया इच्छाकथं च्वसापासा अन्तर्गत न्ह्याना वयाच्वंगु थ्व सिरपाः नियमित रुपं संचालन यायेत ने.सं. १०७८ स हे श्रेष्ठ सिरपाः नियमावली दयेकाः नियमावली कथं थीथी विधाय् पालपाः यानाः श्रेष्ठ सिरपाः लःल्हाना वयाच्वंगु खः । थौं तकया दुने काव्य विधाय् च्यागू, बाखें विधाय् न्यागू, उपन्यास खुगू, स्वंगू प्याखें, प्यंगू निबन्ध, स्वंगू प्रबन्ध व न्यागू अनुवाद सफूयात थ्व श्रेष्ठ सिरपाः लःल्हाये धुकूगु दु । थ्व सिरपालं नेपालभाषाया च्वमितय्त जक प्रोत्साहित व कदर याःगु मजुसे विधागत विकासया नितिं नं तिबः बिउगु दु । थथे श्रेष्ठ सिरपालं बिउगु योगदानयात मनन यानाः वयां लिपा थीथी व्यक्तिगत तथा संस्थागत रुपं नेपालभाषा व थ्वया साहित्य संस्कृति उत्थानया नितिं मेमेगु नं आपालं सिरपाः नीस्वनेगु यानाहल । थुकथं थ्व सिरपाःया रकम थौं मेमेगु सिरपाःया तुलनाय् म्हो जूसां थ्व सिरपालं मेमेगु सिरपाः स्वनेत हःपाः बिउगु दु । नेपालभाषाया दकले न्हापांगु तःजिगु सिरपाः जूगुलिं थ्व सिरपाःया थःगु हे प्रतिष्ठा दु, ऐतिहासिकता दु ।

**भीी प्रधान सिरपा** (ने.सं १०९७) : **‘भीी’** लयपतिइ दच्छिया दुने पिदंगु च्वसु मध्ये उत्कृष्ट च्वसुयात लःल्हाइगु कथं नीस्वंगु **‘भीी प्रधान’** सिरपाःया संस्थापक मयजु **मन्दिरा प्रधान** खः ।

**साहित्य सिरपाः** (ने.सं. १०९७) : **छत्रबहादुर कायस्थ** स्थापना यानादीगु ५००/- दांया थ्व सिरपाः दँय छगू विधाय् उत्कृष्ट सफूयात बिउगु खः ।

**लाकौल सिरपाः** (ने.सं ११०२) : **बैकुण्ठप्रसाद लाकौल**जुं नीस्वनादीगु २०,०००/- तकाया थ्व सिरपाः निर्दँय छक्कः नेपालभाषा व थ्वया साहित्यया ख्यलय् न्ह्यथनेबहगु ज्या याःम्ह व्यक्ति बा संस्थायात बिउगु खः ।

**चिनिमाया सिरपाः** (ने.सं. ११०५) : **भाजु केशवकुमार शाक्य**जुं नीस्वनादीगु १०००/- तकाया थ्व सिरपाः **‘राजमति’** वाःपतिइ दच्छिया दुने पिदंगु च्वसु मध्ये उत्कृष्ट च्वसुयात लःल्हाइगु खः ।

**करुणाकर सिरपाः** (ने.सं. ११०७) : थ्व सिरपाःया संस्थापक **करुणाकर वैद्य** खः । लोक साहित्य संरक्षण यायेगु ज्याय् तिबः बिइपित बिउगु थ्व सिरपाःया न्हापाया रकम १०००/- तका खः । तर करुणाकर वैद्यजुया कायभाजुपिसं मेगु नं

नेपालभाषा साहित्यया इतिहास/१३६



दा तना: थौ कन्हे थ्व सिरपा:या रकम २००००/- तका थ्यंकूगु दु । थौकन्ह्य थ्व सिरपा: निर्दय छक्व: बिङ्गु जूगु दु ।

**मूर्तिमान सिरपा:** (ने.सं. ११०८) : मूर्तिमान सिरपा: लोक साहित्य परिषद् पाखें संचालन जुइगु सिरपा: ख: । निर्दय छक्व: बिङ्गु ५०,०००/- दांया थ्व सिरपा:या संस्थापक भाजु रत्नमान व वय्क:या छें:पिं ख: ।

**हेमराज ह:पा: सिरपा:** (ने.सं. ११११): नेपालभाषा, साहित्य, संस्कृतिया ख्यलय न्ह्यथनेबहगु योगदान ब्यूम्ह व्यक्ति/ संस्थायात बिङ्गु थ्व सिरपा:या दाता लिपि तथा संस्कृतिविद् हेमराज शाक्य ख:सा थ्व सिरपा:या रकम २५,०००/- तका ख: ।

**गोविन्द सिरपा:** (ने.सं. १११५) : मदुम्ह गोविन्दमान प्रधानया नामय् स्थापना जूगु थ्व गोविन्द सिरपा:या संस्थापक भाजु ईश्वरमान प्रधान ख:सा थ्व सिरपा:या रकम ५०,०००/- तका ख: । भाषा, साहित्य, संस्कृति ख्यलय न्ह्यथनेबहगु ज्या या:म्ह व्यक्ति वा संस्थायात बिङ्गु थ्व सिरपा: निर्दय छक्व: ल:ल्हायेगु कथं लोक साहित्य परिषद् पाखें संचालन जुइगु ख: ।

**गौरी-अनन्त सिरपा:** (ने.सं. १११६) :- च्वमितय्गु नेपालभाषाया शोधपूर्ण कृति पिथना बिया: च्वमियातं तुं उगु सफू सिरपा: स्वरूप प्रदान याइगु थ्व सिरपा:या संस्थापक भाजु विष्णुप्रसाद श्रेष्ठ ख: ।

**विश्वभूमि धूस्वां सिरपा:** व मानकाजी मंका: सिरपा: नांजा:म्ह उपन्यासकार धूस्वां साय्मिजुं त:गू हे सिरपा: नीस्वनादीगु दु । उकी मध्ये नेपालभाषा साहित्ययात च्वन्हाकेगु ल्याखं धूस्वांजुं 'विश्वभूमि धूस्वां सिरपा: व नेपालभाषाया कार्यकर्तातय्त ह:पा: बिङ्गु ल्याखं 'मानकाजी मंका: सिरपा: नामं निगू सिरपा: नीस्वनादीगु दु ।

क) **विश्वभूमि धूस्वां सिरपा:** (ने.सं. १११४) - थ्व विश्वभूमि न्हिपतिइ दच्छियाकं पिहांव:गु च्वसुया उत्कृष्ट च्वमियात बिङ्गु सिरपा: ख: । थ्व सिरपा:या रकम ५०००/- ख: ।

ख) **मानकाजी मंका: सिरपा:** (ने.सं. १११४) - नेपालभाषाया कार्यकर्तातय्त बिङ्गु थ्व सिरपा:या रकम २५,०००/- तका ख: ।

**चित्तधर सिरपा:** (ने.सं. ११०९) : भाषा, साहित्य, कला संरक्षण यायेगु ज्याय् थ:त पानाच्वंमि मध्ये छम्हेसित ल्याया: दय्दस बिङ्गु थ्व सिरपा:या रकम

१५,०००/- तका ख: । थुकिया संस्थापक मणिहर्ष ज्योति ख:सा थ्व सिरपा:या संचालक नेपालभाषा परिषद् ख: ।

**ठाकुरलाल सिरपा:** (ने.सं. ११०९) : नेपालभाषा परिषद् संचालन याना वयाच्वंगु ठाकुरलाल सिरपा: नेपालभाषाया निबन्ध विधाय् योगदान बिउम्ह निबन्ध च्वमियात बिङ्गु ख: । थुकिया संस्थापक भाजु गिरिधरलाल मानन्धर ख: ।

**न्हूगु विश्वभूमि सिरपा:** थ्व न्हूगु विश्वभूमि न्हिपतिइ दच्छिया दुने पिदंगु रचना मध्ये बांला:गु रचनायात बिङ्गु सिरपा: ख: ।

**चिनिमाया सिरपा:** (ने.सं. ११०५) : थ्व सिरपा:या संस्थापक केशवकुमार शाक्य ख: । राजमती वापौस दच्छिया दुने पिदंगु दकल्य उत्कृष्टगु च्वसुयात बीगु १,०००/- दांया नगद पुरस्कार ख: ।

**आशामाया सिरपा:** थ्व सिरपा: 'न्हूगु विश्वभूमि' न्हिपतिइ दच्छिया दुने मिसा च्वमिपिनिगु दकले बांला:गु च्वसुयात बिङ्गु सिरपा: ख: । थ्व सिरपा:या संस्थापक आसामान ताम्राकार ख: ।

**नारायण इनाप सिरपा:** - इनाप वा:पतिइ पिदंगु बांला:गु रचनायात बिङ्गु थ्व सिरपा:या रकम ५०००/- तंकाया ख: । थ्व सिरपा:या संस्थापक लुमिन कुमार श्रेष्ठ ख: ।

**नेवा: हना सिरपा** (ने.सं. १११५) :- थ्व भाषा, साहित्य, संस्कृतिया ख्यलय न्ह्यथनेबहगु ज्या या:म्ह व्यक्ति वा संस्थायात बिङ्गु १०,०००/- दांया सिरपा: ख: । थुकिया दाता भाजु राजदास श्रेष्ठ ख:सा, थ्व सिरपा:या संचालक सक्वया भाषा साहित्य मुंज्या खल: ख: ।

**मोतिलक्ष्मी सिरपा:** (ने.सं. १११९): नेपालभाषा, साहित्य, संस्कृति उत्थानया ज्याय् उल्लेखनीय ज्या या:म्ह मिसा च्वमियात निर्दय छक: बीगु १५०००/- दांया सिरपा: ख: । थ्व सिरपा:या दाता डा. केशरी मानन्धर ख:सा थुकिया संचालक नेपालभाषा परिषद् ख: ।

थुपिं सिरपा: बाहेक शैक्षिक क्षेत्रय् नेपालभाषा विषय कया: ब्वनीपिं विद्यार्थीतय्त ह:पा: बिङ्गु नं थीथी सिरपा: नीस्वनात:गु दु, गथे -

१. **मोतिलानी सिरपा:** (ने.सं. १११५) - एस.एल.सी. निसें एम.ए.या तगिमय् तक बिङ्गु जूगु थ्व सिरपा:या रकम ५०००/- तका ख: । मोतिलानी ताम्राकारं नीस्वनादीगु थ्व सिरपा: प्रत्येक तगिया



नेपालभाषा विषय कया: दकल्य अष्व: नम्बर ह:म्ह विद्यार्थीयात बिइगु सिरपा: ख: । थ्व सिरपा:या संचालक नेपालभाषा केन्द्रीय विभाग ख: ।

२. चैन लाकौल सिरपा: (ने.सं ११०१) - थ्व नेपालभाषा कया: एम.ए.या परीक्षाय दकल्य अष्व: ल्या: ह:म्ह मिसा विद्यार्थीयात बिइगु सिरपा: ख: । थ्व सिरपा: ने.सं ११०१ निसं इनेगु शुरु जूगु दु । थुकिया संस्थापक वैकुण्ठप्रसाद लाकौल ख: ।

३. पियूष पदक (ने.सं १११७) - भाजु पियूषबहादुर अमात्य स्वनादीगु पियूष पदक नेपालभाषा विषय कया: प्रथम श्रेणीइ प्रथम जूम्ह एम.ए.या विद्यार्थीयात बीगु लुंया तक्मा व दसिपौ ख: । थ्व सिरपा:या संचालक नेपालभाषा केन्द्रीय विभाग ख: ।

४. नेपालभाषा सिरपा: एस.एल.सी. नेपालभाषाय दकले अष्व: ल्या: कया: उत्तीर्ण जूम्ह विद्यार्थीयात ल:ल्हाइगु सिरपा: ख: । थ्व सिरपा:या संचालक 'विराट नेपालभाषा साहित्य सम्मेलन गुथि' ख: ।

५. गंगामाया सिरपा: व भिमकुमारी सिरपा: -थ्व सिरपा: एस.एल.सि.परीक्षाय नेपालभाषाय दकल्य अष्व: ल्या: ह:पित बिइगु ख: ।

थथे च्वय उल्लेख जूगु थीथी सिरपालं थौया नेपालभाषाया आधुनिक साहित्यया विकासय महत्वपूर्ण भूमिका म्हितावया च्वंगु दु । छखे थज्या:गु सिरपालं नेपालभाषाया च्वमि च्वमितयत नेपालभाषा पाखे आकर्षित याना: थ्व क्षेत्रया भाषिक, साहित्यिक, सांस्कृतिक विकासया नितिं प्रोत्साहन, हौसला बिउगु दुसा, मेखे छुं कथं सफू पिकायेगु नितिं थज्या:गु सिरपा: आर्थिक तिव: नं जूगु दु । अथे हे सिरपा: त्याकूम्ह च्वमिया सफू प्रकाशनय हयेगु नेपालभाषा भाषितयसं थ:पिनिगु सामाजिक दायित्व नं भा:पिउगु दु । भी थें ज्या:गु अविकसित देशय च्वमितयगु कदर सी धुंका: जक जुइगुलिइ थज्या:गु सिरपा:या व्यवस्था इमिगु कदर इमिगु जीवनकालय हे याना:, इमि पाखें अफ अष्व: साहित्यिक योगदान प्राप्त यायेगु परम्पराया नी जूगु दु । नापं सिरपा: का:पिं च्वमितयगु कृतिं न्हूपिं च्वमितयत थज्या:गु हे कथंया साहित्य सृजना यायेगु नितिं प्रेरणा नं बिउगु दु । तर थौं नेपालभाषाय नीस्वनात:गु सिरपा: मध्ये छुं छुं जक संचालन जुयाच्वंगु दु अष्व: थें दिइ धुंकूगु दु वा दिनाच्वंगु दु । अथे ख: सां दयदसं न्हून्हुगु सिरपा:या स्थापनां याना: नेपालभाषा साहित्यया विकासय सकारात्मक लिच्व: अवश्य हइ धइगु आशा याये फु ।

## नेपा:या शिक्षाय नेपालभाषा

छुं नं भाषायात पठनपाठनय दुथ्याकेगु धयागु व भाषायात सम्मान बिइगु जक मखु वया विकासया लँपु छुइगु नं ख: । थज्या:गु हे खँयात वा:चायेका: मचातयत मांभासं शिक्षा बिइमा:गु, नेपालभाषा संरक्षण संवर्द्धनया नितिं थ्वयात पठनपाठनय दुथ्याकेमा:गु स: नेपालभाषा पुनर्जागरण कालया नसंचा इलय हे थ्वेधुंकूगु ख: । मांभासं शिक्षा बिइमा:गु खँय दकल्य न्हापां वा:चायेकादीम्ह व्यक्ति जगतसुन्दर मल्ल ख:सा, नेपालभाषायात शैक्षिक संस्थां मान्यता बिइकेगु नितिं न्हापां आवाहन यानादीम्ह व्यक्ति योगवीरसिंह ख: । वय्क:या 'नेपालभाषा' धैगु कविताय

'नेपालभाषा जिर्ण जूगु अलि मचासे भिंकेनु,  
भारतिय शास्त्र भवनं मान थ्वइत बीकेनु -  
योगसुधा, ने.सं. १०७०:१)

धका: नेपालभाषायात भिंकेगु, थ्वयात मान प्रतिष्ठा बिइकेगु नितिं शैक्षिक संस्थां मान्यता बिइकेगु कुत: यायेत आवाहन यानात:गु दु । थथे योगवीर सिंहया 'भारतिय शास्त्र भवनं मान थ्वैत बीकेनु' धयागु आवाहनयात कार्यान्वयन यायेगु पला: मेम्ह भाषानुरागी धर्मआदित्य धर्माचार्य ल्हवनादिल । वय्क: कलकत्ताय ब्वनाच्वनादीगु इलय अनया विश्वविद्यालयया उपकुलपति आशुतोष मुखर्जीया कुतलं कलकत्ताया विश्वविद्यालय बंगाली, हिन्दी आदियात मेट्रिक निसं बी.एस. तक भर्नाकुलर विषयकथं अनिवार्य रुप ब्वंकेगु व्यवस्था जुल । धर्मआदित्य धर्माचार्य तत्कालीन नेवा: विद्यार्थीतयगु नेतृत्व याना: नेपालभाषायात नं भारतया विश्वविद्यालय मान्यता बिइकेत कलकत्ता विश्वविद्यालयया उपकुलपतियाथाय डेलिगेशन (ने.सं. १०४४) वन । तर नेपालभाषाय पठनपाठनया नितिं स्तरीय सफू मनुनि धयागु विश्वविद्यालयया लिसलं डेलिगेशनया उद्देश्य पूमवन ।



राणाकालीन निरंकुश शासनय् विद्यालय चायेकूपित ज्वनेगु, पुस्तकालय चायेकेत विरान्तपत्र तःपित जरिवाना यायेगु, नेपालभाषा लेख कविता च्वःपित यातना विइगु यानाहल । अज्याःगु स्थितिइ औपचारिक रुप शिक्षा ख्यलय् नेपालभाषा दुध्याकेगु ला सम्भव हे मजुल । ने.सं १०७१ या क्रान्तिं नेपालय् प्रजातन्त्र बल । प्रजातन्त्र वयाः स्वदँ लिपा नेवाः विद्यार्थीतयगु माग कथं ने.सं १०७४ य् एस.एल.सी.या पाठ्यांशय् पूर्वीय भाषाकथं (Oriental Language) नेपालभाषायात नं मान्यता बिल । थज्याःगु व्यवस्थां तत्कालीन नेवाः विद्यार्थीतयके नेपालभाषा विषय कयाः ब्वनेगु तःधंगु उत्साह हयाबिल । अथे हे ने.सं १०७५ निसँ विरगंजया राष्ट्रिय विद्यापीठं नेपालभाषायात प्रवेशिकां निसँ विद्यालंकार थ्यंक छगू माध्यम कथं मान्यता बिल । तर कलेजय् ने.सं १०८० निसँ तिति नेपालभाषा विषययात दुध्याकल । मानविकीया आइ.ए.या तहलय् स्वंगू ऐच्छिक पत्र मध्ये छगू ऐच्छिक पत्रया रुपय् (२०० ल्याः) दुध्याकल सा मानविकी नापं मेगु फुक्क अध्ययन संस्थानया इण्टरमिडियट तगिमय् नेपालभाषा भर्नाकुलर विषयकथं (५० ल्याः) ब्वनेदइगु व्यवस्था जुल । फलतः विज्ञान, वाणिज्य, कानून आदिया विद्यार्थीतयत तकं नेपालभाषा ऐच्छिक भर्नाकुलर विषयकथं ब्वनेगु हवःताः चूलात । ने.सं १०८२ स मूल विषय नेपालभाषा कयाः आइ.ए. पास जूपिं दयेवं व हे दँय बी.ए. तगिमय् नं नेपालभाषा मूल विषय कथं प्राध्यापन जुल । ख ला नेपालभाषा कयाः बी.ए. पास जूपिं दयेवं ने.सं १०८४ निसँ एम.ए.ल.य् नं नेपालभाषाया प्राध्यापन जुइमाःगु खः, तर एम.ए.या लागिं माःगु सफू मनुनि धैगु त्वह चिनाः छथ्वः संकुचित विचाःयापि प्राध्यापकतयसँ एम.ए.या व्यवस्था त्रिभुवन विश्वविद्यालय जुइके मविल । लिपा हानं ने.सं १०८९ स त्रिभुवन विश्वविद्यालयाय 'बोर्ड अफ स्टडीज' नेपालभाषा एम.ए.या पाठ्यक्रम दयेकल । अले डीनया अध्यक्षताय् च्वंगु त्रि.वि.वि.या प्राध्यापन जुइगु भाषा समूहया संयुक्त बैठकं थ्वयात पारित नापं याये धुंकूगु खः । उथाय्था नेपाली विभागया विभागाध्यक्ष ताराप्रसाद जोशी नेपालभाषाय् एम.ए. तगिया लागिं ल्वःगु ग्यसुलाःगु सफू मनुनि धकाः जिकिर याःगुलिं एम.ए. नेपालभाषाया कक्षा संचालन हे मजुल ( मल्ल, ने.सं. १०९९:२३-४०) । थज्याःगु घटनां तत्कालीन विद्यार्थीतयके तःधंगु नैराश्य ब्वलन सा नेपालभाषाय् एम.ए.या व्यवस्था मजुतले एम.ए. हे ब्वने मखु धाईपिं स्वाभिमानी विद्यार्थीत नं पिकाल ।

ने.सं १०९१ स राष्ट्रिय शिक्षा योजना पद्धति लागु जुल । थुकिं नेपालभाषायात तःधंगु आघात लाकल । एस.एल.सि.या पाठ्यक्रमय् पूर्वीय भाषा समूह (Oriental Language) या भवलय् दुध्याकातःगु नेपालभाषायात १७ गू भाषा समूह तथा ७ महत्त्वपूर्ण विषयया नापं यानाः २४ गू विषयया विकल्पय् छगू ब्वनेगु यानाः तये हल । अथे हे इन्टरमिडियतया पाठ्यक्रमय् भर्नाकुलर विषयकथं दुध्याकातःगु विभिन्न संकायलय् ब्वकिइगु मातृभाषायात नं लिक्क्याबिल । मानविकीया विद्यार्थीतयत ऐच्छिक विषय कथं जक नेपालभाषा ब्वने दइगु

व्यवस्था जुल । थुकथं कलेजया बहुसंख्यक विद्यार्थी थःगु मातृभाषां ब्वनेगु अधिकारं बच्चित जुल । अथे हे न्हूगु शिक्षा योजनाय् विदेशी भाषाजक मखु, गृहविज्ञान, गणित आदि २४ गू विषयया विकल्पय् हिन्दी मैथिली लिसँ नेपालभाषा लासेलि विद्यालय ऐच्छिक विषयकथं नेपालभाषा ब्वनिइपिं पाः जुजुवनसा, नेपालभाषा विषययात थःपिनिगु विद्यालयय् ब्वकिइगु स्कूल नं तसकं हे म्हा जुवन । प्यंगू न्यागू स्कूलं जक नेपालभाषाया अध्यापनयात थाय् बिल । थुकथं न्हूगु शिक्षा पद्धतिं नेपालभाषाया अध्यापनया जग हे स्यंकाबिल । थथे स्कूलया जग मदुसां भाषिक अनुरागं आइ.ए., बी.ए. तगिमय् ऐच्छिक विषयकथं नेपालभाषाया पठन पाठन संचालन जुयाच्चन । थथे बी.ए. तक जक ब्वने दयाच्चंगु नेपालभाषायात एम.ए.ल.य् दुध्याकेगु हानं छक्कः प्रयास जुल । तत्कालीन नेपालभाषा विषय समितिया अध्यक्ष तथा पाठन क्याम्पसया विभागीय प्रमुख डा. सुन्दरकृष्ण जोशीया प्रमुख सक्रियतां व नेपालभाषाया थीथी संस्थातय्गु अनवरत प्रयासं त्रि.वि.वि.या पदाधिकारीतयत नेपालभाषा एम.ए.ल.य् दुध्याकेगु नितीं विचाः यायेगु करं क्यंकल । हिन्दी, मैथिली भाषाया एम.ए.या व्यवस्था नेपालय् मदुसां भारतय् दु, तर नेपालया हे साहित्यं सम्पन्न प्राचीन भाय्था अध्ययनया नितीं नेपालं हे मयाःसा सुनां व्यवस्था याइगु, अथे हे साहित्यया लक्षण ग्रन्थ नेपालीइ मदुबलय् हिन्दी, अंग्रेजी पाखें ज्या काल धाःसा नेपालभाषां जक काये मफइगु छु दु ? धैगु बहस डा. जोशी विद्या परिषदया सभाय् यानादिल । फलतः उगु सभां नेपालभाषायात एम.ए.ल.य् दुध्याकेगु खँ सर्वसम्मतिं पास यात । तर थथेयात शोधप्रबन्ध च्वयाः निं डिग्री (Degree by Dissertation) बिइगु लिपा नियमित कक्षा संचालन यायेगु धकाः उगु सभां क्वःछिउ कथं ने.सं १०९७ निसँ शोध प्रबन्ध च्वकाः एम.ए.या डिग्री बिइगु व्यवस्था जुल । तर थ्व शोध प्रबन्धया व्यवस्थां तत्कालीन भाषा अनुरागी विद्यार्थीतयत गुलि उत्साहित याःगु खः, उलि थ्व व्यवस्था व्यवहारय् सफल जुइमफुत । प्यदँया दुने स्वंगू पुचलं यानाः ५६ विद्यार्थीतयसं थःपिनिगु नां दर्ता याःगुलिइ लाक्क छम्ह विद्यार्थी भाजु मल्ल के. सुन्दरं जक डिग्री कायेफत । प्यदँ लिपा ने.सं ११०१ निसँ नेपालभाषा एम.ए.या नियमित कक्षा संचालन जुल । थ्व व्यवस्थां आपालं भाषनुरागीतयत नेपालभाषा ब्वनेगुलिइ हःपाः बिल । मेगु भाषाय् एम.ए. यायेधुंकूसां भाषिक ममतां नं नेपालभाषा ब्वनीपिं विद्यार्थीत पिदन । थथे एम.ए.ल.य् नियमित कक्षा संचालन याये धुसेलि उकियात दक्ष जनशक्ति चूलाकेमाःगु आवश्यकता कथं त्रिभुवन विश्वविद्यालय वृत्ति विकास कार्यक्रम अन्तर्गत प्राध्यापकतयत विद्यावारिधी नं याके बिल । थथे विद्यावारिधीया लागिं नां दर्ता याःपिं प्राध्यापकत मध्ये थौं प्यम्हेस्यां नेपालभाषा विषय सम्बन्धी विद्यावारिधी डिग्री हासिल यायेधुंकूगु दु । अथे हे विदेशं नं नेपालभाषाया साहित्य संस्कृति आदि सम्बन्धी विद्यावारिधी यायेत विदेशी विद्यार्थीत नं थन वयेगु जूगु दु । विदेशी विद्वानतय् नेवाः भाय् सयेकेगु मन दुगु थुइकाः नेपालभाषा विषय समितिं थुकिया अध्यापनया व्यवस्था



यायेत त्रि.वि.वि.यात प्रस्ताव तःकथं ने.सं ११०१ निसं विदेशी विद्वानतयत् नेवाः भाय् स्यनेगु व्यवस्था नं विश्वभाषा क्याम्पसय् जुल ।

नेपालभाषाय् एम.ए.या व्यवस्था जुइधुंकाः प्यदं लिपा ने.सं ११०५ चौलागा ९ (वि.सं २०४२ वैशाख १ गते) नेपाल राजपत्रय् श्री ५ या सरकारय् जागीर नयेत व प्रमोशन कायेत एम.ए. यानागु वापतय् बियावयाच्वंगु सहूलियत नेपालभाषा, मैथिली, हिन्दी गृहविज्ञान आदि विषय कयाः ब्वपित मविइगु घोषणा जुसेलिं एम.ए. ब्वनाच्वच्वपि आपाल विद्यार्थीतय्सं ब्वनेगु त्वःताहल । थुकथं छुखे माध्यमिक तहलय् नेपालभाषा ब्वंकेगु लिकया बिलसा मेखेर 'नेपाली' 'अंग्रेजी' विषयय् एम.ए. याःपित प्रमोशनया नीति थाय् बियाः, नेपालभाषायात मबिसेलिं नेपालभाषा ब्वनेगु उत्साह गुगु न्ह्यानाच्वंगु खः, व छुवासुया वन । थुखे देय्या 'एक भाषा एक धर्म'या निति नियमं नेवाःतय्सं छैय् छैय् थः मचातयत् नं नेवाः भाय् मल्हाकेगु यानाहल । फलतः नेवाःभाय् ब्वनिइपिं विद्यार्थीत न्हियान्हिथं पाः जुयावन ।

लिपा बहुदलीय प्रजातान्त्रिक व्यवस्थाया स्थापना जुइ धुंकाः ने.सं १११३ स (वि.सं. २०५० पौष १३) सामान्य प्रशासन मन्त्रालयं गजेटय् 'रा.प. तृतीय निसं प्रथम थयंक जागीर नयेत व प्रमोशन कायेत माःगु योग्यताय् मान्यता दुगु शिक्षण संस्थां कला (आर्टस), संस्कृत, व्यवस्थापन, वाणिज्य शास्त्र, व्यापार प्रशासन...विज्ञानय् स्नातकोत्तर यानाः अनुभव दुम्ह जुइमाः धकाः सुचं पिकयाः वि.सं. २०४२ वैशाखया सुचंयात क्वःथलेगु यात । तर थथे नेपालभाषायात हानं मान्यता दुगु खं धाःसा बालाक प्रचार जुइमफुत । (जोशी, ने.सं १११८, पृ.३९)

बहुदलीय व्यवस्था लिपा नेपाल अधिराज्यया संविधान २०४७ या भाग ३ धारा १८ या दफा २ लय् 'हरेक समुदायं मचातयत् थःथःगु मां भासं शिक्षा बिइकथं ब्वनेकुथि चायेके दु धकाः उल्लेख जुल । थ्व हे कथं निजी क्षेत्र नेपालभाषा माध्यमं ब्वंकीगु स्कूल तत्कालीन भाषासेवी नेवाःतय्गु कुतल जगतसुन्दर ब्वनेकुथि (ने.सं ११११) या स्थापना जुल । अंग्रेजी, नेपाली भाषा बाहेक मेमेगु विषय नेपालभाषा माध्यमं ब्वंकीगु थ्व स्कूलात म्वाकातयेगु नितिं राज्यपाखें मखु विदेशीतय्सं च्यूताः कयाच्वंगु बहुभाषीय देश नेपाःया नितिं छगू व्यंग हे खः । थौं थ्व स्कूलय् ७ तगिया मचातयत् तक ब्वंकेगु व्यवस्था जुइधुंकूगु दु । ने.सं. १०६७ स यलया नागबहालय् स्थापना जूगु 'धर्मोदय कन्या पाठशाला'यां लिपा स्थापना जूगु नेवाः भाय्या स्कूल थ्व 'जगत सुन्दर ब्वनेकुथि' जूगु दु ।

अथे हे नेपाःया उच्च माध्यमिक शिक्षा योजनाय् वि.सं २०५७ लिपा 'इन्टरमिडियट'या व्यवस्थायात लिकयाः १०+२ या व्यवस्था यायेगु जूगु कथं नेपालभाषायात नं उगु तहया पाठ्यांशय् ऐच्छिक विषय कथं थाय् बिल । थुकिया नितिं पाठ्यक्रम तथा निर्देशन पुस्तिका नं तयार जुइधुंकूगु दु । तर गुलि विद्यालय नेपालभाषा अध्यापनया नितिं थाय् बिइगु खः थ्व शंकाया विषय तिनि धायेमाः ।

जीवनवृत्तिया नितिं थौया तच्चःगु प्रतिस्पर्धाया जमानाय् आपाल न्ह्यूगु प्राविधिक विषय, विविध अन्तराष्ट्रिय भाषा ब्वनेमाःगु, न्हियान्हिथं मेमेगु विकसित देय्या भाषा संस्कृतिं अतिक्रमण याना हयाच्वंगु, म्वायेगु नितिं थःगु परिवार, थःगु छै जक मखु थःगु देश तकं त्वःताः विदेशाय् ब्वनेगु प्रवृत्ति ब्वलना वयाच्वंगु थौया स्थितिइ नेवाःतय्सं थः मचातयत् थुइकं चायेकं नं नेवाः भाय् ल्हाकेगु व नेपालभाषा ब्वंकेगुपाखें विमुख याना हयाच्वंगु दु । फलतः नेपालभाषा ब्वनिइपिं विद्यार्थीत न्हियान्हिथं पाः जुयावनाच्वंगु दु, गुगु नेपालभाषाया शैक्षिक विकासया नितिं चिन्ताया विषय खः । खयेत ला थज्याःगु स्थिति नेपालभाषाय् जक मखु, मेमेगु अनिवार्य मजगु कला सम्बन्धी विषययां पठनपाठनय् नं दु । नेपालभाषाय् थौं विद्यार्थीत पाः जुयावंगु स्थिति यात ध्यान तयाः थ्व विषयस विद्यार्थीत आकर्षित यायेत नेपालभाषा अनुरागी व दातातय्सं थीथी सिरपाः पदक गथे - मोतिलानी सिरपाः, चैन लाकौल सिरपाः, पियूष पदक, गंगामाया पुरस्कार, भीमकुमारी सिरपाः आदि सिरपाः स्वनेगु याःगु दु सा नेपालभाषाया शुभचिन्तक उद्योगपति इन्द्रभक्त्या हःपालं 'नेपालभाषा शिक्षा विकास समिति' (ने.सं १११८) नं स्वंगु दु । थौं नेपालभाषा शिक्षा विकास यायेगु नेवाःतय्गु छगू बौद्धिक जिम्मेवारी जूगु दु । नेवाःत म्वानाच्वंगु दनि धयागुया दसि बिइगु जूगु दु ।



## आधुनिककालया विधागत परिचय

नेपालभाषा साहित्यया इतिहासय् ने.सं १०६० या दशक छगू महत्वपूर्ण दशक सावित जूगु दु । थुगु इलय् वयाः नेपालभाषा साहित्य सीदयेक छगू न्हूगु मोड ज्वन, न्हूगु युग हन आपालं आपाः न्हू न्हूपिं च्वमित पिकाल । न्हू न्हूगु विधाया प्रारुभाव जुल । न्हापा खने मनुनिगु आधुनिक बाखं, नाटक, निबन्ध, कविता, समालोचना आदि खनेदत । अर्भ २००७ सालया राजनैतिक परिवर्तनं तत्कालीन जनमानसय् हःगु न्हूगु जागरण व जोशं थ्वया विकासय् तीव्रता विल । न्हू न्हूपिं च्वमित खनेदत । थुक्रिया लिचः कथं आपालं न्हू न्हूगु सफू, मत्रपत्रिका पिदन । थुक्रिया विकासया नितिं आपालं न्हू न्हूगु भाषिक, साहित्यिक संस्थातयगु नी जुल । विश्व साहित्यय् खनेदुगु न्हून्हूगु प्रवाह प्रवृत्तियात नं नेपालभाषाया च्वमितयसं प्रयोग यानाहल । न्हापा ज्वनेगु मजगु आपालं न्हू न्हूगु विषययात थियाः साहित्य सृजना यायेगु जुल । साहित्यय् न्हूगु मूल्य व मान्यता स्थापना यायेगु कुतः जुल । साहित्यं न्हूगु रुप धारण यात । फलतः थ्व युगया साहित्ययात आधुनिककालया साहित्य कथं ग्रहण यायेगु जुल । उकिं नेपाल संवत् १०६१ निसं थुखेया समययात नेपालभाषाया साहित्यया इतिहासय् आधुनिककाल नालेगु जूगु दु । थौं थ्व आधुनिककालया साहित्ययात विधागत रुपं क्वय् बिया कथं ब्वनेगु जूगु दु ।

- काव्य
- बाखं
- निबन्ध
- नाटक
- समालोचना
- उपन्यास

## आधुनिककालया काव्य

**पृष्ठभूमि :-** काव्य प्राचीनकालं निसं प्रचलनय् दुगु साहित्यिक विधा खः । व्यापक अर्थय् काव्ययात साहित्यया पर्यायया रुपय् कायेगु प्रचलन दुसां थौं व्यवहारय् कथात्मक गठन, गुम्फन दुगु कविता विशेषयात जक काव्य कथं नालेगु जूगु दु (थापा, वि.सं. २०४२ : ३३) । मेमेगु साहित्यिक विधा थें काव्य धयागु नं छगू कथं कथ्य खः, गुगु भावमूलक नं जुइफु बौद्धिक मूलक नं जुइफु । थज्याःगु कथ्ययात थौंया कविं पद्यलसय् वा गद्यलसय् अभिव्यक्ति यानातःगु जुइ । संक्षिप्तता, संश्लेषणात्मकता, अप्रस्तुत योजना, लय, भाषिक माधुर्य आदि काव्यया गुण खः । गद्यय् थें काव्यय् फुक्क कथ्य छर्लङ्ग जुइमखु, गुलिखे खँ अव्यक्त जुयाच्वनी । फुक्क खँ छर्लङ्ग जुल कि काव्यया सवाः दइमखु (प्रधान, ने.सं. १९९७ : १२) । महाकाव्य, खण्डकाव्य बाखं म्ये, प्याखं म्ये, फुटकर कविता आदि थौंया काव्यया थीथी रुपभेद खः । थुमिगु सामूहिक नां काव्य खः । कवितात्मकता, लयात्मकता काव्यया मूलभूत विशेषता खःसा, संरचनाया दृष्टिं थौंया काव्ययात - आख्यानात्मक, नाटकीय, प्रगीतात्मक, कथं ब्वथलेगु नं चलन दु । आख्यानात्मक काव्यय् कथातत्व दयाच्वनी अले थ्व विवरणात्मक प्रवृत्ति कथंयागु जुइ । उकिं थज्याःगु काव्ययात प्रबन्ध काव्य नं धाइ । प्रबन्ध काव्यय् बाखं तत्व दुसां व बाखं जुइमखु, काव्य हे जुइ, अन कविता तत्व नं समायोजन जुयाच्वनी । महाकाव्य, खण्डकाव्य, बाखं-म्ये आदि प्रबन्ध काव्यया थीथी रुपभेद खः । अथे हे नाटकीय संरचनाया काव्यय् कविं थःगु भाव कथ्ययात तप्यंक प्वकेगु मयासे आकस्मिक धंगं पिब्वेगु याइसा, प्रगीतात्मक काव्यय् छगू हे भाव वा बिचाःया पुनरावृत्ति जुयाच्वनी । अले भाव अनुकूल जुइक गीतितत्वया नं प्रयोग जुयाच्वनी ।

थौंया काव्यया विविध प्रकार मध्ये दकल्य प्रचलनय् दुगु प्रकार - फुटकर कविता खः । फुटकर कविता प्रगीतात्मक नं जुइफु, गद्यलयात्मक नं जुइफु । प्रगीति काव्यय् मूलतः कविया थःगु वैयक्तिक भाव संवेग, आवेगया स्फुरण जुयाच्वनी । गेयता, श्रुतिमधुरतां थज्याःगु काव्यय् महत्वपूर्ण थाय् कयाच्वनी । गजल, सनेट, मुक्तक, शोक काव्य, म्ये आदि प्रगीति काव्यया विविध प्रकार खः । गद्यलयात्मक कविता धयागु हे थौंया गद्य कविता खः । थज्यागु कविताय् गीतात्मक तत्व दइमखु । लय स्वतन्त्र जुइ । थज्याःगु कवितां श्रुति



काव्य साहित्यया इतिहास पुइका स्वल् धाःसा कविता सम्बन्धी धारणा जक मखु, कविताया स्वरूप प्रवृत्ति न न्याबले उथे जुयामच्च, ईया हिउपाः लिसे लिसे थुकिइ न हिउपाः वःगु दु । संस्कृत साहित्यय् काव्यया लक्षण सम्बन्धी दकलय् न्हापां चर्चा यानातःगु सफू, अग्निपुराण खः । 'संक्षेपाद् वाक्यमिष्टार्थव्यवच्छिन्ना पदावली वाक्यम्' धकाः अमिष्ट भावयात संक्षेपं व्यक्त याइगु पदावली हे काव्य खः धकाः अग्निपुराणय् न्हयव्यातःगु दु सा आचार्य भामह - शब्दार्थौ सहितौ काव्यम् धकाः शब्द व अर्थया संयुक्त रुपयात हे काव्य नालेगु याःगु दु । थज्याःगु हे विभिन्न विद्वानतय्गु काव्य सम्बन्धी धारणां संस्कृत साहित्यय् विविध सम्प्रदाय - अलंकार, वक्रोक्ति, रीति, औचित्य, ध्वनि रस आदिया निर्माण जूगु दु । संस्कृति साहित्यया अप्पः थें विद्वानत गथे - भरतमुनि, भामह, रुद्रत, वामनपिंसं काव्यया वाह्य वा कला पक्षयात अप्पः थाय् बियावंगु दु सा विश्वनाथ थें ज्याःपिं निम्ह प्यम्ह आचार्यतय्सं धाःसा काव्यया आन्तरिक पक्षयात न वाक्यं रसात्मकं काव्यम् (रसात्मक वाक्य हे काव्य खः) धकाः थाय् बिइगुयाःगु दु । संस्कृति साहित्यय् थें पाश्चात्य साहित्यय् कविताया परिभाषायात कयाः थीथी वाद वा सम्प्रदायया जन्म मजूसां कविताया प्रवृत्तियात कयाः थीथी वादया जन्म जूगु दु । कविताया परिभाषा, कविताया प्रयोजन सम्बन्धी धारणा न ईया हिउपा लिसे पानावंगु दु । एरिष्टोटलया - काव्य, भाषाया माध्यमं प्रकृतिया अनुकरण खः धयागु धारणा, काव्यय् यथार्थता, छन्दोबद्धतायात थाय् बिइगु ज्या जुल । थ्व हे एरिष्टोटलया धारणा लिसे स्वापू तसे नवल्कासिकल युगया कवित - अलेक्ज्याण्डर पोप, जोन ड्राइडन, जोजेफ एडिशन थें ज्याःपिंसं यथार्थमुखि छन्दोबद्ध काव्य सिर्जना यात । वस्तुपरता, बौद्धिक नियोजन, यथार्थ व कल्पनाया समन्वय, चिन्तनया स्थिरता, संवेगया नियन्त्रण आदि थुगु युगया काव्यया मूलभूत विशेषता जू वन । काव्यया प्रयोजन सत्य खः धयागु खँ तत्कालीन प्रसिद्ध समालोचक डा. जोनसनया Poetry is a materical composition, it is the art of uniting pleasure with truth (कविता छन्दोबद्ध रचना खः, थ्व बुद्धिया ग्वाहालि कल्पनाया व्वनाय् आनन्दयात सत्य नाप स्वाइगु कला खः) परिभाषा थुगु युगया कवितय्गु काव्य सम्बन्धी दृष्टिकोणयात अभि स्पष्ट यानाः व्यूगु दु । लिपा कलरीज, वर्डस्वर्थपिनिगु, लिरीकल बालेड (ई.सं १७९२) या प्रकाशनं स्वच्छन्दवादया हानं उत्थान जुल । शेली, किट्स, बाइरन थें ज्याःपिं कवितय्गु प्रादुर्भावं स्वच्छन्दवादायत उत्कर्षताय् थ्यंकाविल । यथार्थमूलक काव्यया थासय्, भावमूलक काव्यया सृजना जुल । व्यक्तिपरकता, स्वप्नदृष्टा, कल्पनाया स्वच्छन्दता, निरंकुश प्रवृत्ति प्रति विद्रोह, स्वतन्त्रता प्रति आशाक्ति, प्राकृतिक सौन्दर्यप्रति तन्मय भाव आदि थुगु युगया काव्यया विशेषता जुयाविल । poetry is the antithesis of science, having for its immediate pleasure not truth ( कविता विज्ञानया विपरीत विधा खः छाया धाःसा थुकिया मूल लक्ष्य आनन्द खः, सत्य मखु) धकाः कलरीज कविताया लक्ष 'आनन्द' खः, सत्य मखु, धकाः क्यना बिलसा वर्डस्वर्थ Poetry is the spontaneous overflow of powerful feelings. It takes its

origin from emotion recollected in Tranquility (कविता प्रवल मनोवेगया स्वच्छन्द प्रवाह खः, थुकिया उत्पत्ति शान्तावस्थाय् मुनाच्चंगु अनुभूति पाखे जुइ ) धकाः कविताया लागी वस्तुयात मखु व्यक्तियात महत्व बिइगु यात, अभिव्यक्तियात मखु, भावयात थाय् बिइगु जुल । थ्व स्वच्छन्दवादी कवितय्गु प्रभाव विश्वया काव्य साहित्यय् थुलि लात कि थुपिं मेमेपिं कवितय्गु नितिं ल्कासिक थें जूवन । तर थ्व स्वच्छन्दवादी काव्य प्रवाह तथा स्वच्छन्दवादी कवितय्गु काव्य सम्बन्धी धारणा न न्याबलेया नितिं मान्य जुयामच्चन । इलं टी.एस. इलियट, इजरा पाउण्ड, डल्लु बि. ग्रिट्स-आदि थें ज्याःपिं कवित न पिकाल । कवि वर्डस्वर्थया कविता सम्बन्धी धारणायात खण्डन यासे टी.एस.इलियट - कविता कविया व्यक्तित्वया अभिव्यक्ति मखुसे बस्तु (जीवन व जगत) या अभिव्यक्ति खः, कवियात च्वयेगु प्रेरणा, न आवेगं वइगु खः, न स्मरणं, न शान्त मनस्थिति हे, धाथें कवियात च्वयेगु प्रेरणा न्हापाया साहित्यं बिइगु खः, अले, अभिव्यक्ति याइलबय् काव्य-संस्कार व परम्पराया प्रभाव लाइ (श्रेष्ठ, ने.स. १०८८ : १५६) धकाः कविता व कवि सम्बन्धी धारणा हिउपाः हयाविलसा, कविताया उद्देश्य 'जीवनय् छगू व्यवस्था कायम यानाः व्यवस्थित स्थितिया छुपुलु खंकेगु खः धकाः कविताया प्रयोजन आनन्द जक मखु धकाः क्यनाविल । थुकथं कवितायात व्यक्तिकइ मखु समाज व युग सापेक्ष वस्तुगतता व्वयेगुलिइ केन्द्रित जुइके बिल । अभि काव्य रचनाय् थुपिं कवितय्गु प्रादुर्भाव कविताया स्वरूप प्रवृत्ति हे छगू तःधंगु हिउपाः हयाविल । न्हूगु युगया सूत्रपात यानाविल । थुमिगु कविताया प्रभाव बिलायत अमेरीका आदि पाश्चात्य देशय् जक लिक्नुना मच्चंसे विश्वया काव्य साहित्यय् हे न्यनावन अले थुमिगु कवितां निसं काव्य साहित्यया इतिहासय् आधुनिक कविताया सुरुवात जूगु धकाः नालेगु यानाहल । अथे हे कविताया संरचनाय् भाव पक्ष व अभिव्यक्ति पक्ष मध्ये गुकियात प्रश्नय् बिइगु धयागु खँय म्याथ्यु आर्नल्ड थें ज्याःपिं समालोचकतय्गु आगमनं, कविताया नितिं भाव व अभिव्यक्तिया उलि हे थाय् दु धयागु क्यनाः युगौ निसं न्यानाच्चंगु विवादयात ब्वजिकाविल ।

## नेपालभाषाय् आधुनिक काव्य

नेपालभाषा साहित्यय् ने.सं १०६१ स थुखेया इलं निसं आधुनिक काव्यया शुरुवात जूगु मानेयाना तःगु दु । पाश्चात्य साहित्यय् टी. एस.इलियट, इजरा पाउण्ड आदिपिनिगु कवितां निसं आधुनिक कविताया शुरुवात जूगु नालेगु याःसां नेपालभाषाया काव्यय् पाश्चात्य कवि वर्डस्वर्थ, कलरीज आदिपिनिगु स्वच्छन्दवादी काव्य प्रवृत्ति नेपालभाषाय् दुहां वसानिसं आधुनिक काव्यया शुरुवात जूगु नालेगु जूगु दु । खयेतः ला ने.स १०६० या दशक शुरु जुइ, छुं दै न्हयः हे थज्याःगु



काव्य प्रवृत्ति नेपालभाषाय दुहां वसानिसे आधुनिक काव्यया शुरुवात जूगु नालेगु जूगु दु । खयेतः ला ने.स १०६० या दशक शुरु जुइ, छुं दै न्ह्यः हे थज्याःगु काव्यया प्रारूप नेपालभाषाय खनेदये धुंकूगु खः, तर थुपिं छगू प्रयोग जक जुल प्रवाहया रूपय् ने.सं. १०६१या दशकय् वयाः तिनि न्ह्यात । ने.सं १०६१ निसं थौं तकया समयावधी दुने नं काव्य ख्यलय् सीदयेक निगू प्रवाह स्पष्ट रुपं न्ह्याये धुंकूगु दु व खः - १) स्वच्छन्दवादी प्रवाह २) आधुनिक कविता व प्रगतिवादी प्रवाह । अध्ययन सुविधाया निती काव्य प्रवाहया आधारय् आधुनिककालया काव्ययात निगू समयावधिइ ब्वथलाः ब्वनेगु उपयुक्त जुइ ।

क) न्ह्यच्चःगु आधुनिककालया काव्य (ने.सं. १०६१-१०८४)

ख) लिच्चःगु आधुनिककालया काव्य (ने.स १०८४निसं)

## क) न्ह्यच्चःगु आधुनिककालया काव्य (ने.सं. १०६१-१०८४)

जेल दुने नेपालभाषाया काव्य साधना जूगु इलं निसं ने.सं १०८४ स पूर्णबहादुर वैद्ययागु सरासु कविता संग्रहयात श्रेष्ठ सिरपाः छछाये न्ह्यः तकया समयावधियात न्ह्यच्चःगु आधुनिक काव्यकाल कथं नालेगु जूगु दु । जीवनया नैतिक सुधार पाखे हे अप्वः क्वसाःगु पुनर्जागरणकालीन काव्यया शास्त्रीय लागायात लिफ्यानाः शैलीगत स्वच्छन्दताय् कल्पनाया असीम सर्गतय् ब्वयेगु प्रवृत्तियात कारागारया कवितय्सं छगू प्रयोग कथं जक मखु छगू प्रवाह कथं हे न्ह्याकल । थथे नेपालभाषाया काव्यय् स्वच्छन्दवादी धारायात छगू प्रवाहया रूपय् न्ह्याकेगुलिइ नेतृत्व यानादीमह कवि सिद्धिचरण खः । सिद्धिचरणया नापं चित्तधर 'हृदय', केदारमान 'व्यथित', हरिकृष्ण श्रेष्ठ आदिपिसं नं थ्व धाःयात न्ह्याकेगुलिइ महत्वपूर्ण योगदान बियादिल । नीति, उपदेश, भाषानुरागया थासय् प्रकृति, मतिना, विरह वेदना थें ज्याःगु विषयगत प्रवृत्ति काव्यय् थाय् कायेगु यात । थ्व युगया अग्रज कवित -सिद्धिचरण, चित्तधर 'हृदय', फत्तेबहादुरसिंह, केदारमान 'व्यथित' आदिपिसं जेल दुने स्वच्छन्दवादया लैपु ज्वनाः कविताय् विरह, वेदना, मतिना तथा सांस्कृतिक व उन्मुक्तिया चेतनां छायापिडगु यातसा प्रजातन्त्रोत्तर कालया कवित गथे - माधवलाल, ईश्वरानन्द, दुर्गालाल आदिपिसं नं स्वच्छन्दवादी प्रवृत्तियात हे ज्वनाः मेमेगु विषय नापं स्वतन्त्रता आदियात नं प्रतिविम्बत यानाः जागरणकालया पलाःचिं नं ब्वयेगु यात । तर प्रजातन्त्रोत्तर कालया कवितय्सं छखे जागरणकालया पलाःचिं ब्वयेगु यातसा मेखेर राजनैतिक

परिवर्तन देशय् सकारात्मक परिवर्तन हयेमफुगु प्रतिक्रिया स्वरूप नैराश्य, पलायनया पलाःचिं नं थःपिनिगु काव्यय् ब्वयेगु यात । कारागारकालं निसं शुरु जूगु न्ह्यगु काव्य प्रवाह न्ह्याना च्वच्चं हे ने.सं १०८४ स हानं थुकिया विरुद्धय् मेगु न्ह्यगु प्रवाह नेपालभाषाया काव्यय् खनेदत । व खः - आधुनिक कविता तथा प्रगतिवादी प्रवाह । थुकथं नेपालभाषा काव्य हानं मेगु मोड ज्वन । उकिं न्ह्यच्चःगु आधुनिक काव्यकाल धकाः समयावधि सीमांकन यायेबलय् छगू न्ह्यथने बहगु खं खः, थुगु ईया गुलिखे कवितय्सं लिपा न्ह्यगु काव्य प्रवाह शुरु जुइसाथं उकियात हे ज्वंगु दुसा गुलिस्यां पुलांगु हे स्वच्छन्दवादी धाःयात न्ह्याकां च्वन । थ्व न्ह्यच्चःगु आधुनिककालय् केन्द्रीय व्यक्तित्वया रूपय् खनेदुपिं कवित - चित्तधर 'हृदय' सिद्धिचरण श्रेष्ठ, व केदारमान 'व्यथित'पिं खः । स्वच्छन्दवादी धाःयात छगू प्रवाहकथं न्ह्याकेगु ज्याय् थ्वय्कःपिं स्वम्हं न्ह्यलूगु जूसां थुकिया न्हापांम्ह प्रयोक्ता वैकुण्ठप्रसाद लाकौलयात नालेमाः । जेलकाल स्वयाः न्ह्यः हे वैकुण्ठप्रसाद लाकौलजुं पाश्चात्य शैलीया रोमान्टिक कविताया प्रयोग 'बुद्धधर्म व नेपालभाषा' पत्रिका तथा 'नेपाली विहार' सफुलिइ हे यानादी धुंकूगु खः । तर थ्व छगू प्रयोग जक जुल, छगू प्रवाहया रूपय् प्रवाहित जुइमफुत । थ्वय्कःपिं बाहेक थ्व प्रवृत्तिया उल्लेख यायेबहपिं मेपिं नं आपालं कवि कवियित्रीत दनि । थुगु ईया फुक्क धया थें कवितय्गु मूलभूत काव्य प्रवाह स्वच्छन्दवादी प्रवाह जूसां थःथःगु हे बिस्कं महत्व नं दु, विशेषता नं दु । थ्वय्कःपिं मध्ये गुलिस्यां काव्य सृजनाय् निरन्तरता बियावंगु दुसा गुलि कविपिं ईया हिउपाः लिसे तनावपिं नं दु, दिनाछवःपिं नं दु । अथे हे गुलिखय् न्हनूपिं कवितसे नं थ्व स्वच्छन्दवादी प्रवाहयात न्ह्याकेगु यानावःगु नं दु । मूलतया थुगु प्रवृत्तिया प्रमुख कवि/कवियित्रीत थुकथं दु ।

## प्रमुख कवि/कवियित्री

फत्तेबहादुर सिंह ( ने.सं १०२२-११०३)

- वनवासया छगू खँ (ने.सं १०६८)
- चर्पट मञ्जरिका (ने.सं १०६८)
- जीवन खुसि (ने.सं १०७०)
- ख्युं अयोध्या (ने.सं १०७०)
- शान्ति सरीता

जेलकाल तथा जेलकाल न्ह्यः छम्ह सक्रिय कवि कथं पिदंम्ह फत्तेबहादुर सिंह प्रजातन्त्र लिपा काव्य ख्यलय् उलि सशक्त रुपं ल्हाः न्ह्याकामदिल । आशा निराशा जाःगु थ्वय्कःया कविताय् सिद्धिदासकालीन



शास्त्रीय परम्पराया नापं जेलकालीन स्वच्छन्दवादी प्रवाहया ल्वाकः ब्वाकः प्रवृत्ति विद्यमान जूगु दु । थ्वय्कःया कविताय् खनेदुगु विविध रुपक व अलंकार कविता समकालीन कवितय्गु अभिव्यक्ति शैली नाप ज्वःलाःगु दु । जेलकालीन मेमेपिं कवितय्सं थें प्रेम अले वियोग वेदनायात कविताया मूल विषयभूमि कथं दुथ्याकामदीसां जीवनया स्वाउँगु पक्षयात हे थ्वय्कलं अप्वः ब्यादीगु दु । उपदेश सुधार आदिया सः नं थ्वय्कलं थःगु कविताय् थाय् थासय् थ्वयेकादीगु दु ।

इन्दुनाद (ने.सं १०२३-१०४६)

- फुटकर

इन्दुनाद, वैकुण्ठ प्रसाद लाकौल पुचःया कवित मध्ये छम्ह सशक्त व सक्रिय कवि खः । थ्वय्कःया धातयेया नां बढीमान श्रेष्ठ खः । खयेत ला थ्वय्कःयात ईया ल्याखं, काव्य प्रवृत्तिया ल्याखं पूर्वक आधुनिक कालया कवि कथं नालेमछि, अथे खःसां नं थ्वय्कः नेपालभाषाया आधुनिक काव्यया इतिहासय् त्वःफिके मजिउम्ह व्यक्तित्व खः । तत्कालीन परिस्थिति थःगु भाव तप्यंक अभिव्यक्ति याके मजिउगु कारण थ्वय्कलं थःगु विचाः जन समक्ष थ्यंकेगु निती रहस्यवाद, छाँयावादया लँपु ज्वनादीगु खनेदु । थ्व खँया पुष्टि थ्वय्कःया धार्मिक कविता थें च्वंक 'भगवान बुद्ध' शिर्षक तयाः चिनातःगु कवितां नं याःगु दु । 'सुथ जुल गुलि छने याकन दें द्यो तुयील (इन्दुनाद : ने.सं १११६,१५) धकाः छाँयावादी धंगं जनतायात आह्वान यानादीगु दु । नेपालभाषाया जेलकालीन कविताय् थें थ्वय्कःया निपु स्वपु जक पिदंगु कविताय् नं नैराश्य हे अप्वः थाय् काःगु दु ।

वैकुण्ठप्रसाद लाकौल (जन्म ने.सं १०२६)

- थुलिंचा (निद्या, ने.सं १०७४)

- कं-स्वां (ने.सं १०८७)

- नगु व मिला (ने.सं ११०८)

हवंगः (ने.सं ११०९)

वैकुण्ठप्रसाद लाकौलज्यात पुनर्जागरण कालया अन्त, आधुनिककालया शुरु याम्ह कवि कथं प्रतिस्थापित यायेछि । वय्कःया 'हवयेत्यंगु स्वांयात' 'वसन्त वाणी' कवितां निसें नेपालभाषाय् पाश्चात्य शैलीया स्वच्छन्दवादी कविताया प्रादुर्भाव जुल । अंग्रेजी शिक्षा प्राप्त यायेगु सौभाग्य प्राप्त जूम्ह लाकौलयात विलायतया भिन्च्यागू शदीया स्वच्छन्दवादी कवित 'शेली' 'किट्स' 'वाइरन्' पिनिगु कवितां प्रभावित याःगु खनेदु । थ्व हे कथं वय्कःया 'वसन्त वाणी' कविताय् - 'गुलि दक्क पुलांगु मभिगु थिति फस धाकुनं याय् समूह इति धकाः शेलिं थःगु West Wind कविताय् पश्चिमया फय्यात सकारात्मक परिवर्तनया प्रतिक कथं छयः थें लाकौलजुं नं 'धाकू'यात नव निर्माणया प्रतिक कथं नालादीगु दु । तर कवि लाकौलजुं पाश्चात्य स्वच्छन्दवादी प्रवृत्तिया कविता नेपालभाषाय् प्रयोग यानादीसां थ्वयात छगू प्रवाह कथं

नेपालभाषा साहित्यया इतिहास/१५१

न्याकेगु ज्या यानादी मफुत । थुपि हे निपु स्वपु कविताय् वय्कः सीमित जुयादिल ।

चित्तधर 'हृदय' (ने.सं. १०२६-११०२)

- पद्य निकुञ्ज (ने.सं १०५३)

- हृदय कुसुम (ने.सं १०५३)

- गौतम बुद्ध (ने.सं १०६७)

- 'हृदय कथा (१०६७)

- अन्तरध्वनि (१०६८)

- बभ्रुवाहन (१०६९)

- सुगत सौरभ (१०६९)

- न्हगु स्वां (१०६९)

- याकःमिया चा (१०७०)

- मञ्जुश्रीयात नेपालया बुद्ध (१०७४)

- चीन लुमना (१०७७)

- देगः (१०७८)

- थ्व नं जिमि वैत (१०८८)

- चित्तया चिन्तना हृदया भंकार (ने.सं. ११०६)

नेपालभाषाय् दकलय् न्हापा (पद्य निकुञ्ज-१०५३), (हृदय कुसुम-१०५३) कविता संग्रह पिकयादीम्ह कवि चित्तधर 'हृदय' खः । सांस्कृतिक चेतना जाःम्ह, भाषिक अनुरागं ग्वाःम्ह, अतितया गौरवया म्ये हालीम्ह कवि कथं परिचितम्ह 'हृदय' १९९७ सालया जेल काण्डय् लाये न्हयः हे कवि जुइधुकूम्ह खयाः नं जेलय् वनाः थ्वय्कलं स्वच्छन्दवादी कविता रुपय् थःत म्हसीके बियादिल । जेलय् कविरत्न सिद्धिचरण, केदारमान 'व्यथित'पिलिसें स्वच्छन्दवादी काव्य प्रवाहयात ज्वनादिल । प्रेम, रति, विरह, वेदना तथा सांस्कृतिक चेतनायात काव्यया विषयभूमि नालादिल । अथे खयाः नं वय्कः लिपा पूर्वक सिद्धिदासकालीन शास्त्रीय परम्परां मुक्त धाःसा जुयादीगु मदु । नीति उपदेश सुधारया सन्देश लिपा थ्यंक थ्वय्कःया काव्यय् ल्यनां तु च्वन । लिपाया पीढीयापि मेमेपिं कवितय्सं तक नं थ्वय्कःया शास्त्रीय प्रवृत्तियात अनुशरण यानाः थःपिनिगु मौलिकता नं तनाः नेपालभाषाय् शास्त्रीय काव्य धाःयात अज्ज न्हयज्याकेगु याःगु दु । थ्व हे कथं समालोचक कमलप्रकाश मल्लजु चित्तधरज्या काव्यलोकय् शास्त्रीयताया शिष्टता, वस्तुतत्त्वया सनातनता नैतिक गाभीर्य दु धकाः 'हृदय'या काव्यया मूल्यांकन यानादीगु दु ।

अथे हे चित्तधर 'हृदय' सुगत सौरभ, बभ्रुवाहन आदि थें ज्याःगु प्रबन्ध काव्यया रचना यानाः नेपालभाषाया काव्य लागायात तब्या.तच्चाः यानादीम्ह कवि नं खः । खयेत ला सिद्धिदास महाजुं नं सिद्धिरामायण च्वयाः नेपालभाषाय्

नेपालभाषा साहित्यया इतिहास/१५२



महाकाव्यया अभावपूर्ति यानादीगु खः, तर थ्व महाकाव्य थौं तक पूर्वक पिदंगु मनुनि । उकिं प्रकाशनया ल्याखं चित्तधरया 'सुगत-सौरभ' (ने.सं १०६९) महाकाव्य नेपालभाषाया दकल्य न्हापांगु महाकाव्य खः । थ्व महाकाव्य चित्तधरया जक अमर कृति मजुसे नेपालभाषाया हे छगू मू वंगु उपलब्धि खः । थ्व सफल चित्तधर 'हृदय'या काव्य शिल्प भावना कामना ब्याः कवि चित्तधरयात जक म्हसीकेबीगु मयासे नेवाः संस्कार संस्कृतिया शूक्ष्म चित्रण यानाः नेवाः जातियात विश्वय परिचित याकेगु ज्या याःगु दु । कवि चित्तधर थः थें हे नेवाः जातियात नं अमर अजर जुइकेत तिबः बियादीगु दु ।

मोटिलक्ष्मी उपासिका (ने.सं १०२९-१११७)

- चखुचिया सर्वय (ने.सं १११३)

साहित्य जगतय एम. लक्ष्मी - श्रीमती एम् लक्ष्मी - श्रीमती मोतिलक्ष्मी- सुश्री मोतिलक्ष्मी- मोतिलक्ष्मी उपासिका आदि थीथी नामं थःत परिचित याकादीम्ह मोतिलक्ष्मी नेपालभाषा साहित्यय जनसाधारण पाखें पिदंम्ह काव्य क्षेत्रय ता ई तक ल्हाः न्ह्याकाभाःम्ह न्हापांम्ह कवियत्री खः । खयेत ला थ्वय्कः स्वयाः न्ह्यः 'प्रज्ञा', व 'तारा'या नामं निपु कविता तत्कालीन बुद्ध धर्म व नेपालभाषा पत्रिकाय मिसापित नं च्वयेगु प्रोत्साहन विइमाः धकाः मिजपिसं पिकाःगु दुसा थ्व हे पत्रिकाय 'मयजुपिं विद्या ब्वना दीमाल' धैगु छपु कविता व मेगु छपु नं यानाः जम्मा निपु कविता लक्ष्मीनानीयागु पिदंगु दु । लक्ष्मीनानी थ्व हे निपु कविताय जक सीमित जुयादिल तर मोतिलक्ष्मी थःगु जीवनया अन्तिमकालय तक साहित्य साधनाय थःत पानादिल । दकल्य न्हापां 'धर्मदूत' पत्रिकाय 'चित्त पंक्षी' (ने.सं १०६३) नांगु कविता च्वयाः थःत कवियत्री कथं परिचित याकादीम्ह मोतिलक्ष्मी सुधारवादी युगया सुधारात्मक प्रवृत्ति जाःम्ह छम्ह उल्लेखनीय च्वमि खः (कमार्चाय, ने.सं ११०८:५७) । थःगु जीवनया अनुभूतियात सरल व सहज रुप काव्यात्मक अभिव्यक्ति बियादीम्ह मोतिलक्ष्मीजुं तर्क व बुद्धिया समन्वयात्मकता दुगु भाव व भावना जक थःगु कविताय प्वकेगु मयासे थःगु मूल्य व मान्यतायात नं प्रतिस्थापित यायेगु कुतः यानादीगु दु । तत्कालीन मेपि च्वमितयगु कविताय थें थ्वय्कःया कविताय नं स्वच्छन्दवादी रहस्यवादी प्रवृत्ति थाय् काःगु दु, मतिना दर्शन काव्यया विषयभूमि जूगु दु ।

सिद्धिचरण श्रेष्ठ (जन्म ने.सं १०३२-१११२)

- सीस्वां (ने.सं १०७०)
- फूस्वां (ने.सं १०८०)
- ग्वय्स्वां (ने.सं १११०)
- लुभुनी (ने.सं ११११)

नेपालभाषा साहित्यया इतिहास/१५३

- तृष्णा (ने.सं ११११)

- उत्तरा बिलाप (ने.सं १११४)

नेपालभाषाया काव्य ख्यलय स्वच्छन्दवादया प्रवर्तन यायेगु ज्या मूलभूत रुपं सिद्धिचरण पाखें जूगु दु । थ्वयां न्ह्यः स्वच्छन्दवादयागु प्रस्फुटन वैकुण्ठप्रसाद लाकौलपाखें जूसां उकियात निरन्तरता विइगु ज्या वय्कः पाखें मजुल । फलतः स्वच्छन्दवाद प्रवाह न्ह्याये मफुत । कवि श्रेष्ठया आगमन नेपालभाषा काव्यय स्वच्छन्दवादयात छगू प्रवाहया रुपय न्ह्याकेगु ज्या जुल । नेपालभाषा साहित्यय जक मखु, नेपाली भाषाया काव्यय नं स्वच्छन्दवादी धाराया प्रवर्तकया रुपय चर्चितम्ह सिद्धिचरणया स्वतन्त्र विषयचयन, कल्पनाशीलता, सौन्दर्यया उपासना, प्रकृतिपाखें क्रान्तिया प्रेरणा, कायेगु प्रवृत्ति उक्ति वैचित्रता, वैयक्तिकता आदि काव्यया विषयगत प्रवृत्ति खःसा संगीतात्मकता, सरलता, कोमलता, माधुर्यता आदि वय्कःया काव्यया शिल्पगत विशेषता खः । 'फूस्वां' 'सीस्वां' थुकिया दसु खः । 'सीस्वां' स भावुकतां अप्ठः थाय् काःगु दुसा 'फूस्वां'स वैचारिक सजगतां अप्ठः थाय् काःगु दु । सिद्धिचरण प्रकृतिप्रेमि कवि खयां नं वर्डसवर्थ थें प्रकृतियात 'विश्वव्यापी आत्मा' खनीम्ह कवि सिद्धिचरण मखु, वरु प्रकृति पाखें क्रान्तिया सन्देश काइम्ह 'शेलि' थें ज्वःम्ह कवि सिद्धिचरण खः । नेपालया साहित्यय सिद्धिचरणया थाय् अंग्रेजी साहित्यय 'शेलि'या थें दु (श्रेष्ठ, ने.सं १०८७:१६७-१६८)

सिद्धिचरणजुं नेपालभाषाय प्रबन्ध काव्यया विकासय नं महत्वपूर्ण योगदान बियादीगु दु । खण्डकाव्यया शास्त्रीय नियमयात अनुशरण मयासे थःगु कथं च्वयातःगु - लुभुनी, तृष्णा, उत्तरा बिलाप आदि थ्वय्कःया खण्डकाव्य नेपालभाषाय प्रबन्ध काव्यया धुकू जायेकेगु जक मखु न्हगु आयाम तक तनेगु याःगु दु । अथे हे नेपालभाषाय गीति कविताया धाः न्ह्याकेगुलिइ नं सिद्धिचरणया महत्वपूर्ण देन दु । थ्वय्कल न्ह्याकादीगु गीतिकाव्यया धाःयात अज न्ह्याज्याकेगु ज्या कवि दुर्गालाल यानादीगु दु ।

केदारमान 'व्यथित' (ने.सं १०३५-१११८)

- प्रतीक्षा (ने.सं १०६६)
- खबिं प्याःगु म्ये (ने.सं १०६७)
- दिवस चित्र (ने.सं १०६७)
- छ्वास (ने.सं १०७०)

केदारमान 'व्यथित' जेलय कवि चित्तधर 'हृदय', सिद्धिचरण, फत्तेबहादुरपनिगु उत्प्रेरणा काव्यख्यलय ल्हाः न्ह्याकादीम्ह खयाः नं थःगु हे मौलिक काव्यात्मक प्रतिभा दुम्ह कवि खः । थ्वय्कःया जेलकालीन काव्य तत्कालीन स्वच्छन्दवादी प्रवृत्तियात नेपालभाषाय छगू काव्य प्रवाह कथं न्ह्याकेगुलिइ तिबः बिउगु दुसा जेलकाल लिपा पिदंगु 'छ्वास' कविता सग्रह नेपालभाषाया काव्ययात छगू न्हगु मोड बिउगु दु । जेलकालीन काव्यय

नेपालभाषा साहित्यया इतिहास/१५४



अन्तर्मुखी, भावुक व आत्म केन्द्रित व्यक्तित्वया रूप्य खनेदुम्ह व्यथित 'छ्वास'य वयाः बहिर्मुखी समष्टिगत भावनायात कय्च्याइम्ह न्हूगु मूल्य व मान्यता स्थापना यायेत आतुरम्ह छम्ह राजनैतिक कवि कथं पिदंगु दु । वर्तमान समाज व्यवस्थाया अभिशाप स्वरूप वःगु अर्थ-संकट, घात प्रतिघात, विक्षिप्ति व विद्रोह अन्तर्जागतिक चेतना ग्वाःगु थ्वय्कःया छ्वास कविता संग्रहलं बहिर्मुखी प्रवृत्ति समष्टिगत भावनायात दुध्याकाः काव्य चिनेगु लेंपु सिइदयेक चायेकाबिल । लिपायापि कवितयत विशेष कथं प्रगतिवादी कवितयत थुकिं छगू दिशाबोध नं यात । तर अथे खःसां छायावादया आधारं प्रतिक्रिया व्यक्त यायेगु कविया पहः ल्याना हे च्वंगु व खुलस्त रुपं विषययात कवि न्ह्यःने तये मफुगु व छन्दया मोह, विम्ब, प्रतिकया ल्यज्याय नं मुक्कं न्हूगु जुइ मफुगु आदि कारणं यानाः थ्वय्कःयात स्वच्छन्दवाद व उत्तर आधुनिककालया दथुं पिदम्ह छम्ह संक्रमणकालया कवि कथं नालेछि । अथे हे थ्वय्कः नेपालभाषाय 'सनेट'या न्हापांम्ह प्रयोक्ता नं खः ।

**धर्मरत्न यमि (ने.सं १०३५-१०९५)**

- न्वाखें पुचः (ने.सं १०७१)
- सँदिया लिसः (ने.सं १०७२)
- विश्वन्तरया मचात दान (ने.सं १०७२)
- अर्हतनन्द महाकाव्य (ने.सं १०७३)

जेल दुने वनाः कवि जूम्ह धर्मरत्न 'यमि' नेपालभाषाया काव्य ख्यलय छम्ह निर्भिक क्रान्तिकारी व सुधारवादी विचारधारायाम्ह कवि कथं परिचित जूगु दु । थ्वय्कःया 'सँदिया लिसः' खण्डकाव्य, 'अर्हतनन्द' महाकाव्य नेपालभाषाया प्रबन्धकाव्यया धुकू जायेकूगु जक मखुसे समाजय वैचारिक तथा संस्कारगत हिउपाःया निरिति सः थ्वयेकूगु दु, अले चेतना व सुधारया जः हवःगु दु । कला पक्ष स्वयां नं वैचारिक पक्ष सशक्त जूगु थ्वय्कःया काव्यय थःगु राजनैतिक व्यक्तित्वया किंचः दु अले न्हूगु मूल्य मान्यता स्थापना यायेगु कुतः दु ।

**लक्ष्मीदेव श्रान्त (ने.सं १०३७)**

- नुगःया घाः (१०७३)

२००७ सालया क्रान्ति लिपा नेपालभाषाया काव्य ख्यलय न्हू न्हूगु प्रयोग, प्रवृत्ति नं दुथ्यन । थ्व हे कथं कविताय हास्य व्यंग नं दुथ्यत । थथे नेपालभाषाया काव्य ख्यलय हास्य व्यंगया प्रयोग यायेगुया श्रेय लक्ष्मीदेव श्रान्तयात नं दु । थ्वय्कः थःगु इलय मानवीय तथा सामाजिक विसंगति विकृतियात न्हिइकाः व्यंग प्रहार यायेगुलिइ तसकं हे चर्चितम्ह कवि खः ।

**प्रेमबहादुर कसाः (ने.सं १०३७-११११)**

- त्यपू (ने.सं १०८४)

नेपालभाषा साहित्यया इतिहास/१५५

थःगु आशा निराशायात काव्यात्मक अभिव्यक्ति बियादीम्ह प्रेमबहादुर कसाः नेपालभाषाय छम्ह स्वच्छन्दवादी कविता रूपय परिचित जूगु दु । प्रकृति, मतिना, जीवन दर्शनयात थःगु काव्यया विषय भूमि कथं नालादीम्ह कसाःया कविताय वय्कःया राजनैतिक जीवनया अनुभूति नं वानाच्वंगु दु ।

**हरिकृष्ण श्रेष्ठ (ने.सं १०३९)**

- ख्वबि (ने.सं १०७०)

जेल दुने वनाः कवि जूम्ह हरिकृष्ण श्रेष्ठ थःगु काव्य प्रतिभायात जेल दुने हे जक सीमित यानादिल । वय्कःया वियोग वेदनां जाःगु ख्वबि काव्य नेपालभाषाय स्वच्छन्दवादयात छगू प्रवाह कथं न्ह्याकेगुलिइ तिवः बिउगु दु । थथे स्वच्छन्दरुपं कल्पनाया आकाशय व्वयेफुम्ह कवि थःगु च्वसा दिकाछ्वःगु नेपालभाषाया निरिति तःधंगु हन्ताः खः ।

**सत्यमोहन जोशी (ने.सं १०४०)**

- जयप्रकाश (ने.सं १०४०)
- शुभराज्यभिषेकया म्ये (ने.सं १०७६)
- चखुंचां हाःगु म्ये (ने.सं ११०३)
- नेपालया राष्ट्रिय विभूति कलाकार
- अरनिकोया श्वेत चैत्य (ने.सं ११०४)

काव्यया माध्यमं भाषिक अनुराग, ऐतिहासिक तथा सांस्कृतिक गौरव, प्रजातन्त्र प्रति आस्था प्वंकादीम्ह सत्यमोहन जोशी नेपालभाषाय मुक्तक रचनां निसं महाकाव्य तकं च्वयादीम्ह च्वमि खः । नेपालभाषाय जक थ्वय्कःया निगू महाकाव्य पिदंगु दु । थ्वय्कःया 'जिगु छँ म्हासीकेसा' नांगु छपु कविता थौया परिवेशय तसकं हे लुमंकेबहगु कविता खः । थ्वय्कःया 'शुभराज्यभिषेकया म्ये' (ने.सं १०७६) दकलय न्हापां श्री ५ या सरकारं पिथंगु नेपालभाषाया सफू खः । अथे हे निक्वः निक्वः तक मदन पुरस्कार त्याकाः नेवाःतयगु हे गौरव ब्वःम्ह नेवाः च्वमि थ्वय्कः खः ।

**रामबहादुर कायष्ठ (ने.सं १०४२-११११)**

- पः क्वःछँ (१०७८)

प्रकृतिया साधारण क्रियाकलापय नं मानवीय कार्यव्यापारया आरोप बियादीम्ह रामबहादुर कायष्ठ छम्ह प्रकृति प्रेमी स्वच्छन्दवादी कवि खः । थ्वय्कःया कविताय छछे प्राकृतिक सौन्दर्यया वर्णन दुसा मेखेर प्रकृतियात नं मानवीय हर्षोल्लासय साथविइम्ह छम्ह हितैषिया रूपय ब्वयातःगु दु ।

**भैरवगोपाल वैद्य (ने.सं १०४३-१०६८)**

- भैरवामृत (प्रकाशन ने.सं. ११०९)

नेपालभाषा साहित्यया इतिहास/१५६



थःगु चिकिचा हाकःगु जीवनय नं नेपालभाषाया काव्यय स्वच्छन्दवादी प्रवाहयात न्ह्याकेगुली महत्वपूर्ण योदान वियादीम्ह छम्ह कवि भैरवगोपाल वैद्य नं खः । देश प्रेम, क्रान्ति, प्रजातन्त्रया कामना आदि थ्वय्कःया काव्यया विषयभूमि खः । तत्कालीन राणा सरकारया विरुद्धय क्रान्तिया निरिति जनतायात आह्वान यानाः कविता च्यादीपि कविपि मध्ये थ्वय्कः नं छम्ह खः । थ्वय्कःया 'आहाः देश थ्व जिगु नेपाः' 'घनघोर घटा थन वा' लुमंके वहगु कविता खः ।

तीर्थराज तुलाधर (ने.सं १०४५)

- फुट्कर कविता

थ्वय्कः नं नेपालभाषाय न्हापां गद्य कविता च्यादीम्ह कवि खः । तर थ्वय्कलं गद्य शैलीयात छगू प्रयोग कथं जक छयलादिल प्रवाह कथं न्ह्याकादी मफुत । जीवनया यथार्थतायात ब्याः थःगु कर्तव्य प्रति संकल्परत जुइत आह्वान यानादीम्ह तीर्थराज तुलाधर छम्ह आशावादी जीवनवादी कविया रुपय परिचित जूगु दु ।

ईश्वरानन्द श्रेष्ठाचार्य (ने.सं १०४६)

- न्ह्यवःसा (ने.सं १०६८)

- नुगःघाः (ने.सं १०६९)

- सन्देश (ने.सं १०७८)

ईश्वरानन्द नेपालभाषाय न्हापां गद्य कविताया प्रयोग यानादीपि मध्ये छम्ह जक मजुसे आधुनिक कविताया पूर्वाभास नं थःगु गुलिं गुलिं कविताय वियादी धुकूम्ह कवि खः । 'सुकुला पिवाः च्वच्चना' थज्याःगु हे छपु कविताया खः । न्हून्हुगु उपमा प्रतिकया माध्यम भावाभिव्यक्ति बिइगु, थःगु व्यक्तित्व अस्तित्व तंकाः म्वायेमाःगु थौया बाध्यता विवशताया चित्रण, गद्य शैलीया प्रयोग आदि विशेषतां जाःगु थज्याःगु कवितायात आधुनिक कविताया पलाःचिं धकाः मधासं मगाः । तर थज्याःगु प्रवृत्ति थ्वय्कःया छपु निपु कविताय खनेदु सा मेमेगु अप्वः थें कविताय थ्वय्कलं स्वच्छन्दवादया लँपु हे ज्वनादीगु दु ।

माधवलाल कर्माचार्य (ने.सं १०४७)

- लःफ्वं (ने.सं १०७८)

- न्हूगु म्ये (१०८४)

नेपालभाषाय गद्य कविता, पद्य कविता नापं म्ये नं चिनेगु यानादीम्ह माधवलाल कर्माचार्य जीवनया यथार्थतायात ब्याः नं सन्देश आदेश बिइगु शास्त्रीयतां थ्वय्कःया काव्य मुक्त जुइफुगु मदु । अथे खयाः नं चित्तधरपिसं थें पुलांप्रति आस्था तयेगु पलेसा छम्ह प्रजातन्त्रोत्तर कालया कविया नातां जागरणया पलाः चिं ब्वयेगु याःगु दु । थ्वय्कलं छयलादीगु उपमा प्रतिकया पह स्वयेबलय जेलकालीन कवित नाप थ्वय्कः सतिक लाःवःगु दु ।

नेपालभाषा साहित्यया इतिहास/१५७

फणिन्द्ररत्न बज्राचार्य (ने.सं १०५०)

- चुलि (ने.सं १०५१)

- तिमिला (ने.सं १०७८)

- सुख दुःखया म्ये

चित्तधर 'हृदय'या शास्त्रीय प्रवृत्तियात अनुशरण यानाः थःगु नं विस्कं विशेषता तनेफुम्ह कवि फणिन्द्ररत्न बज्राचार्य खः । प्रकृतिया साधारण दिनचर्याय नं मानवीय कार्यव्यापारया आरोप यानाः थौया समाजय न्ह्यानाच्वंगु सुख, दुःख, असमानता, अव्यवस्था आदियात काव्यया माध्यम न्ह्यव्यादीम्ह कवि फणिन्द्ररत्न बज्राचार्य खः । वैयक्तिक अनुभूतियात नं समष्टिगत जुइके फुगु थ्व वय्कःया काव्यगत विशेषता खः ।

चित्तरञ्जन नेपाली (ने.सं १०५१)

- मां लुमंकाः (ने.सं १०७१)

- प्रतिक्रिया (ने.सं १०७८) श्रेष्ठ सिरपाः प्राप्त-ने.सं. १०७८

चित्तरञ्जन नेपाली 'मां लुमंकाः' शोक काव्य च्याः नेपालभाषाय शोक काव्यया अभावपूर्ति जक यानादीम्ह मखु पाश्चात्य शैलीया 'एलेजि' नेपालभाषाय न्हापां दुतहयादीपि मध्ये छम्ह थ्वय्कः नं खः । अथे हे थ्वय्कलं न्हापां गद्य कविताया संग्रह 'प्रतिक्रिया' पिकयाः नेपालभाषाय गद्य कविता चिनेगु परम्परा न्ह्याकादिलसा 'उम्मर खैय्यामया .रुवाई' यात नेपालभाषां भाय हिलाः नेपालभाषाया काव्य ख्यलय खैय्यामया दर्शनयात प्रचार, प्रसार यानादिल ।

रमापतिराज शर्मा (ने.सं १०५१)

- जिगु म्ये (ने.सं १०७८)

कवि चित्तधर 'हृदय'या काव्य परम्परां प्रभावित जुयाः रीति व छन्दया दुने च्वनाः परम्परागत विषय वस्तुइ थरि थरि कथं कल्पनाया लं फिकाः, उत्तेजना स्वयाः अप्वः कल्पना व विचाःयात थः नालाः कविता च्वईपिं कवित मध्ये रमापतिराज शर्मा नं छम्ह खः । प्रकृति पाखें प्रेरणा काइम्ह, स्वाधिनता स्वतन्त्रताया हिमायति रमापति राज शर्मा 'सत्य, शिव, सुन्दर'यात हे कविया गन्तव्य नालादीम्ह कवि खः । तर छम्ह स्वच्छन्दवादी कविया भावाभिव्यक्तिइ गुलि स्वच्छन्दता, वैयक्तिक अनुभूतिया उत्कृष्टता दयेमाःगु खः, उलि थ्वय्कःया कविताय खनेमदु ।

रे.र.न स्यस्यः (ने.सं १०५२)

- मलख (ने.सं १०७५)

- उलः (ने.सं १११३)

कवि केदारमान 'व्यथित'जुं न्ह्याकादीगु समष्टिगत भावनायात आत्मसात यानाः थःगु मलख, काव्यय अभ थुकियात व्यापक रुपं ब्यादीम्ह कवि रे.र.न.

नेपालभाषा साहित्यया इतिहास/१५८



स्यस्यः खः । 'उल्ल' काव्यय् थ्यंकाः थ्वय्कःया राजनैतिक चेतना भन सजग व जागरुक जूगु दु । देशय् वःगु राजनैतिक हिउपालं हःगु लिच्वः प्रतिया प्रतिक्रिया काव्यया माध्यमं ब्यादीम्ह छम्ह कवि रे.र.नं स्यस्यः खः । राजनैतिक परिवर्तन धैगु केवल परिवर्तनया निति जक मखु, जनताया जीवनय् सकारात्मक परिवर्तन महङ्गु व्यवस्था न्ह्यागु हे ख्वाःपाः पुयावःसां व व्यवस्था ज्याख्यले मदु धयागु धारणा ज्वनाः बहुसंख्यक जनताया हक हीतया निति सः थ्वयेकादीम्ह छम्ह कवि रे.र.नं स्यस्यः नं खः ।

**मदनमोहन मिश्र (ने.सं १०५२)**

- सीता हरण (ने.सं १०८०)
- राम राज्य (ने.सं १०८२)
- नुगः खं (ने.सं ११८२)
- बागमतीया ख्वःसः (ने.सं. १११२)

थौया विसंगति विकृति प्रति स्याचुक क्वातुक ध्याचू नकाः मात्रिक, वार्णिक छन्दय् काव्यात्मक अभिव्यक्ति बियादीम्ह मदनमोहन मिश्र नेपालभाषाया गीतिकाव्य तथा हास्यव्यंग्य काव्य क्षेत्रय् विशेष योगदान बियादीम्ह छम्ह कवि खः । थ्वय्कःया हास्य व्यंग काव्यं थौया यथार्थ बोध यायेगुया नाप सुधारया सः थ्वयेकूगु दु ।

**नारायणदेवी (ने.सं १०५५) मोतिलक्ष्मी सिरपाः प्राप्त (ने.सं १११९)**

- मुख्स्वां (ने.सं १०७८)

नेपालभाषाया मिसाचवमित मध्ये दकलय् न्हापां कविता संग्रह पिकयादीम्ह नारायणदेवी नारीप्रतिया सामाजिक धारणा, अवहेलनायात ब्याः नारी जागरणया सः थ्वयेकादीम्ह, नारी शक्ति प्रति आशावादी जुयादीम्ह कवयित्री खः । सरल कोमल भाषां नं युगौयुगं निसं न्ह्यानाचवंगु नारी उत्पीडन, शोषणयात हार्दिक व मार्मिक जुडक नैसर्गिक अभिव्यक्ति थें च्वंक विडफुगु थ्वय्कःया काव्यगत विशेषता खः । 'थःगु साहसं हिमचुलि गइ छिं (श्रेष्ठ : ने.सं. १११६:१०१) धकाः कलाःयात लाकां नाप लनीगु सामाजिक परिवेशय् ब्वलनाः नं नारी शक्ति प्रति गुगु आस्था विश्वास कयादीगु खः, थ्व कवयित्रीया तःधंगु साहास खः गुगु कवयित्री थःगु जीवनकालय् हे थम्हं स्वयेखंगु दु ।

**दुर्गालाल श्रेष्ठ (ने.सं १०५७) नरोत्तम-इन्दिरा पुरस्कार प्राप्त (२०५७)**

- भुसुकाः (ने.सं १०७७)
- लिसं (ने.सं १०८० श्रेष्ठ सिरपाः प्राप्त-१०८०)
- पीजा (१०८७)
- चिनियाम्ह किसिचा (ने.सं १०८५)
- सर्गः सिवे नं धरती नमिगवाः (ने.सं ११०६)

नेपालभाषा साहित्यया इतिहास/१५९

- मतिनाया म्ये (ने.सं १०८३)
- लुँबु वहुँ (ने.सं १०८३)
- इन्कलाबया पलाः सः (ने.सं ११११)
- याकःफल्वा (ने.सं ११०७)
- जि स्वयम्भूया त्वाथः (ने.सं ११०७)

समय व परिस्थिति अनुसार थःत न्ह्याकेफुम्ह छम्ह कवि दुर्गालाल श्रेष्ठ खः । प्रारम्भय् सिद्धिचरणया काव्य प्रवृत्ति प्रभावितम्ह दुर्गालालजुं कवि सिद्धिचरणं थें गीति प्रवाहलय् कविता च्वयेगु जक यानादीगु मखुसे थः हे छम्ह लोकहवाःम्ह गीतकार नं जुयाः पिदन । थ्वय्कलं थौं मचानिसं बुराबुरितयूत तकं ल्वःगु काव्य सृजना यानादीगु दु । दुर्गालाल 'ताइभाबा' चिनियाम्ह किसिचा बियाः मचातयूत ह्ययेके सःम्ह, मतिनाया म्ये च्वयाः ल्यासे ल्याय्म्हतयूत यके सःम्ह, गजल हालाः बुराबुरितयूत लयूतायेके फुम्ह कवि कथं परिचित जूगु दु । तर थथे न्हापां स्वच्छन्दवादी कविया रुपय् पिदनादीम्ह दुर्गालाल श्रेष्ठ लिपा ईया हिउपाः लिसे प्रगतिवादी सः नं थ्वयेकादिल । थौया समाजय् विद्यमान विकृति विसंगतियात न्हयब्वयाः, शोषित पीडित जनताया पं लिनाः इमिगु हक हीतया निति सः थ्वयेकाः इमिगु विजय प्रति आशावादी जुयाः छम्ह जनपक्षिय कवि कथं दुर्गालालजुं थःत परिचित याकादिल । थुकथं दुर्गालालजुं थःगु काव्य अनुभूतियात न्ह्याबले मतिना, भुसुकाः, सुलिया पीजाय् जक सीमित यानामदी । बस्तुगत यथार्थता, समष्टिगत चिन्तनय् नं थःत पयानादिल । थौं वय्कःया काव्यं नेपालभाषाय् प्रगतिवादी प्रवाहयात ब्वलंकेत उल्लेखनीय योगदान बिउगु दु । तर अथे खयाः नं वय्कलं स्वच्छन्दवादी कविता च्वयेगु नं ल्वःतादीगु मदुनि । उकिं दुर्गालालजुयात समालोचक इन्द्र मालिं प्रगति व स्वच्छन्दताया सेतु नालादीगु उपयुक्त हे जू । अथे हे म्हो हे जक 'गजल' च्वःसां हार्दिकता, गम्भीरता, गेयता जाःगु वय्कःया गजल गजल साहित्यया विकासय् नं छपलाः तनाविउगु दु ।

**गिरिजाप्रसाद जोशी (ने.सं. १०५९-११०७)**

- पालिख्वौय (ने.सं १०७९)
- हाइ हाइ रे थ्वैया बात्वा (ने.सं १०८५)
- आगं (ने.सं १०८८)
- द्र कवा लिहां लिहां वः (ने.सं १०९०)
- सुथनाप सुथय् सुथय् (ने.सं १०९५)
- गिरिजाप्रसादया गद्य कविता (ने.सं १०९८)
- जनताया म्ये ११०० (ने.सं ११११)
- किसि दुम्ब्वः ११११
- मन्त्र (ने.सं ११०३)
- बुद्ध नुगः (ने.सं ११०३)
- तबन (ने.सं ११०५)

नेपालभाषा साहित्यया इतिहास/१६०



वना वनाथायू तक साहित्यिक लकस सृजना यायेफुम्ह गिरिजाप्रसाद जोशी नेपालभाषाया काव्य विधायात विविधतां छायापादीम्ह छम्ह सृजनशील प्रतिभा खः । गीति कविता, गद्य कविता, गजल, खण्डकाव्य आदि च्वयाः नेपालभाषाया काव्य विधायात समृद्ध यानादीम्ह गिरिजाप्रसाद जोशी न्हापां रहस्यवादी, स्वच्छन्दवादी कविया रुपयू खनेदयेकः भ्नाःम्ह खःसां लिपा वनाः प्रगतिशील प्रवाहयात नं वय्कलं आत्मसात यानादिल । तर थःगु कवितायू सामाजिक विषमतां छन्हू विद्रोहया रुप काइ धकाः शोषित पीडित जनताया पं लिनाः वर्गीय संघर्षया खँ न्ह्यथनाः थःत प्रगतिशील पक्षधर कविया रुपयू ब्यादीसां थ्वय्कःया काव्ययू सैद्धान्तिक निश्चितता स्वयाः नं भावुकता हे अप्वः खनेदु । थ्वय्कःया पालिख्वायू कविता संग्रहलयू च्वंगु निपु स्वपु कवितां धाःसा थौया आधुनिक कवितायू खनेदुगु वैचारिक ह्यूपाःया आभास याके व्युगु दु । नेपालभाषाया प्रबन्ध काव्यया विकासयू नं थ्वय्कःयागु योगदानया खँयू मिखा तिरिसइ फइमखु । 'मन्त्र' व 'बुद्ध नुगः' थ्वय्कःयागु चर्चित खण्डकाव्य खः ।

नर्मदेश्वर प्रधान (ने.सं १०६२)

- जिगु कविता छिगु कविता (ने.सं १११५) श्रेष्ठ सिरपाः प्राप्त (ने.सं. ११०५)

- जिगु गद्य कविता -ने.सं.१११९)

न्हापां लयवद्ध कविता चिनादीम्ह नर्मदेश्वर प्रधान कविताया माध्यम कविता सम्बन्धी थःगु दृष्टिकोण ब्यादीम्ह छम्ह कवि खः । थ्वय्कः जीवनयू थम्ह हनागु विविध अनुभूतियात कविताया रुप बियाः वैयक्तिक अनुभूति नं समष्टिगत जुइक 'जिगु कवितायात' छिगु कविता जक मखु, भीगु कविताया अनुभूति जुइके बियादीम्ह कवि खः । सरल व सहज भाषां अभिव्यक्त यानातःगु थ्वय्कःया कवितां जीवनया विविध क्षणया लुमन्तियात थना बिइगु याः, जीवनयात छम्हाः याउँक सिचुक न्ह्याकाबिइगु याः । लिपा थ्वय्कलं गद्य कविता नं च्वयेगु याना दिल थ्वय्कःया पिदंगु जिगु गद्य कवितां नेपालभाषाया गद्य कविताया लागायात अभ्र चर्कका व्युगु दु ।

लाभरत्न तुलाधर (ने.सं १०६९)

- फुटकर कविता

पुलांगु भजन म्येया परम्परायात न्ह्याकेगु कुतः यानाचवनादीम्ह लाभरत्न तुलाधर पुलांगु पहलयू न्हूगु म्ये च्वयादीम्ह नेपालभाषाया छम्ह गीतिकवि खः । वय्कलं थःगु त्वाःया भजन खलःया नितिं आपालं कविता म्ये पहलं लोक लय व छन्दयू चिनादीगु दु । भजन म्ये बाहेक थौं भीगु सामाजिक, आर्थिक, सांस्कृतिक क्षेत्रयू पिज्वयाच्वंगु विकृति, विसंगति, विषमता न्ह्यब्वयाः, थुकिया सुधारया नितिं सः थ्वयेकाः नं आपालं कविता चिनादीगु दु । थ्वय्कःया म्ये पुलां पहःयागु जुयाः नं बिचाः न्हूगु जूगु दु । थुकथं लाभरत्न तुलाधर वैचारिक रुपं थौया उत्तर

नेपालभाषा साहित्यया इतिहास/१६१

आधुनिककालया कवित लिसे ज्वःलानाः नं अभिव्यक्ति शैलीया दृष्टिं प्राचीन कवितयूगु लँपु ज्वनादीम्ह कवि खः ।

भूषणप्रसाद श्रेष्ठ (ने.सं १०७२)

- जिगु म्ये छंगु खः (ने.सं १११७)

नेपालभाषाया गजल परम्पराया विकासयू न्ह्यथने बहगु योगदान बियादीम्ह भूषणप्रसाद श्रेष्ठ नेपालभाषाया छम्ह प्रगतिशील आधुनिक कवि नं खः । ख ला भूषण प्रसादयागु गजल पिदने न्ह्यः मोहनकाजि, शैलेन्द्र श्रेष्ठपनिगु गजल पिदने धुंक्गु खः, तर गेयता, हार्दिकता व गजल विधान कथं भूषणप्रसाद श्रेष्ठयात छम्ह प्रतिनिधि गजलकार कथं समालोचकतयूसं प्रतिस्थापित याःगु दु । थ्वय्कलं छिनादीगु पलाखयू मेपिं गजलकारत - एच्. के. कपाली, वसन्त महर्जन, तबः मरु, ईश्वरी मैया आदिपिं खनेदयेकः वःगु दु । छम्ह गजलकारया रुपयू थ्वय्कःया म्येयू मतिनाया खँ भयबिया च्वंसां, पुलांप्रति अनास्था, वर्तमान प्रति असन्तोष अले न्हूगु मान्यता स्थापनाया चाहना नं आपालं वानाच्वंगु दु । थ्वय्कलं थःगु राष्ट्रिय जीवनपाखें हे उपमा बिम्बत कायेगु यानादीगु दु । सम्प्रेषणया तीक्ष्णता थ्वय्कःया काव्यगत विशेषता खः ।

चव्य उल्लेख जूपिं कवि कवियित्रीत बाहेक नं थः थःगु हे मौलिक विशेषता न्ह्यब्वयाः स्वच्छन्दवादी काव्यधारा बल्लकेगुलिइ तिबः बियावपि मेमेपिं नं न्ह्यथनेबहःपिं आपालं कवि कवियित्रीत दनि । थथे काव्यया सफू पिकयाः नेपालभाषाया काव्य धुक् तःमि यानावपिं नेपालभाषा स्वच्छन्दवादी प्रवृत्तियापिं कवित खः - शान्ति सौरभ- फुतिफाति (१०७३), रत्नध्वज जोशी- नारद मोह (१०६६), परमानन्द-छन्त लुमंका (१०९८), वासुपासा -जीवन लँपुइ (१०७८), भूपालमान सिंह - माः (१०६९), मा दश्वी (१०९४), आनन्द भूमि -छंगु लुमन्ति (११०५), गंभीरमान मलेकु - सितिकं वोंगु मतिना (११००), सुरेन्द्र महर्जन - नःलि स्वां (११११), रोशनकुमार - न्यायम्ह हि (११००) गणेशलाल श्रेष्ठ- निफो स्वां (१०७७), दामोदरलाल श्रेष्ठ - इव्यप्यगु घाः (१०८०), विनोद पी श्रेष्ठ - छ्वालि (१११२) नाति श्रेष्ठ -होल स्वां (१०८१), भगवतीप्रसाद श्रेष्ठ - दुघाः (१०७८), आशाकाजी सेवक - किपा (१०८०), उद्धव मास्के - वंम्ह अबुयात लुमंकाः (१०९३), श्याम मलेकु - नखत्या, फुति फुति ख्वबि, (११२०) कमलानन्द बज्राचार्य - कृशा गौतमी (१०८७), प्रेमबहादुर श्रेष्ठ - थाति (१०८९), रुद्रदास श्रेष्ठ - नेपालभाषाया म्ये (१०९७), रामभक्त कायष्ठ- सिद्धिदास लुमंका (१०९७), प्रकाश बज्राचार्य - कृशा गौतमी (११०३), नेमसिंह नकर्मि-सुलिमय (११०२), आर.एस. (रामशंकर) दोस्त - नुगः किपा (१०८१), मोहन दुवाल - चुलिजाःगु स्वां (१०८३), धनबहादुर तिमिला - मुसुकागु मिखा विमल ताम्राकार - तिलिकता स्वां (११११), जीस्वां (१११३), साकुरा (१११५), मिगुलि (१११७), तबः मरु - अय्लाः (१११७), धनकृष्ण ज्यापु - यम युद्ध (१०९३), बुद्धिलाल ज्यापु - थ्वयाच्वंगु सः (११११), छत्रबहादुर कायष्ठ- उपहार (१०९५), मां ज्वालादेवी

नेपालभाषा साहित्यया इतिहास/१६२



लुमका (१०९७), प्रगतिया लेंय (११०२), विनोद पि - छ्वाल (१११२), नरेन्द्रबहादुर श्रेष्ठ - प्याःचाःगु सः (११११), कृष्णप्रसाद लुंबि - (१११५), जीवनया लेंपुड (१११४), अमरराज जोशी - आस्कुति आत्म विलाप (१११७), श्याम प्रजापति स्वया छन्त जिं (१११७), ईश्वरी मैया श्रेष्ठ - जिन्दगीया सवाः (१११८) एच. के. कपाली, - तुगल्य अगिमथः च्याः (१११८) मोहनकाजी - भचाभचा, शैलेन्द्र श्रेष्ठ - गजलया कलकल, लक्ष्मीलाल श्रेष्ठ - मतिनाया सवाः कृष्णप्रसाद दुवाल - जिं हालागुम्पे (ने.सं. १०८६), शाक्य, सुगत - छंगु हःपाल्य, हिन्दमैत्रा वैद्य - मतिनाया स्वांफुवः (१११६) आदि, आदि ।

थुपिं बाहेक विविध पत्रपत्रिकाय कविता च्याः नेपालभाषाया काव्य ख्यः समृद्ध यायेगुलिइ तिबः बियावीपि मेपिं कवित नं आपालं दनि । गथे मोहनहिमांशु थापा, सुन्दरकृष्ण जोशी, इन्दिरा नेपाली, मंगलमान शाक्य, धूस्वां सायूमि, चिनिहिरा शाक्य, कमला चित्रकार, केशरीलक्ष्मी तुलाधर, कमलमैया स्थापित जीवन मल्ल, साहना श्रेष्ठ, आदि, आदि ।

## ख) लिच्वःगु आधुनिककालया काव्य (ने.सं १०८४ निसं)

नेपालभाषा साहित्यय आधुनिककालया शुरु जेलकालं निसं जूगु खः धकाः नाला तःसां थौं विश्व साहित्यय पिदंगु कथंयागु आधुनिक कविताया शुरुवात थ्व हे लिच्वःगु आधुनिककालं निसं तिनि जुल । थ्व युगय छ्छे छ्छ्वः कवितयसं परम्परागत स्वच्छन्दवादी प्रवृत्तियात नालाः काव्य साधना यानां तुं च्वन सा मेखेर गुलिखय कवितयसं न्हूगु काव्य प्रवृत्तियात ज्वनेगु यात । थथे न्हूगु युगया प्रतिनिधित्व याइपिं कवित पिदंगु खँय तत्कालीन ऐतिहासिक घटनायात लुमकेबह जू । २००७ सालया प्रजातन्त्र लिपा रेडियो नेपालय नेपालभाषायात नं थाय बियाः नेपालभाषां नं समाचार बिइगु यात । तर २०१७ सालय वनाः संसदीय व्यवस्थाया विघटन तथा पञ्चायती व्यवस्थाया स्थापनां जनताया राजनैतिक अधिकारय हस्तक्षेप जुल सा पञ्चायति सरकारया 'एकदेश' - 'एकभाषा' नीति अनुरूप ने.सं. १०८५ सालय रेडियो नेपालं समाचार बिइगु नं दिका बिसंलि जनताया भाषिक अधिकार नं हनन् जुल । थज्याःगु सरकारया दमन नीतिया विरोधय तत्कालीन भाषाप्रेमीतयसं दच्छियंकं धयाथें त्वाःत्वाल्य, चुकय बहालय वाः वाः पतिकं साहित्य मुंज्या यात । थःपिनिगु हक अधिकारया निंति सः थ्वयेकल । थथे भाषिक आन्दोलनय दुध्याःपिं आपालं भाषा सेवीतयत तत्कालीन

निरंकुश पञ्चायती सरकारं जेल नेलया यातना नं बिल । तर गन शोषण दमन जुइ अन प्रतिकार नं जुइ धयाथें त्वाः त्वाल्य जूगु साहित्य सम्मेलनं आपालं न्हून्हुपिं कवित बुइकल । कवि मजुपिं नं कवि जुयाः पिदन । अथे हे ने.सं. १०९१ स 'जीवन दबू' कार्यक्रम नं लिक्का बिल । थथे कवितयगु जन्म हे आक्रोष, असन्तोष व विद्रोहं जूगुलिं थुमिगु कविताया भावभूमि, अभिव्यक्तिया पह न्हापायापिं कवितयगु स्वयाः पाःवन । मेखेर २००७ सालया स्वतन्त्र वातावरणं नेपाली जनतायात विश्वया गतिविधि नाप परिचित जुइगु मौका बी धुंकूगु खः । थ्व हे कथं थ्व इलय थ्यंबलय विश्वय पिदंगु अनेक वाद तथा साहित्यिक प्रवाह प्रवृत्तिनाप थनया आपालं साहित्यकारत परिचित जुइ धुंकूगु जुल । फलस्वरूप नेपालभाषाया काव्यय देय दुनेया न्हूगु वस्तुस्थिति न्हूगु वातावरणं बुइकूगु असन्तोष विद्रोहया किचः नापं विश्वय पिदंगु न्हून्हुगु प्रवाह प्रवृत्तिया प्रभाव नं लाः वन । बिलायतया टि.एस. इलियट, अमेरिकाया इज्जा पाउण्ड पिंसं न्ह्याकूगु ई.सं. १८९२या आधुनिक कविता प्रवाह तथा एशिया महाद्वीपय लु शुन, माओ त्से तुंग, किम इल सुंग आदिपिसं साहित्यय नेतृत्व याःगु प्रगतिवादी प्रवाह नेपालभाषाया काव्यय दुथ्यन । थथे प्रगतिवादी प्रवाह तथा आधुनिक कविता अलग्ग अलग्ग क्षेत्रया विषय, अलग्ग अलग्ग थासं विकास जूगु खयाः नं नेपालभाषाया काव्यय नाप नाप हे दुथ्यन । थथे नाप नाप हे दुथ्यगु छगू संयोग खः । फलतः न्हापाया कविताया तुलनाय थौंया आधुनिक कविता, रुप व शैलीया दृष्टिं जक पाःगु मखुसे थौंया कवितां विषयगत रुपं वैचारिक रुपं नं छगू न्हूगु मोड ज्वन, न्हूगु युग हन । थ्व आधुनिक काव्य प्रवाह वर्षाया खुसिवाःथें छगू आन्दोलनया रुपय जक न्ह्याःगु मजुसे थ्व छगू ग्यसुलाःगु उपलब्धी सिद्ध जुल । मल्ल, ने.सं. १११० पृ ३३) । थथे न्हूगु मोड ज्वंगु न्हूगु युग प्रतिनिधित्व याःगु 'कविता संग्रह' सफू प्रकाशनया ल्याखं ने.सं. १०८६ स पिदंगु गाजलं दाःगु चा खःसा पाण्डुलिपिया ल्याखं ने.सं. १०८४ स श्रेष्ठ सिरपाः त्याकूगु पूर्णबहादुर वैद्यजु यागु सरासु कविता संग्रह खः । पूर्णबहादुर वैद्यया सरासु कविता संग्रह प्रकाशनया ल्याखं ने.सं. १०८७ स तिनि पिदंगु खःसां ने.सं. १०८४ स हे 'सरासु'यात नेपालभाषाया कविताया इतिहासय छगू न्हूगु प्रयोग, न्हूगु आन्दोलन घोषणा यानाः च्वसापासां श्रेष्ठ सिरपाः तर्क द्वायै धुंकूगुलिं नेपालभाषाय आधुनिक कविता 'गाजलं दाःगु चा' स्वयाः न्ह्यः हे दुथ्यने धुंकूगुयात स्वीकार मयासं मगाः । भिंछ्म कवितयगु प्रतिनिधि कविता संग्रह 'गाजलं दाःगु चा' थीथी कवितयगु त्वाकःबुकः सः खःसा, स्वीगु कृतिया संग्रह 'सरासु' सचेत व सुस्पष्ट धारणा दुम्ह कविया मुक्कंगु सः खः (मल्ल, ने.सं. १११०:२३) । थीथी च्वमि व इमिगु कविताया लिधंसाय नेपालभाषा आधुनिक कविताय खनेदुगु मू मू प्रवृत्तियात थुकथं न्ह्यव्वये छिं -

**शिल्पगत प्रवृत्ति :** सम्प्रेषणया तीक्ष्णता तिब्रता थौंया आधुनिक कवितयगु छगू मू कुतः जूगु दु । थुकिया निंति थौंया कवितयसं न्हू कथंया शैली न्हून्हुगु अभिव्यक्ति प्रक्रियायात छयलेगु याःगु दु । थ्व हे कथं थौंया कवितयसं छन्द,



अभिव्यक्तिं प्रक्रियायात छयलेगु याःगु दु । थ्व हे कथं थौया कवितय्सं छन्द, मात्रा, लय, स्वर, ताल आदि शास्त्रीय नियमं चिकाः कविता च्वयेगु मयासे मुक्त गद्य शैलि भावाभिव्यक्ति विङ्गु याःगु दु । छन्द, मात्रा, स्वर आदि शास्त्रीय विधानयात अमिसं भाव अकुण्ठित रुपं पिब्वयेगु ज्याय् छ्गू पगः थें तायेकूगु दु । थ्व हे कथं न्हापा छन्दबद्ध कविता च्वयाच्वपि कवितय्सं तर्कं मुक्त गद्य शैलीयात ज्वंगु दु । थौया जटिल परिस्थितियात पितहयेत गद्य शैली उपयुक्त तायेकूगु दु । अथे धकाः मुक्त छन्द नं मनोमानी छन्द मखु । कवि थःगु भाव विचाःया आन्तरिक गति व यतियात थुकिइ नं पालन यायेगु याः । थुकथं गद्य शैली थौया आधुनिक कविताया छ्गू विशेषता जूगु दु ।

भाव अकुण्ठित रुपं पितविइत थौया कवितय्सं गद्य शैलीयात छयःगु दु सा प्रभावोत्पादक सम्प्रेषणया नितिं तप्यं क अभिव्यक्ति विङ्गु मयासे प्रतिक, चित्र, उपमा, विम्ब, विरोधाभास, आदिया माध्यमं भावभिव्यक्ति विङ्गु याःगु दु । उकिं थौयापि कवितयगु अभिव्यक्ति म्हिगःयापि कवितयगु थें तप्यं मजू । थौयापि कवितयगु बौद्धिक लागा आपालं चकने धुंकूगुलिं व जीवनशैली, सामाजिक परिवेश आपालं पाये धुंकूगुलिं म्हिगः साहित्य जगतय् छयलावयाच्वंगु थीथी उपमा प्रतिक नं थौया जटिल समस्या वृहत परिवेश च्वयेगु नितिं असक्षम, अपूर्ण जूगु दु । उकिं थौयापि कवितय्सं पुलांगु साहित्यिक परम्परां दं वःगु, आपालं ज्यले धुंकूगु उपमा प्रतीकया पलेसा न्हूगु व थौया समस्या, थौया परिवेशया सही प्रतिनिधित्व याइगु उपमा प्रतिक छयलेगु नं याःगु दु । थ्व हे कथं सम्बन्धित क्षणय्, सम्बन्धित वातावरणय् थम्हं खंगु, अनुभव जूगुयात थौया कवितय्सं विम्ब, प्रतीक, उपमाया रुपय् छयःगु दु । फलस्वरुप ऐतिहासिक तथा साहित्यिक पात्र, घटना, दुर्घटना आदि तर्कं प्रतिक, उपमा, विम्ब जुयाव्यूगु दु । थ्व हे कथं थौ उपमा चित्रतयगु क्षेत्र तसकं व्यापक व विस्तृत जू । अले थुमिगु प्रयोगय् न्हापाया कवितय्सं थें छम्हस्यां मेम्हसिगु अनुशरण यायेगु मयासे थःथःगु कथंयागु छम्हसिया मेम्ह नाप पाःगु जूगु दु । थुकथं थौया कवितय्सं भावाभिव्यक्ति विङ्गु भवलय् न्हूगु शिल्प न्हूगु कलात्मक दक्षता क्यंगु दु ।

**वैचारिक प्रवृत्ति :** थौया 'आधुनिक कविता आन्दोलन' छ्गू साहित्यिक आन्दोलन जक मजुसे वैचारिक आन्दोलन नं खः । आधुनिक कवितय्सं पुलांगु काव्यशिल्प, शैली प्रति जक अनास्था ब्वःगु मखु, इमिगु अनास्था, पुलांगु मान्यता, पुलांगु विचाः, पुलांगु संस्कार प्रति नं खः । म्हिगः म्हिगः तर्क भ्नी पूर्खा आस्था व विश्वासया मिखां स्वयाच्वंगु धर्म, संस्कार, विश्वासप्रति हे थौया कवितय्सं अनास्था प्वकूगु दु, विद्रोह क्यंगु दु, उपहास याःगु दु । अथे हे थौया काव्यधारा दुने छेछे पुलांगु मूल्य मान्यता प्रति तच्चःगु अनास्था अविश्वासया सः तायेदुसा थौया मूल्य व मान्यता, मनु मनु जुयाः म्वाये मफइगु थौया सामाजिक विसंगति, विकृति, विवशता, बाध्यताप्रति नं थौया कवितय्सं उतिकं हे असन्तोष विद्रोहया सः प्वकाच्वंगु दु । तर अथे खःसां नं थौया बहुसंख्यक आधुनिक कवित कन्हय्

वइगु भविष्य प्रति धाःसा निरुत्साहित जुयाः ल्हा प्वःचिना च्वंगु मदु । अले व्यक्तिगत अस्तित्व जुइमा, सामाजिक अस्तित्व जुइमा छ्गू न्हूगु हे अस्तित्व कायम यायेगु थौया आधुनिक कवितयगु विशेष वैचारिक आग्रह खनेदु । न्हूगु मूल्यया चाहना छ्गू रोमान्टिक चाहना मखु जीवनमुखी यथार्थया छ्गू सज्जा खः । समानता, स्वतन्त्रता, न्याय व भातृत्वया भावनां ध वाकाः समाजय् व्यक्तिया थाय् व मान्यतायात क्वातुकेगु थ्व न्हू मूल्यया आदर्श खः (मल्ल, ने.सं. १९९०:२४) ।

थ्व हे कथं थौया आधुनिक कवित न्हूगु मूल्य व मान्यता स्थापनाया नितिं, न्हूगु अस्तित्वबोधया नितिं संघर्षरत संकल्परत जूगु दु । थथे जूगुया मू हनि न्हू स्थिति प्रति थौयापि कवितय्के दुगु सजगता सतर्कता खः अले परम्परागत मूल्य व मान्यतां थौया जीवनया जटिलतायात ज्यंके मफुगु व थौया जीवनयात सकारात्मक रुपं न्ह्याके मफुगुलिं खः । उकिं थौया कवितां हृदयपक्षयात स्वयाः नं वृद्धिपक्षयात अप्वः थिइगु याःगु दु ।

**विषयगत प्रवृत्ति :** थौया नेपालभाषाया आधुनिक कवितय्सं धर्म, मतिना, प्रकृति, विरह, वेदना आदि सीमित विषयया परिधिइ जक च्वनाः कविता च्वयेगु मयासे थौया सामाजिक, आर्थिक, राजनैतिक विसंगति, विकृति ब्वलकूगु विविध समस्यायात कयाः कविता च्वयेगु याःगु दु । थौया कविताया केन्द्रविन्दु मनु खः । मनुया अस्तित्व समष्टिइ जक दइगुलिं, समष्टिगत भावना, कामना हे थौया कविताया विषयभूमि जूगु दु । थ्व हे कथं गुलिं गुलिं कवितय्सं थौया मनु, मनु जुयाः म्वाये मखंगु इमिगु अस्तित्व न्हियान्हथं = हास जुयावंगु प्रति आक्रोश, बाध्यतायात कविताया विषयभूमि कथं नालेगु याःगु दु सा गुलि गुलिस्यां सामाजिक विषमता, आर्थिक शोषण, वर्ग संघर्षयात कविताया भावभूमि याःगु दु । थौया कवितय्सं ज्वनीगु समस्या व्यक्तिगत मजुसे समष्टिगत जूगु दु । थ्व छ्गू समाज छ्गू राष्ट्रय् जक लिमकुंसे विश्वव्यापि तर्कं जूगु दु । निजात्मक अनुभूतिइ नं विश्व वेदनाया सः प्रतिध्वनित यायेगु जूगु दु । विश्वय् न्ह्यानाच्वंगु घात, प्रतिघात, घटना, दुर्घटना न्ह्यागु नं थौ कविताया विषय जुइफुगु दु ।

थथे नेपालभाषाया काव्यय् खनेदुगु शिल्पगत, वैचारिक व विषयगत हिउपाः राष्ट्रिय अन्तर्राष्ट्रिय स्तरय् पिदंगु विविध घटना दुर्घटनाया प्रतिविम्ब खः, ज्ञान विज्ञानया विकासया परिणाम खः । शिक्षाया प्रचार व यातायात संचार आदिया विकास थौया कवितयगु बौद्धिक लागा चकने धुंकूगु दु । इमिगु अध्ययन चिन्तन छ्गू समाज छ्गू जातिइ जक सीमित मजुसे राष्ट्रिय अन्तर्राष्ट्रिय क्षेत्रय् तर्कं व्यापक व विस्तृत जुइधुकूगु दु । विश्व हे थौ छ्गू गां (Global Village) जुइ धुकूगु दु । थ्व हे कथं छ्गू थासय् जूगु घटनाया प्रभाव मेगु थासय् लाइगु छ्गू भाषा साहित्यय् वःगु प्रवाह मेगु भाषा साहित्यय् न्यनावनीगु स्वाभाविक खः, संयोग मखु । अभ् नेपालभाषाया थौया आधुनिक कवित छ्गू हे ई, छ्गू हे परिवेशय् ब्वलीपि जूगुलिं इमिगु कविताय् अभिव्यक्तिया खंखः जक पानाः भाव



विचा: तर्क व हे व हे जूवंगु दु । थौ नेपालभाषाय् थुगु प्रवृत्तियापि प्रमुख कवि/कवयित्री थुकथं दु ।

## प्रमुख कवि/कवयित्री

रमेश 'मधु' (ने.सं १०५९-११०५)

- फुट्कर कविता

कवि रमेश 'मधु' नेपालभाषाया आधुनिक कवित मध्ये उमेरं थकालिम्ह खया: नं न्हू कविताया प्रणेता कवि धा:सा मखु । थ्वय्क: स्वच्छन्दवादी काव्य धाराया लैपु न्ह्या:वना: आधुनिक कविताया दुवातय् थ्यं: भ्ना:म्ह कवि ख: । उकिं कवि 'मधु' या प्रारम्भिक कविताय् जीवनयात विश्लेषण यायेगु रहस्यवादी स्वच्छन्दवादी प्रवृत्ति खनेदु सा लिपाया कविताय् सामाजिक भावभूमियात ग्रहण याना: थौया बाध्यता विवशता न्ह्यब्वयेगुया नापं विसंगति विकृति प्रति विद्रोह प्वंकेगु प्रवृत्ति पिज्व:गु दु । कवि 'मधु'या शिल्पगत प्रवृत्ति सरल व सुगम जुया: नं गहन जू । कविताया सम्प्रेषणय् गम्भीर कल्पना सुलाच्चंगु दु ।

श्यामसुन्दर सैजु (ने.सं १०६०)

- फुट्कर कविता

न्हापां परम्परागत कविता च्वयाच्चनादीम्ह श्यामसुन्दर सैजुयात लिपा आधुनिक कविता च्वयादीबलय् नं पद्यात्मकताया मोहलं सालाका:गु खनेदु । नैराश्य, असन्तोष, आक्रोस थ्वय्क:या कविताया मूलभूत प्रवृत्ति जूगु दु । थ्वय्क:या असन्तोष व आक्रोस थौया मनुखं अन्तर विरोधपूर्ण जीवन हनेमा:गुया बाध्यता विवशताप्रति ख: ।

सत्यभामा माथेमा (ने.सं १०६०)

- फुट्कर कविता

सत्यभामा नेपालभाषाय् न्हापांम्ह आधुनिक कवयित्री ख:। खयेत ला इन्दिरा नेपाली थ्वय्क: स्वया: आपालं न्हय: गद्य शैली ज्वना: काव्य छ्यलय् खनेदयेक: भ्ना:गु ख: । तर थ्वय्क:या काव्यय् स्वच्छन्दवादी प्रवृत्ति थाय् का:गुलिं 'इन्दिरा नेपाली'यात न्हापांम्ह आधुनिक कवयित्री कथं नाले मछिं । सत्यभामाया कविताय् शैली शिल्पया दृष्टिं जक मखु विषयवस्तु तथा वैचारिक दृष्टिं नं वाला स्वयेबलय् न्हूगु कविताया भाव अविलम्बित जूगु दु । थ:गु कविताय् नैराश्यया भाव अप्व: प्वंकादीम्ह कवयित्री सत्यभामा थौया मनूया प्रगतिया बाधक तत्व रुढी संस्कार परम्परायात खंकादीगु दु सा निस्क्रिय निर्जिव जुनि हनेमा:गु थौया वर्तमान प्रति नं आक्रोस, व्यंग्य प्वंकादीगु दु ।

नेपालभाषा साहित्यया इतिहास/१६७

पूर्णबहादुर वैद्य (ने.सं १०६१)

- सरासु (ने.सं १०८४) श्रेष्ठ सिरपा: प्राप्त, प्रकाशन - १०८७

- ल: ल: ख: (ने.सं ११११, छता हे विषयया काव्य)

पूर्णबहादुर वैद्य नेपालभाषाया आधुनिक कविताया न्ह्यलुवाया नापं छम्ह प्रगतिशील कवि नं ख: । थ्वय्क:या 'सरासु' कविता संग्रह नेपालभाषाया काव्यय् छगू न्हूगु आयाम, न्हूगु मोड न्ह्याकूगु दु सा, 'ल:', 'ल: ख:' कविता संग्रहं अभ् छतं थहांवना: नेपालभाषाया काव्ययात अभ् अप्व: परिस्कृत, परिमार्जन याना: बिउगु दु । थ्वय्क:या काव्यय् खनेदुगु समसामयिकता बोध, सामाजिक मूल्य चेतना, विश्व वेदनायात नं निजात्मक अभिव्यक्ति याना यंकेगु क्षमता, पुलां प्रति अनास्था विद्रोह, वर्तमान प्रति असन्तोष भविष्य प्रति सतर्कता, न्हूगु मूल्य व मान्यता स्थापना यायेगु कुतः, विम्बयात लाक्षणिक भाषां पिब्वयेगु प्रवृत्ति, न्हू न्हूगु उपमा प्रतिकया प्रयोग नेपालभाषाया काव्यय् व:गु आधुनिकताया बोध याकूगु दु सा, थौया शोषित पीडित जनताया यथास्थितिया चित्रण जक मखु, 'माथं मवंगु बैया कारणं थनु संघर्ष ब्वलनी अले सुं बलवान व शक्तिवान जुइवं खुसिबा:यात म्हूचिना: तये फइमखु' धयागु जनताया संघर्ष प्रतिया विश्वास नेपालभाषाया काव्यय् व:गु प्रगतिवादी प्रवाहयात अभ् मजबूत याना बिउगु दु । थुकथं वैद्यजु सचेत सुस्पष्ट धारणा दुम्ह छम्ह प्रगतिवादी आधुनिक कवि कथं प्रतिस्थापित जूगु दु । वैचारिक स्पष्टता जक मखु बौद्धिकता व हार्दिकताया समन्वय, सम्प्रेषणया तिव्रता तीक्ष्णतां वैद्यजुया कविताया मेगु विशेषता ख:। मिहग: तर्क भी पुर्खा आस्थाया मिखां स्वयाच्चंगु धर्म, संस्कृति, विश्वासयात थौं थम्ह जक मखु, जनमानसं हे असहमत व अस्वीकार याकेगु व्यंग्य चित्र बिइफुगु, अले न्हूगु मूल्य मान्यता नीस्वनेगु चाहना जन हृदयलय् नं म्वाकेफुगु थुकिया दसु ख: । गहन विषययात नं सहज सरल रुपं अभिव्यक्त यायेगु, मूलत राष्ट्रिय जीवन हे थीथी उपमा प्रतिक लानाकायेगु, मातृभूमि तथा जनताप्रतिया अनुराग, चिन्तन मननं जा:गु थ्वय्क:या कवितां थ्वय्क:यात छम्ह जनकवि जातीय कवि जक मखु, राष्ट्रिय भावनां ग्वा:म्ह कवि कथं नं प्रतिस्थापित याकूगु दु सा थौया राष्ट्रिय, अन्तराष्ट्रिय मानवीय चेतना, मानवीय पीडा व भावनाया सामष्टिगत स्वरुप दुगु थ्वय्क:या कवितां नेपालभाषा काव्यं वृहत् लागा ज्वंगुयात स्वीकार याके बिउगु दु । उकिं समालोचक इन्द्र मालिजु वैद्यजुया कवितां साहित्यिक आन्दोलन जक मखु, वैचारिक तथा कलात्मक आन्दोलन नं न्ह्या:गु नालादीगु दु ।

नातिवज्र बज्राचार्य (ने.सं १०६१)

- सुतिल: (१०९१)

- थम्हं थ:त लुइकाबले (ने.सं ११०२)

- जीवनया दुवातय् (ने.सं १११३)

चिकिचा चिकिचा हाक:गु मुक्तक च्वयादीम्ह नातिवज्र बज्राचार्य म्हो खँग्वलं नं नुगलय् थिइक आपा: खँ धायेफुम्ह कवि ख: । थौया विषमतां जा:गु

नेपालभाषा साहित्यया इतिहास/१६८



स्थितिइ व्याहंशुलिया सः ताये दयेकाः निभाः जः लुइकेत भी नि सक्रिय जुइमाःगु प्रति सचेत यानादीम्ह कवि नातिबज्रयाके गनं गनं पुनर्जागरणकालया कवितय्गु प्रभाव ल्यं दनिगु खनेदु ।

**योगेन्द्र प्रधान (ने.सं १०६२)**

- लूसः (ने.सं १०८४)
- छगू दीप छगू लास ( ने.सं. १०८८), श्रेष्ठ सिरपाः प्राप्त
- हाबलासा ( ने.सं. १०९८)
- लुमधंगु लकस (ने.सं ११२०)

न्हापां परम्परागत कविता चव्यादीम्ह योगेन्द्र प्रधानजुं छगू दीपः छगू लास कविता संग्रह निसैं आधुनिक काव्य प्रवृत्तियात नालाः कविता चव्यादिल । थ्वय्कःया सामाजिक कुरीति बेथिति प्रति कठोर व्यंग्य प्रहार यानाः, आर्थिक शोषण, असमानताया विरुद्धय् सः थ्वयेकाः, सामाजिक यथार्थयात वयातःगु 'छगू दीपः छगू लास' व 'हाबलासा'या प्रकाशनं न्हू चिनाखं नाप ल्वाकज्याना वयाच्वंगु प्रगतिवादी सःयात भुन तिखर यानाबिल । न्हू चिनाखंया छगू विशेषता प्रगतिवादी सः नं खः धयाथें च्वंक क्यनाबिल । थुकथं थौया वर्तमान समाजय् खने दयाच्वंगु विविध विकृति विसंगतियात व्वयेगु नितिं आपालं अभिव्यंजनात्मक वाक्यांश प्रभावोत्पादक उपमा व प्रतीक छ्यलादीम्ह कवि योगेन्द्र प्रधान थौ नेपालभाषाया छम्ह यथार्थवादी आधुनिक कविया रुपय् प्रतिस्थापित जूगु दु ।

**सुन्दर मधिकर्मि (ने.सं १०६३)**

- लबु गुगु दना वइ (ने.सं १०९१)
- आल तनीमखु (ने.सं १०९९)
- फसय् थवइ च्वंगु सः (ने.सं ११०५)
- थःगु हे धालं (ने.सं १११७)
- आकाश पियाचवनी (ने.सं १११८)

सुन्दर मधिकर्मि नेपालभाषाया छम्ह नांजाःम्ह आधुनिक कवि खः। पुलांगु परम्परा, संस्कार धर्म प्रति तच्चःगु विद्रोह क्यनादीम्ह सुन्दर मधिकर्मि क्रान्तिया हिमायति कवि खः । थौया मनुया विकासया नितिं रुढीगत परम्परा धर्म बाधक जुयाच्वंगु तायेकादीम्ह कवि सुन्दर मधिकर्मि, थःगु कविताय् सकारात्मक परिवर्तनया नितिं क्रान्तिया आवश्यकता क्यनादीगु दु । मनुखं थःगु भिया नितिं थःत विश्वास यायेगु, थःगु 'स्वत्व' यात सम्मान यायेगु थें ज्याःगु न्हूगु मूल्यया स्थापना यायेगु आग्रह यानादीम्ह छम्ह जीवनवादी कवि थ्वय्कः खः ।

**बुद्ध साय्मि (ने.सं १०६४)**

- जि जिगु वर्तमान (ने.सं १०६५)
- जिन्दगी बैय् वाःगु हि : चेतनाया मि (ने.सं १११७)

समालोचक प्रा. माणिकलाल श्रेष्ठजुं फुक्क पक्षय् आधुनिक कवि नालातःम्ह बुद्ध साय्मि नेपालभाषाया छम्ह आधुनिक कवि नापं प्रगतिशील कवि नं खः । थ्वय्कःया काव्यय् न्हूगु मूल्य व मान्यता स्थापना यायेमाःगु सः अप्वः प्रतिध्वनित जूगु दु । पुलांगु विश्वास प्रति अनास्था क्यनाः न्हूगु मूल्य व मान्यता स्थापना यायेगुलिइ समर्पित, थौ मनु मखु मनुया संस्कार हिलेमाःगुलिइ वः वियादीम्ह कवि बुद्ध साय्मियात छम्ह सरल व सशक्त अभिव्यक्ति विइम्ह सृजकया रुपय् नं म्हसिइकेफु । कवि बुद्ध साय्मिया काव्य प्रवृत्तियात दुवालाः समालोचक इन्द्र मात्तीजुं थ्वय्कःयात छम्ह विद्रोही कविया रुपय् प्रतिस्थापित याःगु दु । कवियागु विद्रोह थौया मान्यता व मूल्य नाप जक मखु, थौ मछिंक म्वायेमाःगु समाज नाप नं दु । 'जि : जिगु वर्तमान' कविता संग्रहलय् कवि बुद्ध साय्मि छम्ह युगबोध दुम्ह मचा सा 'जिन्दगी : बैय् वाःगु हि, चेतनाया मि' कविता संग्रहलय् थ्यंवलय् थ्वय्कः छम्ह चेतनशील अले जिम्मेदारीया कु कविया च्वम्ह अभिभावकया रुपय् मुखरित जूगु दु ।

**आनन्द जोशी (ने.सं १०६८)**

- विस्थापित जि, जि मखु (ने.सं ११००), श्रेष्ठ सिरपाः प्राप्त (ने.सं. ११००)
- कोसल्वहं (ने.सं १११३)

नेपालभाषा आधुनिक कविता ख्यःया छम्ह बहुचर्चित कवि आनन्द जोशी नं खः । थ्वय्कःया विस्थापित जि, जि मखु कविता संग्रहात कयाः समालोचक कृष्णचन्द्रसिंह प्रधानजुं थ्वय्कःयात विद्रोह बौद्धिकताया कविया रुपय् प्रतिस्थापित यायेधुकूगु खयाः नं 'कोसल्वहं' कविता संग्रहय् थ्यंवलय् थ्वय्कःयाके अझ अप्वः परिष्कृतता परिपक्वता वःगु व कविताय् बौद्धिक पक्ष स्वयाः नं दार्शनिक पक्ष अझ अप्वः सशक्त जूगु दु । जोशी थौया विश्वया स्थिति, मनुया जिन्दगी, जिन्दगीइ भोगे यानाच्वंगु विवशता वाध्यतायात बौद्धिक प्रखरतां जाःगु प्रतिक उपमाया माध्यमं व्वयादीम्ह छम्ह आधुनिक कवि खः । थः दुनेया थःयात माला जूम्ह कवि आनन्द जोशी जीवनया असंगतिपूर्ण यथार्थयात खंकादीगु दु, थौया मनु मनुखं विस्थापित जुजुं वनाच्वंगु वाःचायेकादीगु दु, मानव मूल्य न्हियान्हिथं विघटन जुजुं वनाच्वंगु अनुभव यानादीगु दु । थथे मनुयात मनु जुयाः म्वाके मविउगु वाध्यता प्रति कवि आनन्द जोशीया तच्चःगु आक्रोस दु, विद्रोह दु । अले कविया विद्रोह, विद्रोहया नितिं जक मजुसे परिवर्तनया नितिं खः, न्हूगु मूल्य, न्हूगु मान्यताया नी यायेत खः, मानविय मूल्य अवमूल्यन मजुइकेत खः । विस्तारित शैलीया प्रयोग यानादीम्ह जोशीया कविताय् अभिव्यक्ति विइगु प्रतिक व चित्र साधारण दैनिक जनजीवनं स्वयाः नं बौद्धिक क्षेत्रं अप्वः कयातइगुलिं सर्वसाधारणया नितिं थ्वय्कःया गुलिं गुलिं कविता भचा जटील हे जूगु दु, उकिं गुलिं गुलिं समालोचकतय्सं थ्वय्कःया कवितायात Literary Man's Literary Job धकाः ध्याचू नकेगु नं याःगु दु ।

नेपालभाषा साहित्यया इतिहास/१७०



पुष्पराज राजकर्णिकार (ने.सं १०६८)

- वर्तमानं वैयुग कचिघा: (ने.सं ११०१)

- सच्छिक्क जिन्दगी (मुक्तक मुना - १११८)

थौया आर्थिक विषमतां जा:गु वर्तमान प्रति गाक मर्माहित जुया: नं, न्हू कथंया जीवन न्ह्याकेगु, आस्थापूर्ण जीवन हनेगुलिइ संकल्परत जुयादीमह छम्ह कवि पुष्पराज राजकर्णिकार नं ख: । थुकिया निति कवि प्रत्येक मनुखं थ:गु संस्कारयात हिलेमा:गु, न्हापालाक थ:नाप नि संघर्ष यायेमा:गु, अले न्हूगु परम्परा संस्कारयात ज्वनेमा:गु खं थ:गु कविता माध्यमं न्ह्यथनादीगु दु । कवि राजकर्णिकारजुं थ:गु कृतिइ छगू जाति समाजया समस्या जक मखु थौथी राष्ट्रिय एवं अन्तर्राष्ट्रिय समस्या नं प्रतिविम्बित याना: नेपालभाषाया काव्ययात व्यापक यायेगुलिइ महत्वपूर्ण तिव: बियादीगु दु ।

भगतदास श्रेष्ठ (ने.सं १०६८)

- जि अले जिगु विश्व (ने.सं १०१२)

थौया नेपालभाषाया आधुनिक कविताया लाग्ना छगू समाज छगू राष्ट्रया विषय दुने जक सीमित मखु धका: कयनादीमह छम्ह कवि भगतदास श्रेष्ठ नं ख: । सुं सुं हे मनु सम्पूर्ण मखु, छुं छुं हे देय् नं सम्पूर्ण मखु धका: व्यक्ति मखु, समष्टिगत भावना ब्यादीमह कवि भगतदास धर्म तथा अन्धराष्ट्रवादयात थौया विश्वय् न्ह्यानाचवंगु युद्ध साम्राज्यवादया मू कारकतत्व खंकादीगु दु । विश्ववन्धुत्वया भावना जक थौ विश्वय् खने दयाचवंगु युद्ध विभिषिका न्हंके फइ, मनुखं स्वतन्त्रता, मुक्तिया सास: ल्हायेफइ धैगु धारणा थ्वय्क:या बहुसंख्यक कविताय् अभिव्यक्त जुयाचवंगु दु । थुकथं संकुचित विचा:यात हाकुतिना: विश्वभातृत्वया भावना जागृत यायेगु न्हूगु संस्कार नीस्वनेगुलिइ तल्लीनमह कवि भगतदास श्रेष्ठ ख: ।

त्रिरत्न शाक्य (ने.सं १०७१)

- न्ह्योलं पाचिने मफुगु विश्वास (ने.सं ११०९)

त्रिरत्न शाक्य नेपालभाषाया छम्ह आधुनिक तथा प्रगतिवादी कवि ख: । सन्ताप, विघटन, विषमतां जा:गु थौया वर्तमानप्रति आक्रोश, विद्रोह कयना: नं भविष्य प्रति आशावादी जुयादीमह कवि ख: । प्रजातन्त्र, स्वतन्त्रताया हिमायति कवि त्रिरत्न शाक्यं क्रान्तिं हे जक स्वतन्त्रता स्वाधिनता प्राप्त यायेफइगु विश्वास थ:गु कविताय् प्वंका दीगु दु । थुकथं थौया विसंगति विकृति न्हंकेत जनताया शक्तिइ विश्वास यानादीमह जनताया विजय प्रति आश्वस्त जुयादीमह छम्ह कवि त्रिरत्न शाक्य नं ख: ।

केशवमान शाक्य (ने.सं १०७१)

- बिनाचवंगु पहर (ने.सं १०९६)

नेपालभाषा साहित्यया इतिहास/१७१

मानव जीवनया विविध कार्यव्यापारयात हे प्रतिक कथ छयला: थौया मनुतय्गु असफलता, असन्तोष व थौथी विकृतिया चित्रण यानादीमह कवि केशवमान शाक्यया कविताय् नैराश्य हे अप्व: थाय् का:गु दु । पाय्छिगु उपमा चित्र ब्या: मिखाय् लुइगु भाव दृश्यया चित्रण यायेफुगु थ्वय्क:या काव्यया मेगु विशेषता ख: । थ्वय्क: थ:गु कविताय् प्रतीक व बिम्ब पिने आयात यायेगु सिबे थम्ह अनुभव यानागु जीवनं हे कायेगु पाखे अप्व: धेचूगु दु ।

सुदन खुस: (ने.सं १०७६)

- तनावंगु लाग्ना (ने.सं ११०५)

सुदन खुस: नेपालभाषाया छम्ह आधुनिक कवि नापं प्रगतिशील कवि नं ख: । थ:गु देय्का दैनीय स्थिति मर्माहित जुयादीमह खुस:जुं, थ:गु कविताय् थौया विसंगति विकृति जक ब्यायेगु यानामदिसे थुकिया कारक तत्वयात नं न्ह्यब्वयादीगु दु । थम्ह अनुभव यानागु जीवनं हे अप्व: प्रतिक बिम्ब कायेगु यानादीमह सुदन खुस:या अभिव्यक्ति कला नं उलि हे परिमार्जित परिस्कृत जूगु दु । थ्वय्क:या कवितां वृद्धि पक्षयात नं गाकं कुलावीफुगु दु ।

प्रतिसरा साय्मि (ने.सं १०७६)

- जि छक्क नालिस भों (ने.सं १११५)

प्रतिसरा साय्मि वर्तमान .समाजय् विद्यमान विसंगति, विकृति, व विषमताया विरुद्धय् 'नालिस भों' ज्वना: भौगु काव्य ख्यलय् खने दयेक: भा:मह छम्ह कवयित्री ख: । प्रतिसरा साय्मियागु अनुभूतियात दुवाला यंकेबलय् वय्क:यात छम्ह जनपक्षीय कवयित्रीकथं नाले फु । थ्वय्कलं थ:गु नारी माधुर्यता, शालीनता व कोमलतायात क:घाना: विवशता व वाध्यतायात नुगलय् तिक्क मिनिइगु कथं भाव अभिव्यक्त यानादीफु । नापं नारी सुलभ कोमल व सरल भाषा छयला: नं नारी शोषण व दमनया विरोधय् सशक्त रुप नैसर्गिक अभिव्यक्ति कथं थ:गु अनुभूति न्ह्यब्वये फुगु दु । थ: म्वानाचवनागु, थम्ह अनुभव यानागु समाज, संस्कृति व परिवेश पाखें हे उपमा, प्रतीक ज्याना: काव्यभिव्यक्ति बिया: थ:गु जातीय संस्कार व परम्परायागु सूक्ष्म चित्रण यायेगुलिइ नं थ्वय्क:या ल्हा: साप न्ह्या: । थथे भौगु संस्कार, परम्परा व संस्कृतियात मूल रुपं क:घाना: अनुभूतिया रुपय् अभिव्यक्त याये फुगुलिं भौगु भाषाय् जक मखु, थ्वय्क: नेपाली भाषाय् नं चर्चित जूवंगु दु । जि छक्क नालिस भों कविता संग्रहया प्रकाशन लिपा पिदगु थ्वय्क:या मेगु कवितायात अनुशीलन यानायंकेबलय् थ्वय्क:यागु पला: धिसिमिसि धायाव:गु, अभिव्यक्तिया सलय् गहनता पिज्व:गु, अनुभूति स्पेल्लाना वंगु, कल्पनाय् प्रौढता पिज्व:गु खने दु, गुकिं याना: वय्क: समकालीन कविता ख्यलय् छम्ह चर्चित कवयित्रीकथं प्रतिस्थापित जूगु दु । तर अथे खया: नं कवयित्रीया काव्य साधनाय् निरन्तरता मदु धायेमछिं, तर सक्रियता मदु गुकिं याना: प्रतिबद्धता म्हो जुयावंगु दु ।

नेपालभाषा साहित्यया इतिहास/१७२



राजभाइ जकःमि (ने.सं १०७८)

- चीखुज्वःचिया सः (ने.सं १०९६)

नेपालभाषाय् प्रगतिशील काव्यधारा बल्लकेगुलिइ तिवः बियावःपि आधुनिक कवित मध्ये राजभाइ जकःमि नं छम्ह खः । शोषित पीडित जनताया हक हितया निरति थौया स्थितिइ परिवर्तन हयेमाःगु आवश्यकता न्ह्यब्वयाः सघर्षया निरति आहवान यानादीम्ह जकःमिया काव्यय् विद्रोह व आक्रोषया सः तसकं तिखर जूगु दु । तर न्ह्याथे हे असन्तोष विद्रोह थ्वय्कःया काव्यय् वानाच्चंगु दुसां, शोषित पीडित जनताया विजयप्रतिया विश्वास थ्वय्कःया काव्यय् गाकं दु । देश व जनतायात, न्हयलं चायेके विडगु छगू सशक्त व सबल माध्यम साहित्य खः धैगु खं थ्वय्कः थें ज्याःपिनिगु कवितां पुष्टि यानाबिउगु दु । थःगु रचनाय् वैचारिक पक्षय् सशक्तता क्यं थें कला पक्षय् नं भचा चिउताः तयाः न्हयज्यायेफत धाःसा थ्वय्कःया काव्य अभ्र प्रभावशाली जुइगु खनेदु ।

सुरेश किरण (ने.सं. १०८६)

- फुटकर कविता

नेपालभाषाया ल्याय्म्ह पुस्तायापि कवितय्गु पुचलं दनावःम्ह, म्हो इलय् म्हो कविता च्वयाः नं थःगु प्रभाव नेपालभाषाया काव्य स्थलय् त्वःतेफुम्ह छम्ह चिन्तनशील अध्ययनशील कवि सुरेश किरण खः । थ्वय्कलं भी पुर्खा आस्था व विश्वासया मिखां स्वयाच्चंगु गुगु धर्म संस्कृति खः, उक्रियात जक उपहास यायेगु, व्यंग नकेगु यानादीगु मखुसे थौया विश्वय् न्यनाच्चंगु विडम्बना, विसंगतियात नं उलि हे सतर्कता पूर्वक न्हयब्वयाः काव्य चिनेगु यानादीगु दु । अन्तर्राष्ट्रिय स्थलय् जूगु घटना दुर्घटना क्रिया प्रतिक्रियाप्रति नं नेपालभाषाया कवित उलि हे चिन्तनशील, सम्बेदनशील धयागु खं थ्वय्कः थें ज्याःपिनिगु कवितां पुष्टि याना बिउगु दु । थःगु भाव व विचाःयात नैसर्गिक अभिव्यक्ति थें च्वंक प्वंकेफुगु शिल्प थ्वय्कःया काव्यया मेगु विशेषता जूगु दु । थ्वय्कःया कवितां नेपालभाषाया काव्य विधायत अभ्र न्हयज्याकी धकाः आशा यायेफु ।

चव्य उल्लेख जूपिं कवि कवयित्रीत बाहेक मेमेपिं नं आपालं कवि कवयित्रीतय्सं थःपिनिगु प्रतिभा व सृजनां नेपालभाषाया आधुनिक कविता स्थःयात छाय्पिउगु दु । थ्वय्कःपिं खः - श्यामलाल दिवाकर - 'मनाः आकाशया म्ये' (१०९७) महेन्द्र कायष्ठ - 'घाःया हि' (११००), सुधीर ख्वि - 'चक्रब्यूह' (११००), 'पित्याः मिखा' (१११५) रामभक्त कायष्ठ - 'जिन्दगी' (११०९), शैलेन्द्र श्रेष्ठ - 'थ्व देश छंगु मखु' (११०३), शाक्य सुरेन - 'छम्ह आकाश' (११०६), यु.पि. जोशी - 'आखः धस्वाःगु तुपः' (११०८), जनार्दन जोशी - 'भ्वाथः लाकांः पालापाला थीम्ह मनू' (११११), माधव मूल - 'नकतिनिया कविता' (१११२), अमोघ ताम्राकार - 'नेवाः हाइकु' (१११३) ओमकारेश्वर श्रेष्ठ - 'असं छगू आणविक भट्टी' (१११३), बालगोपाल श्रेष्ठ - 'कुलामय थ्वयाच्चंगु सः' (१११५), सबिना श्रेष्ठ - 'जिगु छें जिगु सर्गः' (१११५), नवीन चित्रकार - 'स्वकुमि जि जि दुनेया' (१११७),

दया खड्गी 'वैचेन'- 'जि व जिगु यात्रा' (१११८), तुयु पुं - 'लुफिहाःगु पलाः' (१११९), पुष्परत्न तुलाधर - 'घाँय्म्बः' (१११२), आदि । अथे हे इलय् व्यलय् थौथी पत्रपत्रिकाय् कविता च्वयाः नेपालभाषाया आधुनिक कविताया विकासय् तिवः बियादीपिं मेमेपिं कवि कवयित्रीत नं यक्व दर्शन, गथे - मुकुन्दराज वैद्य, ब.आ. कनकदिप, तेजेश्वरबाबु ग्वंगः, ध्रुवकृष्ण 'दीप', विष्णु 'अल्पज्ञ', मोहन दुवाल, श्रीकृष्ण 'अणु', मंगलमान शाक्य, जगदीश चित्रकार, इन्द्र माली, पुष्पबहादुर चित्रकार, अमृतरत्न तुलाधर, मल्ल के. सुन्दर, विरेन्द्रमान शाक्य, अमरबहादुर शाक्य, श्रीराम श्रेष्ठ, सुदर्शन कारंजित, विष्णु चित्रकार, श्यामदास, प्रविण शुक्ल, अरविन्द भोंमि, नारायणप्रसाद प्रधानाङ्ग, प्रेमकृष्ण श्रेष्ठ, अमीरत्न ताम्राकार, रमेशकाजी स्थापित, मणिकमान सिंह, योगेन्द्रमान श्रेष्ठ, प्रदीप आर. तुलाधर, दर्वरत्न शाक्य, सौरभ शाक्य, बसन्त महर्जन, नारद वज्राचार्य, रजनी 'मिला', राजेन्द्रकुमार 'पुता', ईश्वरी मैया श्रेष्ठ, यचु जोशी, रास जोशी, योगेश राज., एच्. के. कपाली, शैलेन्द्र श्रेष्ठ, पृथक रासु भेले आदि ।

थौं नेपालभाषाय् वैयक्तिक कवितय्गु कविता संग्रह बाहेक प्रतिनिधि कवि कवयित्रीतय्गु सामूहिक संकलन नं थ्व आधुनिककालया काव्य विधाय् आपालं पिदंगु दु । ने.सं १०६९ निसं थुखे पिदंगु, छुं छुं थज्याःगु सामूहिक संकलनया काव्य सफू खः - मुना स्वां (१०७७), पद्यपुचः (१०७६), नेपालभाषाया नःलि कविता (१०७८), ब्याहां (१०७५), भों.स्वां (१०७८), पद्य पुचःया तँसा (१०८८), गाजलं दाःगु चा (१०८६), पाचिना (१०८७), दुसः (१०८८), चुलि (१०८८), दुजः च्वसु मुना (१०८८), कविता मुना (१०७९), कँचा (१०८९), हः (१०९८), ससिवा (१०९४), इलं हाःगु म्ये (१०९४), नेपालभाषाया आधुनिक कविता संग्रह (१०९६), भीगु सः मुना (११०५), भी कविता (११११) नेपालभाषा कविता संग्रह (१११६), प्रतिभा साहित्य दब् (१११०), जनआन्दोलन कविता (१११०) आदि ।

अथे हे थौं नेपालभाषाया कवितायात नेपालभाषा भाषीतय्गु दथुइ जक सीमित मजुइकुसे मेमेगु भासं नं अनुवाद यानाः विभाषी काव्य प्रेमीतय्गु दथुइ नं सम्प्रेषित यायेगु कुतः जूगु दु । थथे नेपालभाषाया कवितायात दकलय् न्हापां मेगु भासं अनुवाद यानाः पिब्वयेगु ज्या नःलि कविता संग्रह (ने.सं १०७८) निसं जूगु दु सा नेपाल राजकीय प्रज्ञा प्रतिष्ठानं इन्द्र मालीया सम्पादकत्वय् फिम्र नेपालभाषाया समकालीन कवितय् न्यापु न्यापु कवितायात नेपाली भासं भाय् हिइकाः नेवारी भाषाका समकालिन कविता (ने.सं १११३) नामं पिकाःगु दु । अथे हे कृष्णचन्द्रसिंह प्रधानया सम्पादकत्वय् फिम्र नेपालभाषाया समकालीन कवितय्गु ५९ पु कवितायात तीर्थराज तुलाधर, वायेन अमर्त्तजीसपिंस अंग्रेजी भाषाय् अनुवाद यानाः Representative Collection of Nepal Bhasa Poems ने.सं. १११२ या नामं सानुबाबु वैद्य स्मृति प्रकाशन समिति पाखें पितहःगु दु । अथे हे चित्तधरया 'हृदय' देगः कविता संग्रह नं अंग्रेजी भाषा अनुवाद जुयाः पिदंगु दु । साहित्य गुथि नं मेगु भाषाया काव्ययात नेपालभाषा भाषीपित पिरिचित याकेगु



उद्देश्य नेपालभास अनुवाद याना सफू पिथनेगु या:गु दु गथे - सुन्तारो तानिकावाया चिनाखें (ने.सं. ११०९), काजि नजरुल इलामया छपास: म्ये (ने.सं. १११४) न्ह जापानी हाइकु (ने.सं. ११०९) आदि ।

**लिखें :** नेपालभाषाय् थासा आखलं सफू पिदंगु इलं निसें थौंतकया सफू अध्ययन यायेबलय् थ्व भाषा साहित्यय् दकलय् अप्वः सफू पिदंगु, दकलय् अप्वः च्वमि पिदंगु विधा काव्य हे जूगु दु । थासा आखलं पिदंगु नेपालभाषाया साहित्यया सफू मध्ये ३८% प्रतिशत सफू काव्ययागु जूगु दु (अमात्य, १९९८ : घ) । अथे हे प्राचीनकालय् जक मखु थौं नं मिसा च्वमितय्सं दकले अप्वः ल्हाः न्ह्याकूगु छगू विधा काव्य नं जूगु दु । ने.सं १०६१ निसें थौं तकया काव्य विधाय् खने दुगु प्रवृत्ति, विशेषता व परम्परायात अवलोकन यायेबलय् दकले तःमिगु विधा जक मजुसे दकलय् तःजिगु व ब्वये बहःगु नेपालभाषाया साहित्यिक विधा कथं काव्ययात हे कायेफु । थ्व विधाय् गुलि न्हू न्हूगु प्रवाह प्रवृत्तिया प्रयोग जुल, गुलि प्रकाशन जुल व प्रयोग व प्रकाशनया निंति जक मजुसे छगू न्हूगु सिर्जनाया लागी नं जूगु दु ।

काव्यया रुपभेदया दृष्टिकोणं थौं नेपालभाषाया आधुनिक कालया काव्य दुने मुक्तक, गजल, सनेट, शोक काव्य, हाइकु, प्याखं म्ये, वाखंम्ये निसें खण्डकाव्य, महाकाव्य, लोकमहाकाव्य तक दुथ्याये धुंकूगु दु । तर अप्वःथें थौंयापि कवितय्सं फुट्कर कविताया रचनाय् च्वसा छयलेगु या:गु दु । उकिं थौंया काव्य अप्वः थें आख्यानात्मक मजुसे संरचनात्मक हे जूगु दु । अथे हे भीगु काव्य ख्यलय् ताःई तक कविताया सम्प्रेषणया माध्यम पद्य जक जुयाच्चंगु थासय्, विश्व साहित्यय् गद्य कविताया परम्परा च्वन्ह्याना वंगुया लिच्चः कथं, गद्य कविताया प्रयोग नं नेपालभाषाय् अप्वः जुजुं वःगु दु । थौं वयाः गद्य कविता नं उलि हे विकसित व परिपुष्ट जुइ धुंकूगु दु । अथे धकाः हानं इलय् ब्यलय् पद्य कविताया प्रकाशन जुयामच्चंगु नं मखु, तर थौं गद्य कविता छगू आन्दोलन, छगू परम्परा व छगू संस्कार कथं गुलि न्ह्यानावःगु दु, पद्य कविता उलि मनु ।

प्राचीनकालय् जक मखु थौं नं मनूया घात प्रतिघात, राष्ट्रिय अन्तर्राष्ट्रिय परिवेशयात दकलय् सशक्त रुपं समग्र रुपं प्रतिविम्बित यायेफुगु नेपालभाषाया साहित्यिक विधा काव्य हे जूगु दु । ने.सं १०६१ निसें थौंतकया दुने देशय् सीदयेक स्वंगू राजनैतिक हिउपाः वयेधुंकूगु दु, गुगु १०७० (वि.सं २००७) दँया प्रजातन्त्र स्थापना, १०८० (२०१७) दँया पञ्चायति व्यवस्था तथा १९९० (२०४६) दँया बहुदलीय व्यवस्थाया पुनर्स्थापना खः । थ्व स्वंगू राजनैतिक हिउपालं थनया आर्थिक, सामाजिक, सांस्कृतिक जीवनय् तच्चःगु प्रभाव लाकूगु दु । आशा, निराशा इच्छा आकांक्षा असन्तोष, विद्रोह, आक्रोश थनया जनमानसय् ब्वलंकूगु दु । थज्याःगु फुक्क घात, प्रतिघात, आशा निराशा, सफलता असफलता आदिया छपाः यचुगु किपा थौंया काव्य जूगु दु । थथे देया राजनैतिक हिउपालं हःगु अनुभव अनुभूतियात आधुनिक समकालीन काव्य ख्यलय् जीवन्त रुपं गुक्कथं

चित्रण व विश्लेषण जुल, उलि सशक्त रुपं नेपालभाषाया मेगु विधाय् जुइफुगु मनुनि । अथे हे भीगु समाज, भीगु देय् दुनेया जक मखु अन्तर्राष्ट्रिय ख्यलय् जूगु घटना दुर्घटना, क्रिया प्रतिक्रिया नं नेपालभाषाया आधुनिक कवितय्सं उलि हे चिन्तनशील, सम्बेदनशील जुयाः न्हयब्वयेगु या:गु दु । उकिं थौंयापि नेपालभाषाया कवितय्गु काव्य लागा छगू जाति छगू राष्ट्रया चिन्तनया घेरा दुने जक लिक्नेगु मजुसे वृहत् व व्यापक जूगु दु । विश्वया गुगु नं कुकुलामय् जूगु घटना दुर्घटना थौं नेपालभाषाया कविताया विषय जुइफुगु दु । फलतः थौं नेपालभाषाया कवितां अन्तर्राष्ट्रिय स्तरय् तक मान्यता प्राप्त यायेफुगु दु । सन् १९७२स कोरियाय् जूगु अन्तर्राष्ट्रिय कविता प्रतियोगिताय् नेपालभाषाया कवि पूर्ण वैद्यया कवितायात दकले उत्कृष्ट घोषणा जूगु थुकिया छगू दसु खःसा मेगु अमेरीकाया 'मेरीलायण्डय्' जूगु अन्तर्राष्ट्रिय कविता सम्मेलनया निंति नेपालभाषा कविता दबू 'लिजः' (ने.सं १९९८) पाखें न्हयम्ह कवितय्गु कविता छवःगुलिइ न्याम्हसिगु कवितायात उगु प्रतियोगिताय् दुथ्याकूगु व छम्हसित (कवि नवीन चित्रकार) पुरस्कार तक प्राप्त जूगु धयागु हे नेपालभाषाया कवितां अन्तर्राष्ट्रिय जगतय् तक मान्यता प्राप्त यायेफुगुया मेगू दसु खः । थुकथं नेपालभाषाया काव्य नेपाःया छुं नं भाषाया काव्य स्वयां लिपा मलासे प्रायःदीपया काव्य साहित्यया स्तरय् थ्यवने फुगु दु ।



## आधुनिककालया बाखं

**पृष्ठभूमि :-** बाखं मनु ति हे पुलां जूसां थौयागु 'शर्ट स्टोरी' नांयागु न्हू बाखं विश्वय् सिइदयेक सच्छि व चाःचू दँ न्ह्यः अमेरिकाया एडगर एलेन पोर्न पिकयादीगु खः । लिपा वनाः थज्याःगु शर्ट स्टोरी अमेरिका व युरोपय् जक मखु भारतय् नं थाय् कयाहल । शरतचन्द्र, रवीन्द्रनाथ टैगोर थें ज्याःपिं च्वमितय्सं सामाजिक सुधार हयेगु माध्यम कथं न्हू बाखंयात छयल सा, प्रेमचन्द्रं जीवनया विभिन्न तहयात मूर्तरुप बिइगु कथं बाखंयात ज्वन । नेपालभाषा साहित्यय् नं विश्व साहित्यया प्रभाव स्वरुप आधुनिक बाखंयागु प्रस्फुटन जुल । सलंसः दँ मल्याक लिखित रुपय् हे हा कया वयाच्वंगु थःगु हे तालयागु बाखंया थासय् पश्चिमी विश्वं पिदंगु 'शर्ट स्टोरी'या प्रभावं न्हूगु बाखं पिदन । न्हापा न्हापा थें धार्मिक आस्था व विश्वासं प्रेरित, तीर्थव्रत महात्म्यया बाखं, नैतिक शिक्षा व उपदेशं जाःगु 'हितोपदेश', 'युधिष्ठिर नारद सम्वाद' थें ज्याःगु नीति बाखं व मनोरञ्जनया नितीं चिनातःगु 'शुक बहत्तरी' 'बत्तिस पुत्तलिका' बाखं, न्हि छयायेत चिनातःगु 'सिंहःपता मय्जु', 'ध्वं चोलय्चा' थें ज्याःगु न्येकं बाखंया थासय् जीवन व जगतया छुं नं छगू पक्षया चित्रण वा छगू तथ्यया उद्घाटन, छगू सत्यया विश्लेषण जुइगु मानव जीवन सम्बन्धी बाखंनं थाय् कयाहल । बाखंया रुप कनेगु शैली छुं कथं न्हापाःथें जुयाः नं न्हू बाखं मुक्कं मानव सम्बन्धी बाखं ज्वन । मानवेत्तर पात्रत गथे : राक्षस, दैत्य, पशु, पक्षि आदिया थासय् मनु प्रतिस्थापित जुल । थौया मनुखं याये मफइगु इमिगु जीवनय् जुइमफइगु अलौकिक घटनायां चित्रण बाखनय् मजुल । फलस्वरुप मनुयात मनु मखयेक अतिरंजित यानाः महामनु दयेका बिइगु व अज्याःम्ह महामनुया अद्भूत चमत्कार कनेगु ज्या थौया बाखनं मयात । अफ्नै न्हू बाखं मनुया जीवन सम्बन्धी बाखं जुयाः नं धातयेया घटनाया वर्णन थ्व मखु, वरु मनुया जीवनय् जुइमफइगु व स्वयेबलय् खः थें च्वंगु घटनाया चित्रण थुकिइ ज्वन, गुकिं यानाः ब्वमितयत् थःगु जीवनय् जूगु घटना वा थःगु छेंय् जूगु घटना वा थः जःखः दुने जूगु घटना थें तायेकाविल (तुलाधर, ने.सं ११०६:२) ।

विषयवस्तुया दृष्टि, अंगया दृष्टि थौया न्हू बाखं व उपन्यास आपालं सती । निगुलिं मनुया जीवन सम्बन्धी बाखं खः, तर उपन्यासं समाजया तथ्यांक चित्रण, जीवनया यक्व पक्षया वर्णन, यक्व घटनाया चित्रण यायेफु सा न्हू बाखनं जीवनया छगू पक्ष, छक्कू कुचाया जक चित्रण याइ । थुगु दृष्टि उपन्यास स्वयाः बाखनं ज्वनीगु परिधी चीधं व सीमित जुयाच्वनी । उकिं पश्चिमी जगतय् न्हू बाखंयात Modern Short Story धायेगु याःगु खः । Short Story या अर्थ बाखंया हाकः कथं चीहाः धाःगु मजुसे थ्व ज्वनीगु परिधी चीधंगु जूगुलिं जक थथे धाःगु खः, मखुसा भीगु हितोपदेश, तन्त्राख्यानया चिचीहाकःगु बाखं फुक्कं न्हू बाखं जुइमाल अथे हे स्वस्थानी, जातक आदि ततःहाकःगु बाखं फुक्क उपन्यास जुइमाल । तर चीहाः जुइगु थौया न्हू बाखंया विशेष लक्षण मखुसां न्हू बाखं आपालं ताहाः जुइ मजिउ धयागु प्रचलित धारणा दु । छपु बाखनं छगू हे प्रभाव जक बिइमाः धकाः बाखंया प्रभावकारीताय् अप्वः जोड बिइगु याःगु दु । फलस्वरुप बाखंया सफलता थ्वया प्रभावकारीताय् लाःवंगु दु ।

## नेपालभाषाय् बाखं

नेपालभाषाय् थौं स्वयाः प्यसःत्या दँ न्ह्यः अर्थात ने.सं ६२५ निसं भागवत पुराण थें ज्याःगु बाखं खनेदये धुंक्सां पश्चिमी विश्वं पिदंगु Modern Short Story या परम्परा ने.सं १०६४ निसं तिनि शुरु जुल धायेमाः । थज्याःगु बाखंयात नेपालभाषाय् न्हू बाखं, न्हू चीहाः बाखं, आधुनिक बाखं आदि कथं नामाकरण यानातःगु दु । ने.सं १०६४ बछलां धर्मदत्त (१,१-२) पत्रिकाय् पिदंगु श्रीमती एम. लक्ष्मीया 'लै' बाखं निसं नेपालभाषाय् न्हू बाखंया शुरुवात जुल । खयेत ला मोतिलक्ष्मीयात न्हू बाखं च्वयेगु प्रेरणा चित्तधर पाखें हे वःगु खः । चित्तधरं केहेँ मोतिलक्ष्मी स्वयाः न्हापां बाखं च्वयेगु यानादीगु खयां नं १९९७ सालया जेल काण्डय् लाःगुलिं प्रकाशनया ल्याखं चित्तधरया बाखं मोति लक्ष्मी स्वयाः लिपा हे लात । चित्तधर 'हृदय'जु ने.सं १०४८ निसं हे बाखं च्वयेगु यानादी धुंक्कल धइगु खं चित्तया चिन्तन हृदयया रचना सफुतिइ पिदंगु 'गल्प लहरी' धकाः न्ह्यव्वयातःगु च्वसुं नं पुष्टि याःगु दु । चित्तधर हृदय, फत्तेबहादुर, परमानन्दपिंसं बाखं च्वये धकाः स्वयाः नं नेपालभाषाय् न्हू बाखंया अभाव पूर्ति याये धैगु उद्देश्यं हे उगु इलय् थःपिंसं बाखं च्वयेगु छगू अभियान कथं न्ह्याकूगु खः । थथे नेपालभाषाय् बाखंया अभावपूर्ति यायेगु नितीं बाखं च्वयेगु याःगु खःसां 'हृदय' छम्ह स्पल्लाःम्ह हे बाखंमि जुयाः पिदन । प्रकाशनया ल्याखं मोतिलक्ष्मीया बाखं न्हापा लाःसां न्हू बाखंयात नेपालभाषा साहित्यय् विकास यायेगुलिइ 'हृदय'जुया विशेष देन दु ।

खयेत ला न्हू बाखंया पूर्वाभास सिद्धिदासया शिवविलास बाखनं हे बिइ धुंक्कू खः, तर थुकिइ मानवेत्तर प्राणी भंगःयात नं पात्र कथं दुथ्याकातःगु व तप्यंक नैतिक उपदेश बिइगु आदि प्रवृत्ति नं त्यं दनिगुलिं थ्वयात थौं कन्हय्या



नहू बाखंया रुपय नाले मछिं । सम्वादात्मक शैलीइ च्यातःगु मोतिलक्ष्मीया 'लैं' बाखं मिसा समस्याय केन्द्रित बाखं खः, गुगु बाखनय उगु ईया परिवेशया क्रिया बांलाक दु । समस्या समाधानया लैपु नापं सुधारात्मक सन्देश वियातःगु 'लैं' बाखनय कथानक साल्लुसे च्वनाः चरित्र प्रतिपादन खँलावल्हाया घात प्रतिघातयात मनोविश्लेषण कथं याना यंकेगु कृतः जूगु दु (माली, १९९७...) । अथे हे तुं सफूया ल्याखं दकल्य न्हापांगु बाखं सफू चित्तधर हृदयया **खुपु बाखंचा** (ने.सं १०६७) खः । अमेरिकाया नहू बाखं च्वमि एडगार एलन पोपिसं शुरु याःगु कथानक, पात्र चित्रण, वातावरण सृजना स्वतांयात नं बाखनय महत्वपूर्ण थाय् वियाः आः छु जुइन, धकाः पाठकतयगु नुगलय उत्सुकता, जिज्ञासा थना विङ्गु, तर थथे जुइ धकाः मतिइ हे मवंगु छता घटना हयाः अजु चायेका विङ्गु 'सरप्राइज प्लट'या बाखं चित्तधर पाखें हे शुरु जुल । आकस्मिक घटनाया संयोजन यानाः पाठकतयत् मनोरञ्जन विङ्गु जक मखु, ला हियापिं पात्रत सृजना यानाः थम्हं हे खनाच्चवनापिं, थः हे परिवारया सुं जः थें च्वंक न्हयव्वयेगु, अथे हे मिखाय लुङ्गु दृश्य चित्रण यायेगु प्रवृत्ति नं चित्तधरया बाखनं हे शुरु जुल । थुकथं चित्तधरया बाखंया प्रवृत्ति शैली तत्कालीन मेमेपिं बाखं च्वमिपनिगु नितिं छगू नमूना जुयाविल । चित्तधरं लिपा न्हून्हुपिं बाखं च्वमित व न्हून्हुगु बाखं यक्व खनेदत । नेपालभाषाय नहू बाखं दुहांवःवल्य विश्वया नहू बाखं ख्यलय तःगू कथंया प्रवाह, प्रवृत्तिया प्रयोग जुइ धुंकूगु खः । अथे हे हिन्दी, नेपाली भाषाय नं आपालं बाखं पिहां वये धुंकूगुलिं नेपालभाषाया च्वमित नहू बाखं साहित्य नाप बांलाक हे परिचित जुइधुंकूगु खः । उकिं विश्वय नहू बाखं साहित्यय पिदंगु अनेक प्रवाह, प्रविधिया प्रयोग नं नेपालभाषाया बाखनय याकनं याकनं हे जुल । ने.सं १०६७ स धर्मोदय पत्रिका पिदन । थ्व पत्रिकाया प्रकाशनं तत्कालीन बाखंमितयत् बाखं पिकायेगु थाय् वियाः नेपालभाषाया बाखं साहित्यया विकासय महत्वपूर्ण तिबः विल । न्हापा हे नेपाली भाषां पिदंगु तत्कालीन शारदा (१०५१) पत्रिकाय छपु निपु बाखं च्वयेधुंकीपिं च्वमितयसं नं नेपालभाषां धर्मोदय पत्रिकाय उत्साहपूर्वक बाखं च्वयेगु यात । पूर्णदास, पूर्ण 'पथिक', सिद्धिचरण श्रेष्ठ, हृदयचन्द्रसिंह प्रधान, आशाराम शाक्य, केशवलाल, प्रेमबहादुर, प्रकाश कुमारीपित न्हापां बाखंमिया रुपय म्हसिइके विङ्गु ज्या थ्व हे धर्मोदय पत्रिका यात । उदार दृष्टिकोण ज्वनाः न्हूपिं च्वमितयत् नं थ्व पत्रिकाय थाय् विउगुलिं आपालं बाखंमित पिकायेगुलिइ थ्व पत्रिका सफल जुल । थुकथं नेपालभाषाया बाखंया जन्म प्रकाशनया ल्याखं धर्मदूत (ने.सं १०६४) पत्रिकाय जूगु खयाः नं, उगु इलयया सशक्त च्वमित गुलिं जेलय गुलिं निर्वासित जुयाच्चंगुलिं मोतिलक्ष्मी छम्हेसिगु बाहेक मेपिनिगु बाखं धर्मदूत पत्रिकाय पिदनेमफुत । गुलि नं मेपिनिगु पिदन धर्मोदयय वयाः तिनि पिदन । धर्मदूत पत्रिकाय जन्म जूगु, बाखंयात बांलाक पलाः छिकेगु ज्या धर्मोदय (१९६७) पत्रिका यात । धर्मोदय पत्रिका पिदंगु छुं दै लिपा हे नेपालय राणा शासन क्वःदलाः प्रजातन्त्रया स्थापना जुल । २००७ सालया क्रान्तिं हःगु स्वतन्त्र, मुक्त वातावरणं नेपालभाषाया बाखनय नं

सकारात्मक परिवर्तन हल । धर्मोदय बाहेक नेपाल, पासा, थौकन्हय आदि पत्रिका पिदन । फलतः आपालं बाखंमितयगु बाखं खनेदत । न्हापा थें सफू व्वनेत खुयाः सुलाः व्वनेमाःगु वातावरण नं मन्त । फलतः न्हून्हुपिं बाखं च्वमित नापं न्हून्हुगु बाखं नं पिदन । थ्व हे कथं चित्तधर 'हृदय', मोतिलक्ष्मी, फत्तेबहादुर, पूर्ण 'पथिक' आदिपिंसं घटनाय आग्रह यासैं 'सरप्राइज प्लट'या बाखं च्वयेगु व बाखंया माध्यमं सामाजिक यथार्थ, सांस्कृतिक चित्रण सुधारया सन्देश हवलेगु यानाच्चंगु इलय हे मेखे अभ् न्हू पहलं माधवलाल कर्माचार्य, पूर्णदासपिसं मनोविश्लेषणात्मक चरित्र प्रधान बाखं च्वयादिल । बाखनय कथानक सालुया वन, यद्यपि आकस्मिक घटनाया संयोजनं बाखं क्वचायेकेगु परम्परा ल्यना हे च्वन । पात्रतयगु बाह्य क्रियाकलाप स्वयाः नं इमिगु अन्तर हृदयया शूक्ष्म विश्लेषण यायेगु प्रवृत्तिया नी जुल । अभ् पात्रतयगु चेतन मन जक मखु, अर्धचेतन मन, अचेतन मनया विश्लेषणया यानाः तकं बाखं च्वयेगु परम्परा व्यापक जुजुं वल । अथे हे बाखंया विषयभूमियात प्रेम विवाह, सामाजिक कुरीति, घरेलु समस्या आदिइ जक लिक्का मतसे राजनैतिक, आर्थिक, सामाजिक आदि कारणं पिदंगु न्हून्हुगु समस्यायात विषयभूमि यानाः बाखंया रुप विङ्गु ज्या प्रेमबहादुर, हृदयचन्द्र सिंह, धूस्वां सायमिपिसं शुरु याःगुयात अभ् विस्तृत व व्यापक यायेगु ज्या नहू पुस्ताया बाखं च्वमितयसं यानाहल । सामाजिक, आर्थिक व राजनैतिक समस्यायात भन शूक्ष्म रुप व्वयेगु जुल । न्हून्हुगु वस्तुभूमि ज्वनेगु क्रमय न्हून्हुगु यथार्थ उलेगु क्रमय न्हूगु प्रयोग न्हूगु शैली छयलेगु जुल । फलतः कथानक सालुया वनेगु क्रमय अकथाया तकं जन्म जुल । नये त्वने तिइ थें यौन नं जीवनया छगू अभिन्न तत्व खः, जीवन व्वयेगु क्रमय यौनयात नकारे यायेमजिउ धयागु धारणा ज्वनाः यौन भावनायात विषयवस्तु कथं छयलाः बाखं च्वयेगु परम्परा नं आशाराम शाक्य, पूर्णदास श्रेष्ठपिसं न्हापां शुरु यानादिल सा लिपा मथुराकृष्ण सायमि, हितकरवीरसिंह, राजा शाक्य आदिपिसं थ्वयात अभ् न्हयज्याकादिल । फ्रायडया यौन मनोविज्ञानया लिधंसाय बाखं च्वयेगु प्रवृत्ति नं नेपालभाषाय खने दयावल । थुकथं विभिन्न मनोवैज्ञानिक क्रिया व प्रभाव पात्रतयके क्यनाः क्षण विशेषया अनुभूतियात व्वङ्गु बाखं नेपालभाषाय आपालं खने दयावल । थज्याःगु बाखं अभ् अप्वः लोकं व्हानावल ।

अथे हे बाखंया माध्यमं नेवाः जातिया सांस्कृतिक सौन्दर्यया रस्वास्वादन याकेगु विशेष उद्देश्यं प्रेरित जुयाः वातावरण प्रधान बाखं च्वयेगु ज्याय तीर्थलाल नःघःभनि न्हयज्यात । लिपा फणिन्द्ररत्न वज्राचार्य, लक्ष्मण राजवंशी, जनकलाल वैद्यपिसं नं स्वजातिय संस्कृतियात बाखंया अभिन्न अंग थें यानाः शूक्ष्म रुप थःपिनिगु बाखनय व्वयेगु यानाहल । समाजया निम्न मध्यम वर्गया यथास्थितियात व्वयाः मार्मिक बाखं च्वयेगु प्रारम्भ पूर्ण 'पथिक'जुं शुरु यानादिल सा थ्व वर्गया यथास्थितिया चित्रण जक मखु इमिगु हक हितया नितिं सः थ्वयेकाः इमिसं याइगु संघर्षय आशावादी जुयाः बाखं च्वयेगु ज्याय सुवर्ण केशरी, दुर्लभलाल सिंह, भूषणप्रसाद श्रेष्ठ, रमेशकाजी स्थापित, अमोघ ताम्राकार, मंगलदेवी स्थापित आदि



युवा च्वमित अग्रसर जुयादिल । फलतः नेपालभाषाया बाखनय् न प्रगतिशील प्रवाहं थाय् काल । नेपालभाषाया बाखनय् थ्व प्रगतिशील प्रवाह २०३६ सालया जनमत संग्रहलिपा अभ् सशक्तरूपं न्ह्यज्यात । खयेत ला नेपालभाषाय् छगू राजनैतिक सिद्धान्तयात आस्थाया लिधंसा दयेका :बाखं चिनेगु 'रे.र.न. स्यस्यः' या 'कपं' बाखं सफुनिसैं हे जुइधुंकूगु खः । तर थ्वयात छगू प्रवाहया रूपय् न्ह्याकेगु श्रेय थौया ल्याय्म्ह बाखंमितय्त हे बिइमाः ।

ईया हिउपाः लिसैं नेपालभाषाया बाखं ख्यलय् विषयगत, विचारगत रुपं जक हिउपाः वःगु मजुसे शिल्पगत रुपं न हिउपाः बल । समाजय् विद्यमान विकृति विसंगतियात तर्प्यंक व्वयेगु स्वयाः हास्यव्यंगया रूपय् प्रस्तुत यायेबलय् अप्वः प्रभावकारी जुइगु तायेकाः रामशेखर प्रवृत्तिया च्वमितसैं हास्यव्यंग बाखंया शुरुवात यात सा व्यंगयात थौया यथार्थ व्वयेगु सशक्त ज्याभःया 'रूपय् भूषणप्रसाद श्रेष्ठ, हरिशंकर रंजितकार आदिपिसं छ्यलाबिल । अथे हे थौंकन्हय् साहित्यया गुगुं न विधा 'विशुद्ध' धैगु मदये धुंकल, कविताय् बाखं ल्वाकज्याइगु जूसा बाखनय् कविता ल्वाकज्याइगु, धैगु अवधारणायात नेपालभाषाया बाखनय् न छ्यलाः क्यने थें केदार सितु, अमृत रत्न तुलाधर, आदिपिसं बिम्ब, प्रतीक आदिया माध्यमं बाखं चिनेगु यानाहल सा, बाखनय् लेखकया 'अहम्'यात सर्वोपरि यानाः ध्रुव मधिकर्मि प्रवृत्तिया च्वमिपिसं निबन्ध बालुङ्क बाखं च्वयेगु न यानाहल । छेबे निबन्ध बालूगु बाखंया प्रयोग नेपालभाषाय् जुलसा मेखेर थौया आधुनिक कवितां थें प्रतिकात्मक रुपं भाव अभिव्यक्ति बीगु 'ची बाखं'या प्रवाह न दुर्लभलाल सिंह, केदार सितु, बिमल ताम्राकार थेंज्याःपिं न्हू पूस्ताया बाखं च्वमिपिसं न्ह्याकेगु यात । अथे हे बाखं कनेगु शैली न पाश्चात्य साहित्यय् 'भर्जिनिया उल्फ' पिसं न्ह्याकूगु 'फलैश वाय्क' 'चेतना प्रवाह पद्धति' (Stream of Consciousness) आदि नेपालभाषाया बाखं च्वमिपिसं न्हू बाखंया शुरुं निसैं हे छ्यलाहःगु दु सा थौं बाखंया प्रस्तुतिइ न नाटकीय शैली, आत्मकथात्मक शैली, वर्णात्मक शैली, टिप्पणी शैली, पत्रात्मक शैली आदियात छ्यलेगु जूगु दु । थथे नेपालभाषाया बाखनय् वःगु विषयगत, प्रविधिगत हिउपाः दे दुने पिनेया राजनैतिक, सामाजिक, आर्थिक, सांस्कृतिक क्षेत्रय् वःगु हिउपाःया नापं साहित्य ख्यलय् पिदंगु न्हूगु आयाम, प्रवाह प्रवृत्तियगु परिणाम खः धकाः मधासैं मगाः । थौं यातायात, संचार माध्यमया द्रुत विकासं छगू भाषाया साहित्यय् वःगु हिउपाःया प्रभाव मेगु भाषाया साहित्यय् तसकं हे अःपुक तसकं हे याकनं लाःवनीगु स्वाभाविक खः । अभ् भारत नेपाःया खुला सिमानाया सम्बन्धं, नेपालभाषाया च्वमितयगु अध्ययन तथा प्रेरणाया श्रोत पुनर्जागरण-कालं निसैं भारतया हिन्दी, बंगाली, उर्दू आदि भाषाया सफु, पत्रपत्रिका जूगु दु । थ्व हे कथं थौं नेपालभाषाया बाखनय् न पाश्चात्य बाखंया प्रभाव हिन्दी, बंगाली आदि भाषाया लंपु जुयाः जक वःगु मजुसे हिन्दी, बंगाली आदि बाखंया प्रभाव न नेपाल-भाषाया बाखनय् प्रत्यक्ष अप्रत्यक्षरूपं लाःवःगुयात थौया परिप्रेक्ष्य अस्वीकार याये फइमखु । थौया बाखं ख्यलय् खनेदुपि मुख्य मुख्य बाखंमित थुकथं दु ।

## प्रमुख बाखंच्चमि

फत्तेबहादुर सिंह (१०२२-११०३) -

- फुटकर

नेपालभाषाय् न्हू बाखं च्वयेगु अभियान न्ह्याकादीपिं बाखंमित मध्ये फत्तेबहादुरसिंह न छम्ह खः । पाश्चात्य साहित्यय् न्हू बाखंया प्रारम्भिक ईया बाखनय् थें थ्वय्कलं न थःगु बाखनय् आकस्मिक घटनाया संयोजन यानाः पाठकतय्त मनोरञ्जन, आनन्द बिइगु यानादीगु दु । तर बाखं च्वयेगु रहं स्वयाः न नेपालभाषाय् बाखं दयेके धयागु उद्देश्य थ्व ख्यलय् ल्हाः च्वयेकादीम्ह च्वमि जूगुलिं फत्तेबहादुर थ्व विधाय् ताःई तक थात च्वनामदिल ।

चित्तधर 'हृदय' (ने.सं १०२६-११०२) -

- खुपु बाखंचा (ने.सं १०६७)

- थाय्भु (ने.सं १०७८)

- मिं मनः पौ (ने.सं १०८८)

- डायरी (ने.सं. १०९०)

- चित्तया चिन्तना हृदयया रचना (ने.सं. ११०७)

बाखं च्वयेगु धकाः स्वयाः न थःगु भाषाय् न न्हू बाखं दयेके धयागु तातुनाः न्हू बाखं च्वयेगु अभियानया नेतृत्व यानादीम्ह छम्ह साहित्यक व्यक्तित्व चित्तधर 'हृदय' खः । बाखंया माध्यमं सामाजिक सुधार, सांस्कृतिक चित्रण, अतीतया गौरव व्वयेगु यानादीम्ह चित्तधर 'हृदय' नेपालभाषाया छम्ह न्हापांम्ह बाखंच्चमि जक मजुसे छम्ह सिद्धहस्तम्ह बाखंच्चमि न खः । विश्वया आधुनिक बाखंया विकासया प्रारम्भिक अवस्थाय् खनेदुगु आकस्मिक घटनाया संयोजनं च्वमिपित अजगति चायेकाः प्रभाव बिइगु हे थ्वय्कःया बाखंया मू प्रवृत्ति खः । थ्व प्रवृत्तियात मेपिं समकालीन बाखंच्चमिपिसं न आपालं नालाकाःगु दु । अथे हे 'ला' 'हि'यापिं पात्रत सृजना यायेगु थ्वय्कःया बाखंया मेगु विशेषता खः । खयेत ला 'हृदय'जुं थौंकन्हय्यापिं बाखं च्वमितसैं थें गुगुं मनोवैज्ञानिक सिद्धान्तया लिधंसाय् पात्रतय्गु मनयात वालादीगु मदु । तर अथे खयाः न थःगु जीवनया दुयःगु अनुभूतिया आधारय् पात्रतय्गु मनया घातप्रतिघात न्ह्यव्वयाः जीवन्त पात्रत सृजना यायेगुलिइ थ्वय्कः सिद्धहस्त हे धाःसां जिउ । थ्वय्कःया पात्रपात्रीत बाखं संसारया चिकचा बालागु लागाया समाज व परिवेशया मू पात्रपात्री थें जक मच्चं, बरु गुगु खँया लिधंसाय् बाखंयागु संरचना जूगु खः व हे कथावस्तुया सामाजिक, आर्थिक परिवेशं सृजित जूपिं थें च्वं । नापं बाखनय् नायः गौण जुयाः न आकस्मिकतां बाखंयागु नी यानाः विश्वमयपूर्वक बाखंयागु अन्त यानातइगुलिं यानाः थ्वय्कःयागु बाखं कलात्मक जू । थुकथं सुनियोजित कथानक योजना,



स्वजातिय पहचहयापि पात्रतयुगु सृजना, तस्वीर हे मिखाय लुइका विइफुगु वर्णात्मक शैली, सुधारात्मक सन्देश आदि थय्कःया बाखंया मू प्रवृत्ति जूगु दु । फलतः थय्कः म्हो बाखं च्याः नं भीगु बाखं ख्यलय स्येल्लाःगु छगू थां जुइ फुगु दु । भीगु बाखं साहित्यया आधुनिक ईया छम्ह न्ह्यलुवा बाखं च्वमि कथं प्रतिस्थापित जुइफुगु दु ।

**मोतिलक्ष्मी उपासिका (ने.सं. १०२९-१११७)**

- मोतिबाखं पुचः (ने.सं. १११४)

मोतिलक्ष्मी उपासिका नेपालभाषाय न्हापां बाखं च्यादीम्ह च्वमि जक मखुसे गद्य क्षेत्रय ल्हाः च्येकादीम्ह न्हापांम्ह मिसा च्वमि नं खः । थय्कःया निपु बाखं 'रोदन', 'पुनर्विवाह' तत्कालीन 'शारदा' पत्रिकाय वि.सं. १९९१ (ने.सं. १०५४) नेपाली भासं पिदने धुकाः लिपा नेपालभासं 'धर्मदूत' पत्रिकाय 'लै' बाखं पिदंगु खः । थय्कःया 'लै' बाखं नेपालभाषाया प्रारम्भिक ईया न्हू बाखंया लैपु खःसा थय्कःया मेमेगु बाखनय थः समकालीन च्वमितसें थें घटनायात हे विशेष महत्व बियाः आकस्मिक घटनाया संयोजनं बाखं क्वचायेकातःगु दु । बाखनय घटनायात न्ह्याकेगु क्रमय नेवाः समाजया चित्रण, संस्कृतिया प्रदर्शन यायां यंकेगु मोतिलक्ष्मीया बाखंया थःगु हे विशेषता खः । मध्यमवर्गीय समाजया पृष्ठभूमिइ निर्माण जूगु थय्कःया बाखनय -बाल विवाह, अनमेल विवाह, मिसातयत शिक्षां वंचित याइगु सामाजिक कुरीति, कुसंस्कारप्रति विद्रोहया सःदसा नारी शिक्षा, नारी स्वतन्त्रता प्रति आग्रह दु (तुलाधर, ने.सं. १११७) । नारी जातियात वयागु अधिकार जक मखु वयागु कर्तव्य दायित्वया नं बोध याकीम्ह च्वमि मोतिलक्ष्मी खः । थुकथं मोतिलक्ष्मी छम्ह सुधारवादी युगयाम्ह, सुधार व जागरणया सन्देश ह्वलीम्ह छम्ह सचेत बाखं च्वमि खः, गुम्ह बाखं च्वमि भीगु नेपालभाषाय जक मखु नेपाली भाषाया आधुनिक बाखंया प्रारम्भिककालया छम्ह सशक्त बाखं च्वमि नं खः, गुम्हेसिगु कुतलं नेपाली भाषाय नं पत्रशैलीया बाखंयागु नी जूगु दु ।

**पूर्णदास श्रेष्ठ (ने.सं. १०३०-१११५)**

- न्हाः (ने.सं. १०९२)

- भिस्वपु बाखं (ने.सं. ११०५)

मूल रुपं सामन्ती समाजय विद्यमान आर्थिक विषमता, मिसा जीवन, लोक धारणां मतिनायात थःगु बाखंया विषयवस्तु कथं कयादीम्ह पूर्णदास श्रेष्ठ मनुतयके परिस्थिति अनुकूल दनावइगु शाश्वत भावनायात सचित्र वर्णन यायेफुम्ह बाखं च्वमि खः । पात्रतयुगु बाह्य क्रियाकलाप जक मखु, इमिगु अन्तर हृदय तथा स्वभावयात शूक्ष्म रुपं व्ययाक्यनेगु मनोवैज्ञानिक प्रवृत्ति थय्कःया बाखंया प्रमुख विशेषता खः । नेपाली भाषाया बाखनय विश्वेश्वरप्रसाद कोइरालां छयलादी थें फ्रायदया मनोविश्लेषण सिद्धान्तयात नेपालभाषाया बाखनय न्हापां छयलादीपि बाखं च्वमित मध्ये थय्कः नं छम्ह खः । पूर्णदासयागु बाखं सरल

नेपालभाषा साहित्यया इतिहास/१८३

इतिवृत्त जू । बाखनय कथावस्तु, प्रेम व्यापार परम्परावादी रुपं प्रस्तुत जूसा वेदनाया माधुर्यता नंः पिज्वः । अथे हे थय्कःयागु बाखनय आशिक रुपं जूसा संघर्षया भावना नं प्रतिबिम्बत जू । विश्वमयपूर्ण व फलागमय बाखं अन्त जुइगु पूर्णदासयागु बाखंया सरचनागत विशेषता खः । बाखंया भाषाय कृत्रिमता मदु, बरु दैनिक जीवनय प्रयोग जुइगु भाषा दु ।

**प्रेमबहादुर कंसाकार (ने.सं. १०३७-११११)**

- ती (ने.सं. १०७५)

- गय थें मस्यु ? (१०८२)

थय्कः थःगु धारणा, थःगु सन्देश विइगु उद्देश्य हे प्रेरित जुयाः बाखं च्यादीम्ह च्वमि खः । छगू परिवार, छगू समाजया सीमित समस्याया विषयवस्तुइ जक केन्द्रित जुयाच्चंगु नेपालभाषाया बाखंयात देय्या राजनैतिक, आर्थिक आदि समस्यां पिदंगु न्हून्हुगु विषयभूमि नं दुत हयाः नेपालभाषाया बाखंया विषय लागायात तच्चाः तब्या यानादीम्ह छम्ह बाखं च्वमि प्रेमबहादुर कंसाकर खः । देशय विद्यमान सामाजिक, राजनैतिक विसंगतिं बलंकुगु थीथी समस्यायात बाखंया विषयभूमि कथं ब्वयेगु हे थय्कःया बाखंया विशेषता जूगु दु । उकिं थय्कःया बाखनय, स्वाभाविकता, हार्दिकता स्वयाः नं बौद्धिकता अप्वः थाय् काःगु दु । थय्कःया राजनैतिक व्यक्तित्वया किचः बाखनय नं गनं गनं लाबाक लाबाक खनेदु । नापं जीवन व जगतपाखें कयागु खायुगु अनुभवयात नं बाखनय दुथ्याकाः न्ह्यज्याये फु । अथे हे बाखनय बाखं हनेगु पहः, घटनाया तारतम्य मिले यायेगु शिल्प, सामाजिक मनोदशायागु संगठन जक मखु, उकियात स्वाभाविक कथं ब्वयेगु शीप नं कसाःयाके दु ।

**सत्यमोहन जोशी (ने.सं. १०४०)**

- निम्ह मचाया मां (१०७०)

नेपालभाषाय नं न्हू बाखंया अभावपूर्ति यायेगु उद्देश्य हे अभिप्रेरित जुयाः बाखं च्यादीपि बाखंमिपि मध्ये सत्यमोहन जोशी नं छम्ह खः । थःगु ईया बाखंमिसें थें हे थय्कलं नं सर्प्राइज प्लट या बाखं च्वयेगु यानादीगु दु । बाखनय बाखंया अंग पूवनाः नं थौया न्हू बाखनं विइमाःगु प्रभावकारिता धाःसा थय्कःया बाखनं उलि विइफुगु मदु ।

**गोविन्दबहादुर मल्ल 'गोठाले' (ने.सं. १०४३)**

- फुटकर बाखं

नेपालभाषाय निपु स्वपु हे जक बाखं च्याः नं छगू महइगु पलाःचिं त्वःते फुम्ह छम्ह बाखं च्वमि गोविन्दबहादुर गाठाले खः । थौया बाखं धयागु हे मनूया बाखं जुसेलिं धाथेया बाखं ला 'पात्रतयुगु' हृदयया चित्रणया बाखं जुइमाः धयागु धारणां पात्र चित्रणयात हे जक विशेष रुपं थाय् बियाः इमिगु हृदययात ब्वयाः

नेपालभाषा साहित्यया इतिहास/१८४



सफल बाखं च्यादीम्ह मनोवैज्ञानिक बाखंच्वमि गोविन्दबहादुर गोठाले खः । पात्रतय्गु हृदयया कोमल कठोर भावनायात ब्वयाः, मानवीय स्वभाव जक मखु पात्रयागु माध्यमं छगू समाजया किपा हे मिखाय् लुइकाविइगु क्षमता नं थ्वय्कःया बाखनय् दु । निगति घटना छगू ब्वयाः नं पाठकतय्गु नुगः उलि हे सालेफुगु इमिगु न्हयपुयात उलि हे कुलावीफुगु थ्वय्कःया कथा शिल्प अनुकरणीय दु ।

पूर्ण पथिक (ने.सं. १०४४-१११४)

- अपराधी (ने.सं १०७०)

- छपाः चित्र (१०७७), श्रेष्ठ सिरपाः प्राप्त (१०७७)

निम्न माध्यम वर्ग व निम्न वर्गया समस्यायात तसकं हे हार्दिक मार्मिक धंगं प्रस्तुत यायेगुलिइ सिद्धहस्तम्ह पूर्ण 'पथिक' नेपालभाषा बाखं ख्यःया छगः थीगु नगु खः । समस्यायात ल्वयेक वातावरण सृजना यायेगु, बाखंया घटना नापनापं चरित्रतय्गु व्यक्तित्वया क्रमिक विकास यायां यंकेगु, 'पथिक'जुया बाखंया मू प्रवृत्ति खः । कौतुहलतां जाःगु, क्वातुगु कथानक संरचना, सजीव पात्र चित्रण, किपा हे मिखाय् लुइकाविइगु वातावरणया सृजना आदिं बाखंयात गाकं हे च्वन्हाका विउगु दु । थः समकालीन मेमेपिं च्वमितय्सं थें बाखनय् थःगु उद्देश्य निर्देशनयात तप्यंक ब्वयेगु मयासे सामाजिक विषमता, आर्थिक शोषण, गरीबी, रुढी संस्कार, अन्धविश्वास आदि न्हयब्वयाः पाठकतय्त बाखनय् थःपिसं हे सन्देश मालेगु कुतः याकादीम्ह च्वमि पूर्ण 'पथिक' खः । प्रत्यक्ष मखुसां परोक्ष रुपं थ्वय्कलं शोषित श्रमिक जनताया पक्ष कयादीगु दु । अझ गुलि बाखनय् शोषित वर्गया सकलें मखुसां युवा पिढीयात शोषणया विरुद्ध सः थ्वयेके विइगु यानादीगु दु ।

केशवलाल कर्माचार्य (ने.सं १०४५-११०९)

- जि पिहां वने त्यल (१०७०)

आकस्मिक घटनाया संयोजनं पाठकतय्त अजू चायेकः मनोरञ्जन विइगु कुतः यानादीम्ह केशवलाल कर्माचार्य नेपालभाषाया न्हापां न्हापाया बाखंच्वमिपिं मध्ये छम्ह खः । सामाजिक कुरीति, कुसंस्कार, जातीय स्वभाव व अन्धविश्वासयात न्हयब्वयाः उकिया विरुद्धय् वनेमफुगु मनूतय्गु बाध्यता, विवशतायात ब्वयेगु कुतः थ्वय्कःया बाखनय् जूगु दु । केशवलाल कर्माचार्यया बाखंया कथावस्तु समकालीन बाखं च्वमितय्गु थें जटिल व समस्यापूर्ण मजुसे सरल व सहज कथं न्हयानाच्वंगु दु । अले बाखंया भाषा शैलीयात नं सरल व मनोरञ्जक कथं न्हयज्याके फु, नापं गुलिं बाखनय् हास्यव्यंगया प्रयोगं न्हयइपुका नं ब्यूगु दु ।

माधवलाल कर्माचार्य (ने.सं. १०४७)

- थःछें (ने.सं १०७८)

नेपालभाषा साहित्यया इतिहास/१८५

माधवलाल कर्माचार्य पाश्चात्य बाखं साहित्यय् पिदंगु न्हून्गु प्रवाह प्रवर्तित दुतहया नेपालभाषाया आधुनिक बाखंया विकासय् महत्वपूर्ण योगदान वियादीम्ह छम्ह अग्रज बाखंच्वमि खः । बाखनय् घटनायात बः विइगु स्वयाः पात्रतय्गु मनोदशाया शूक्ष्म चित्रण यायेगु चेखोवया प्रयोग कथंया मनोवैज्ञानिक बाखं तथा भर्जिनिया उल्फया चेतना प्रवाह पद्धति नेपालभाषाया बाखनय् न्हापां दुतहयेगु ज्या थ्वय्कः पाखे हे जूगु दु । सजीव वातावरणया सृजना तथा पात्रतय्गु हृदयया सूक्ष्म वर्णन यानाः पाठकतय्त छगू अमित छाप लाकेगुलिइ थ्वय्कः गाकं हे सफल जू । छम्ह कलाकारं ब्रुशं तस्वीर च्वइ थें थःगु कलमया माध्यमं बाखनय् सजीव दृश्यया चित्रण यायेफुम्ह माधवलालया बाखनं नेपालभाषाया बाखंयात छगू न्हूगु रुप विउगु दु, स्तरीयता विउगु दु ।

पुण्यरत्न बज्राचार्य (ने.सं १०४७-११०९)

- बाज्याया ग्वाय् व मेमेगु बाखं (ने.सं १०७५)

- वैं फय् व मेमेगु बाखं (ने.सं १०७६)

नेपालभाषाया हास्यव्यंग बाखंच्वमित मध्ये पुण्यरत्न बज्राचार्य नं छम्ह खः । सामाजिक विसंगति प्रति छुं व्यंग तथा पाठकतय्त मनोरञ्जन विइगु निती न्हिले पिज्वइ कथंया घटनाया समायोजन याना यंकेगु पुण्यरत्न बज्राचार्यया बाखंया विशेषता खः । थ्वय्कःया बाखनं नेपालभाषाय् हास्यव्यंग साहित्यया विकासय् तिवः ब्यूगु दु ।

न्हूछेसुन्दर तुलाधर (ने.सं १०४८)

- तिनिख्यः मिसा (ने.सं १११७)

मनूया हृदयया चित्रण यायेगुलिइ विशेष अभिरुचि ज्वनाः बाखं च्यादीम्ह न्हूछेसुन्दर नेपालभाषाया अग्रज बाखंच्वमित मध्ये छम्ह खः । नेवाः समाज व संस्कृति विषयलय् जक सीमित जुयाच्वंगु नेपालभाषाया बाखंया विषयवस्तुयात देय्या मेमेगु समस्या नाप नं व्यापक विस्तृत यायेगु कुतः यानादीम्ह छम्ह न्हापांम्ह बाखं च्वमि थ्वय्कः नं खः । तर छपु बाखं नं जीवनया तःगू पक्ष क्यनेगु अनुराग ज्वनादीगुलिं, 'पथिकजु' पिनिगु बाखं गुलि हार्दिक मार्मिक जुइफुगु खः, उलि थ्वय्कःया बाखं जुइफुगु मदु ।

धूस्वां साय्मि (ने.सं १०५०)

- न्याफ्वःस्वां (१०७०)

- मूस्वां (१०७३)

- ब्वाला (१०७४)

थौ नेपालभाषाया उपन्यासकारया रुपय् नांजाःम्ह धूस्वां साय्मि न्हापां छम्ह बाखंच्वमि, लघु बाखंच्वमि नं खः । मतिना, विवाह, सामाजिक कुरीति आदि सीमित विषयय् जक लिधनाच्वंगु नेपालभाषाया बाखंयात सामाजिक, राष्ट्रिय

नेपालभाषा साहित्यया इतिहास/१८६



समस्याय् तत्कं व्यापक यानायकाः नेपालभाषाया बाखंया लागा तब्ब्या यानादीम्ह छम्ह बाखंच्वमि थ्वय्कः नं खः । तर थ्वय्कःया उपन्यास गुलि जीवनया अनुभूतिं भूचाःगु खः, उलि बाखं जुइफुगु मदु । अथे हे बाखंया संरचनाया दृष्टिं नं थ्वय्कःया बाखनय् आपालं कमजोरी दु । छगू घटनाया लिउ मेगु घटना स्वाना यंकेगु ज्यां बाखंया रुपयात स्यंकाविइगु जूगु दु । अभ् छम्ह लघु बाखंया च्वमिया नातां छगू घटनाय् नं फयांफछि चिहाकः अभ् संकेत जक बियाः अन्तय् गुगु ठोसपूर्ण प्रतिक्रिया बिइमाःगु खः व बिइफुगु मदु ।

**परमानन्द बज्राचार्य (ने.सं १०५०)**

- फुटकर

बाखं च्वयेगु खुबिं स्वयाः नं नेपालभाषाय् नं न्हू बाखं दयेके धयागु भावनां (अभिप्रेरित जुयाः) बाखं च्वयादीपिं नेपालभाषाया न्हापांया न्हू बाखं च्वमित मध्ये परमानन्द बज्राचार्य नं छम्ह खः । तत्कालीन बाखंच्वमितय्सं थें थ्वय्कलं नं थःगु बाखनय् मनं मतुंगु आकस्मिक घटनाया संयोजन यानाः पाठकतय्त मनोरञ्जन बिइगु प्रविधि ज्वनादीगु दु । थये खयां नं चित्तधर, पूर्ण पथिकपिसं गुगु स्वाभाविकता, हार्दिकता बाखनय् थनेफुगु खः, थ्वय्कःया बाखं उलि हे ज्वः जुइफुगु मदु । बाखंयात विश्वसनीयता व स्वाभाविकताया अभावं यानाः थ्वय्कःया बाखं उलि प्रभावकारी जुइफुगु मदु ।

**तीर्थलाल नःघःभनी (ने.सं १०५०)**

- ब्वघासा (ने.सं १०७८)

थःगु बाखंया माध्यमं नेवाः समाज, नेवाः जीवन शैलीयात सचित्र रुप ब्वयादीम्ह नेपालभाषाया छम्ह स्येल्लाःम्ह बाखंच्वमि तीर्थलाल नःघःभनीजु खः । छम्ह कलाकारं ब्रुशं किपा किइ थें थःगु कलमया माध्यमं मिखाय् लुइगु दृश्य चित्रण यायेफुगु हे थ्वय्कःया बाखंया विशेषता खः । अथे हे थ्वय्कलं थःगु बाखनय् मचातय्गु क्रियाकलाप, इमिगु शूक्ष्म मनोभावया चित्रण यानाः जीवन व जगत प्रतिया थःगु क्वातुगु अध्ययन अनभूतिया परिचय बियादीगु दु । नेवाः समाज, नेवाः संस्कृतिया सचित्र किपा दुगु थ्वय्कःया बाखं नेवाः जातियात अमर यानातयेगु छगू मू वंगु ज्वलं जूगु दु ।

**फणिन्द्ररत्न बज्राचार्य (ने.सं १०५१)**

- च्वापुया जः (११०७)

- शालिग्राम (११०८)

थम्ह अनुभव यानागु थःत प्रभावित जूगु घटनायात बाखंया रुप बियादीम्ह फणिन्द्ररत्न बज्राचार्य नेवाः जाति नेवाः संस्कृतिया किपा नं बाखं नाप नापं घानायकीम्ह बाखंच्वमि खः । थः समकालीन मेमेपिं बाखंच्वमितय्सं थें जवरजस्त

नेपालभाषा साहित्यया इतिहास/१८७

आकस्मिक घटनाया संयोजन यानाः मनोरञ्जन बिइगु कुतः स्वयाः नं थौया यथार्थता वास्तविकता प्रति सजग सचेत यायेगु कुतः थ्वय्कःया बाखनय् दु । सामाजिक कुरीति, रुढी संस्कार आदिया चित्रण जक मखु, थौया नेपाःया समाजय् ब्वलनाच्वंगु आर्थिक विकृतिं हःगु भयावह परिस्थितिया किपा नं थ्वय्कलं थःगु बाखनय् ब्वयादीगु दु । थुकथं थ्वय्कःया बाखं नेवाःतय्गु सांस्कृतिक जीवनया चित्रणं निसं थौया नेपाःमितय्गु वास्तविक जीवनया वर्णन दुगु छगू सक्रिपा थे जूगु दु ।

**डा.जनकलाल बैद्य (ने.सं १०५४)**

- स्वयाच्वंगु मिखा (ने.सं ११०३)

नेपालभाषाया छम्ह समालोचकया रुपय् नांजाःम्ह बैद्यजु थम्ह इलय्ब्यलय् च्वयागु बाखंयात सफूया रुप बियाः छम्ह बाखंमि कथं न्हयलुयादीगु दु । विशेष यानाः घटना, पात्र चित्रणयात स्वयाः नं वातावरण सृजनाय् महत्व बियाः छगू ई, छगू स्थितियात ब्वयेगु हे थ्वय्कःया बाखंया विशेषता जूगु दु । अथे हे स्वजातीय सांस्कृतिक चेतना नं थ्वय्कःया बाखंया मेगु विशेषता जूगु दु, तर समालोचनाया क्षेत्रय् थ्वय्कः गुलि चर्चित जुइफुगु खः बाखं विधाय् उलि जुइफुगु खनेमदु ।

**दुर्लभलाल सिंह सुवाल (ने.सं १०५४ -१११८)**

- किक्किपा (ने.सं १०९०)

- भूल दुने च्वम्ह मनू (११००)

- दथु मिखा (ने.सं ११०४)

- वयात छें पितिन (ने.सं ११०९)

- दुने च्वम्ह मनू (१११७)

दुर्लभलालसिंह नेपालभाषाया चीबाखंया रचनाय् विशेष रुपं समर्पित जुयादीम्ह बाखंच्वमि खः । थौया तसकं लिमलाःगु जीवनय् ईया गाक्कं महत्व दु । थ्व हे महत्वपूर्ण ईया सदुपयोगया उद्देश्यं हे थ्वय्कलं चीबाखंया प्रयोग नेपालभाषाय् यानादिल । चीबाखनय् गुगु विषयया पूर्वंगु विवरण दइमखु, थ्व हे कथं दुर्लभलालजुं संक्षिप्त परिवेशय् जीवन व समाजया असंगतिपूर्ण खंयात प्रतिकात्मक शैलीं सांकेतिक कथ्यया रुपय् ब्वयादीगु दु । दुर्लभलालजुं थौया असंगति व विरोधाभासयात यथेष्ट रुपं ब्वयादीगु हे थौया यथार्थता प्रति सजग सचेत यायेत खः सद्वृत्ति पाखे न्हयज्याकेत खः । सरल शैली सांकेतिक भाषा, गभीर अर्थ, व्यंग्यात्मक प्रस्तुति प्रतिकात्मक आकृति आदिं दुर्लभलालजुया बाखंयात प्रौढता बिउगु दु, परिष्कृत जुइकाबिउगु दु ।

**रामशेखर नकःमि (ने.सं १०५५)**

- सोतिपाँय (ने.सं १०८८)

नेपालभाषा साहित्यया इतिहास/१८८



- सिमात फफः स्वः (१०९८)

ध्वकः बाखंया माध्यमं नेवाः संस्कृतिया किपा ब्वयेगु नापं थौया समाजय् विद्यमान विवृति विसंगतियात ख्यालः पहलं प्रस्तुत यानादीम्ह बाखंच्वमि खः । ध्वकःया ख्यालः, प्याखं व उपन्यासय् गुगु प्रगतिवादया पलाः खनेदुगु खः, बाखनय् नं खनेमदु धाये मछिं । बाखनय् नं थौया समाजया मध्यम वर्गीय मनुतय्गु स्यनावंगु आर्थिक स्थिति, रुढीवादी विचाःयात ब्वयेगुलिइ ध्वकः लिपा लाःगु मदु ।

लक्ष्मण राजवंशी (ने.सं १०५५)

- नमिगवाःगु सर्गः (ने.सं ११०८)
- बुलुमि (ने.सं ११११)
- देखा (ने.सं १११५)
- आलंमत (१११९)

बाखं च्वयेगु प्रतिभा दयाः नं आपालं लिपा हे तिनि बाखं सफू पिथनादीम्ह लक्ष्मण राजवंशी छम्ह स्वजातीय सांस्कृतिक चेतनां ग्वाःम्ह बाखंच्वमि खः । बाखंया माध्यमं नेवाः संस्कृतिया जः ह्वलादीम्ह लक्ष्मण राजवंशी थम्ह अनुभव यानागु, थःत प्रभावित जूगु घटनायात कल्पनाया लसां बियाः बाखंया रुप बियादीम्ह बाखंच्वमि नं खः । ध्वकःया बाखनय् नेवाः संस्कृति, नेवाः संस्कारयात छम्ह भ्वासि चाःम्ह मनुखं तिसाः वसः ब्वये थें ब्वयेगु मजुसे बाखंया हे छगू अभिन्न अंग थें प्रस्तुत यानायकेगु जूगु दु । थथे ध्वकःया बाखनं भीगु सांस्कृतिक, धार्मिक व सामाजिक मौलिक विशेषता ब्वयेगुया नापं थौया परिवेशय् म्वाये माःपि मनुतय्गु यथास्थिति यात नं ब्वयेगु याःगुलिं, ध्वकःया बाखं गाकं रोचक व आकर्षक जूगु दु । तर बाखनय् घटनाक्रमयात बलुहुं थत यकाः चरमसिमाय् थ्यने साथं गुगु व्वाचायेके माःगु खः अथे मजुसे, हानं हानं मेमेगु घटना न्ह्याकाः बाखं तःहाकः यायेगु प्राविधिक त्रुटि धाःसा ध्वकःया बाखनय् दनि ।

डा. सुन्दरकृष्ण जोशी (ने.सं १०५५)

- सितुमाः (ने.सं १०९९)

सुन्दरकृष्ण जोशी म्हो बाखं च्वयाः नं नेपालभाषाया बाखं ख्यलय् थःगु नं छुं प्रभाव क्यनेफुम्ह बाखंमि खः । अप्ठः थें बाखनय् पौराणिक विषयवस्तुयात, कथावस्तुया रुपय् प्रस्तुत यानाः नं थौया परिवेश थौया ईयात ल्वयेक सन्देश उपदेश बिइगु ज्या ध्वकःया बाखनय् जूगु दु । सललल न्ह्याःगु भाषा शैली, स्वभाविक व सरल अभिव्यक्ति ध्वकःया बाखंया दकलय् आकर्षक पक्ष खःसा सुधारवादी भावना, सांस्कृतिक गरिमा, राष्ट्रिय चेतना हे ध्वकःया बाखंया मू विशेषता जूगु दु । थुगु दृष्टि ध्वकःया बाखं गनं गनं 'हृदय' जुया बाखं लिसे सतिइगु खनेदु । बाखनय् सुधारया संकेत, अतितया गरिमा ब्वयेगु

नेपालभाषा साहित्यया इतिहास/१८९

प्रवृत्ति विद्यमान जुयाः नं बाखंया शिल्प निर्वाह यायेगुलिइ बाखंमि लिपा लाःगु मदु

आशाराम शाक्य (ने.सं १०५८)

- हिलाबुला (ने.सं. १०७७)

आशाराम शाक्य मानवीय शाश्वत भावना, प्रेम रतियात बाखंया विषयवस्तु कथं दुथ्याकादीम्ह नेपालभाषाया छम्ह न्हापांम्ह बाखं च्वमि खः । पात्रयागु नुगःयात शूक्ष्म रुपं मनोविश्लेषणात्मक धंगं ब्वयेगुया नापं सामाजिक भेदभाव, आर्थिक समस्या, रुढी संस्कार आदिं समाजय् ब्वलंकूगु विवृति विसंगतियात बाखंया अभिन्न अंग थें यानाःब्वयेगु ज्या नं ध्वकःया बाखनय् जूगु दु । थुकिं यानाः प्रायः ध्वकःया बाखं घटना प्रधान जूगु दु, बाखं रोचक व आकर्षक जूगु दु । तर परम्परागत शैली कथं क्वातुगु कथानक, पात्र चित्रण व वातावरण सिर्जना स्वताय् नं उलि हे ध्यान बियाः गब्लें फलैश बाय्कया रुपय् सा गब्लें स्वगत शैलीया रुपय् न्हयब्वया तइगु ध्वकःया बाखं ब्वनेबलय् तसकं आकर्षक व रोचक जूसां, छपु बाखनं छगू हे समस्या वा जीवनया छगू हे पक्षयात जक केन्द्रित याना क्यनेगु गुगु अवधारणा थौया बाखनय् ब्वलंगु दु व धाःसा पूर्वक मदु ।

मथुराकृष्ण साय्मि (१०५९)

- वं नकतिनि प्रेम यात (१०८२)

- लुमन्ति (१०८३)

- जि हिरा (१०८७)

मथुराकृष्ण साय्मि कथानकयात स्वयाः नं पात्र चित्रणय् विशेष बः बियादीम्ह बाखंच्वमि खः । पात्रतय्गु वाह्य क्रियाकलाप जक मखु इमिगु अन्तर हृदयया शूक्ष्म विश्लेषण यानाः इमिगु यौन मनोवृत्तियात ब्वयेगु ध्वकःया बाखंया मू विशेषता जूगु दु । थुकथं मथुराकृष्णजुं फ्रायड्या अर्धचेतन, अचेतन मनया विश्लेषण प्रवृत्ति यात नेपालभाषाया बाखनय् छ्यलाः मनोवैज्ञानिक बाखंया विकासय् तिबः बियादीगु दु ।

हितकरवीरसिंह कंसकार (ने.सं १०५९)

- अगिमथः (ने.सं १०८४), श्रेष्ठ सिरपाः प्राप्त

- मिजला (ने.सं १०९०)

वास्तविक घटनायात नं कल्पनाया लसां बियाः बाखं सृजना याइम्ह छम्ह बाखं च्वमि हितकरवीरसिंह नं खः । बाखं-सार पाठकतय्सं सिउगु हे वस्तु जुइगुलिं, थज्याःगु बाखनय् सफलताया आधार वातावरणया सृजना यायेगुलिइ जुइ । थ्व हे कथं हितकरजुं नं सचित्र दृश्य वर्णन, आकर्षक भाषा शैली छ्यलाः बाखंयात आकर्षक रोचक दयेकादीगु दु । बाखंया मू कथानक नाप नाप थम्ह

नेपालभाषा साहित्यया इतिहास/१९०



अनुभव यानागु, थम्हं खंगु थौया समाजय् विद्यमान अनेक विकृति विसंगतियात ब्वयायकेगु थ्वय्कःया बाखंया मेगु विशेषता खः । थ्व हे कथं थ्वय्कःया बाखनय् आर्थिक, राजनैतिक, सामाजिक, धार्मिक विकृति जक मखु, यौन विकृतिया नं यथेष्ट चित्रण दु । साहित्य समाज व जीवनया प्रतिबिम्ब खःसा जीवन ब्वयेगु क्रमय् यौनया चित्रण जूवनीगु स्वभाविक खः धयागु थ्वय्कःया धारणा खनेदु ।

**प्रकाशकुमारी प्रधानांग (ने.सं १०६१)**

- मस्यांपा: (ने.सं १०८३)

छम्ह पात्रया माध्यम थःम्हं हनाच्वनागु समाजयात ब्वयादीम्ह नेपालभाषाया छम्ह बाखंच्वमि प्रकाशकुमारी प्रधानांग नं खः । भीगु समाजय् विद्यमान मिसा मिजया भेदभाव जक मखु, छम्ह मिसाया दथुइ नं म्हयाय्मचा व भौमचाया दुने दुगु भेदभाव थें ज्याःगु नारी समस्यायात तीक्ष्ण रुपं वात्तु वाले फुम्ह बाखंच्वमि थ्वय्कः खः । थौ 'म्हयाय्यात नं अंश' धयागु गुगु अवधारणा ब्वलंगु दु, थुकियात थौ स्वयाः स्वीन्यादँ न्हयः हे 'काय बुइकूम्ह मांयात अंश दइगु म्हयाय् बुइकूम्ह मांयात अंश मदइगु' थें ज्याःगु बाखं चिनाः मिसातय्त नं आर्थिक अधिकार माः धकाः सः थ्वय्कादीम्ह बाखंच्वमि प्रकाशकुमारी प्रधानांग खः । थुकथं मिसा समस्यायात उगु इया सामाजिक दृष्टिकोणं जक मखु आर्थिक, प्रचलित कानूनी तवरं नं बालेगु यानादीम्ह नेपालभाषाया जक मखु नेपाःया न्हापांम्ह मिसा बाखंच्वमि प्रकाशकुमारी प्रधानांग जूगु दु । अथे हे थ्वय्कःया बाखनय् घटनाया स्वभाविकता, सम्पूर्ण दृश्य पाठकया मिखाया न्हयःने हयेफुगु वर्णन-शक्ति, बाखनय् चित्रित चरित्रयात मनोवैज्ञानिक रुपं विश्लेषण यायेगु आदि यानाः थ्वय्कःयात छम्ह स्यल्लाःम्ह बाखंच्वमिया रुपय् परिचित याकूगु दु ।

**पुष्पलता श्रेष्ठ (ने.सं १०६२)**

- कीगः (ने.सं १०८३)

थः समकालीन बाखंच्वमितसें थें हे आश्चर्यजनक घटनाया संयोजन यानाः पाठकतय्त प्रभावित यायेगु बाखं च्वयादीम्ह छम्ह बाखंच्वमि पुष्पलता नं खः । अथे हे समाजय् नारी वर्गयात जुयाच्वंगु असमान व्यवहार, शोषण आदियात ब्वयाः मिसातयके चेतना व जागरण थनेगु कृतः थ्वय्कःया बाखनय् जूगु दु । तर बाखनय् कौतुहलता जिज्ञासां थनेगु कृतलय्, थ्वय्कःया गुलि गुलि बाखनय् स्वाभाविकताया हत्या नं जूगु दु । थ्वय्कःया कीगः (ने.सं. १०८३) बाखं सफू, न्हापांगु मिसा च्वमितय्गु बाखं सफू खः ।

**राजा शाक्य (ने.सं १०६२)**

- मतकी (ने.सं १०९०)

- जि खग्रास मखु मिलाया (ने.सं ११०३) श्रेष्ठ सिरपाःप्राप्त ( ने.सं. ११०३)

- कुचाकुचागु किपा (ने.सं १११९)

नेपालभाषा साहित्यया इतिहास/१९१

न्हापां विशेषतः मिसा व मतिनाय् जक केन्द्रित जुयाः बाखं च्वयादीम्ह राजा शाक्यं लिपा 'जि खग्रास मखु मिलाया' बाखं पुचलय् थ्यंकाः थःगु बाखंया विषयभूमि चकंका दीगु दु, न्हूगु आयाम मालेगु न्हूगु प्रयोग पाखे अविलम्बित जुयादीगु दु । थ्वय्कलं थःगु बाखंया माध्यमं भीसं हनाच्वनागु जीवनय् खनेदुगु विषमता, विसंगति कुण्ठातय्त ब्वयाः थौया मनूयागु परिवेशया शाश्वतताया धर्कि उलादीगु दु । थ्वय्कःया अप्वः थें बाखनय् आश्चर्यजनक घटनाया संयोजन, मनोवैज्ञानिक पात्र चित्रण, खल्लाबल्लाय् स्वाभाविकता व संगठनय् एकरूपता दु । प्रस्तुतिकरणय् नाटकीय पहः तथा भीगु संस्कृति व परम्पराया कथंयागु बिम्ब व प्रतीकया प्रयोगं बाखंया रुप विधानयात च्वन्ह्याका विउगु दु । तर छुं छुं बाखनय् अप्वः सम्बेदनशीलता व भावुकताया कारणं बाखंया स्वाभाविकता व प्रभावकारीताय् घाःपाः लाःवंगु नं दुसां लिपा पिदंगु कुचाकुचागु किपाय् वनाः थ्वय्कःया बाखं गाकं परिमार्जित व परिस्कृत जूगु दु ।

**हरिशंकर रंजितकार (ने.सं १०६३)**

- कैगाः (१०८९)

- कैचा (१०९१)

- कंमा (१११७)

मनूया नुगलय् ब्वलनीगु प्रेम, घृणा, क्रोध मोह आदि थें ज्याःगु शाश्वत भावना व उमङ्गयात मू विषय यानाः बाखं च्वयादीम्ह हरिशंकर रंजितकार नेपालभाषाया छम्ह सशक्त मनोवैज्ञानिक बाखंच्वमि खः । प्लटय् स्वयां पात्र चित्रणय् अप्वः बः बियातःगु थ्वय्कःया बाखनं नेपालभाषाय् मनोवैज्ञानिक बाखंया विकासय् तिबः विउगु दु । मनूया नुगः हिलाबिइत भौतिक साधन स्वयाः नं मनोवैज्ञानिक प्रयोग आपालं प्रभावकारी जू धयागु खँ थ्वय्कःया आपालं बाखनय् दु । स्वाभाविक घटना चित्रण, छगू घटनाया माध्यमं समाजया किपा ब्वयेगु क्षमता, मनोवैज्ञानिक पात्र चित्रण आदि यानाः थ्वय्कःया बाखं ब्वमितय्गु नुगः थिइत गाकं सफल जूगु दु ।

**सुवर्णकेशरी (ने.सं १०६७)**

- गुँच्च मू पुली (ने.सं १०९४)

सुवर्ण केशरी, थौया विश्वया आधुनिक बाखं ख्यलय् पिदंगु विविध प्रवाह प्रवृत्तियात नेपालभाषाया बाखं ख्यलय् छ्यलादीम्ह छम्ह बाखंच्वमि खः । थ्व हे कथं थ्वय्कःया बाखनय् गनं मनोविश्लेषणयात विशेष थाय् बियातःगु दुसा गनं घटनायात विशेष थाय् बियाः उत्सुकता जिज्ञासा थनेगु प्रयास जूगु दु । अथे हे थ्वय्कःया आपालं बाखनय् प्रगतिशील प्रवाह नं खनेदु । थुकथं शोषित पिडित जनताया पं लिनाः इमित जूगु अन्याः अत्याःया विरोध यायेगु जक मखु, इमिगु विजयप्रति आशावादी जुइगु प्रवृत्ति सुवर्ण केशरीया बाखनय् खनेदु । बाखं

नेपालभाषा साहित्यया इतिहास/१९२



कनेगु कला तसकं हे हिसि दु, ब्वमितयूत बाखंया संसारय् थ्यंकाविइगु चित्रण शक्ति थ्वय्कःया बाखनय् दु ।

**अमृतरत्न तुलाधर (ने.सं १०६७)**

- स्याक्कुनःम्ह मन् (ने.सं १११७)

नेपालभाषाया आधुनिक बाखं ख्यलय् थःगु विस्कं विशेषता न्ह्यब्वयादीम्ह छम्ह बाखंमि अमृतरत्न तुलाधर नं खः । थौया परिवेशय् थौया मनूया बाध्यता विवशतायात न्ह्यब्वयातःगु थ्वय्कःया बाखनं थौया यथास्थितियात जक ब्वयेगु मयासे थ्वयात हिइके माःगु भिंके माःगु आवश्यकतायात नं ध्वाथुइकेगु याःगु दु । बाखंया माध्यमं पाठकतयूत छगू अमित छाप लाकेगुलिइ बाखंच्चमि सफल जुइफुगु दु ।

**मोतिलक्ष्मी शाक्य (ने.सं १०६८)**

- मतया जलय् (ने.सं ११०२)

मोतिलक्ष्मी शाक्य विशेषतः घटनायात स्वयाः नं पात्रतय्गु बाह्य क्रियाकलाप व इमिगु अन्तर हृदयया शूक्ष्म विश्लेषण यानाः बाखं च्वयादीम्ह च्वमि खः । मिखाय् लुइगु दृश्य चित्रण यायेगुलिइ थ्वय्कः तसकं जाःगु खनेदु । हिसि दयेक बाखं कनेगु थ्वय्कःया कथा शिल्पं पाठकतयूत बाखंया संसारय् साला यंकेफुगु दु ।

**डा. केशवमान शाक्य (ने.सं १०७१)**

- झ्यालं पिनेया परिवेश (१११०)

डा. केशवमान शाक्य नेपालभाषा बाखं ख्यःया न्हू हस्ताक्षर खः । थ्वय्कःयागु बाखंया संरचना, विषयवस्तुया ल्यज्या, प्रस्तुतीकरण, शिल्प आदियात दुवाला यंकेबलय् थ्वय्कः गाककं 'न्हू बाखं' पाखे आग्रहित जूगु दु । नापं थ्वय्कःया बाखनय् भीगु बाखं ख्यलय् नेपाःगालं पिनेयागु जीवनयात समावेश यानाः बाखं हनेगु कुतः नं जूवंगु दु । थुकथं नेपाःगालं पिनेयागु जीवन ब्वइबलय् अनयागु सामाजिक, राजनैतिक परिप्रेक्ष्ययात नं उलाबिउगु, दु अनया मनूतय्गु वैचारिक मान्यतायात नं ब्वया बिउगु दु । बाखंयात मनोविश्लेषण कथं संरचना यायेगुपाखे नं शाक्ययागु ल्हाः कुशल जू । भाषा व शैली नं ग्यसु हे लाः ।

**भूषणप्रसाद श्रेष्ठ (१०७२)**

फिसः (१०९३)

ग्वःफय् (१०९४)

धकिं दुने (१०९७) श्रेष्ठ सिरपाः प्राप्त (ने.सं. १०९७)

बीनिभाः (१०९८)

लैपु (१०९५)

नेपालभाषा साहित्यया इतिहास/१९३

**दासिवःम्ह मन् (११०४)**

भूषणप्रसाद श्रेष्ठ नेपालभाषाया न्हू पिढीयाम्ह छम्ह सशक्त बाखंच्चमि खः । थौया समाजय् विद्यमान विकृति विसंगतियात प्रतिकात्मक धंगं स्याचुक क्वात्तुक प्रहार यानाः बाखं ज्यायेगु थ्वय्कःया विशेषता खः । नेपालभाषाया बाखं ख्यलय् यथार्थवादी प्रवाहयात विस्तार यायेगु ज्याय् थ्वय्कःपाखें नं गाकं तिबः जूगु दु । ब्वमिपितय्गु मनय् तिक्व मिक छुं प्रभाव लाकेगु हे थौया सफल बाखंया गुगु विशेषता जूगु दु, थज्याःगु कलाया सफल प्रयोग थ्वय्कःया बाखनय् नं गाकं दु । अथे हे थौया बाखंया ख्यलय् खनेदया च्वंगु चीबाखंया प्रयोगय् नं थ्वय्कलं सशक्तता क्यनादीगु दु ।

**मंगलदेवी बज्राचार्य / स्थापित (ने.सं १०७३)**

- हयूपाःया जलय् (ने.सं ११००)

मंगलदेवी स्थापित नेपालभाषाया छम्ह उदयमान मयजु च्वमि खः । थ्वय्कःया बाखनं नेपालभाषाया बाखं विधाय् दनावःगु प्रगतिशील लहरयात न्ह्याकेगुलिइ तिबः बिउगु दु । गृहस्थ समस्यां निसं राष्ट्रिय समस्या तर्क कःघायेगु कुतः जूगु थ्वय्कःया दक्कं बाखंयात प्रगतिशील बाखं धायेमछिं, तर अथे खयाः नं अप्वः धया थें बाखनय् थ्व पलाः सशक्त जू ।

**सुलोचना मानन्धर (ने.सं १०७५)**

- झ्यारखाना (ने.सं १११६)

नेपालभाषाया बाखं च्वज्याय् ल्हाः ज्यःम्ह छम्ह मिसा बाखंच्चमि सुलोचना मानन्धर नं खः । मूलतः नेवाः समाज, नेवाः संस्कृतिया परिवेशय् बाखं च्वइपिं मेपि मयजु च्वमिपिसं थें सुलोचना नं छखा छँया समस्या न्ह्याब्वया नं थ्वय्कलं छगू समाजया समस्या प्रतिविम्बित याकेफुगु दु । 'थःगु नुगलय् मन्हयंगु खँ प्वकेत हे जिं बाखं च्वया' धयादीम्ह सुलोचनां, बाखनय् समस्यायात थाय् वियादीसं मूलरूप थ्वय्कःया बाखं सन्देशमूलक जुइगु स्वाभाविक हे खः । थ्व हे कथं थ्वय्कःया बाखंया पात्रत बाखंयात जीवन बिइपिं स्वयां नं च्वमिया सन्देश हवलीपिं छगू वर्ग छगू समूहया प्रतिनिधित्व याइपिं जूगु दु । थुपिं हे पात्रत पाखें सुलोचना थःगु नारी मुक्ति, स्वतन्त्रता, स्वाधिनताया धारणा, कामनायात उलि हे सतर्क, सशक्त रूपं थ्वयेकादीगु दु । निपु स्वपु हे जक थ्वय्कःया बाखं प्रगतिशील धाः पाखे उन्मुख जूसां, प्रगतिशील साहित्य पाखे थ्वय्कःया भुकाव नं अभ यचुका ब्यू ।

**अष्टमुनि गुभाजु (ने.सं १०७६)**

धकिं दुने धकिं पिने (ने.सं. ११०४)

अष्टमुनि गुभाजु नेपालभाषाय् समस्यामूलक बाखं च्वयादीम्ह छम्ह च्वमि खः । निम्न मध्यम वर्गया आर्थिक समस्याय् केन्द्रित जुयाः बाखं च्वयादीम्ह गुभाजु

नेपालभाषा साहित्यया इतिहास/१९४



आर्थिक समस्यां सृजना याः गु विविध विकृति विसंगति जक मखु थौया मनूतय्के खनेदयाच्चंगु अनैतिकता अमानवीयतायात नं छगू समस्याया रुपय् खंकादीगु दु । छम्ह पात्रया माध्यमं छगू समाज छगू वर्गया प्रतिनिधित्व याकातइगु थ्वय्कःया बाखनय् अनैतिक पात्रतय्त थःगु गल्लि महशुस याकाः सुधारया सन्देश हवलेगु थ्वय्कःया कुतः च्छाये बहः जू ।

**अमोघ ताम्राकार (ने.सं १०७६)**

- लकसं लेंपु हिलाबी व मेमेगु बाखं (ने.सं १११२)

- इलं म्हःगु बाखं (ने.सं १११६)

अमोघ ताम्राकार नेपालभाषाय् थौया यथास्थितियात प्रतीकात्मक रुपं ब्वयाः बाखं च्यादीम्ह बाखंच्वमि खः । 'चीबाखं' (लघु बाखं) च्वयेगुलिइ विशेष ल्हाः न्ह्याःम्ह अमोघ ताम्राकारया बाखनं नेपालभाषाया बाखनय् प्रगतिशील धाः न्ह्याकेगुलिइ तिवः विउगु दु । प्रतिक्रियावादी तत्त्वतय्गु जालं थौया जनता अभ्रं नं मुक्त मजुनि व थौं प्राप्त जुल धाःगु स्वतन्त्रता स्वाधीनता छगू भ्रम जक तिनि धकाः क्यनाः जनतायात सजग व सचेत यायेगु कुतः थ्वय्कःया बाखनय् जूगु दु ।

**सुशीला मानन्धर (१९७७)**

- लेहेंपू (ने.सं १११२)

नेपालभाषाया मिसा बाखं च्वमिपिनिगु धलखय् नांजाःम्ह छम्ह च्वमि सुशीला मानन्धर नं खः । मानवीय हृदययात सूक्ष्म रुपं दुवालाः बाखं च्वयेगु ज्या थ्वय्कःया बाखनय् जूगु खनेदु । दीशाविहीन, उदेश्यविहीन जुयाः म्वायेमाःगु, परिस्थितनाप सामना यायेमफुगु थौया मनूया बाध्यता, विवशता हे थ्वय्कःया बाखनय् मू थाय् कयाच्चंगु दु ।

**केशरमान ताम्राकार (ने.सं १०७७)**

- मिफुति (ने.सं १०९७)

- लागाय् जि (ने.सं ११००)

- जि विश्वासय् म्वाय् (ने.सं ११०३)

केशरमान ताम्राकार पात्र चित्रणयात विशेष वः वियाः बाखं च्यादीम्ह च्वमि खः । विशेष यानाः मिसा पात्रतय्गु मानसिक स्थितियात दुवालाः बाखं च्वयेगु यानादीम्ह केशरमानजुं मनूया नुगःयात सूक्ष्म रुपं ब्वयेगु जक मखु, आः छु जुइ व गथे जुइ धैगु कौतुहलता जिज्ञासा थनेगु नं यानादीगु दु । अथे हे थ्वय्कःया बाखनय् यथास्थितिवाद, पुरातनवादयात विरोध यानाः थौया ल्याय्म्ह मानसिकता व चाहनायात ब्वयेगु नं जूगु दु ।

**ध्रुव मधिकर्मि (ने.सं १०७८)**

- ध्रुव मधिकर्मिया बाखं (अप्रकाशित)

थौया असंगति विकृति, विरोधाभासयात प्रतिक बिम्बया माध्यमं अभिव्यक्त यानाः नेपालभाषाय् न्हू बाखं परम्पराया नी यानादीम्ह छम्ह बाखंच्वमि ध्रुव मधिकर्मि नं खः । थौया आधुनिक निबन्धया लसि वःगु थ्वय्कःया बाखनं पाठकतय्गु नुगः सालेगु स्वयाः नं बुद्धि विवेकयात ज्ययेके बिइत स्वःगु दु । विशुद्ध बाखं विशुद्ध निबन्धया अवधारणा थौं मात्र कल्पनाया विषय जुइ धुंकल, गुगुं विधाय् नं मेगु विधा पूर्ण रुपं शून्य जुइ मखु धैगु 'फुक्कवाद' (Wholistic)या अवधारणायात थ्वय्कःया बाखनं ब्वया विउगु दु ।

**शशीकला मानन्धर (ने.सं १०८०)**

- नमि (ने.सं ११०२)

अप्चः थें मिसातय्गु दीनहीन स्थितिया चित्रणय् जक अभ्यस्त जुयाच्चंगु नेपालभाषाया बाखंयात मिसात नं छुं खः इमिसं नं छुं यायेफु धयागु वैचारिक हिउपाः अर्थात् आत्माभिमानया सः थ्वयेकाः न्हू कथं न्ह्याकेगु कुतः यानादीम्ह छम्ह मय्जु च्वमि, शशीकला मानन्धर नं खः । थौया मिसात भाःतया चिप नयाः मखु, थःगु तुतिं च्याः म्वाइ धयागु न्हूगु संस्कार न्ह्याकेगु थ्वय्कःया प्रयास च्छाये बह जू । थौया मिसातय्के वःगु जागरण, चेतनाया लहर थ्वय्कलं थःगु बाखनय् प्रतिबिम्बित यानादीगु दु ।

**केदार 'सितु' (ने.सं १०८०)**

- धकं धयाव (ने.सं ११०३)

शास्त्रीय नियमं मचिंकुसे स्वच्छन्द रुपं बाखं च्वयेगु गुगु प्रचलन थौं वःगु खः, थज्याःगु न्हू प्रवृत्तियात आत्मसात यानाः बाखं च्यादीम्ह छम्ह बाखंच्वमि 'केदार सितु' नं खः । थौं साहित्य ख्यलय् छुं नं विधायात 'विशुद्ध बाखं', 'विशुद्ध कविता' आदि कथं नाले मछिने धुंकल, छगू नाप मेगु ल्वाकःबुकः जुइगु जुइ धुंकल । थ्व हे कथं 'केदार सितु' नं बाखंयात छगू 'बिम्ब'या रुपय् खंकादीगु दु, अले थौया छम्ह आधुनिक कविं थें छगू चित्र, छगू दृश्य न्ह्यब्वयाः उकिया पाखें छगू यथार्थ छगू सत्ययात 'ज्योमेटीकल प्रुफ' थें सिद्ध यानाः क्यनेगु कुतः थ्वय्कलं यानादीगु दु । पाठकयात छुं नं छगू प्रभाव बिइगु हे थौया बाखंया चिं खः धकाः थ्वय्कःया बाखनं क्यना विउगु दु ।

**विमल ताम्राकार (ने.सं. १०८५)**

- फिसः (ने.सं. १११२)

- लिसः लकसं ब्वलंगु (ने.सं. १११३)

- प्यपुंगु ल्हाः (ने.सं. १११९)

बाखंया परम्परागत शास्त्रीय मान्यतां पिने वनाः बाखं च्वइपिं च्वमिपिं मध्ये विमल ताम्राकार नं छम्ह खः । नेपालभाषाय् चीबाखंया विकासय् विमलया



बाखंया नं महत्वपूर्ण थाय् दु । च्वमिं बाखंया माध्यमं थःगु प्रतिक्रिया ब्वयेत कविताय् थें प्रतिक व बिम्बया लिधंसा कायेगु याःगु दु । म्ह खं ग्वलं नं नुगलय् थीफुगु कथाः शिल्प विमलयाके दु ।

च्वय् उल्लेख जूपिं बाखं च्वमित बाहेक नेपालभाषाया बाखं साहित्ययात न्हयज्याकेत थःगु बिस्किं प्रतिभा क्षमतां जाःगु बाखं सफू न्हयब्वयाः तिवः बियादीपिं मेमेपिं नं आपालं बाखंच्वमित दनि, गथे - रे. र. न. स्यस्यः - कपं (१०७६), वैकुण्ठप्रसाद लाकौल - गांया ममता (११०३), सिद्धिचरण श्रेष्ठ - नारी हृदय (१११२), सुवर्ण शाक्य - गंगु ख्वबि (११०१), प्रकाशमान नानिचा - दुधाः (१०९६), बल्चा (११०३), बुद्धिराम प्रजापति - गंगु स्वां (१०९३), यज्ञरत्न धाख्वाः - सारी (१०९५), चक्रमान शाक्य - सिन्हाय् स्वां (११०६), कमलबहादुर श्रेष्ठ - बाखंया पुचः (१११३), निरञ्जनरत्न शाक्य - ब्वलासा (११०१) निरञ्जनरत्न व अमीररत्न - निकचा (१०९६), श्रीकृष्ण ज्यापु - किपू देय्या परिवेशय् (१११४), श्यामदास कुमाः - आक्सय् लूगु निभाः (१०९७), निभाःया पलाखय् (११०४), श्यामआशा कायष्ट - ल्हवंगु ल्हाः (११०१), एच.के. कपाली - जि नेवाः (१११४), श्याम बिम्ब - लिच्चः थ्व ईयात (११०३), माधवराज बेल - न्ह्यानाच्वंगु पलाः (११०४), जय वैद्य - थ्वीके मफुगु जीवन (११०८), नजरमान महर्जन - बाखं दुनेया बाखं (१११०), मिपुसा (११०५), सुरेन्द्र महर्जन - नःलिस्वां (११११), रेवति राजभण्डारी - ज्यामि (१११५), उद्धव मास्के - लायलामा (१०९४), अमलदेवी शाक्य - बिनावंगु मतिना (१११५), मोहनमान श्रेष्ठ - आशांघ्याः (१०७८), नःलि बज्राचार्य - जिगु नुगःया किचः (१११५), अरहन स्थापित - सचेतना छगू भिन्नता रेखा (१११३), दया खड्गी वेचैन - भावनाया छगू न्हूगु संसार (१११२), फुवगिं जिमिगु पलाः (११०३), सुधीर ख्वबि - न्हूगु वसन्त (१११७), लोचनतारा - पलासु (११०१), सुगत शाक्य - तःपुखूया पलेस्वां व व.आ., कनक व्दीप - अजिया उजं (१११८) आदि ।

अथे हे थःगु मुक्कं बाखं सफू पिमदसां विभिन्न पत्र पत्रिका, साहित्य सम्मेलनय् बाखं च्वयाः, बाखं ब्वनाः थ्व ख्यलय् ल्हाः न्हयाकादीपिं च्वमित नं आपालं दनि गथे - विष्णुहरि परदेशी, सी.बी. रमण, गम्भिरमान माय्के, नर्मदेश्वर प्रधान, शान्तलाल, तिलकबहादुर, प्रकाश स्यस्यः, अगिंमथः, पुष्कर माथेमा, यू.पि. जोशी, जगदीश चित्रकार, शान्तराज शाक्य, मनरत्न स्वां, दर्वरत्न शाक्य, शराम नेवाः, सोभियतरत्न तुलाधर, केशरत्न शाक्य, सुगत शाक्य, राधा कारंजित, प्रमिला साय्मि, केशरीलक्ष्मी तुलाधर, भरत साय्मि, नारद बज्राचार्य, शरद कसाः, मंगला कारंजित, सरस्वति तुलाधर, रीना वनिया, रमेशकाजि स्थापित, आनन्द चित्रकार ..... आदि, आदि ।

व्यक्तिगत च्वमितय्गु बाखं सफू जक मखु, नेपालभाषाया प्रतिनिधि बाखं च्वमितय्गु बाखं मुनाः 'बाखं संग्रह' नं विभिन्न व्यक्ति, संघ संस्थातय्सं पिकायेगु नं याःगु दु । थज्याःगु बाखं सफू खः - बाखं पुचः (१०७०), गद्यपुचः भाग - १ (१०७२), गद्यपुचः भाग - २ (१०७६), न्हू बाखं पुचः (१०८०), भी बाखं मुना

(१०७८), नसला (१०७४), खने मरु मरु (१०८५), छगू देशय् (११०९), लुं ध्वाखा (१११५), मूति (१०९२), सतः (१०९७), पलेहः (१०८७), हसय् हाईसय् (१०९५), समय (१०९३), ई भीगु खः, तायतिति (१०८४), रुवि नेपालभाषा बाखं पुचः (११०५) आदि । अथे हे थीथी पत्रिकां गथे जला, मिमलः, सितु, भी, नेपाल आदि नं बाखं विशेषांक पिकायाः थ्व विधायत तःमि जुइकेत तिवः बिउगु दु । थौं नेपालभाषाया गुलिखे बाखं मेगु भाषाय् हिडिकाः विदेशीतय् नेपालभाषाया बाखं म्हसीकेगु नं याःगु दु । थथे नेपालभाषाया बाखं सफू न्हापां अंग्रेजी भाषाय् अनुवाद जूगु **Nepal Bhasa Short Stories** खःसा, 'आखे' (१०८५) न्हू बाखं नेपालभाषाय् न्हापां अनुवाद जूगु विदेशी बाखं सफू खः । साहित्य गुथिं नं थौं कन्हे तःगू मछि हे विदेशी न्हू बाखंत नेपालभाषाय् अनुवाद यानाः नेवाःतय् थौया विश्वय् खनेदयाच्वंगु न्हू बाखंत नाप परिचित याकेब्यूगु दु । थथे पिदंगु सफू खः - न्हू जापानी बाखं (ने.सं. ११०७), भारतया न्हू बाखं (ने.सं. १११२), श्री लंकाया न्हू बाखं (ने.सं. १११३), म्हालकायचा व मे मेगु बाखं (ने.सं. ११०८), राशोमोन व मेमेगु बाखं (ने.सं. ११०९) । अथे हे नेपाःया समकालीन बाखंयात अंग्रेजी भासं अनुवाद यानाः **An Anthology of Short Stories of Nepal** नामं नेपाःया बाखंयात ब्वयेगु याःगु दु । थौं नेपालभाषा साहित्यय् कविता विधायां लिउ दकलय् अप्वः सफू पिदंगु विधा बाखं जूगु दु । कूल नेपालभाषाया साहित्यिक विषयया सफू मध्ये १७.५० प्रतिशत सफू बाखंयागु जूगु दु (अमात्य, १११८ : पृ. ४) । थौं नेपालभाषा साहित्यय् आधुनिक बाखंनं जन्म काःगु बागू शताब्दी फुत । थ्व समयावधिया दुने थ्यंमथ्यं न्ह्येय्म्हं (७०) मल्याक बाखं च्वमितय्सं थःथःपिनिगु बाखं संग्रह पिकायाः बाखंमि कथं थःपित परिचित याकल सा मेपिं पीम्हं (४०) मल्याक बाखं च्वमितय्सं इलय् ब्यलय् पत्र-पत्रिकाय् बाखं च्वयाः जक नं थःपित बाखंमि कथं म्हसिइके विल । सफू प्रकाशनया ल्याखं सच्छि व नीन्यागू ति (१२५) बाखंसफू बाखं च्वमितय्गु व्यक्तिगत संकलनया रुपय् सा भिन्त्यागू ति (१५) सामूहिक संकलनया रुपय् पिदंगु दु । थुकथं नेपालभाषाय् दकलय् अप्वः च्वमित पिदंगु, दकलय् अप्वः सफू प्रकाशित जूगु विधा मध्ये बाखं नं छगू जूगु दु । थ्व विधाय् मिजपिं च्वमितय्सं जक मखु, मिसापिं च्वमितय्सं नं उलि हे सशक्त रुपं ब्वति काःगु दु । थथे बाखं साहित्यय् आपालं च्वमित संलग्न जूगुया मू हुनि 'बाखं' च्वमि, ब्वमि फुक्कस्यां यःगु विधा, जुयाः जक मखु, अभि मुख्य ला थःगु भाय्या साहित्यया निंति थम्हं नं छुं याये थैगु मातृभाषा अनुरागया भावना नं खः धकाः मधासं मगाः ।

**लिखँ** :- थौंतक पिदंगु नेपालभाषाया आधुनिक बाखनय् मिखा ब्वयेबलय् बाखंया माध्यमं थौया च्वमितय्सं जीवनयात विविध कथं ब्वयेगु कुतः याःगु खनेदु । गुलिस्थां मानव जीवनया थीथी पक्षयात उलेगु याःगु दु, गुलिस्थां जीवनया विविध स्थितियात ब्वयेगु याःगु दु सा गुलिस्थां जीवनया विविध समस्यायात ब्वयेगु याःगु दु । तर अप्वः थें बाखंच्वमितय्सं थौया आधुनिक नाटककारतय्सं थें जीवनया



विविध समस्यायात कया: हे बाखं च्वयेगु या:गु दु । फलतः नेपालभाषाय् गुलि नं न्हू बाखं पिदन अप्वः थें समस्यामूलक बाखं हे पिदन । तर ईया हिउपा: लिसें समस्याया प्रवृत्ति समस्याया प्रस्तुति नं पापां वंगु खनेदु । चित्तधर, मोतिलक्ष्मी पुस्ताया बाखंच्वमितय्सं सामाजिक कुरित, रुढी संस्कार, आर्थिक दूरावस्था, नैतिक भ्रष्टता आदियात समाजया मूलभूत समस्या खंका: बाखं च्वयेगु या:गु दुसा थौया न्हू पुस्ताया च्वमितय्सं थौया राजनैतिक, आर्थिक, सामाजिक विकृति विसंगति ब्वलंकूगु बेरोजगारी, भ्रष्टाचार, असमानता, शोषण गरीबी अपराध, कृकृति, मानसिक विकृति आदि समस्याय् केन्द्रित जुया: बाखं च्वयेगु या:गु दु । अथे हे समस्यायात बालेगु क्रमय् न्हापाया बाखंच्वमितय्सं समस्यायात मूलतया सामाजिक, नैतिक रुपं जक बालेगु या:गु दु सा थौया च्वमितय्सं समस्याया मू हा राजनीतियात खंकूगु दु अले समस्यायात बालेगु क्रमय् भौतिक दृष्टिकोण जक मखु, मनोवैज्ञानिक आधारभूमियात नं ज्वनेगु या:गु दु ।

थौ नेपालभाषाया बाखं च्वमितय्सं विविध विषययात कया: बाखं च्वयेगु या:गु दु सां, इमि यःगु छगू विषय' मतिना' जूगु दु । आधुनिक बाखंया प्रारम्भं निसें थौ तक नं थ्व विषयलं नेपालभाषाया बाखनय् महत्वपूर्ण थाय् कया वयाच्वंगु दु । तर मतिनायात कया: गुलिं बाखं च्वमितय्सं मनोवैज्ञानिक सिद्धान्तया विश्लेषण याये कथं, गुलिं च्वमितय्सं मानवीय शाश्वत भावना ब्वयेकथं सा गुलिं च्वमितय्सं सामाजिक समस्या क्यनेकथं बाखं च्वयेगु या:गु दु । अले थ्व मतिना गनं प्रेमी प्रेमीकाया मतिना, गनं कला:भात:या मतिना: सा गनं थःगु जाति, भाषा, संस्कृति, राष्ट्र प्रतिया मतिना जुया विउगु दु ।

नेपालभाषाया आधुनिक बाखंया छगू मेगु विशेषता खः, थौ तक नेपालभाषां गुलि नं बाखं पिदन फुक्क धया थें बाखंया संरचना नेवा: समाज नेवा: संस्कृतिया परिवेशय् जूगु दु । थ्व परिवेशयात त्वःता: नेपालभाषाया बाखंच्वमितय्सं गुलि नं मेगु सामाजिक परिवेशय् बाखं चिनेगु या:गु दु, उकिइ स्वभाविक अनुभूतिया अभावं प्रभावकारिता, हार्दिकता कायम याये मफु । उकिं नेपालभाषाया बाखनं वृहत् परिवेशयात थिइमफु धका: नेपालभाषा बाखं समालोचनाया सन्दर्भय् समालोचक' कृष्णचन्द्र सिंहजु' कुंखिनादीगु नं या:गु दु । थुकथं नेवा: समाज, नेवा: संस्कृति नेवा: बाखंच्वमितय्गु निरिति' अवशेष' थें जूगु दु । गुलिस्यां थुक्रियात हे विषयभूमि याना: बाखं तक निर्माण यायेगु या:गु दु सा गुलिस्यां बाखंया पृष्ठभूमिया रुपय् छयलेगु या:गु दु । तर थःगु जाति, समाजप्रति मतिना दयां नं धर्म, संस्कृति परम्परा सम्बन्धी निखल: बिचारधारायापि च्वमित नेपालभाषाया बाखनय् खनेदु । छखल: थःगु जातिया संस्कृति, धर्म परम्परायात संरक्षण सम्बर्द्धन यायेगु कुतलय् थ्व प्रतिया भ्रम चिइका: मर्म ब्वयेगु चेष्टा याना: बाखं च्वइपिं चित्तधर, फणिन्द्ररत्न बज्राचार्य, लक्ष्मण राजवंशि प्रवृत्तियापि च्वमित दु सा मेखल: थौया स्थितिइ मनूतय्गु विकास प्रगतिया निरिति धर्म संस्कृतियात पंगल: तायेका: थ्व छगू ढोंग खः धका: व्यंग नका: बाखं च्वइपिं दु । थ्व निगूगु

खलकय् नेपालभाषाया प्रगतिशील च्वमित नापं छुं भन्ना मिसा च्वमित न ला:गु दु ।

अथे हे बाखंया प्राविधिक पक्षय् नं ईया हिउपा: लिसें गुगु न्हू न्हूगु प्रवाह प्रवृत्तिया प्रयोग नेपालभाषाया बाखनय् जुल थुक्रियात उपलब्धि हे धायेमा: । तर थज्या:गु न्हू न्हू प्रवाह प्रवृत्तिया प्रयोगं छुं अनुभव याक् धा:सा ज्याभ: न्हयागु हे जूसां छयलिइम्ह निपूर्ण जुल धा:सा, घटना प्रधान वा मनोवैज्ञानिक प्रधान न्हयागु हे बाखं च्वःसां वं सफल जुइक च्वयेफु, अले बाखंया सफलता, धैगु हे बाखंया प्रभावकारिता खः, छयलीगु ज्याभ: मखु धयागु नेपालभाषाया बाखनं क्यनाविउगु दु ।

तर थौ बाखं विधाय् आपालं च्वमित पिदंसां न्हून्हुगु प्रयोग प्रवाह दुहांवये धुंकूसां, नेपालभाषाया बाखं साहित्यया उपलब्धीयात कया: समालोचकत लुदने फुगु मदिन । भीगु समाजया छगू चीधंगु भलक नेपालभाषाया बाखनं बिइगु या:सां थ्व थौया जीवनया वृहत् पक्षयात ज्वनेफुगु मदिन । थौया समाजय् व्यापक जुयाच्वंगु अन्तरविरोध, - हासोन्मुख जुयाच्वंगु नैतिक मान्यता, यान्त्रिक सभ्यतां ब्वलंकूगु जीवनया जटिलता, न्हूगु आर्थिक परिस्थितिं जन्म बिउगु न्हूगु मानव सम्बन्ध, शान्ति व सत्यया चाहना आदिया संदर्भय् जीवनयात न्हू कथं थौया बाखनं व्याख्या यायेमा:गु ई वये धुंकूगु दु । आर्थिक व राजनैतिक शोषणया किपा कीगु परम्परा थौ आउटडेटेड जुइधुकल (जोशी, १०९५:६२) । थुकथं थौ नेपालभाषाया बाखं अझ व्यापक व विस्तृत जुइमानिगु व थ्व युगया स:यात सशक्त रुपं प्रतिध्वनित यायेमानिगु खनेदु ।

अथे हे समालोचकतय्सं नेपालभाषाया बाखंया स्तरीयतायात कया: नं सन्तोष का:गु खनेमदु । अप्वः थें बाखंच्वमितय्के मनूया जीवन थौया परिवेशया शूक्ष्म अध्ययन व अनुभूतिया अभावं इमिसं व्यापक परिवेशयात जक बाखनय् दुध्याके मफुगु मखु, थःपिसं ज्वनागु विषयलय् नं स्वभाविकता, जीवन्तता अप्वःस्यां वीफुगु मदिन धयागु समालोचकतय्गु धारणा दु । अथे हे कहानी व उपन्यासया क्षेत्रय् छुं छगू ई छगू समूहया नेतृत्व ब्यूम्ह बा प्रतिनिधित्व या:म्ह धायेछिपिं सुं च्वमित मदु (श्रेष्ठ, १०९५:७७) धका: सही नेतृत्व यायेफुपिं बाखंच्वमित पिदने मफुगुलिं नं आपालं बाखं पिदना: नं बाखंया स्तर थहां वने मफुगु खंकूगु दु । थुकथं नेपालभाषाया बाखंच्वमितय्सं थ्व विधाया विकासया निरिति मेहनत यायेमानिगु खनेदु ।



## निबन्ध

**पृष्ठभूमि :-** 'एस्से' (Essay) गुकियात थौं भीसं निबन्ध धयावयाचवना, थ्व नेपालभाषा साहित्यया नितिं जक मखु विश्व साहित्यया नितिं हे छगू न्हूग व रोचक विषय जूग दु। थौं सुं नं लेखकं थःत दकल्य अःपुक अभिव्यक्ति यायेफइगु व पाठकं लेखकयात दकल्य सत्तिक म्हासीके फइगु साहित्यिक विधाया रुपय निबन्ध प्रतिस्थापित जूग दु।

पूर्वीय साहित्यय् छगू प्राचीन व सम्पन्न साहित्य माने यानातःगु संस्कृत साहित्यय् गद्यरूप प्राचीनकालं निसं खनेदुसां निबन्ध विधाया मुक्कं थःगु हे अलग अस्तित्व दुगु धाःसा खनेमदु। थौं साहित्यिक जगतय् गुगु विधायात निबन्ध कथं छ्यलेगु यानावयाचवंगु दु, उकिया जन्म तथा विकास पाश्चात्य साहित्य हे जूग खः। निबन्धयात छगू रोचक व आकर्षक साहित्यिक विधाया रुपय दकल्य न्हापां स्थापित यायेगु ज्या भिखुगूगु शताब्दी फ्रान्सया साहित्यकार माइकेल मोन्तेज (Michelle Montaigne 1633-1591) पाखे जुल। बय्कलं सन् १५८१ स् 'एस्से' (Essai) धकाः शीर्षक छुनाः छुं आत्मालोचनात्मक लेखतय्गु संग्रह पिकयादिल। मोन्तेज थःगु रचना पुचःया नां गुगु एस्से (Essai) धकाः छुनादिल, 'फ्रान्सेली' भाषाय् उकिया अर्थ खः 'कुतः' वा 'प्रयत्न'। थ्व हे शब्द अंग्रेजी भाषाय् वनाः एस्से (Essay) जूवन, गुकियात चेम्बर्सया शब्दकोशय् (An effort made for the performance of any things) धकाः परिभाषित यानातःगु दु। बःचा बःचा हाकःगु वैयक्तिकता प्रधान अनुभूतिमूलक, ब्वमिपिनाप खँल्हाबल्हा यानाचवंगु थें ज्याःगु शैली च्वयातःगु मोन्तेजया निबन्ध तत्कालीन फ्रान्सय् जक मखु संसारभरयात हे प्रभावित यात।

मोन्तेजया लिपा निबन्ध विधायात मेगु कथं हे रुप बीगु ज्या भिखुगूगु शताब्दीया अन्तपाखे बिलायतया फ्रान्सिस बेकन (Francis Bacon-1561-1626) पाखे जुल। विद्वतापूर्ण भाव, गहन निरूपण, निर्वैयक्तिकता, तर्कपूर्ण अभिव्यक्ति, पाण्डित्याङ्गपूर्ण भाषा, प्रौढ परिमाजित शैली हे बेकनया निबन्धया विशेषता खः। बेकनया निबन्ध सर्वसाधारणय् उलि मोन्तेजया निबन्ध थें व्याप्त जुइ मफुसां,

निबन्ध साहित्यय् छगू मेगु नं आयाम तनेगु यानाबिल। फ्रान्सिस बेकन धुकाः बिलायतय् हे मेम्ह निबन्धकार अब्राहम काउली (ई.सं. १६१८-१६६७) पिदन। भिन्हय्गु शताब्दीया बिलायतया साहित्यय् काउलीया प्रभाव थुलि लात कि बिलायतय् निबन्ध साहित्यया जन्मदाता बेकन मखु अब्राहम काउली खः धाइपि तक नं पिदन। भिन्च्यागु शताब्दीइ वनाः रिचर्डस्टील (ई.सं. १६७२-१७२१), 'जोसेफ एडिसन' (ई.सं. १६७२-१७९९) जोनाथन स्वीफ्ट (ई.सं. १६६८-१७४५) थें ज्याःपि रोमान्टिक कवितसं निबन्ध विधाय नं ल्हाः न्ह्याकाः निबन्ध साहित्यया विकासय् तिबः बिल। 'जोसेफ एडिसन' नं निबन्ध विधायात 'हलुका' व 'गेम्भिर'गु निबन्ध धकाः ब्वथलाः 'मन्तेज', 'बेकन', नितां प्रवृत्तियात निबन्धया परिधि दुने दुथ्याकाः निबन्ध विधायात छगू चक्कंगु, तप्फागु व व्यापक साहित्यिक विधाया रुपय प्रतिष्ठापित यानाबिल। लिपा भिन्गूगु शदी चार्ल्स लायम्ब, लुइस स्टेभेनसन आदि व नीगूगु शदी जे.के. चेष्टरटन आदि थें ज्याःपि लेखकतसं मोन्तेज शैलीया निबन्धयात अभि परिमार्जित अभि विकसित रुपय न्ह्यब्वयाबिल। बाखं थें ज्यानाः कवितात्मक भाषा छ्यला, छुं मदुगु विषयलय् नं रोचक निबन्ध च्वयेफु धइगु खं क्यनाबिल। अथे हे कारलाइक, मेकले, लेस्ली, स्टिफेन, रस्केन थें ज्याःपि सिद्धहस्त, लेखकतसं राजनैतिक, ऐतिहासिक, साहित्यिक आदि सम्बन्धी गहन व गम्भीर विषययात कयाः चिन्तन मननयात दुथ्याकाः नं तर्कयुक्त कलापूर्ण प्रतिपादनया माध्यमं निबन्धयात जन रुचिया विषय कथं प्रतिस्थापित यानाबिल। तर ई न्ह्याः लिसे विषयगत प्रवृत्ति, आत्मगत प्रवृत्ति नितांयात नं आत्मसात यानाः निबन्ध च्वयेगु अप्ठः निबन्धकारपिसं यानाहल। थथे फ्रान्स, अनं बिलायत न्ह्याःगु निबन्धया परम्परा केवल युरोपीय देशय् जक मखु, एशियाली देश भारत, नेपाल आदिइ नं थ्यन। निबन्ध नं साहित्यया अलग विधाया रुपय प्रतिष्ठापित जुल। गद्यात्मकता, लघुता, वैयक्तिकता, हार्दिकता, बौद्धिकता, सृजनशीलता, सरलता आदि हे थौंया निबन्धया विशेषता जूवन।

## नेपालभाषाय् निबन्ध

नेपालभाषा साहित्यय् आधुनिक बाखं, आधुनिक प्याखं, उपन्यास थें निबन्ध नं छगू न्हूग विधा सिद्ध जूग दु। थौं स्वयां खुसः दँ न्ह्यः हे विविध वाङ्मयया रचना जुइधुकूगु नेपालभाषाय् निबन्ध विधाया शुरुवात आपालं लिपा हे तिनि जूग खनेदु। खयेत ला रामायण बाखं, वंशावली, घटनावली आदि च्वयावपि च्वमितय्सं सफूया अन्तय थःगु नं छुं खं च्वयेगु यानावंगु दु, तर थुकियात हे निबन्ध विधाया शुरुवात धायेगु अवश्य पाय्छि मजू, अथे हे प्रताप मल्लया ने.सं ७७८या शान्तिपुरया शिलाभिलेखय् न्ह्यब्वयातःगु जुजु प्रताप मल्लया शान्तिपुर यात्राया वर्णन नं थौकन्ह्याया विवरणात्मक निबन्धया आभास बिउगु दु, तर थ्व



छगू संयोग जक जुल, आधुनिक निबन्धया शुरुवात मजुल । लिपा पुनर्जागरणकालय वया: सिद्धिदास महाजुया 'सर्वबन्धु' धयागु सफुलिं धा:सा निबन्ध साहित्यया पूर्वाभास अवश्य बिङगु यात । खयेत ला जातभात सम्बन्धी कुरीतिया विरोध याना: फुक्क मनु हे भी बन्धुबान्धव ख: धका: शिक्षा बियात:गु थ्व सफुलिङ च्यागू अध्याय दु । तर अथे खया: नं थ्व सफुलिङ छ्यलात:गु गद्य प्राचीन गद्य स्वया: आपालं सुगठित जूगुया नापं थौया निबन्धया प्रारूप नाप नं छुं कथं ज्व:ला:गु खनेदु । तर थ्व छगू प्रयोग जक जुल, प्रवाहया रूपय न्ह्यज्याये मफुत । थुकियात निरन्तरता बिङगु ज्या मजुल । अथे हे ने.सं १०३५ स पिदंगु जगतसुन्दर मल्लयागु इसपं दयेकातगु बाखं सफुलिङ भूमिकाया रूपय जगतसुन्दर मल्लजुं विद्याया महत्तायात कया: मुक्त रुपं थ:गु भाव गुगु न्ह्यब्वयातल, थुकियात हे नेपालभाषाया आधुनिक निबन्धया प्रारम्भ ख: धाइपिं नं दु । तर थ्व च्वमिया छगू वैचारिक अभिव्यक्ति जक ख:, धाथेंगु निबन्ध मखुनि । अथे हे ने.सं १०४५ निसं ने.सं १०५० तक पिदंगु विद्वान धर्मआदित्य धर्माचार्यया 'बुद्धधर्म व नेपालभाषा' पत्रिकां नेपालभाषाया गद्ययात ब्वलंकेगुलिङ उल्लेखनीय ज्या या:सां विशुद्ध निबन्ध विधा ब्वलंकेगुलिङ थ्व पत्रिका सफल जुइ मफुत । थ्व पत्रिकाय गुलि नं गद्य रचना पिदन, फुक्क धया थें विद्वान सम्पादकया च्वसां जक पिदन । गद्य लेखन प्रति व्यापक सहभागिता थ्व ग्वाके मफुत । ने.सं १०६१ निसं सारनाथं पिदंगु धर्मदूत पत्रिकाय नेपालभाषायात नं थाय बिल । फलस्वरूप थ्व पत्रिकां नेपालभाषाया आधुनिक निबन्धया जन्म बिल । धर्मदूत १३:१-२:१३४-१३५ (ने.सं १०६८, चैत्र - वैशाख) स मोतिलक्ष्मीया जन्म नांगु निबन्ध पिदन सा थ्व हे दैय चित्तधर 'हृदय'या हवनागा (ने.सं १०६८) सफुतिङ छु च्वय निबन्ध पिदन । मुद्रणया ल्याखं थुपिं नेपालभाषाया न्हापांगु निबन्ध ख:सां थुपिं स्वया: न्ह्य: ने.सं १०६५ स रत्नध्वज जोशीजुं तत्कालीन ल्हातं च्वया: पिदनीगु नेपाल पत्रिकाय च्वयेगु छाय नांगुया तर्कपूर्ण, बिचार प्रधान निबन्ध पिकयादी धुंकूगु ख: । रत्नध्वज जोशीजुयागु च्वयगु छाय निबन्ध मुद्रित रुपय मखुसां हस्त लिखित पत्रिकापाखें ब्वीमपिनिगु दथुइ वयेधुंकूगुलिं थुकियात हे नेपालभाषाया न्हापांगु निबन्ध कथं नालेमा: धाइपिं नं आपालं दु । थुकथं धर्मदूत, हवनागा नेपाल आदि नेपालभाषाया न्हापांगु निबन्धया स्वा: क्यनसा थुकिया विकासया निंतिं धर्मोदय पत्रिकाया प्रकाशनं धिसिलाक तिब: बिल । ने.सं १०६७ स धर्मोदय पत्रिका पिदंसेलि नेपालभाषाया गद्य च्वमितयगु ल्या: आपालं जायावल । नेपा:या संस्कृति, धर्म, यात्रा, इतिहास, दर्शन आदि विविध विषयया रचना धर्मोदय पत्रिकाय पिदन । रत्नध्वज जोशी, चित्तधर 'हृदय', ठाकुरलाल मानन्धर, मोतिलक्ष्मीपिंत निबन्ध, रचना पाखे मूलरुपं ल्हा: च्वयेकेबिङगु ज्या धर्मोदय पत्रिकां यात । धर्मोदय पत्रिकाय जक रत्नध्वज जोशीया - खुपु, चित्तधर 'हृदय'या - स्वपु, मोतिलक्ष्मीया - न्ह्यपु, ठाकुरलाल मानन्धरया - न्यापु निबन्ध पिदन । धर्मोदय पत्रिकां रत्नध्वज थें ज्या:पिं विषयपरक निबन्धकारतयगु जक च्वसा परिमार्जित या:गु मजुसे प्रेमबहादुर कंसकार थेंज्या:पिं मुक्तक निबन्धकारतयगु नं जन्म बिल । अथे हे थौ

नेपालभाषाया निबन्ध प्रवन्ध ख्यलय सुपरिचितपिं - तेजेश्वरबाबु ग्वंग:, सत्यमोहन जोशी, हेमराज शाक्य, फणिन्द्ररत्न बज्राचार्य, ठाकुरमान शाक्य, कृष्णचन्द्र सिंह, भूवनलाल प्रधान, पूर्णकाजि ताम्राकार, मणिहर्ष ज्योति आदिपिं नं न्हापां धर्मोदय पत्रिकां परिचित याकूपिं निबन्धकारत ख: । धर्मोदय पत्रिकाया प्रकाशन जुया: छुं दै लिपा हे नेपालय नं क्रान्ति जुल । २००७ सालया जनक्रान्तिं च्वमितयत निर्भिक व निश्चिन्त रुपं च्वयेगु वातावरण बिलसा सफू व पत्र पत्रिकाया प्रकाशनया निंतिं ध्वाखा चायेका बिल । फलस्वरूप धर्मोदय पत्रिकायां लिउ नेपाल, पासा, थौकन्हे, भी, ज, सितु, तिकिझ्या: आदि पत्र-पत्रिका पिदन, गुकी भाव बिचा: निगू पक्षय नं स्येल्ला:गु थीथी निबन्ध खनेदत सा न्हून्हूपिं निबन्धकारत नं अप्व: दयावल । विश्वया निबन्ध साहित्यय खनेदुगु थीथी प्रवाह व प्रवृत्ति नं नेपालभाषाया निबन्धय खनेदत । निबन्ध छगू स्वच्छन्द, व च्वमिं थ:गु खं दकलय अप्व: तप्यं प्वंके छिगु विधा जूगुलिं दकलय अप्व: उन्मुक्त रुपं भाव बिचा: प्वंकेगु विधा निबन्ध जूवन । प्रजातन्त्र पश्चात विविध पत्र-पत्रिकाया प्रकाशनया नापं साहित्यिक गोष्ठी, साहित्य सम्मेलन यायेगु परम्परा नं नेपा:गालय नी जुल । हनुमान ध्वाखा लायकुलिङ न्यायेकूगु ऐतिहासिक विराट नेपालभाषा साहित्य सम्मेलन, यलया साहित्य सम्मेलन निबन्ध विधायात प्राथमिकता बिसे सिरपा: नं देछात । अथे हे निबन्ध विधाया विकासय तिब: जुइ कथंयागु श्रेष्ठ सिरपा: गुथि, अन्तर कलेज नेपालभाषा साहित्य सम्मेलन पा:ला:, अन्तर हाइस्कूल नेपालभाषा साहित्य सम्मेलन पा:ला:, विराट नेपालभाषा साहित्य सम्मेलन गुथि आदि नं नी स्वनेगु ज्या जुल, गुकिं विद्यार्थीतयत नं निबन्ध विधाय ल्हा: न्ह्याकेबिङगु यात । फलस्वरूप न्हापा न्हापाया निबन्धकारतयगु लै लिना: नं थ:गु बिस्कं शैली व वैचारिक विशेषता ब्वयेफुपिं न्हू न्हूपिं निबन्धकारत नं खने दयावल । पद्मरत्न तुलाधर, पूर्णबहादुर वैद्य, मंगलप्रसाद स्यस्य:, रमेशकाजी स्थापित, भूषणप्रसाद श्रेष्ठ, विजयेश्वर वैद्य आदिपिं २००७ साल लिपाया लकसं ब्वलंकूपिं निबन्धकारत ख: । थथे नेपालभाषाया निबन्ध विधा ब्वलंकेगुलिङ पत्र-पत्रिकाया देन दु थें तत्कालीन साहित्य सम्मेलनया नं आपालं योगदान दुगु स्पष्ट जू । तर छगू इलय त्वा: त्वालय थाय थासय साहित्य सम्मेलन यायेगु गुगु लहर ब्वलंगु ख:, थ्व निरन्तर रुपं न्ह्याना वनेमफुत । बरु थुकिया पलेसा नेपालभाषा, इनाप, राजमति, विश्वभूमि, सन्ध्या टाइम्स, देशयमदु झ्या:, नसना, नेपाल संस्कृति आदि विविध न्हिपौ, वा:पौ, लयपौ आदि पिदन सा क्याम्पस क्याम्पस पतिं थीथी पा:ला: स्वना: - ज:, सैझ्या:, सुकुन्दा, नाय्खिं, पलेस्वां, कुलां, सुसा:, न्हाय्कं, अमू, तिसा, ग्वय्स्वां, कुलां आदि पत्र-पत्रिका पिकायेगु ज्या जुयावल । थुकिं हानं विद्यार्थीत पाखें निबन्ध च्वके बिङगु लकस दयेकाबिल । तर थौया विद्यार्थीतयसं चिनाखें, बाखं क्षेत्रय गुलि ल्हा: न्ह्याकेगु या:गु दु, उलि निबन्ध विधाय न्ह्याकूगु खनेमदु । अथे हे बाखं, उपन्यासया सफू ब्वनेगुलिङ गुलि ब्वीमित दुगु ख: उलि निबन्धय खनेमदु ।



थौ नेपालभाषा निबन्ध च्वयेगु यानादीपि निबन्धकारतयसं थःपिनिगु निबन्धयात पत्र-पत्रिकाय् प्रकाशन यानाः जक, साहित्य सम्मेलनय् ब्वनाः जक सीमित यायेगु मयासे थःथःगु हे मुक्कं निबन्ध संग्रह पिकायाः निबन्ध विधायात छगू गति बिडगु ज्या नं यात । थथे न्हापां निबन्धया संकलन पिकायादीम्ह निबन्धकार रत्नध्वज जोशी खःसा दकलय् अप्वः निबन्ध संग्रह पिकायादीम्ह निबन्धकार नं थ्वय्कः हे खः । अथे हे नेपालभाषाया निबन्ध तथा निबन्धकारतय्गु निबन्ध च्वयेगु उदेश्यं थीथी संस्था वा व्यक्तिगतयसं प्रतिनिधि निबन्धकारतय्गु निबन्ध दुथ्याकाः निबन्ध संग्रह पिकायेगु नं ज्या जुल । न्ह्यःखा (सं. रे. र. न. स्यस्यः, ने. सं. १०७६), निबन्धरत्न (नेपालभाषा समिति, ने. सं. १०७८), गद्य पुचः भाग-१ (प्र. नेपालभाषा परिषद १०७२), गद्य पुचः भाग - २ (प्र. नेपालभाषा परिषद, १०७६), मूसः निबन्ध (सं. कमलप्रकाश मल्ल (१०८४) खाखें पुचः नगु (सं. प्रेमबहादुर कसाः - १०८८), मतजः (प्र. खेलुइताः पिकाकः गुथि, ने. सं. ११०१), नेपालभाषा निबन्ध पुचः (सं. इन्द्र माली ने. सं. ११०३) भोमि निबन्ध (सं. रामभक्त कायष्ठ, ने. सं. १०९८) आदि थज्याःगु हे निबन्धया परिचय बिडगु सफू खः ।

अथे हे नेपालभाषा परिषद्, च्वसापासा, श्रेष्ठ प्रकाशन, खेलुइताः पिकाकः, नेपालभाषा मिसा खलः, लोक साहित्य परिषद्, धर्मकिर्ति महाविहार, आनन्द कुटी विहार गुथि, थौकन्हे प्रकाशन, पासा मुना, साहित्य मूलुखा, आदि थीथी संघ संस्था पाखें नं सफू प्रकाशन यानाः निबन्ध विधायात ब्वलंकेत तिबः बिडगु दु अथे हे साहित्य गुथि नं जापानी निबन्ध सफू मतापय् च्वयागु निबन्ध (ने. सं. ११०८) नेपालभाषा अनुवाद यानाः पितहःगु दु । तर मेमेगु विधाय् गुलि सफू पिहांवःगु खः, उलि थ्व निबन्ध विधाय् पिदंगु मदु नापं थौतक छुं नं नेपालभाषा निबन्ध पुचः मेगु भाषाय् अनुवाद जूगु मदुनि ।

थौ नेपालभाषाय् निबन्धया नामं गुलि नं सफू पिदंगु दु व दक्कं वास्तविक रुपं निबन्ध मजुसे अप्वः प्रबन्ध हे जूगु दु । दसुया लागी नेपालभाषाया न्हापांगु निबन्ध संग्रह 'न्ह्यखा' यात हे कायेफु, थुकिइ नीम्ह च्वमितय्गु च्वसु दयां नं धाथें निबन्ध धायेबहगु च्वसु माले हे माःगु दुसा मेगु निबन्ध संग्रह 'निबन्ध रत्न' सफलइ दुथ्याःगु भिनिपु निबन्धय् लाक्क न्यापु खुपु निबन्धयात जक निबन्ध कथं नाले छिं । अथे हे व्यक्तिगत संग्रहलय् नं थज्याःगु हे स्थिति दु । निबन्ध व प्रबन्धयात अलग्ग अलग्ग स्पष्टरुपं ब्वथलाः ब्वनेगु स्थिति आतकं नेपालभाषाय् वःगु मदुनि ।

निबन्ध खँग्वःया व्यापक व सीमित नितान् अर्थयात कःघाना स्वयेबलय् थौ नेपालभाषाय् पिदंगु निबन्धयात व्वय् बियाकथं ब्वथले छिं

- १) निजात्मक च्वखें
- २) बस्तुपरक च्वखें
- ३) अनुसन्धान मूलक, च्वखें

- ४) जीवनी सम्बन्धी च्वखें
- ५) यात्रा सम्बन्धी च्वखें आदि

**निजात्मक च्वखें :-** प्रेमबहादुर कसाःजुं न्ह्याकादीगु थज्याःगु निबन्धयात अभि विस्तृत व्यापक यायेगु ज्याय् पद्मरत्न तुलाधर, पूर्णबहादुर वैद्य, मंगलप्रसाद स्यस्यः आदि निबन्धकारत न्ह्यःचिलादीगु दु । यथार्थवादी दृष्टिकोण, सम्बेदनशील कवितात्मक अभिव्यक्ति, आत्म प्रकाशन, वैचारिक स्वच्छन्दता थज्याःगु निबन्धया मूलभूत प्रवृत्ति जूगु दु । थौया परिवेश च्वयेगु क्रमय् थ्व प्रवृत्तिया च्वमितय्सं थौया स्थिति प्रति तिब्र असहमति क्यनाच्वंगु दुसा न्हूगु मूल्य मान्यता स्थापना यायेगु नितीं थःपिं संघर्षरत जुइमाःगु महशुस यानाच्वंगु दु । थुमिगु चिन्तन थम्हं ज्वनागु विषय दुने जक सीमित मजुसे राष्ट्रिय, अन्तर्राष्ट्रिय समस्या प्रति तर्क व्यापक व विस्तृत जूगु दु ।

**बस्तुपरक च्वखें :-** खयेत ला बस्तुपरक निबन्धय् नं च्वमिया सृजनात्मकताया पलाःचिं खनेमदुगु मखु, तर अथे खयाः नं थज्याःगु निबन्धय् निबन्धकारतय्गु व्यक्तित्व स्वयाः नं बस्तुया थाय् प्रधान जूगु दु । विषय प्रति दुजां उप्चः क्यनेगु प्रवृत्ति यानाः थज्याःगु निबन्धय् मर्यादा, संयम व विषय प्रति अप्वः निष्ठा पिज्वःगु खनेदु । रत्नध्वजजुं न्हापां न्ह्याकादीगु बस्तुपरक निबन्धया परम्परायात चित्तधर, मोतिलक्ष्मी, सत्ययमोहन जोशी, हेमराज शाक्य आदिपिसं अभि न्हू पुस्तायात हस्तान्तरण यानायकूगु दु । खयेत ला मेमेगु नं आपालं विषययात कायेगु याःसां विशेषतः नेवाः जाति, भाषा, धर्म, संस्कृति आदिया परिचय बिडगु अले उकिया महिमा व गरिमा च्वयेगु ज्याय् थ्व प्रवृत्तिया निबन्धकारत अप्वः संलग्न जूगु दु । नापं थम्हं ज्वनागु विषय बस्तुइ क्वातुक चिकाः च्वयेगु नं थुमिगु विशिष्टता जूगु दु । थ्व पुचःया निबन्धकारतय्गु भाषा सारगर्भित जू नापं शिल्प नं च्वन्ह्याना वनाच्वंगु दु ।

**अनुसन्धानमूलक च्वखें :-** नेपालभाषायात नं मेमेगु विषय थें विद्यालय, महाविद्यालय, विश्वविद्यालयय् दुथ्याकुसेलि थुकिया अध्ययन अध्यापनया क्रमय् अनुसन्धानमूलक च्वखें नं नेपालभाषाय् सीदयेक हे पिदंगु खने दयावल । धर्मआदित्य धर्माचार्यजुं 'नेपालभाषा व थ्वया सहित्य' लेख च्वयाः प्रारम्भ यानादीगु अनुसन्धान मूलक प्रबन्धया परम्परायात छगू प्रवाहया रुपय् न्ह्यज्याकेगु ज्या ठाकुरलाल मानन्धर, तिर्थलाल नःघःभनि, स्वयम्भूलाल श्रेष्ठपिसं यानादिल सा थौ थुकियात निरन्तरता बिडगु ज्या मूल रुपय् प्राध्यापन पेशाय् संलग्न शिक्षक व विद्यार्थीतय्सं यानाच्वंगु दु । नेपालभाषाया उच्च अध्ययनय् अनुसन्धानयात नं थाय् बियातःगुलिं अनुसन्धानमूलक च्वखेंया ल्याः नं अप्वः जुजुं वःगु दु । थज्याःगु अनुसन्धानमूलक च्वखें विशेषरुपं भाषा, साहित्य, संस्कृति, धर्म सम्बन्धी जूगु दु । थ्व प्रवृत्तिया च्वमितय्सं थज्याःगु विषयया गुणगान यायेगु मयासे बस्तुगत



अध्ययन व तथ्यया आधारय् निष्कर्ष बिइगु या:गु दु, गुकिं याना भीगु भाषाय् अनुसन्धानात्मक च्वसुयागु विकास जुयाव:गु दु ।

**जीवनी सम्बन्धी च्खँ** :- थौं नेपालभाषाय् साहित्यिक, राजनैतिक, सांस्कृतिक, व्यक्तित्वगु जीवनी, व्यक्तित्व सम्बन्धी अध्ययन विश्लेषण यायेगु परम्परा नं ब्वलना वयाच्चंगु दु । थ्व ज्याय् दकलय् न्हापां ल्हा: च्वयेकादीम्ह इन्द्रमान, चित्तधर 'हृदय' आदि ख:सा थौंया न्हू पुस्ताय् मदनसेन बज्राचार्य, अशोक श्रेष्ठ, रे.रे.न. स्यस्य, छत्रबहादुर कायष्ठ, बदिरत्न बज्राचार्य, देव बज्राचार्य, बिमल ताम्राकार, काशीनाथ तमोट, डा. चुन्दा बज्राचार्य, सूर्यबहादुर पिबा, बैकुण्ठप्रसाद लाकौल, अष्टमुनि गुभाजु आदिपिं संलग्न जुयादीगु दु । थ्वयक:पिसं थ:पिनिगु रचनाय् व्यक्तित्वतयगु जीवनीयात सरसरति जक. ब्वयेगु मयासे थ:पिनिगु दृष्टिकोण मूल्यांकन नं न्ह्यव्वया: सृजनात्मकता नं क्यनेगु या:गु दु ।

**यात्रा विवरण सम्बन्धी च्खँ** :- यात्रा विवरण सम्बन्धी च्खँ नेपालभाषाय् तसकं हे म्हो जक खनेदु । थ:पिनिगु चीन भ्रमणया संस्मरणया रुपय् च्वयात:गु भिक्षु धर्मालोकया 'महाचीन यात्रा', चित्तधरया 'चीन लुमना' अथे हे सत्यमोहन जोशी 'चिकलापाया छँ' धका: पोखराया चमेरो ओडारय् दुहां वनागु घटना विवरण बिया: च्वयात:गु च्खँ निसं थज्या:गु प्रवृत्तिया निबन्धया शुरुवात जुल धायेमा: । थौंया न्हू पुस्ताय् यात्रा सम्बन्धी निबन्ध च्वयेगुलिइ कृष्णचन्द्र सिंह, मल्ल के. सुन्दर, जूहि सुवाल, सुलोचना मानन्धर, घनश्याम राजकर्णिकार आदिपिं न्ह्यचिउगु खनेदु । थ:पिनि यात्राया वर्णन यायेगु थज्या:गु निबन्धया मू ध्येय खया: नं स्वअनुभूति ब्वयेगुया नापं थौंया स्थिति प्रति टिका-टिप्पणी यायेगु ज्याय् नं थ्व प्रवृत्तिया च्वमित उलि हे सक्रिय सशक्त जूगु दु ।

थथे च्वय् उल्लेख जूगु निबन्धया प्रकार मध्ये नेपालभाषाय् दकलय् अप्व: बस्तुपरक निबन्ध आपा: पिदंगु खनेदु, तर नेपालभाषाय् छम्ह हे निबन्धकारयात मूलरूपं छगू हे कथंयाम्ह निबन्धकार कथं नालेगु उलि पाय्छि मज् । अथे हे थौं निबन्धयात थ्व मुकं बस्तुपरक थ्व आत्मपरक धका: ब्वथलेगु स्थिति नं म्ह जुजुं व:गु दु । थौं बस्तुगत तथा आत्मगत प्रवृत्तिया समन्वयात्मकता दुगु निबन्ध अप्व: थाय् कया हयाच्चंगु दु । थौं नेपालभाषाया निबन्ध प्रबन्धया ख्यलय् खनेदुपिं च्वमित शुक्लं दु ।

### प्रमुख निबन्धकार/प्रबन्धकार

चित्तधर 'हृदय' (ने.सं १०२६-११०२)

- नेपाल संस्कृति (ने.सं १०९२)

नेपालभाषा साहित्यया इतिहास/२०७

- महाचीने नेपाल संस्कृति (ने.सं १०८०)

नेपालभाषा, थ्वया साहित्य, संस्कृति च्वन्ह्याकेत तन, मन, व धन बियावम्ह चित्तधर 'हृदय' नेपालभाषा साहित्यया मेमेगु विधाय् थें निबन्ध विधाय् नं छम्ह न्ह्यलुवा निबन्धकार ख: । थ्वयक:या दकलय् न्हापांगु 'छु च्वय्' (ने.सं १०६८) निबन्धय् आधुनिक निबन्धया विशेषता आत्मपरकता, तथा थ:गु भाव कल्पना व बिचार प्रवाहायात कवितात्मक शैलीइ ब्वयेगु प्रवृत्ति लुयाच्चंगु ख: । थ्व प्रवृत्ति, लिपा लिपाया नेपाल संस्कृतियां विभिन्न पक्षयात कया: च्वयात:गु विषयपरक निबन्धय् तातापाना वंगु दु (वैद्य, ने.सं ११०९:६) । ब्वमितयूत निबन्ध प्रति आकर्षित यायेगु उदेश्य थ्वयकलं विविध शैलिं - गनं पत्रात्मक शैली, गनं आत्मपरक शैली, गनं नाटकीय शैली छायेपा: निबन्ध च्वयेगु यानादीगु दु । भाव गाम्भीर्य, तार्किकता, उदार दृष्टिकोण, कलात्मक अभिव्यक्ति, वैज्ञानिक दृष्टिकोण थ्वयक:या निबन्धया महत्वपूर्ण पक्ष ख: । निबन्धय् वैयक्तिक अनुभूति व व्यक्तित्वया पलेसा थ:गु जातीय सभ्यता, संस्कृतिया गरिमा व महिमा ब्वयेगु प्रवृत्ति थ्वयक:याके अप्व: खनेदु । थ्वयक:यागु भाषा, शिल्प व शैलीइ प्रौढता जायाच्चंगु जक मखु, धिसिमिसि धा:गुलिं याना: नं गद्य साहित्यया विकासया निंतिं थ्वयक:या निबन्ध मूवंगु ज्वलं जूगु दु ।

मोतिलक्ष्मी उपासिका (ने.सं १०२९-१११७)

- मोतिमा: (ने.सं १०७८)

- संघ (ने.सं १०८०)

- धौबजि (ने.सं. १११८)

मोतिलक्ष्मीया न्हापांगु निबन्ध 'जन्म' (ने.सं १०६८) धर्मदूत पत्रिकाय् जन्म जुया: धर्मोदय पत्रिकाय् मिजंत लिसे ल्वयेक मिसात नं पला: छिइफु धयागु पत्रात्मक शैलीइ च्वयात:गु 'स्मानताया विषय' निबन्ध पिदन । मोतिलक्ष्मी नेपालभाषा निबन्ध ख्य:या छम्ह प्रौढ निबन्धकार जक मजुसे नेपालभाषाया धार्मिक विषयभूमि सम्बन्धी गद्य व वैयक्तिक अनुभूतिमूलक गद्ययात नापनापं न्ह्याकादीम्ह नेपालभाषा साहित्यया संक्रमण ईया छम्ह च्वमि नं ख: । उकिं वयक:या निबन्धय् धार्मिक विषयभूमिया नापं वैयक्तिक अनुभव, अनुभूति नितांया छाप यचुक खने दु । बौद्ध दर्शन, बौद्ध धर्मया प्रभाव थ्वयक:या निबन्धय् खनेदुसां थ्वयकलं धार्मिक अन्धपरम्परायात मिखा तिसिना: स्वीकार यानादीगु मदु, बरु थुकिया पलेसा आत्मचेतनां खंगु व स्वअनुभूति प्राप्त जूगु बिचा:यात निबन्धया माध्यमं प्वकेगु यानादीगु दु । धर्म, द्य:, स्वर्ग, नरक जन्म मरण थें ज्या:गु विषयस आधुनिक धारणा प्वकेगुया नापं सामाजिक चेतनां कुला: मिसा जातियात आत्मनिर्भर जुइगु प्रेरणा बिइगु कुत: थ्वयक:या निबन्धय् जूगु दु । व्यावहारिक ज्ञान व थ:के दुगु बौद्ध धर्मया ज्ञानया लिधंसाय् तर्क प्रस्तुत यायेगु, दसु बिइगु, थ:गु बिचा: मान्यता स्थापित यायेगु कुत: थ्वयक:या निबन्धया

नेपालभाषा साहित्यया इतिहास/२०८



मूलभूत विशेषता खः । छति हे पण्डित्याई मद्गु सरल भाषा छयलाः न सशक्त रुपं थःगु भाव पिब्वयेफुगु थ्वय्कःया निबन्धया शैलीगत विशेषता जूगु दु ।

ठाकुरलाल मानन्धर (ने.सं. १०३२-११११)

- भाजु निबन्ध (ने.सं. ११०४)

नेपालभाषा निबन्ध साहित्यय् प्रौढ निबन्धया प्रवाह बलकाः छगू न्हूगु परम्परा न्ह्याकादीपि निबन्धकारत मध्ये थ्वय्कः नं छम्ह खः । न्हापां धार्मिक विषयवस्तुयात निबन्धया विषयभूमि कथं कयाः निबन्ध च्यादीसा लिपा अनुसन्धानात्मक लै ज्वनाः निबन्ध साधना यानादीम्ह निबन्धकार खः । थ्वय्कःया निबन्धया विषयवस्तु मूलतः नेवाः संस्कृति, संस्कार व परम्पराय् केन्द्रित जुयाच्चंगु दुसा, चित्तधरं थें थःगु जातीय गौरव, मायां प्रेरित जुयाः थःगु संस्कृतिया गुणगान यायेगु मजुसे वस्तुगत अध्ययन यायेगु पाखे ठाकुरलाल प्रवृत्त जू । थथे अनुसन्धानात्मक प्रवृत्ति व कलात्मक अभिव्यञ्जनाया सामञ्जस्य हनाः निबन्ध च्यादीम्ह ठाकुरलालया निबन्धय् प्रयोग जुयाच्चंगु शिष्ट व सन्तुलित भाषा' सश्लिष्ट शैलि वय्कःया प्रौढ गद्यकारया व्यक्तित्वया नं परिचय बिउगु दु ।

रत्नध्वज जोशी (ने.सं. १०३६-११०९)

- निबन्ध छपुचः (ने.सं. १०७०)

- निबन्ध निपुचः (ने.सं. १०७८)

- निबन्ध स्वपुचः (ने.सं. १०९९)

- आरती (११०७)

- लिसः

नेपालभाषाय् दकलय् न्हापां व दकलय् अप्वः निबन्धया सफू पिकयादीम्ह रत्नध्वज जोशी अग्रज निबन्धकारत मध्ये छम्ह खः । ल्हातं च्याः पिकाःगु तत्कालीन 'नेपाल' (ने.सं. १०६५) पत्रिकाय् पिदंगु 'चव्यगु छाय्' रत्नध्वज जोशीया न्हापांगु निबन्ध खःसां थ्वय्कः निबन्धकारया रुपय् 'धर्मोदय' पत्रिकां निसें तिनि बांलाक परिचित जूगु खनेदु । थ्वय्कःया 'चव्यगु छाय्' निबन्ध प्रकाशनया रुपय् जक न्हापांगु निबन्ध मजुसे नेपालभाषाया न्हापांगु सैद्धान्तिक समालोचनाया पलाः नं खः । रत्नध्वज नेपालभाषाय् वस्तुपरक निबन्धया जन्मदाता जक मजुसे थ्वयात बलकाः नेपालभाषाया वस्तुपरक निबन्धया धुकू समृद्ध नं यानाबिउम्ह निबन्धकार खः । थम्हं कयागु, थम्हं ज्वनागु विषयवस्तुइ क्वातुकक चिकाः चव्येगु प्रवृत्ति यानाः थ्वय्कः स्वच्छन्द रुपं चव्येगु पक्षय् मद्गु धयागु स्पष्ट जू । 'निबन्धकार थःगु भावावेशं विभोर जुयाः स्वतन्त्र व स्वच्छन्द प्याखं हुलिइम्ह कलाकार खः' धयागु प्रेमबहादुरया धापूया विपरीत रत्नध्वज शास्त्रीय नियमया बन्धनं चीकाः प्याखं हुलिइम्ह कलाकार खः (श्रेष्ठ ने.सं. १११७:४७) । तर अथे खयां नं थ्वय्कःया निबन्ध निपुचः सफलइ दुथ्याःगु छुं निबन्ध आत्मपरकताया नं आभास ब्यूगु दु । सुधार सन्देश, तर्क तिबः बिइकातःगु विषय प्रतिपादन, बौद्धिकता व जिज्ञासा ग्वाकीगु

नेपालभाषा साहित्यया इतिहास/२०९

प्रसंग आदि थ्वय्कःयात नेपालभाषाया छम्ह प्रौढ निबन्धकारया रुपय् प्रतिस्थापित जुइके बिउगु दु ।

प्रेमबहादुर कसाः (ने.सं. १०३७-११११)

- न्हू पुखू (ने.सं. १०७८), श्रेष्ठ सिरपाः प्राप्त - ने.सं. १०७८

- 'धर्मोदय'य् जि (ने.सं. ११०८)

निबन्धकार धयाम्ह थःगु हे भावावेशं विभोर जुयाः स्वतन्त्र व स्वच्छन्द प्याखं हुलिइम्ह कलाकार खः धकाः निबन्धयात परिभाषित यानादीम्ह प्रेमबहादुर कसाः नेपालभाषाया निबन्ध ख्यलय् आत्मपरक निबन्धया धाः न्ह्याकादीम्ह छम्ह सशक्तम्ह निबन्धकार खः । यथार्थवादी दृष्टिकोण, आत्मप्रकाशन, कवितात्मक अभिव्यक्ति, आत्मविश्लेषण, निगति वस्तु दुने नं नेपाल संस्कृतिया गरिमा खंकेफुगु, विषयया लागाय् जक थःत सीमित मयासे उखें थुखें चाःहिलाः नं बनेमाःगु लै त्वःमफिक बनेफुगु, जीवन दर्शनया गहन व रहस्यपूर्ण गथि नं न्हिन्हिसिया अनुभूति तिप्याये फइकथं दसि तर्क न्हयथनाः याउँक पयनाः क्यनेगु क्षमता प्रेमबहादुरया निबन्धया मूलभूत विशेषता खः । थुकथं कसाःजुं नेपालभाषाया निबन्ध ख्यलय् थःगु हे परिवेश सृजना यानादीगु दु, गुकिं लिपायापि निबन्धकारतयत न्हयज्यायेत लै छुना बिउगु दु, नेपालभाषाया निबन्ध ख्यःयात चकंका बिउगु दु ।

पूर्णकाजी ताम्राकार (ने.सं. १०४०)

- थःगु साहित्यिक याः ब्वछि (ने.सं. १११९)

बासः दै मयाक थःत भाषा साहित्य ख्यलय् पयाना नं सत्यापुं मयाक विभिन्न पत्रपत्रिकाय् भाषा, साहित्य, संस्कृति, यात्रा सम्बन्धी निबन्ध प्रबन्ध पिकयाः नं सफूचवमिया रुपय् नकतिनि हे जक म्हसीकः भ्नाःम्ह पूर्णकाजी ताम्राकार नेपालभाषाया प्रबन्ध ख्यःया छम्ह त्वःफिके मज्यूम्ह व्यक्तित्व खः । ने.सं. १०६८ स धर्मोदय पत्रिकाय् पिदंगु चवसुं निसें थौया 'नसंचा' (ने.सं. १११८) पत्रिकाय् पिदंगु चवसुं तर्क दुथ्याःगु थ्वय्कःया 'थःगु साहित्यिक याः ब्वछि' सफलं मातृभाषा प्रति अनुराग, स्वजातीय संस्कृति प्रति विशद ज्ञान अले थुकिया गरिमा महिमा ब्वयेगु हे थ्वय्कःया चवखँया विशेषता खः धकाः क्यनाब्यूगु दु । ताम्राकारया चवसुं नेपालभाषा प्रबन्ध ख्यःयात जक विविधता छायेपेगु याःगु मखुसे, नेपालभाषाया गद्य विधायात बल्लंकेगुलिइ नं महत्वपूर्ण तिबः ब्यूगु दु ।

सत्यमोहन जोशी (ने.सं. १०४०)

- सुखया किचलय् (ने.सं. १०७३)

- नेपाःया बौद्ध कला (ने.सं. १०७६)

- स्वां व समेबजि (ने.सं. ११०४)

नेपालभाषा साहित्यया इतिहास/२१०



धर्मोदय पत्रिका निसैं नेपाल संस्कृतिया अन्वेषक निबन्धकार कथं खनेदयेकः भाम्हा सत्यमोहन जोशी नेपाःया नांदीपि साहित्यकारत मध्ये छम्ह खः । नेपाःया इतिहास, साहित्य संस्कृतियात थःगु चर्खैया विषयभूमि कथं छ्यलादीम्ह सत्यमोहन जोशीया चर्खा भोगु सांस्कृतिक गरिमा जक व्वयेगु मयासे थुकियात संरक्षण सम्बर्द्धन यायेगु ज्याय नं गाक्कं तिबः बिउगु दु । अन्वेषणात्मक प्रवृत्ति, विश्लेषणात्मक शैली, बस्तुगत ज्ञान, गाम्भीर्य व तार्किकता यांनाः थ्वय्कःया चर्खै रोचक व शिक्षाप्रद जू ।

**शंकरमान राजवंशी (ने.सं. १०४५-१११९)**

- भोगु संस्कृति म्हसीके (१११२)

नेवाः संस्कृति संस्कार सम्बन्धी आपालं दुयंगु लेख चर्खादीम्ह शंकरमान राजवंशी नेपालभाषा प्रबन्ध ख्यःया छगः थीगु नगु अले नेवाः संस्कार नेवाः संस्कृति छम्ह तःधंम्ह विद्वान नं खः । थ्वय्कःया चर्खा नेवाः संस्कार संस्कृति या प्रचार प्रसार यायेत जक तिबः बिउगु मजुसे थुकिया संरक्षण सम्बर्द्धनय नं महत्वपूर्ण योगदान बिउगु दु । नेवाः संस्कार संस्कृति गरिमा महिमा व्वयेगु स्वयाः नं उकिया विधि विधान, उपादेयता आदि कनेगुलिइ वय्कःया चर्खा अप्वः ज्यःगु दु ।

**हेमराज शाक्य (ने.सं १०४६)**

- नेपाल संस्कृति मू लुखा (ने.सं १०८९), श्रेष्ठ सिरपाः प्राप्त (ने.सं ११८९)

- स्वयम्भू महाचैत्य (ने.सं १०९८) श्रेष्ठ सिरपाः प्राप्त

(ने.सं ११०१)

- सम्यक महादान गुथि (ने.सं ११००)

नेपाल लिपि, बौद्ध धर्म व नेवाः संस्कृति संस्कार आदिया दुयंगु अध्ययन दुम्ह हेमराज शाक्यजुया चर्खा लिपि, बुद्ध धर्म व नेपाल संस्कृति या जः ह्वलेगु जक मखु थुकिया संरक्षण सम्बर्द्धनया निति नं महत्वपूर्ण योगदान बिउगु दु । अन्वेषणात्मक प्रवृत्ति, तर्कपूर्ण प्रस्तुति, प्रौढ भाषा शैली थ्वय्कःया चर्खुया मू विशेषता खः । बस्तुगत ज्ञान भयबिउगु थ्वय्कःया प्रबन्ध नेपाःया संस्कृति, धर्म, लिपिया अध्ययन याइपित मू वंगु ज्वल जूगु दु । थौं नेपालभाषा नेपाःया धर्म संस्कृति सम्बन्धी दकलय् अप्वः सफू पिकयादीम्ह चर्मा थ्वय्कः हे जूगु दु ।

**सूर्यबहादुर पिवाः (ने.सं १०४८)**

- हँय्खें ध्वंवा (ने.सं १०९८)

- बुरिम्ह ल्यासे (ने.सं १०९२)

- मा. जगतसुन्दर मल्लया जीवनी

- ब्रेक मरुम्ह मन् (ने.सं १११८)

नेपालभाषा साहित्यया इतिहास/२११

सूर्यबहादुर पिवाः नेपालभाषा निबन्ध साहित्यय् हास्यव्यंग्य निबन्धया अभावपूर्ति जक मखु थ्व विधायात तब्ब्या तच्चाः यायेगुलिइ उल्लेखनीय योगदान वियादीम्ह चर्मा खः । थौंया समाज, थौंया मनूतय्के खने दयाच्वंगु अनेक विकृति विसंगति यात न्हंकेगु उदेश्य हास्यव्यंग्यया रोचक व प्रभावकारी शैली प्रस्तुत यानातःगु थ्वय्कःया निबन्ध थज्याःगु विकृति विसंगति प्रति सतर्क सचेत यायेत तिबः बिउगु दु । । नेवाः समाज नेवाः संस्कृति विडम्बना विकृति प्रति जक मखु राष्ट्रिय अन्तर्राष्ट्रिय क्षेत्रय् खने दयाच्वंगु उच्छृंखलाता प्रभूत्ववाद, साम्राज्यवादप्रति तर्क तिक्छा व्यंग्य नकाः चर्चातःगु थ्वय्कःया निबन्ध नेपालभाषाया निबन्ध विधायात चर्का बिउगु दु ।

**तीर्थलाल नःघःभनि (ने.सं. १०५०)**

- फुटकर - ठाकुरलाल सिरपाः प्राप्त

बाखं चर्माया रुपय् आपालं नां जाःम्ह तीर्थलाल नःघःभनि छम्ह स्यल्लाम्हा नेपालभाषाया चर्खै चर्मा नं खः । पत्रपत्रिकाय् आपालं अनुसन्धानमूलक, सांस्कृतिक, धार्मिक, ऐतिहासिक चर्खैत चर्चाः नेपालभाषाया प्रबन्ध ख्यःयात विविध विषयलं छायेपेगु ज्या थ्वय्कः पाखें जूगु दु । साहित्यिक दृष्टिकोण जक मखु सांस्कृतिक, धार्मिक, ऐतिहासिक बस्तुगत तथ्य सीकेगु निति नं थ्वय्कःया चर्खु मूवंगु जूगु दु ।

**फणीन्द्ररत्न बज्राचार्य (ने.सं १०५२)**

- स्वांसिन्हः (ने.सं १०८०) श्रेष्ठ सिरपाः प्राप्त - ने.सं. १०८१)

- तय्जु (ने.सं १०८९)

- क्वाति (ने.सं ११०१)

- पौ-दुःख सुखया (ने.सं ११०१)

- जिगु खँ (ने.सं. १११८)

फणीन्द्ररत्न बज्राचार्य मूलतः सांस्कृतिक विषयवस्तु ज्वनाः थुकिया गरिमा व्वयेगु तातुनाः निबन्ध चर्मा निबन्धकार खयाः नं थःगु वैयक्तिक अनुभूति, राष्ट्रिय अन्तर्राष्ट्रिय घटनाप्रति थःगु स्वस्थ प्रतिक्रिया नं दुध्याकाः निबन्ध चर्माया यानाःदीम्ह चर्मा खः । थ्वय्कःया निबन्धया विषय प्रसंग प्राचीन युगनिसैं बीसौ शदीया चर्चा, नेवाः जातिया कर्मकाण्ड निसैं राष्ट्रिय अन्तर्राष्ट्रिय स्थितिया चर्चा नं थिउगु दु । भाव गाम्भीर्य, तार्किकता, कलात्मक अभिव्यञ्जना संयमित व संतुलित अभिव्यक्ति, सरल भाषा थ्वय्कःया निबन्धया शैलीगत विशेषता खः । बस्तुगत निबन्धय् नं वैयक्तिकताया समन्वय दइगु थ्वय्कःया निबन्धया छगू मेगू नं विशेषता जूगु दु ।

नेपालभाषा साहित्यया इतिहास/२१२



स्वयम्भूलाल श्रेष्ठ (ने.सं १०५१-११०७)

- भीमि (ने.सं १०८८)

विशेषतः भाषिक, साहित्यिक, सांस्कृतिक विषय सम्बन्धी अनुसन्धानमूलक चर्चा चर्चादीम्ह स्वयम्भूलालया चर्चासु नेपालभाषाय प्रबन्ध विधायात तःमि यायेगुलिइ जक तिबः विउगु मजुसे नेपाःदेय्या भाषा साहित्य संस्कृतियात प्रचार प्रसार जुइकेगुलिइ नं महत्वपूर्ण योगदान विउगु दु । सरल व सरलल न्ह्याःगु शैली चर्चायातःगु थ्वय्कःया चर्चासु बौद्धिक प्रधान चर्चा नं सरल व सरस जुइक चर्चायेजिउ धयागु खँ क्यना विउगु दु । छुं नं पूर्वाग्रह मतसे खँ मालेगु अले लूगु खँ ब्वमितयत् न्ह्याइपुक, अःपुक ध्वाथुइक कनेगु प्रवृत्ति थ्वय्कःयात छम्ह स्येल्ताःम्ह अन्वेषकया रुपय् नं प्रतिस्थापित याःगु दु ।

रे.र.न स्यस्यः (ने.सं १०५२)

- भिपु हवना खँ (ने.सं. १११६)

- जिगु छुं धार्मिक चर्चा (ने.सं. १११६ )

रे.र.न स्यस्यः नेपालभाषाया निबन्ध ख्यःया चीरपरिचित नां खः । न्हापां न्हयःखा निबन्ध संग्रहया सम्पादन याताः नेपालभाषाया निबन्ध ख्यलय् दुहांभाःम्ह थ्वय्कःया निबन्ध भीमि संस्कृतियात चर्चायेगु नापं थौया राजनैतिक, सामाजिक, सांस्कृतिक आदि क्षेत्रय् खनेदुगु विभिन्न विकृति विसंगतियात नं न्हयब्वयेगु याःगु दु । थ्वय्कःया थौकन्हे पत्रिकाय् पिदंगु सम्पादकीय नं समसामयिक घटनाप्रति थ्वय्कःया प्रतिक्रिया व भाषा साहित्य, संस्कृति तथा धर्म सम्बन्धी दृष्टिकोण चर्चायेगु याःगु दु । थौकन्हे थ्वय्क अप्व धार्मिक चर्चा चर्चायेगु पाखे घेचुलादीगु दु ।

ठाकुरमान शाक्य (ने.सं १०५५)

- फुतिफाति (ने.सं १०९०)

पुलांगु मूल्य व मान्यतायात न्ह्याबलें सकारात्मक रुपं नालेगु प्रवृत्तियात विरोध याताः थौया युग अनुसार भीमि परिवर्तित जुइमाःगु सन्देश बियाः निबन्ध चर्चादीम्ह ठाकुरमानया निबन्धय् विषय ज्ञानया नापं निजात्मकता नं उलि हे भयविउगु दु । थ्वय्कःया निबन्ध ब्वमितयगु 'द्वय' यात स्वयाः नं बुद्धि पक्षयात अप्वः कलेगु याःगु दु । ब्वमितयत् निबन्ध दुने सासां यंकेफुगु थ्वय्कःया प्रस्तुतिकरण, भाषा शैली चर्चायेबह जू ।

तेजेश्वरबाबु ग्वंगः (ने.सं १०५६) ठाकुरलाल सिरपा प्राप्त

- फुटकर

धर्मोदय पत्रिकाय् 'निबन्धया खँ' शीर्षकया निबन्धपाखें निबन्धकारया रुपय् म्हासीकःभाःम्ह तेजेश्वरबाबु ग्वंगः भीमि निबन्ध ख्यःया छगः थीगु नगु खः । सामाजिक कुरीति व कुसंस्कारयात व्यंग्यात्मक भाषां आलोचना याताः सुधारया

नेपालभाषा साहित्यया इतिहास/२१३

सः थ्वयेकादीम्ह चर्चा तेजेश्वरबाबु ग्वंगः खः । जीवन दर्शनया गहन तत्त्वयात नं स्याचुक क्वातुक ध्याथुइके फुगु, प्रभावोत्पादक भाषा, आकर्षक शैली, सरल स्पष्ट अभिव्यक्ति थ्वय्कःया निबन्धया शैलीगत विशेषता खः ।

विष्णु अल्पज (ने.सं १०५६)

- जि व जिया दुने (ने.सं १११५) गोविन्द सिरपाः प्राप्त (ने.सं. १११५)

हिन्दू धर्म, पूर्वीय दर्शनया पृष्ठभूमिइ निबन्ध चर्चादीम्ह विष्णु अल्पजया निबन्धय् सांस्कृतिक चेतना, भाषिक ममता, राष्ट्रिय भावना, विश्व शान्तया कामना उलि हे ल्यहे पुयाचंगु दु । थ्वय्कःया निबन्ध बस्तुगत जूसां निजात्मकतां नं गाकं भयविउ । छम्ह निबन्धकारयाके दयेमाःगु इमान्दारिता, जीवन व जगत प्रतिया दुर्गुगु अनुभव थेंज्याःगु गुण वय्कःयाके गाकं खनेदु ।

डा. कमलप्रकाश मल्ल (ने.सं १०५६)

- फुटकर

डा. कमलप्रकाश मल्ल नेपालभाषा व साहित्य ख्यलय् नांजाःम्ह छम्ह चर्चा खः । थ्वय्कःयागु अनुसन्धानात्मक चर्चासु इलय् व्यलय् पिदनाचंगु दु । थ्वय्कःयागु चर्चासु प्रबन्धनात्मक प्रवृत्ति पाखे मुखरित जूसां थ्वय्कःया अन्वेषणात्मक पक्ष साप हे क्वातुसे चर्चा नापं समालोचनात्मक मिखा नं तेल्लाः जू, गुकिं याताः भीमि निबन्ध ख्यलय् थःगु कथंयागु व्यक्तित्व निर्माण यायेगु ज्याय् थ्वय्कः सफल जुइफुगु दु ।

बलदेव जुजु (ने.सं. १०५६)

- नेवाः संस्कृति व नेवाः दर्शन (ने.सं. १११५) गौरी - अनन्त सिरपाः प्राप्त (ने.सं. १११५)

- नेपाःया तान्त्रिक छः व तान्त्रिक पूजा

(सुरेन्द्रमान श्रेष्ठ लिसे जानाः चर्चाःगु)

- कान्तिपुर (सुरेन्द्रमान श्रेष्ठ लिसे जानाः चर्चाःगु)

- नेवाः संस्कार व उकिया बिधि (ने.सं. १११९)

नेपाःया धर्म संस्कृति विषययात कयाः अन्वेषणात्मक चर्चासु चर्चापि चर्चा मध्ये बलदेव जुजु नं छम्ह खः । तःदं न्हयःनिसें थज्याःगु चर्चासु चर्चायेगुलिइ संलग्न जुयादीम्ह 'जुजु'या लेखनं केवल नेपाःया संस्कृति नेवाः दर्शनया जक जः हवलेगु मजुसे थुकिया संरक्षण सम्बर्द्धनय् नं महत्वपूर्ण तिबः जूगु दु । नेपालभाषाया प्रबन्ध ख्यःयात विविधतां छायेपेगुलिइ थ्वय्कःया चर्चासु मूवंगु ज्वलं जूगु दु ।

डा. केशरीलक्ष्मी मानन्धर (ने.सं. १०६०)

चतु मधु (ने.सं. १११६)

नेपालभाषा साहित्यया इतिहास/२१४



विशेषतः संस्मरण, यात्रा विवरण, अनुसन्धानमूलक विज्ञान सम्बन्धी चवसु च्वयाः नेपालभाषाया प्रबन्ध ख्यःयात विविधतां छायेपादीम्ह छम्ह च्वमि डा. केशरी लक्ष्मी नं खः । सरल व रोचक भाषा शैली छयलाः थः धायेमाःगु खंयात पूर्वक, त्याजिक धायेगु थ्वय्कःया चवसुया विशेषता खः । चतु मधुं स्वास्थ्य तन्दुरुस्त यायेगुलिइ तिवःवीथें थ्वय्कःया अनुसन्धानमूलक विज्ञान सम्बन्धी चवसु भीत स्वस्थ व तन्दुरुस्त जीवन हनेगु नितिं ज्याय् खेले जूगु तथ्यत सीकेत तिवः व्यूगु दु ।

**पूर्णबहादुर वैद्य (ने.सं १०६१)**

- जि : जिगु अभिव्यक्ति (अप्रकाशित) श्रेष्ठ सिरपाः प्राप्त- ने.सं. ११००

प्रेमबहादुर कसाः नं न्हापां प्रयोग याःगु आत्मपरक निबन्धया प्रवाह नाप थःत न्ह्याकाः नं वय्कलं कताय् मफुगु गुणात्मक स्तर व विषयवस्तु ज्वनाः नेपालभाषा निबन्धयात तःमि यानादीपि निबन्धकारत मध्ये पूर्णबहादुर वैद्य नं छम्ह खः । वैद्यजुया निबन्धया प्रमुख विशेषता खः - काव्यात्मक अभिव्यक्ति, चेतना प्रवाह शैली, निगति विषय थियाः नं विराट सत्ययात ब्येफुगु क्षमता, विषय लागां पिहां वनाः थुखें उखें चाःहिलाः नं हानं थःगु गन्तव्यय् थ्यंकेफुगु कुशलता, देशया दूरावस्था, दुर्दशाया तीव्र आलोचना, थौया स्थितिप्रति तीव्र असहमति, पुलांप्रति अनास्था अस्वीकृति आदि । परिस्कृत विचारधारा, परिमार्जित शैली, प्रभावोत्पादक प्रस्तुतिकरण थ्वय्कःया निबन्धया विशेषता खः । निबन्धय् हार्दिकता व बौद्धिकताया समन्वय जुइफुगु हे थ्वय्कःया सफलताया मू कारण खः । कवि जुयाः स्वयाः नं निबन्धकार जुयाः अप्वः थःगु खं अभिव्यक्त यायेफु धयागुया दसु पूर्णबहादुरया निबन्ध जुया बिउगु दु ।

**धुवनारायण कायष्ठ (ने.सं. १०६१), ठाकुरलाल सिरपाः प्राप्त (ने.सं. १११९)**

छवास अजिमाः (ने.सं. १११६)

थःगु विद्यार्थी इलं निसें हास्य व्यंग निबन्ध च्वयाः आपालं सिरपाः त्याका दीधुकूम्ह धुवनारायण कायष्ठ नेपालभाषा हास्य व्यंग निबन्ध ख्यःया छम्ह त्वःफिके मज्यूम्ह व्यक्तित्व खः । थौया विकृति, विसंगति प्रति स्याचुगु ध्याचू, क्वातुगु धापू, न्ह्यैपुगु खंपुं जाःगु थ्वय्कःया निबन्ध नेपालभाषाया हास्य व्यंग निबन्धया धुकू जक जायेका व्यूगु मखुसे थौया खायूगु यथास्थिति नाप नं भीत उलि हे साक्षात्कार जुइके व्यूगु दु । छुं नं खं तप्यक धायेबले स्वयाः नं ध्याचू नकाः धायेबले अप्वः मनय् थिइ धेगु खं थ्वय्कःया हास्य व्यंग निबन्ध क्यंगु दु ।

**पद्मरत्न तुलाधर (ने.सं १०६२)**

- बुलुमि (ने.सं १०८२)

नेपालभाषाया निबन्ध ख्यल्य् छम्ह आधुनिक निबन्धकारया रुपय् खनेदयेकः भ्नाःम्ह छम्ह च्वमि पद्मरत्न तुलाधर नं खः । थ्वय्कलं नेपालभाषा

साहित्यय् मेमेगु विधाय् नं ल्हाः तयादीसां थ्वय्कःया प्रतिभा दकलय् निबन्धकारया रुपय् उत्कृष्ट खनेदु । प्रेमबहादुर कसाःजुं छुनादीगु आत्मपरक निबन्धया लंपु ज्वनाः नं थःगु विस्कं शैली व वैचारिक विशिष्टता थ्वय्कलं कायम यानादीगु दु । निबन्धय् निगति विषय ज्वनाः नं समसामयिक जीवन, राष्ट्रिय अन्तर्राष्ट्रिय समस्या, परिस्थिति प्रति भीत नजग सचेत यायेगु क्षमता थ्वय्कःयाके दु । नेपालभाषा साहित्यय् प्रगतिशील थाः न्ह्याकादीपि निबन्धकारत मध्ये पद्मरत्न नं छम्ह खः । छम्ह प्रभावशालिम्ह निबन्धकारं निगति विषय दुने नं विस्तृत व व्यापक दर्शन लुइके फु धयागुया दसु थ्वय्कःया निबन्ध जुयाबिउगु दु । काव्यात्मक सम्बेदनशीलता, खुसि थें गनं दिपाः मकासे सल्लल् न्ह्यायेफुगु भाषा शैली, स्वच्छन्द अभिव्यक्ति, तर्कपूर्ण प्रस्तुति आदि थ्वय्कःया निबन्धया विशेषता खः ।

**मंगलप्रसाद स्यस्यः (ने.सं १०६७)**

- जिगु दायरी : छपु पौ (ने.सं १०९०)

मंगलप्रसाद स्यस्यः नेपालभाषाया निबन्ध ख्यल्य् पूर्ण वैद्य, पद्मरत्नपिं थें छम्ह न्हू पुस्ताया न्हू पलाः खः । थौया समाजय् पिज्वयाचवंगु विकृति, विसंगति प्रति गाक्कं चिन्तित व सम्बेदनशीलम्ह अले थःगु ल्याय्म्ह जीवनयात सुधार व क्रान्तिया नितिं छयलेमाः धयागु कर्तव्यबोध यानादीम्ह निबन्धकार खः । थौया वर्तमानयात हिलाः न्हूगु समाज निर्माण यायेगु आह्वान थ्वय्कःया निबन्धय् दु । थ्वय्कःया निबन्धय् कल्पना तसकं च्वन्ह्याः, भाषा व अभिव्यक्ति काव्यात्मक जू । छपु छपु निबन्ध छपु छपु ताहाःगु कविता धाये त्वः । अथे हे विषयगत स्वच्छन्दता थ्वय्कःया निबन्धया मेगु विशेषता खः । थुकथं आत्मपरक निबन्धया विकासय् मंगलप्रसादया निबन्ध महत्वपूर्ण योगदान बिउगु दु ।

**मल्ल के. सुन्दर (ने.सं १०६८)**

- लुमन्तिया किचः (ने.सं ११०९)

नेपालभाषाया, भाषिक, साहित्यिक, सांस्कृतिक आन्दोलनय् सक्रिय नेतृत्व बियाभाःम्ह, 'इनाप' वाःपौया सम्पादक जुयाः ता ई तक ज्या यानादीम्ह मल्ल के. सुन्दरया समसामयिक घटना सम्बन्धी टिका टिप्पणी यानातःगु विचारात्मक लेख तथा इनाप पत्रिकाया सम्पादकीय नेपालभाषाया प्रबन्ध विधयात बल्लाकेत तिवः बिउगु दुसा थ्वय्कःया इलय् ब्यलय् पिदंगु प्रबन्ध, निबन्ध नेपालभाषाया निबन्ध व प्रबन्ध विधाय् खनेदुगु वैचारिक हिउपाः तथा वृहत व्यापक परिधियात कःधायेगु प्रवृत्तियात न्हयव्वया बिउगु दु । अथे हे थःगु युरोप भ्रमणया लुमन्तिइ च्वयातःगु बौद्धिकता व हार्दिकताया समन्वयात्मक निबन्ध 'लुमन्ति किचः' सफल थःगु देय्या दयनीय स्थितिं वय्कःया 'हृदय' गुलि ममार्हित जुल धयागु जक क्यंगु. मजुसे भीगु न्हयपु व हृदययात नं उलि हे ममार्हित यानाबिउगु दु ।



भूषणप्रसाद श्रेष्ठ (ने.सं १०७२)

- कुकुल्याङ्क (ने.सं ११०१)

भूषणप्रसाद श्रेष्ठ नेपालभाषाया आधुनिक निबन्धया ख्यल्य छगू न्हू पलाः खः । निर्गति विषययात ज्वनाः नं थौं वर्तमानया यथास्थिति, थौया परिवेश व्वयेगुलिइ वय्कः सक्षम जूगु दु । देशय् व्याप्त भ्रष्टाचार, नातावाद, कृपावाद, घूसखोरी आदिप्रति थौया जनता सचेत सतर्क यायेगु छगू माध्यमया रुपय् थ्वय्कलं निबन्धयात छ्यलादीगु दु । व्यंगात्मक शैलीइ प्रस्तुत यानातइगु थ्वय्कःया निबन्ध व्वनेबलय् भीत मतिइ लुइका ब्यू भीसं खनाच्वनां नं, अनुभव यानाः नं, धायेमफुगु, धाये मसयाच्वंगु भीगु खँ, भीगु नुगः थ्वय्कलं व्वयाविल । थुकथं थःगु नुगः खँ पलाः नं करपिनिगु नुगः खँ जुइकेगु क्षमता थ्वय्कःया निबन्धय् दु । थ्वय्कः कविताय् थें थ्वय्कःया निबन्धय् नं थौया वर्तमान प्रति असन्तोष, म्हिगःया धर्म संस्कारप्रति अनास्था अले न्हूगु हयेमाःगु प्रति आतुरता दु । अफ निबन्धय् ला च्वमिं थःगु खँ तय्क वयाः कनेछिगुलिं, भन ध्वाथुइक प्वकादीगु दु ।

सौरभ शाक्य (ने.सं. १०७३) ठाकुरलाल सिरपाः प्राप्त

- मार्कान्त (ने.सं ११०८)

- प्रजातन्त्रया अद्भूत अवतार (ने.सं १११८)

थौया ख्यालः थें जुयाच्वंगु देय्या राजनैतिक विसंगतियात कयाः ध्याचू च्वयादीमह छम्ह च्वमि सौरभ शाक्य नं खः । थ्वय्कःया हास्य व्यंगं छभाः भीत न्हिकेगु याःसा, थौया वास्तविकता नाप साक्षात्कार यानाविइगु थ्वय्कःया ध्याचूया विषयवस्तुखं भीत नुगलय् प्याकुतिं न्यानाविइगु याः ।

मदनसेन बज्राचार्य (ने.सं. १०७४)

- प्रेमबहादुर कसाःया छत्वाःचा जीवनी (ने.सं ११०८)

- प्रेमबहादुर कसाःया जीवनी (ने.सं ११०९)

- लोकम्ये मुनामि मानदास तुलाधरया जीवनी (ने.सं १११०)

- लोकसाहित्यविद् करुणाकरया जीवनी (ने.सं ११०९)

- लोकरत्न तुलाधरया जीवनी (ने.सं १११०),

- सत्यमोहन जोशीया जीवनी (ने.सं १११४)

खयेत ला नेपालभाषाया समसामयिक तथा सांस्कृतिक विषयय् नं निबन्ध च्वयेगु यानादीसां नेपालभाषाया लोकसाहित्यविदपिनिगु जीवनी व्यक्तित्व सम्बन्धी विश्लेषणात्मक तथा अनुसन्धानमूलक कृति च्वयेगुलिइ विशेष रुपं थःत पयानाभाःमह मदनसेन बज्राचार्य नेपालभाषाया प्रबन्ध ख्यःया छगः थीगु नगु खः । थ्वय्कःया कृति नेपालभाषाया प्रबन्ध साहित्यया धुकू जायेकेगु जक याःगु मजुसे नेपालभाषाया भाषा साहित्य संस्कृति क्षेत्रय् विशिष्ट योगदान वियावंपि व्यक्तित्वतय्त अजर अमर यानातयेत नं तिबः बिउगु दु । थ्वय्कलं

व्यक्तित्वपिनिगु जीवनी व्वयेगु क्रमय् थःगु हे कथं मूल्यांकन विश्लेषण यानाः थःगु सृजनात्मकताया नं परिचय वियादीगु दु ।

रमेशकाजी स्थापित (ने.सं १०७५)

- भी प्रधान सिरपाः व ठाकुरलाल सिरपाः प्राप्त

- मुलुकय् मरुगु मुलुक (ने.सं ११००)

रमेशकाजी स्थापित नेपालभाषाया छम्ह न्हू पुस्ताया निबन्धकार खः । शोषित पीडित जनताया पं लिनाः, जनताया हकहीतया निति सः थ्वयेकाः, जनताया भिं जुइगु खँ च्वइमह छम्ह प्रगतिशील निबन्धकार कथं नेपालभाषा साहित्यय् रमेशकाजी परिचित जूगु दु । थौया समाजय् खनेदुगु अनेक समस्या, विसंगति, विकृतिया भण्डाफोर यानाः थुकियात त्यात्या मत्या त्यानाः न्हूगु भिंगु समाजया निर्माण यायेमानिगु आवश्यकता थ्वय्कलं थःगु निबन्धय् प्वकादीगु दु सा ' जिगु थ्व ल्हातं मुलुक ब्वलंके मानि' धकाः थःगु कर्तव्य प्रति नं सचेत व सतर्क जुयादीगु दु । सरल न्ह्याःगु अभिव्यक्ति, सरल भाषा, स्वजाति पहचहया विम्ब, प्रतीकया प्रयोग थ्वय्कःया निबन्धया शिल्पगत विशेषता जूगु दु ।

चन्द्रमान बज्राचार्य (ने.सं. १०७५ )

- नेपालय् जिगु थःगु खँ (ने.सं १११७)

नेपाल पत्रिकाय् थःगु सम्पादकीय कथं पिदंगु रचनायात संकलन यानाः प्रबन्ध सफूया रुपय् पिकयादीमह चन्द्रमान बज्राचार्य समसामयिक विषयलय् थःगु प्रतिक्रिया विइमह छम्ह च्वमि खः । सरल व स्वाभाविक अभिव्यक्ति थ्वय्कःया रचनाया विशेषता खः ।

जुही सुवाल (ने.सं १०७६))

- पलाखय् लूगु लुमन्ति (ने.सं १११५)

मोतिलक्ष्मीयां लिउ नेपालभाषाय् निबन्ध पुचः ज्वनाः पिदंमह मिसा निबन्धकार जुही सुवाल खः । स्वां थें नाइसे च्वंगु, पपू थें याउँसे च्वंगु खुसि थें सरल न्ह्याःगु जुहीया निबन्ध ब्वमितय्गु नुगः सालाकाये फुगु जक मखु थौया परिवेशयात नं उलि हे सतर्क पूर्वक उलेगु याःगु दु । थःगु देय्, भाषा, साहित्य संस्कृतिप्रति गुलि वय्कःयाके माया ममता देजाःगु दु, उलि हे थनया आर्थिक असमानता, विकृति, विसंगति खनाः वय्कःया नुगः ख्वःगु दु ।

बालगोपाल श्रेष्ठ (ने.सं. १०८०) ठाकुरलाल सिरपाः प्राप्त

- हलिमलि (ने.सं ११०५)

बालगोपाल श्रेष्ठ नेपालभाषाया छम्ह नवोदित जनपक्षीय निबन्धकार खः । थ्वय्कलं निबन्धय्, अन्धविश्वास, अन्ध सिद्धान्त, परम्परागत रीतिथिति गुकिं



विकासयात अवरोध याइ, प्रगतियात पनी, उकिया विरोधय् गनं व्यंग्य प्रहार याना: सा गनं ख्यालि थें याना:, अले गनं तप्यक आलोचना याना: स: थ्वयेकादीगु दु । युक्तिपूर्ण सोचाइ, अन्धविश्वास मुक्त विचाल जक समाजयात न्ह्यज्याके फइ धइगु बिचा: थ्वय्क:या खनेदु । वैचारिक स्पष्टता, वस्तुयात दुथ्यंक बालेगु तेयल्ला: मिखा, तिक्क मिंक कुला विइफुगु हार्दिकता बालगोपालया निबन्धय् खनेदुगु शिलागत विशेषता ख: ।

**विजयेश्वर वैद्य (ने.सं १०८१)**

- ध्याचू:गु लैय् (ने.सं ११०९) **श्रेष्ठ सिरपा: प्राप्त**

विजयेश्वर वैद्य नेपालभाषाया नबोदित प्रतिभाशाली निबन्धकारत मध्ये छम्ह ख: । थ्वय्क:या 'ध्याचू:गु लैय्' निबन्ध सफू वैद्यजुया निति जक मखु नेपालभाषा निबन्ध विधाया निति हे छगु उपलब्धि ख: । वैद्यजुया निबन्ध भीगु संस्कार हिलेत, शोषण मदयेकेत, मानसिकता भिंकेत, ई अनुसार न्ह्यज्यायेत भीत ह:पा: वियाचवंगु दु । वैद्यजुयाके थ:गु धापू न्ह्य:ने तयेगु कुशलता दु, थुखें उखेया खं छुना: उखेरं थुखेरं चा:हिला: थ:गु निर्दिष्ट गन्तव्यय् थ्यंक: वनेगु क्षमता दु ।

**हृदयप्रसाद मिश्र (ने.सं १०८२) ठाकुरलाल सिरपा: प्राप्त**

- पपू मदुम्ह भंग: (ने.सं ११०९)

- क्वायेभु (ने.सं १११७)

नेपालभाषा ध्याचू निबन्ध ख्य:या छम्ह चर्चित ध्याचूमि हृदय प्रसाद मिश्र नं ख: । छम्ह मन्थ्या वैयक्तिक कमि कमजोरीयात कया: जक मखु राष्ट्रिय स्तरय् थ्यंक व्याप्त जुयावं वनाचवंगु सामाजिक, राजनैतिक आर्थिक एवं सांस्कृतिक विषमता व विकृतियात ख्या: बछि नी बछि याना: स्याचुक क्वातुक उला विइफुगु थ्वय्क:या निबन्धया विशेषता ख: । थ्वय्क:या ध्याचू च्खंय् दुगु रागात्मकतां ब्वमितय्त छेबे आनन्द विउसा उकिइ छ्यलातइगु शब्दं नेपालभाषाया गरिमा ब्वयाविउगु दु ।

**केशरत्न शाक्य (ने.सं. १०८४)**

- ल्वाप्पा (ने.सं १११९)

थौया समाजय् विद्यमान असंगति, विसंगति, विकृति, विडम्बनायात थ:गु निबन्धय् तसकं हे पाय्छिगु उपमा उखान व टुक्का छ्यला: न्ह्यब्वयादीम्ह केशरत्न छम्ह युवा पुस्तां पिदंम्ह खयां नं छम्ह सशक्त हास्यव्यंग निबन्धकार ख: । भीगु जीवनय् न्हिं न्हिं छ्यलाबुलाय् दइगु उखान उपमाया प्रयोग याना: थ्वय्कलं थौया परिवेशयात गुकथं सशक्त रुपं प्रतिबिम्बत यायेफुगु ख: थुकिं थ्वय्क:या वैचारिक सशक्तता जक मखु, शिल्पगत कुशलता नं क्यनाविउगु दु । गोतिं कयेके थें थासय् हे कयेकेफुगु थ्वय्क:या ध्याचुलिं ब्वमितय्त रोमान्चित

नेपालभाषा साहित्यया इतिहास/२१९

यायेगुलिइ जक मखु समाजयात मार्गदर्शन याकेगुलिइ नं तिब: बिइ धका: आशा यायेफु ।

चव्य उल्लेख जूपिं निबन्धकारत बाहेक थीथी पत्र-पत्रिकाय् थीथी विषयया निबन्ध च्वया: नेपालभाषाया निबन्ध विधायात समृद्ध यायेगुलिइ तिब: बियादीपिं मेपिं नं आपालं निबन्धकारत दनि । गथे - आत्मपरक निबन्ध च्वयादीपिं - भुवनमान कायष्ठ, नीलबीरसिंह कसा:, मन्दिरा श्रेष्ठ, अमीररत्न ताम्राकार, माधुरी चित्रकार, एम्.के. कल्पित, शान्तदांस मानन्धर, पुष्पमान कायष्ठ, उद्धव मास्के आदि । सांस्कृतिक विषयप्रधान निबन्ध च्वयादीपिं - हेमलाल जोशी, मदनमोहन मिश्र, पुण्यरत्न बज्राचार्य, माधवनन्द वैद्य, मनबज्र बज्राचार्य, धनवज्र बज्राचार्य, ज्यापु पञ्च भुइज:सि, बुद्धाचार्य शाक्य, ब.आ. कनकृषि, रामभक्त, जीतबहादुर मानन्धर, तीर्थलाल नध:भनि, योगेश, पुष्परत्न, रास जोशी, सुरेन्द्रलाल कायष्ठ, सुरेन्द्रमान श्रेष्ठ, गायत्री, रामधर श्रेष्ठ, सुवर्णमान तुलाधर आदि । कला साहित्य विषयसं निबन्ध च्वयादीपिं - माधवलाल कर्माचार्य, माधवानन्द वैद्य, सिद्धिचरण श्रेष्ठ, समसामयिक महत्त्वया विषयसं निबन्ध च्वयादीपिं - कुलधर्मरत्न, ईश्वरानन्द श्रेष्ठचार्य, धर्मरत्न यमि, माणिकलाल श्रेष्ठ, भगवतीप्रसाद, भुवनमान प्रधान, बासुपासा, बि.एन: उफोस्वां, चक्रानन्द, भिक्षु अश्वघोष, ओमकारेश्वर श्रेष्ठ, आदि । दार्शनिक निबन्ध च्वयादीपिं - जगतबहादुर जोशी, नृच्छेबहादुर, प्रभुभक्त जोशी, चन्द्रप्रसाद गोर्खाली आदि । धर्मदर्शनया विषयसं निबन्ध च्वयादीपिं - अमृतानन्द, महाप्रज्ञा, अनिरुद्र, सुदर्शन, रत्नमुनि, मुनिन्द्ररत्न बज्राचार्य, रे.र. न. स्यस्य:, धम्मावत्ती, नृच्छेबहादुर कमल, जगतबहादुर, भिक्षु डा. सुनन्द, ज्ञानबहादुर नेवा: आदि । नेपा:या इतिहास सम्बन्धी निबन्ध च्वयादीपिं - चित्तरञ्जन नेपाली, भैरवबहादुर प्रधान, भुवनलाल प्रधान, रामहरी जोशी आदि । विज्ञान व प्राबधिक विषय सम्बन्धी निबन्ध च्वयादीपिं - ज. जनकराज श्रेष्ठ, डा. चन्द्रप्रसाद गोर्खाली, प्रो. उपेन्द्रमान मल्ल, डा. हेमराज बज्राचार्य, योगाचार्य विकाशानन्द, निर्मल बज्राचार्य, अशोक राजवंशी, उज्ज्वल विलास, डा. महेशमान, ऐश्वर्यलाल प्रधान आदि । भाषाविज्ञान सम्बन्धी च्खं च्वयादीपिं - अयोध्याप्रसाद प्रधान, ईश्वरानन्द, इन्द्र माली, डा. सुन्दरकृष्ण जोशी, रमापतिराज शर्मा, काशीनाथ तमोट, डा. तेजरत्न कंसाकार, तुयुबहादुर महर्जन, डा. रुद्रलक्ष्मी श्रेष्ठ, तुल्लिलाल सिंह, प्रेमहीरा तुलाधर आदि । नेपालभाषाया इतिहास सम्बन्धी निबन्ध च्वयादीपिं - डा. जनकलाल वैद्य, इन्द्र माली, नर्मदेश्वरमान प्रधान प्रेमशान्ति तुलाधर, छत्रबहादुर कायष्ठ, कुमारबहादुर जोशी, आदि । हास्यव्यंग निबन्ध च्वयादीपिं - कृष्णचन्द्रसिंह प्रधान, गजसुन्दर प्रधान, गोविन्दलाल च्खुं, बलराम श्रमजीवि आदि । व्यक्तित्वपिनिगु जीवनीयात कया: च्वयादीपिं - अशोक श्रेष्ठ, बिमल ताम्राकार, अष्टमुनि बज्राचार्य, डा. चुन्दा बज्राचार्य, माया मानन्धर आदि । अथे हे विविध विषयसं निबन्ध च्वया: थ्व विधायात समृद्ध यायेगुलिइ तिब: बियादीपिं - प्रो. सूर्यबहादुर शाक्य, प्रदीपमान श्रेष्ठ, शान्तराज शाक्य, आस्था नेपा:मि, दवेरत्न, सोभियतरत्न, संघ यज्यु, शाक्य मानुस सुगतरत्न सिन्दुराकार, बसन्त

नेपालभाषा साहित्यया इतिहास/२२०



महर्जन, रास जोशी आदिपिनिगु देनयात न ल्वःमंके मज्यू । थुकथं थौ नेपालभाषाया निबन्ध विधां गुलि उपलब्धि यायेफुगु खः उकिया श्रेय सकल निबन्धकारतयगु सामूहिक प्रयासयात बिइमाः ।

**लिखँ :** नेपालभाषाया साहित्यय निबन्ध विधाया शुरुवात जूगु न्यागू हे दशक जक दयेधुंकूगु जूसां नेपालभाषाय् थौकन्हय् खनेदुगु निबन्ध, उकिं कय्च्यानातःगु विषय व ज्वंगु शैली सिद्ध याःगु दु - थःगु मतिइ लूगु भाव व विचाःयात स्वच्छन्द रुप कनेत छिगु अःपुगु विधा निबन्ध खः, थुकियात नेपालभाषाया लेखकतयसं प्रचुर मात्राय् उपयोग याःगु दु । चित्तधर 'हृदय' पूर्ण वैद्य थें ज्याःपिं कवि, रत्नध्वज व कृष्णचन्द्र थें ज्याःपिं समालोचक, ईश्वरानन्द थें ज्वःम्ह नाटककार उपन्यासकार नं थःगु खँ ध्वाथुइक कनेत निबन्धया माध्यम ज्वंगु दु । प्रेमबहादुर व पद्मरत्न थें मूलतः निबन्धकारतयगु खँ मेगु हे (श्रेष्ठ, ने.सं १११७: २९) । अथे हे छगू जाति छगू समाजया सिमित घेराय् जक लिमंकुसे, राष्ट्रिय अन्तर्राष्ट्रिय परिवेशयात तर्क कःघाना वयाच्वंगु नेपालभाषाया साहित्यिक विधा मध्ये निबन्ध नं छगू जूगु दु । थौया नेपालभाषाया निबन्धकारतयगु चिन्तन गन्धन 'छम्ह'कुसि' छम्ह'सली बाकु' निसें कयाः विश्व ब्रम्हाण्ड तर्क न्यंगु दु । खँ न्ह्याइपुक यैपुक कनेसल धाःसा न्ह्याथें ज्याःगु विषय नं थौ निबन्ध जुइफु धकाः क्यनाब्यूगु दु (तुलाधर, ने.सं. ११०९:क) । अथे हे विश्वया निबन्ध साहित्यय खनेदुगु विविध प्रवाह प्रवृत्तिया प्रभाव नं नेपालभाषाया निबन्धय लालां वयाच्वंगु दु । थःगु खँ कनेगु आत्मपरक व विषयवस्तुया खँ कनेगु वस्तुपरक निबन्ध नितां नं नेपालभाषाय् दुध्यने धुंकूगु दु । थ्व हे कथं लेखकया निजी स्पन्दन दुगु निजात्मक निबन्ध, थःगु भावना कामना प्वकातःगु भावनात्मक निबन्ध, छुं सिद्धान्त, विचाः वा घटनाप्रति चिन्तन मनन यानातःगु बिचारात्मक निबन्ध, जीवनी प्रथा, प्रणाली, घटना आदिया विवरण ब्वयातःगु विवरणात्मक निबन्ध, जाति, भाषा, धर्म संस्कृति आदि वर्णन यानातःगु वर्णात्मक निबन्ध आदि विविध प्रकारया निबन्ध नेपालभाषाय् खनेदये धुंकूगु दु । शैलीया दृष्टि नं गम्भीर तर्कयुक्त न्हयपुयात कुलीगु बौद्धिक निबन्ध निसें हृदयया खँ प्वकातःगु थें च्वंगु हार्दिक निबन्ध नं थौ नेपालभाषाय् पिदने धुंकूगु दु । अथे हे निबन्ध छगू विशुद्ध गद्य रचना खयाः नं थौया गुलि गुलि निबन्धकारतयसं बिम्ब प्रतिक छयलाः काव्यात्मक भाषां नं निबन्ध च्वयेगु याःगु दु । निबन्धया प्रस्तुतिइ नं गुलि निबन्धकारतयसं हास्यव्यंग परम्परायात नालेगु याःगु दु सा गुलि गुलिस्थां व्यंगयात जक छयलेगु याःगु दु । अथे हे गुलिस्थां नाटकीय परम्परा, गुलिस्थां वर्णात्मक परम्परायात प्रयोग याःगु दु । थुकथं गुगु लैपु ज्वनाः थःगु खँ ध्वाथुइक कनेफइ, हिसि दयेक धायेफइ धयागु खँ थौया निबन्धकारतयगु ध्यान केन्द्रित जूगु खनेदु । छता खँ भीगु नितिं लसता धा वा विशेषता धा नेपालभाषाया अप्वः थें निबन्ध नेवाः जाति, भाषा, संस्कृति धर्म सम्बन्धी जूगु दुसा थज्याःगु विषय मखुगु निबन्ध नं स्वजातिय पह चहलं मुक्त जूगु मदु । तर भीसं शुरु निसें

थौतकया निबन्धय मिखा ब्वयाः स्वयेबलय् थ्व सन्दर्भय निगू प्रकारयापि निबन्धकारत खंकेफु - छथः - भीगु पुलांगु धर्म संस्कृतिया महिमा गरिमायात जिउथाय् तक ब्वयेत सनीपिं, मेखलः- पुलांगु धर्म संस्कृति प्रति अनास्था, अविश्वास क्येनगु जक मखु थौया विकृति, विसंगति, विडम्बनाया नं भण्डाफोर यानाः न्हूगु संस्कार न्हूगु समाजया निर्माणया नितिं सः थ्वयेका च्वंपिं, परिवर्तनया चाहना यानाच्वंपिं । थुकथं चित्तधर 'हृदय', सत्यमोहन प्रवृत्तिया निबन्धकारतयसं भीगु धर्म संस्कृतिया महिमा गरिमायात ब्वयेगु यानाच्वंगु दुसा पूर्णबहादुर, बालगोपाल प्रवृत्तिया न्हू पुस्ताया निबन्धकारतयसं भीगु धर्म संस्कृतियात हे प्रगतिया लैपु पंगः तयेकाः न्हूगु संस्कार न्हूगु मूल्य मान्यताया नितिं सः थ्वयेकाच्वंगु दु । थुकथं ईया परिवर्तनं हःगु वैचारिक हिउपाःया छपाः कपा नेपालभाषाया निबन्ध नं जुयाबिउगु दु ।



## आधुनिककालया नाटक

**पृष्ठभूमि :-** काव्य साहित्यय् दृश्यकाव्य कथं नालातःगु नाटक विधा सम्बन्धी थौ जक मखु 'नाटक' शब्दया अर्थ, थुकिया उत्पत्तियात कयाः थीथी इलय् थीथी कथं व्याख्या यायेगु परिभाषा बिइगु कुतः याःसां छुं नं परिभाषा सर्वमान्य रुपं स्थापित जूगु मदु । तर अथे खयाः नं थौया नाटकया स्वरुप संरचनायात दृष्टिगत यानाः थुकियात आख्यात्मक कथ्यया अनुकार्य मूलक संवादात्मक संरचनाया रुपय् थुइकेगु अप्वः उपयुक्त जुइ । च्वमि, ब्वमि, रंगकर्मी स्वखलकं सम्बद्ध जुइगुलिं त्रिआयामिक स्वरुप हे नाटकया छगू विशेषता जूगु दु । नाटक आख्यात्मक रचना जूगुलिं थुकिइ बाखंचु थें पात्र चित्रण, वातावरण आदिया प्रयोग दइ । नाटकया कथ्य अनुकार्यात्मक जुइ । थुकिया संरचना संवादया माध्यमं जुइ । संवाद पद्यात्मक नं जुइफु गद्यात्मक नं जुइफु । तर थौ गद्यात्मक सम्वाद हे थाय् कयाहःगु दु, अले संघर्ष नाटकया प्राण थें जूगु दु । थौ प्रशारणया छगू सवल माध्यम नाटक जूगु दु ।

नाटकय् नं 'छधाः प्याखं', 'पूधाः प्याखं' धकाः अलग्ग हे विधा कथं प्रतिस्थापित जूगु दु । रुप विधानया दृष्टिं थ्व निगुलिं ज्वलानाः नं संरचनाया दृष्टिं छगू नाप मेगु पाः । छगू धाः दुगु नाटक छधाः प्याखं, छगू स्वयाः अप्वः विभिन्न धाः, विभिन्न दृश्य दुगु नाटक पूधाःप्याखं धकाः बाह्य संरचनाया दृष्टिं ब्वथले छिंसा, पूधाः प्याखंयात जीवनया यक्व पक्षया विवेचना दुगु अले 'छधाः प्याखं'यात जनजीवनया छगू पक्षयात जक थियातःगु धकाः थ्वया आन्तरिक संरचना कथं ब्वथले छिं । थुकथं छधाः प्याखं पूधाः प्याखंया कचा मखु, निगुलिं अलग्ग हे अस्तित्व दुगु साहित्यिक विधा खः ।

विश्व साहित्यया इतिहासय् थीथी विधा मध्ये दकले पुलांगु विधा कविता व नाटक जूगु दु । फुक्क साहित्यय् धया थें नाटकया विकास धार्मिक नृत्य व संगीतं जूगु खनेदु । पूर्वीय जगतय् - भारतवर्ष, चीनय् प्राचीनकालय् स्वतन्त्र रुपं नाटकया उदय, विकास व प्रचार जूगु खनेदु । चिनिया साहित्यय् दकले पुलांगु प्रकार मध्ये छगू नाटक खः । संस्कृत साहित्यय् थौ स्वयाः नीछसः दँ न्ह्यः भारतया उत्तर क्षेत्रय् जन्म जूम्ह भरतमुनियात न्हापांम्ह नाट्याचार्यया रुपय्

कायेगु चलन दु । थ्वय्कःया नाट्यशास्त्र आपालं पूर्वीय नाटककारतय्गु नितिं नाट्यसूत्र जूगु दु । अथे हे भरतमुनि धुंकाः मेपिं नं आपालं संस्कृत विद्वानतय्सं नाटक सम्बन्धी अनेक सिद्धान्त प्रतिपादन यानावन । आतक सिउगुलिइ संस्कृत साहित्यय् नाटक सम्बन्धी दकले न्हापां चर्चा यानातःगु सफू नाट्यशास्त्र हे खः । थुकिं संस्कृत साहित्यय् नाटक नीछसः दँ स्वयां नं न्ह्यः हे दये धुंकल धैगु सिइदु । आतक लुयावःगुलिइ न्हापांगु संस्कृत भाषां आचार्य भासं च्वयाथकूगु स्वप्नवासवदत्ता नाटक नं भिंगुसः दँ न्ह्यःयागु खः । संस्कृत साहित्यय् नाटकयात काव्येषु नाटकं रम्यम् धकाः नाटकयात मनोरञ्जन बिइगु विधाया रुपय् थुइकेगु याःगु खनेदु । अथे हे 'अनुकार्य' हे नाटकया मूलभूत प्रवृत्ति नालाः नाटकयात रुपकया भिंगू भेद मध्ये छगू भेद कथं दुध्याकातःगु दु । नापं नाटक थथे जुइमाः धकाः संस्कृत साहित्यय् नाटकया लक्षण विषयय् छगू सर्वमान्य शास्त्रीय नियम हे दये धुंकूगु दु । ग्रीक साहित्यय् थें संस्कृत साहित्यय् नाटकयात 'त्रासदी' 'कमेडी' धकाः अलग्ग अलग्ग साहित्यिक विधा कथं नालेगु चलन मदु । बरु 'एकांकी' 'पूर्णांकी'यात अलग्ग अलग्ग साहित्यिक विधा कथं नालेगु व नाटक क्वचाइगु ल्याखं 'दुखान्त' 'सुखान्त' धकाः ब्वथलेगु चलन दु । संस्कृत नाटक परम्परा कथं नाटक दुखान्त जुइ मजिउ सुखान्त अर्थात संयोगान्त जुइमाः तर अथे खयां नं दथुइ दथुइ करुणादि भावया अभिव्यक्ति दुगु जुइमाः । नाटक श्रृंगार वा वीर रस प्रधान जुइमाः । मू पात्र धीर, वीर पराक्रमि, उदात्त भावयाम्ह, छुं हे चरित्र मू पात्र जुइमाः । पात्रया स्तर स्वयाः भाषा छ्यलेमाः, न्यागू निसं भिंगू स्वयाः अप्वः अंक दयेमजिउ, ततःहाकःगु घटना छगू हे सर्गय् दये मजिउ धयागु धारणा दु ।

पाश्चात्य जगतय् नाटक साहित्यया उदय न्हापां ग्रीसय् जूगु खनेदु । डायनोसस् द्यःया उत्सव पाखें शुरु जूगु ग्रीसेली 'त्रासदी' यात क्रमशः विकास यायेगु ज्या - 'एस्किलस', 'सफोकिलज', 'युरिपिडिज' आदिपिसं यात । लिपा एरिष्टोटलं थुपिं नाटककारतय्गु नाटकया आधारय् थःगु 'पोइटिक्स' सफलइ नाट्य सिद्धान्त सम्बन्धी विवेचना यात । 'पोइटिक्स' सफू मेमेपिं नाटककार व समालोचकतय्गु नितिं छगू सर्वमान्य शास्त्रीय नियम थें जूवन । उगु इलय् ग्रीसय् 'त्रासदी' व 'कमेडी' निगू कथंया नाटक दुगु जुयाचवन । एरिष्टोटलं त्रासदीयात उत्कृष्ट साहित्य नालाः नाटक सम्बन्धी लक्षण ब्वयेगु ज्या थ्व हे त्रासदीया आधारय् यानादीगु खः । ग्रीक साहित्यय् नाटक जीवनलिसे तसकं हे सतीगु विधा जूगु दु । थ्व हे कथं एरिष्टोटलं नाटकयात जीवनया अनुकरण कथं परिभाषित यात । ग्रीसय् नाटकया विकास गुलित जुल व फुक्क एरिस्टोटलया ईया दुने हे जुल । अनं निसः दँ ति लिपा ग्रीसय् थें तुं रोमय् नं धर्मनाप सम्बन्धित जुयाः नाटकया विकास जुल । ग्रीसया नाटक रोमय् न्हयाना वंसां नाटकय् छुं छुं हिउपाः नं खनेदत । सेनेका, प्लाटस, टेरेन्सपि थें ज्याःपिं रोमन नाटककारतय्सं ग्रीसेली नाटकया अनुसरण यानाः नं थःपिनिगु छुं तनेगु यात । न्हापा ग्रीसेली त्रासदीइ भयानक दृश्य मक्यनेगु यानातःथाय् अति भयानक दृश्य



तक त्रासदिइ क्यनेगु ज्या सेनेका पाखें न्हापां जुलसा प्लाटस व टेरेन्सपि थें ज्याःपि कमेडीया लेखकतय्सं साधारण मनूया जीवनया यथार्थ घटनायात कयाः, नाटकयात जीवननाप अभ् अण्वः सतिकेगु यानाहल । रोम साम्राज्यया पतन लिपा रोमय् नं नाटकया विकास थप्प दित । स्वसः प्यसः दैं लिपा पादरीतय्सं ब्राइबलया आधारय् ल्याटिन भाषां नैतिक शिक्षामूलक प्याखं दयेकाः थाय् थासय् प्याखं क्यनेगु नं यात । तर लिपा ईस्वी १३२६य् इटलिं शुरु जूगु रेनसां न्ह्याकूगु सांस्कृतिक पुनरुत्थानया सकारात्मक प्रभाव नाटकय् नं लात । बिलायतय् एलिजाबेथया इलय् विश्वया नाटक साहित्यय् प्रभाव बिइफुपिं शेक्सपियर व मार्लो थेंज्याःपि नाटककारत पिदन । 'नाटक' धयागु हे नायकयात छुं जूगु वा नायकं छुं याःगु ज्याया वाखं जूवन । अले नायक न्ह्याथे हे धीर वीरम्ह जूसां छगू वयागु चिधंगु कमजोरि नायकया पतन जूगु क्यनाः दर्शकतय्गु मनय् त्रास व करुणा थनाः आनन्द बिइगु 'त्रासदी' नाटकया मू कुतः जूवन । ऐतिहासिक प्रसिद्ध, उच्च कुलयापि मनूत हे जक नाटकया थीथी पात्र जूवन । नाटकया कथावस्तु च्वमिं थम्हं सृजना यायेगु मखु, ऐतिहासिक, पौराणिक वाखं पाखें हे कयाः थःगु नं कल्पना तनाः ज्यायेगु जुल । शेक्सपियरया नाटकं विश्वया नाटक जगतय् थुलि प्रभाव लाकल कि शेक्सपियर छम्ह स्वच्छन्दवादी लेखक खयां नं मेमेपि नाटककारतय्गु निंतिं क्लासिक जूवन ।

भिर्गुगु शदीया अन्तपाखें नाटक साहित्यया विकासय् छगू तःधंगु हिउपाः वल । नाटकया विषयवस्तु निसें प्रस्तुतिकरणया माध्यम, धारणा फुक्क फुक्क, परम्परागत नाटक नाप पाक्क नाटक च्वयेगु ज्या नर्वेया 'हेनरीक जोन इब्सन' (ई.सं. १८२८-१९००)पाखें जुल । इब्सनया नाटकया प्रभाव नर्वेय् जक लिक्नुना मच्चंसे विश्वव्यापि जूवन । नाटकय् घटनाया पलेसा समस्यां थाय् काल, साधारण मनू हे नाटकया मू पात्र जुल । अमिगु समस्या हे नाटकया मू विषय जुल । प्याखनय् वाह्य संघर्षया पलेसा निगू विचारधाराया संघर्ष क्यनेगु यानाहल । दबुलिइ घटनाया पलेसा समस्याया विषयय् छलफल यायेगु जुल । पुलांगु बन्धन संस्कारया उपेक्षा यायेगु यानाहल । अले प्याखंया पात्र छम्ह साधारण मनू जुयां नं छगू वर्ग वा समाजया प्रतिनिधित्व याइम्ह जुयावल । 'इब्सन' न्ह्याकूगु थज्याःगु 'आधुनिक नाटकया' प्रवाहयात अभ् व्यापक यायेगु अभ् परिस्कृत यायेगु ज्या बिलायतया जर्ज वनार्ड शा पाखें जुल । इब्सनया नाटकया सिद्धान्तयात प्रचार यायेत Quintessence of Ibsenism धकाः सफू समेत प्रकाशित यात । अथे हे विलियम आर्थर, व एडमण्ड गसडिस पिंसं नं इब्सनवादी नाटकया प्रचारय् आपालं तिबः बिल । थथे समस्या न्हयव्वयेगु हे आधुनिक नाटकया मू ज्या जूबलय् थौया मनूयात जुयाच्चंगु न्ह्यागु नं समस्या व्वयेगु निंतिं नाटक छगू प्रभावकारी साधन जूवन । फलतः नाटकया माध्यमं मिसा समस्या, वर्ग संघर्ष, मनोवैज्ञानिक समस्या, आर्थिक समस्या, भाषिक समस्या आदि व्वयेगु जूवन, नाटक मनोरञ्जनया विषय जक मजुसे बौद्धिक चिन्तन, सामाजिक चेतना प्रसार यायेगु साधन नं जूवन ।

नेपालभाषा साहित्यया इतिहास/३२५

## नेपालभाषाय् नाटक

प्राचीन नेपालभाषा साहित्यय् नाटक छगू तःमिगु विधा जुयां नं पाश्चात्य पहयागु नाटकया शुरु आपालं हे लिपा तिनि जुल । पाश्चात्य साहित्यय् आधुनिक नाटक धकाः इब्सन प्रवृत्तिया नाटकयात थुइकेगु जूसां नेपालभाषा साहित्यय् मल्लकालीन परम्पराया नाटकयात प्राचीन नाटक अले पाश्चात्य पहयागु (शेक्सपियरिन् तथा इब्सनवादी) नाटकयात आधुनिक नाटक कथं थुइकेगु चलन दु । अथे हे थौं छधाः प्याखं, पृधाः प्याखं, छ्यालः आदिं अलग्ग हे साहित्यिक विधाया मान्यता प्राप्त यायेधुंकूसां थुमिगु त्रिआयामिक स्वरूप, सम्वादात्मक संरचना प्रवृत्तिं यानाः नेपालभाषा साहित्यय् थुपिं स्वतांयात नं नाटक हे धायेगु चलन नं कायम हे जुयाच्चंगु दु ।

नेपालभाषा साहित्यय् प्राचीनकालया अन्त लिपा, नाटक च्वयेगु परम्पराय् नं सीदयेक त्रास वल । शास्त्रीय नाटकया थासय् बिस्तारं लोक नाटकं थाय् कयाहल । लाय्कू खलकं नाटक च्वयाः हुइकेगु पलेसा जनसाधारण नाटक दयेकाः क्यनेगुलिइ तिब्रता वल । थुकथं परम्परागत शास्त्रीय नाटकया थासय् ज्यापु नाटकं दबुलिइ थाय् कयाहल । ज्यापु नाटकं साधारण ज्यापुतय्सं दयेकीगु जुइगुलिं थ्व परम्परागत नाटक थें क्लिष्ट मजु नापं समसामयिक घटना तथा समस्या नं व्वयेगु याइगुलिं थ्व आपालं लोकं नं हवात । ई न्ह्याःलिसे थज्याःगु ज्यापु नाटक पूर्वक हुइकेगु मयासे थ्वया छगू कचा 'घिन्तामुनि' नाटकजक हुइकेगु यात । श्रृंगारिक भावं जाःगु घिन्तामुनि नाटक नं तत्कालीन समाजय् न्याक्क हे लोकं हवात । लिपा वनाः थ्व छगू लोकप्याखं कथं प्रतिस्थापित जुल । घिन्तामुनि नाटक थें हे ज्यापु नाटकया मेगु छगू कचा 'चैन सिपाई' प्याखं खः । भेषभूषा व अभिनय पाखें दर्शकतय् आकर्षित याइगु थज्याःगु 'चैन सिपाई' नाटक नं तत्कालीन जनमानसया हृदयलय् गाक्कं थाय् काल । तर दुःखया खँ, थज्याःगु नाटकयात लिखित रुपय् तयेगु धाःसा ज्या मजुल । तर अथे खःसां ज्यापु नाटकयात नेपालभाषाया नाटकया इतिहासय् प्राचीन नाटक व लिपा पिदंगु आधुनिक नाटकया स्वापू मधासैं मगाः । थुखे येन्थाः पुन्हि, गुणुन्हिया लसताय् दबुलिइ नाटक क्यनेगु सांस्कृतिक परम्परा नं न्ह्याना हे च्वंसां लिखित रुपय् तयेगु चलन मदुगु कारणं याना थज्याःगु नाटक नं सुरक्षित जुयामच्चन ।

पुनर्जागरणकालया च्वमितय्सं नं मेमेगु विधाय् योगदान बियावं थें नाटक विधाय् बियावंगु खनेमदु । निम्ह स्वम्ह च्वमितय्सं नाटक च्वयेगु कुतः नं याःगु खः, तर अथेसां योगवीर सिंह छम्हसिगु बाहेक मेमेपिनिगु नाटक प्रकाशनय् वःगु खनेमदु । थथे थुगु इलय् च्वःगु नाटक योगवीरसिंहया - शकुन्तला (ने.सं. १०४८ पाखे च्वःगु, ने.सं. १११४ स प्रकाशनय् वःगु), सिद्धिरत्न कसाःया म्ये हना नाटक

नेपालभाषा साहित्यया इतिहास/२२६



- विश्वन्तर (ने.सं. १०५९ पाखे च्वःगु ) आदि खः । नेपालभाषाय् आधुनिक नाटकया जन्म धाःसा ने.सं. १०६८ वयाः तिन जुल । चित्तधर 'हृदय' जुया 'ह्वनागा' सफलइ च्वंगु शाक्यानी (ने.सं. १०६८) नाटकन निसं नेपालभाषाय् पाश्चात्य प्रवृत्ति कथंया नाटकया नी जुल । शास्त्रीय संगीतया पलेसा पात्रतय्गु क्रियाकलाप मनुतय्गु हृदयल्य् थीगु, अलौकिक तथा मानेवेत्तर पात्रतय्गु थासय् ला हियापि पात्रत सृजना यायेगु, घटनाया पलिसा संघर्षयात थाय् बीगु परम्परा नेपालभाषाया नाटकय् नं दुथ्यात । सिद्धार्थ गौतमं थें नन्द राजकुमारं नं गृह त्याग यानावनी धकाः ग्याःम्ह शाक्यानिं नन्द राजकुमारयात फयांफतले सिद्धार्थयाथाय् मछ्वयेत सनिइगु व आखिर नन्द राजकुमार सिद्धार्थयाथाय् वनाः भिक्षुत्व ग्रहण याइगु हे थ्व शाक्यानी नाटकया मू कथावस्तु खः । खयेत ला विषयवस्तुया दृष्टिकोण थ्व 'शाक्यानी' नाटकायात नं मुक्कं न्हूगु धाये मल्वः । तर थुकिया प्रस्तुति प्रयोजन न्हापा नेपालभाषाया परम्परागत शास्त्रीय नाटक स्वयाः आपालं पाःगुलिं शाक्यानी छ्धाः नाटक पाश्चात्य प्रवृत्ति कथंया नेपालभाषाय् दकले न्हापांगु नाटक जुयाविल ।

चित्तधर 'हृदय' जुया 'शाक्यानी' छ्धाः प्याखं निसं प्रारम्भ जूगु नेपालभाषाया पाश्चात्य परम्पराया नाटक साहित्य बल्लकेंगुलिइ तत्कालीन 'धर्मोदय' पत्रिकाया नं तःधंगु ल्हाः दु । धर्मोदय (ने.सं. १०६९)य् बौद्ध जातक अवदानया लिधंसाय् च्यायातःगु 'विश्वन्तर विदा' नांगु चित्तधर 'हृदय'या मेगु छ्धाः प्याखं पिदसेलि मेमेपिं च्वमितय्गु बौद्ध विषयया छ्धाः प्याखं नं धमाधम पिदन । गथे - स्वयम्भूलाल श्रेष्ठया - 'हृदय परिवर्तन', श्रामेणर सुदर्शनया - 'अज्ञात शत्रु' हेमलाल जोशीया - 'मगधराज विम्बिसार' आदि । २००७ सालया राजनैतिक परिवर्तनं नेपालभाषाया नाटकच्वमितयूत नं न्हू न्हूगु विषययात थियाः नाटक च्वयेगु जागरण उत्साह हयाविल, बंगाली, हिन्दी साहित्यय् पिदंगु नाटकं नं तत्कालीन नाटक च्वमितयूत प्रभावित यानाविल । थ्व हे कथं नेपाःया इतिहासय् आधारित हेमलाल जोशीया - 'म्वाःछो पिदनसा सामाजिक राजनैतिक नाटकया भवलय् हृदयचन्द्र सिंहया 'सितिलाः माष्टर' ईश्वरानन्दया - 'मिसा' आदि नाटक नं धर्मोदय पत्रिकाय् हे पिदन । थुकथं छ्धाः प्याखंया भवलय् 'शेक्सपीयर' तथा 'इब्सन' पह वःगु थीथी नाटक नं खनेदत । अथे हे सफूया रुपय् सत्यमोहन जोशीयागु गौतम बुद्ध (ने.सं. १०७०) छ्धाः प्याखं पिदन । न्यादें लिपा भिक्षु सुदर्शनया अम्बपाली (ने.सं. १०७५) पूधाः प्याखं पिदन । थुकथं 'अम्बपाली' नेपालभाषाया दकले न्हापांगु पाश्चात्य प्रवृत्ति कथंयागु पूधाः प्याखं खः । बुद्धकालीन बैशालीया राजनर्तकी 'अम्बपाली'या मातृभूमि प्रतिया त्याग बलिदानयात कयाः च्यायातःगु थ्व नाटकय् वाह्य संघर्ष नापं भावनात्मक संघर्ष नितांयात दुथ्याका तःगु दु ।

थुकथं चित्तधर 'हृदय'जुं नेपालभाषाय् न्हापां पाश्चात्य परम्परा कथंया नाटक प्रारम्भ यानादीगु खःसा थुकियात छगू प्रवाह कथं न्ह्याका विकास यायेगुलिइ तिवः बियादीम्ह नाटककार भिक्षु सुदर्शन जूगु दु । 'अम्बपाली' पूधाः

प्याखंया प्रकाशन लिपा नेपालभाषाय् ऐतिहासिक व्यक्तित्वतय्गु जीवनीयात कयाः नाटक च्वयेगु ज्या छगू प्रवाह कथं हे न्ह्यात । थ्व क्षेत्रय् थ्यकः भ्नाःम्ह मेम्ह नाटककार हेमलाल जोशी खः । वय्कःया 'खड्ग सिद्धि' (ने.सं. १०७६) छ्धाः प्याखं संग्रहं मल्लकालीन ऐतिहासिक व्यक्तित्वतय्गु जीवनया घटनायात छ्धाः प्याखंया रुप विलसा 'सदाशिव' (ने.सं. १०८५) प्याखनं पूधाः प्याखंया रुप विल । सुदर्शनया नं 'अम्बपाली' वाहेक मेमेगु ऐतिहासिक प्याखं 'राष्ट्रपाल' (ने.सं. १०७८) विम्बिसार (ने.सं. १०८२) आदि पिदन । थ्व हे भवलय् सत्यमोहन जोशीं 'सिद्धिदास' नाटक च्वयाः नेपालभाषा साहित्यय् ख्यलय् नां जाःपिं व्यक्तित्वतय्गु विषयय् नाटक च्वयेगु परम्परा न्ह्याकादिल ।

थथे ऐतिहासिक व्यक्तित्वतय्गु विषययात कयाः नाटक च्वयेगु प्रवृत्ति न्ह्यानां च्वंगु इलय् ईश्वरानन्दया - 'पसूका' (ने.सं. १०७७) छ्धाः प्याखं संग्रह, 'थःगु छें' (ने.सं. १०७८) पूधाः प्याखं पिदन । थुकिं नेपालभाषाया नाटकया ख्यलय् छगू तःधंगु हिउपाः हल । नेपालभाषाय् नं इब्सन परम्पराया समस्यामूलक नाटक दुहांवल । नाटकय् 'घटना' मखु 'समस्या' थाय् काल । मिसा समस्यायात वालाः नाटक च्वयेगु प्रवृत्ति ब्वलन । थथे ईश्वरानन्दं शुरु यानादीगु इब्सनवादी नाटक परम्परा ईश्वरानन्दया नाटकय् जक लिकुना मच्चंसे नेपालभाषाया नाटकय् छगू प्रवाह कथं हे न्ह्यात । फलतः 'समस्या'यात प्राधान्यता बियाः नाटक च्वयेगु परम्परा नेपालभाषाय् नं न्ह्यात । ईश्वरानन्दयां लिपा खनेदयेकःवःम्ह मेम्ह नाटककार बासु शशि 'ताःचाप्याय्' (ने.सं. ११०४) नाटक च्वयाः छगू परिवारया समस्या न्हयब्वयाः नं समाजया हे समस्या कथं क्यनाविल । छगू हे नाटकं समाजया थीथी कथंया मनुतय्गु समस्या गथे - भौमचाया समस्या, माजुया समस्या, काय्मचाया समस्या, म्हाय्मचाया समस्या, छम्ह जागिरदारया समस्या आदि न्हयब्वयाविल । अले थुमिगु समस्यायात सामाजिक, मनोवैज्ञानिक व आर्थिक दृष्टिं वालेमाःगु क्यनाविल । नाटकय् नं मनोविश्लेषण थाय् काल । थुकथं समस्या प्रधान नाटकय् नं मिसा समस्याय् जक केन्द्रित मजुसे समाजया मेमेगु समस्यायात कयाः नं च्वयेगु प्रवृत्तिया विकास जुल ।

अथे हे छगू जाति, छगू वर्गया समस्यायात ज्वनाः जक नाटक च्वयेगु प्रवृत्तियात हाचां गायाः देय्या विविध ख्यलय् पिज्वयाच्चंगु विकृति विसंगतियात कयाः नाटक च्वयेगु प्रवृत्ति नं नेपालभाषाया नाटकय् खनेदत, अले थज्याःगु विकृति विसंगतियात तप्यंक ब्वयेगु मयासे हास्य व्यंग्यया रुपय् प्रस्तुत यायेगु प्रवृत्ति नं नेपालभाषाया नाटकय् ब्वलन । खयेत ला थथे समसामयिक विडम्बना, विरोधाभास, कमजोरी विकृति आदियात ध्याचू नकातःगु नाटक न्हापा नं खने मदुगु मखु, तर छगू प्रवाहया रुपय् न्ह्याःगु मदु । थौया समस्यामूलक नाटकय् थज्याःगु हास्यव्यंग्य प्रवृत्तियात छगू प्रवाहया रुपय् न्हयज्याकेगु ज्या पद्मरत्न तुलाधर, श्री कृष्ण अणु, रामशेखरपिसं न्हापां यानादिल । श्री कृष्ण 'अणु'या 'खःला मखुला' (ने.सं. १०९७), पद्मरत्न तुलाधरया 'आः जितः नं तन तन दइवल' । (ने.सं. १०९७), 'छ्याः बछि नी बछि' (ने.सं. ११०४), रामशेखरया



‘धिन्ताल्ल’ (ने.सं. १०९६) आदि थें ज्याःगु ख्यालकं नेपालभाषाया नाटकय् न्हूगु आयाम तनाविल ।

नेपालभाषाया नाटक ख्यलय् दुर्गालालया आगमनं नं छगू न्हूगु मोडया अनुभव याकेबिल । थ्वय्कःया आगमनं नेपाली जनजीवनया करुण क्रन्दन जक नाटकय् थ्वयेकेगु मखु, अन्त्याः, अत्याः शोषण आदिया समाधानया मू लँपु ‘संघर्ष’ खः धकाः ‘वर्गीय संघर्षप्रति’ आस्था दयायेकीगु प्रगतिवादी नाटकया नं नी जुल । न्हापा समस्यामूलक नाटक च्याच्वपि ईश्वरानन्द, बाशु शशी थें ज्याःपिनिगु नाटकय् नं प्रगतिवादीया सः प्रतिध्वनित जुल । थ्व सःयात नाटकय् अभ्र मजबूत यायेगु, तिख्खर जुइकेगु ज्याय् गिरिजाप्रसाद जोशी, दिनेश भुजु, राजभाइ जकःमिपिं अग्रसर जुयादिल । दिनेश भुजुया वर्गीय चेतनाया परोक्ष अभिव्यक्ति तथा वैचारिक आन्दोलनं कस्सिक घयपुनाच्वंगु ‘बायावंगु लँपु’ छधाः प्याखं पुचलं नेपालभाषाया नाटकया स्तरयात अभ्र छतँ थकया बिल ।

अथे हे प्यपु खुपु हे नाटक च्याः नं नेपालभाषाया नाटक क्षेत्रयात छगू न्हूगु मोड बिइगुलिइ विजयबहादुर मल्लं नं महत्वपूर्ण योगदान वियादीगु दु । प्रचारवादया गन्धं मुक्त यानाः नं सुधारया सन्देश, युग चेतनाया जः नाटकया माध्यमं ह्वले जिउ धयागु खँ थ्वय्कलं क्यनादीगु दु । पुरातन व आधुनिक निगू विचाःया संघर्ष न्ह्यब्वयाः स्वाभाविक धगं, प्रभावकारी रुपं युग चेतनाया जः ह्वलातःगु थ्वय्कःया समसामयिक विषययात कयाः च्यातःगु जीवनवादी, यथार्थवादी नाटकं नेपालभाषाया नाटकयात विषयगत रुपं जक मखु शिल्पगत रुपं नं च्वन्हाका बिउगु दु । नाटककारया विशिष्टता वं छु खँ प्वकल धैगुलिइ जक मखु, वं थःगु खँ गुलिसित पुंक्ल धैगुलिइ नं लाइ धकाः थ्वय्कःया नाटकं क्यनाबिउगु दु । नेपालभाषाया नाटकयात नं मेमेगु भाषाया नाटकया प्रतिस्पर्धाय् वनेफयेका बिउगु दु ।

थथे उत्कृष्ट नाटककारतय्त नेपालभाषाया नाटक ख्यलय् दुत हयेगु व न्हून्हूपिं नाटककारतय्त थ्व ख्यलय् आकर्षित यायेगु ज्याय् इलय् ब्यलय् विभिन्न संघ संस्थापाखें जूगु नाटक धेंधेबल्लाः कासा, नाटक महोत्सव आदिया नं तःधंगु भूमिका दु । ने.सं. १०८२ लिपाया त्वाः त्वाःया साहित्यिक सांस्कृतिक आन्दोलनया लिच्वः कथं स्पष्ट रुपं न्ह्यःने वःगु विधा ख्यालः व छधाः प्याखं नं खः । थ्व भवलय् ‘मुनासः’ यात ल्वःमंके फइमखु । पद्मरत्न, श्री कृष्ण अणु, रामशेखर थेंज्याःपिं नाटककारतय्त जक थ्व क्षेत्रय् सालाहःगु मजुसे मेपिं नं यक्व हे स्येस्येल्लाःपिं न्हून्हूपिं लेखकतय्त थ्व विधाय् दुतहयेगु ज्या ‘मुनासः’ पाखें जूगु दु । अथे हे ‘सहलह’ संस्थां नं नेपाल राजकीय प्रज्ञा प्रतिष्ठानया दबुलिइ ‘किसि न्याइम्ह मदनमान’, ‘कुलां चकनी तिनि’, ‘किपालुं लिनाच्वम्ह मनु’ आदि थें ज्याःगु नाटक मन्चन यानाः नेपालभाषाया नाटक विधा थकायेगुलिइ तिबः बिउगु दु । थ्व हे भवलय् पब्लिक युथ क्याम्पसया ‘सँझ्याःसाहित्य पाःलाः’ नं न्ह्यःकः तक विभिन्न क्याम्पसया दथुइ ‘छधाः प्याखंया धेंधेबल्लाः कासा’या आयोजना यानाः आपालं नाटककार तथा नाटक पिकायेगु जक मयासे, थ्व कासाय् मञ्चन जूगु उत्कृष्ट

नाटकतय्गु संकलन हे पिकयाः नेपालभाषाया नाटक विधायत तःमि यायेगुलिइ तिबः बिउगु दु । न्हापा भिक्षु सुदर्शनया सम्पादनय् ‘दबू’ छगू जक प्रतिनिधि नाटककारतय्गु नाटकया संग्रह कथं दयाच्वंगुलिइ ‘सँझ्याः’ (छधाः प्याखं मुना, प्र. १११६) छगू नं सँझ्याः साहित्य पाःलाःया विद्यार्थीतय्गु कुतलं तनेगु जुल । थौं नेपालभाषाया नाटक, दबुलिइ हुइकेगु ज्याय् जक सीमित मजुसे टेलिफिल्म फिल्मया रुपय् नं प्रदर्शन जुइधुंकूगु दु । ‘सिलु’, ‘राजमति’, ‘तं बैक’ ‘पलाख्वाय्’, ‘१२ बजे’, ‘भोक्कमनिम्ह’, ‘न्हिसुतु’ आदि थुकिया दसु खः । अथे हे विभिन्न साहित्यिक पत्रिकां नं न्हूपिं पुलांपिं नाटककारतय्गु नाटक पिकयाः जक मखु गब्लें गब्लें नाटकया विशेषांक हे पिकयाः थ्व ख्यःयात समृद्ध यायेगुली तिबः बिउगु दु । थ्व सन्दर्भय् ‘सितु’ पत्रिकाया छधाः प्याखं विशेषांक उल्लेख यायेबह जू । अथे हे नाटक विधाया विकासया नितिं विभिन्न साहित्यिक संस्था तथा श्रेष्ठ सिरपाःया देन नं च्वछाये बह जू । श्रेष्ठ सिरपाः गुथिं नेपालभाषाया उत्कृष्ट नाटकया सफूयात ‘श्रेष्ठ सिरपाः’ देछायाः समान बिइगु यातसा, च्वसापासा, नेपालभाषा परिषद, रुवि नेपालभाषा गुथि आदि थें ज्याःगु साहित्यिक संस्था पाखें नाटकया सफू प्रकाशनय् हयाः थ्व विधाया धुकू जायेकेगुलिइ तिबः बिउगु दु । थौं नेपालभाषाया आधुनिक नाटक विधाय् खनेदुपिं प्रमुख नाटककात थुकथं दु ।

## प्रमुख नाटककार

चित्तधर ‘हृदय’ (ने.सं. १०२६-११०२)

- फुटकर

नेपालभाषा व थ्वया साहित्यया उत्थानया नितिं तन मन धन वियादीम्ह चित्तधर ‘हृदय’या साहित्यिक विशिष्टता प्याखं ख्यः मखुसां नं नेपालभाषाया मल्लकालीन नाटक परम्परायात हाचां गायाः, पाश्चात्य परम्परा कथंया नाटक नेपालभाषाय् न्हापां नी यानादीम्ह प्याखंच्वमि जूगुलिं थ्व क्षेत्रय् नं ‘हृदय’ जुया थाय् उलि हे महत्वपूर्ण जू । खयेत ला चित्तधर ‘हृदय’ जुं ने.सं. १०६६ स हे ‘विश्वन्तर’ थें ज्याःगु प्याखं च्यादी धुंकूगु खः, तर प्रकाशनया ल्याखं ने.सं. १०६८ स पिदंगु ‘ह्वनागा’ सफुलिइ च्वंगु ‘शाक्यानि’ छधाः प्याखं हे ‘हृदय’जुया जक मखु नेपालभाषाया हे न्हापांगु छधाः प्याखं जूगु दु । थनं निसें नेपालभाषाय् शास्त्रीय परम्पराया नाटकया थासय् पाश्चात्य शैलीया नाटक थाय् काल । शाक्यानी बाहेक थ्वय्कलं धर्मोदय पत्रिकाय् बौद्ध बाखनय् आधारित ‘गौतम बुद्ध’ आदि मेमेगु नं छधाः प्याखं च्यादीगु दु । तर थ्वय्कःया पृधाः प्याखं धाःसा पिदंगु खनेमदु । विषयवस्तुया ल्याखं ‘हृदय’ जुं बौद्ध बाखनय् आधारित कथावस्तु हे कयादीगु दु सां नाटकय् पात्र चित्रण, खँल्हाबल्हा, द्वन्द्व संघर्ष आदियात थौया



नाटक कथं हे प्रस्तुत यानादीगु दु । अले नाटकया माध्यमं सन्देश न्ह्यब्वयेगु ज्याय् न थौया परिवेशयात हे ल्वयेक थःगु खँ प्वंकादीगु दु ।

**हृदयचन्द्रसिंह प्रधान (ने.सं. १०३६-१०८०)**

- फुटकर

नेपालभाषाया न्हापां न्हापापिं छ्धाः प्याखं च्वमित मध्ये हृदयचन्द्रसिंह प्रधान नं छम्ह खः । थ्वय्कःया नेपाली भाषाय् नाटकया सफू पिदंगु दु सां नेपालभाषाय् पिदंगु खनेमदु । प्रधानजुया 'दबू' सफुलिइ पिदंगु समसामयिक विषययात कयाः च्वयातःगु 'सितिलाः माष्टर' छ्धाः प्याखं नं सामाजिक विडम्बनाप्रति व्यंग नकेगु जक मखु तत्कालीन राजनैतिक स्थितियात नं ब्वःगु दु । भावुकताया धरातलं मुक्त जुयाः यथार्थतायात नालाः जीवन न्ह्याकेगु सन्देश बियातःगु प्रधानजुया नाटक उप्वः उद्देश्यपरक जूगु दु । नापं छपु नाटकं छगू हे जक प्रभाव बिइगु स्वयाः तःगु पक्षयात थियाः तःगू प्रभाव बिइगु चेष्टा नं प्रधानजुया नाटकय् दु ।

**हेमलाल जोशी (ने.सं. १०३८-१०८४)**

- खड्गसिद्धि (ने.सं. १०७६,) श्रेष्ठ सिरपाः प्राप्त-१०७६
- एकांकी पुचः (ने.सं. १०८५)
- सदाशिव (ने.सं. १०८५)
- रूपा (ने.सं. १०८६)

नेपालभाषाया छ्धाः प्याखं नापं पूधाः प्याखंया च्वज्याय् उलि हे सफल भूमिका म्हितादीम्ह छम्ह नाटककार हेमलाल जोशी नं खः । हेमलाल जोशी थम्हं नाटकया कथावस्तु सृजना मयासे इतिहास वंशावली, पुराण आदिया आधारय् नाटक च्वइम्ह च्वमि खः । हेमलाल जोशी ऐतिहासिक, पौराणिक घटनाय् आधारित नाटक बाहेक 'रूपा' थें ज्याःगु सामाजिक नाटक नं च्वयामदीगु मखु, तर नाटककारया रुपय् वय्कःयात सफलता ऐतिहासिक नाटक पाखें हे चूलाः वःगु दु । जोशीजुया ऐतिहासिक नाटक अप्वः धया थें मल्लकालीन ऐतिहासिक घटना नाप सम्बन्धीत जूगु दु । तर वय्कलं ऐतिहासिक नाटक च्वयादीसां नाटकय् इतिहास प्रति पूर्ण वफादार मजुसे थःगु नं कल्पना थाय् थासय् छयलेगु नापं इतिहासय् मदुपि पात्र तर्क दुथ्याकीम्ह जूगुलिं थ्वय्कःयात समालोचकतय्सं अप्वः ऐतिहासिक रोमान्सया च्वमि कथं थुइकेगु याःगु दु । थ्व ल्याखं हेमलालयात विश्वप्रसिद्ध नाटककार शेक्सपियर नाप लनेवह जू । जोशीजुया नाटकया छगू विशेषता खः, ऐतिहासिक घटना, ऐतिहासिक पात्र न्ह्यब्वइबलय् वने धुंकूगु ईयात व मदये धुंकूम्ह पात्रयात नं थौया ईयाम्ह थें च्वंक जक मखु, गबलें हे ल्वःममनी कथं न्ह्यब्वये फुगु, अले नाटकया नां नं अप्वः थें मू पात्रया नामं छुइगु यानातःगु दु । नाटकय् जोशीजुं प्रचारवादी च्वमितय्सं थें तप्यंक थःगु सन्देश ब्वयेगु यानादीगु मदु । थम्हं बियागु सन्देश थौया सन्दर्भय् नं उलि हे पाय्छि जुइक उलि

नेपालभाषा साहित्यया इतिहास/२३१

हे शिक्षाप्रद जुइक बिइफुगु दु । थ्वय्कःया नाटकय् निरंकुशताया विरोधय् विद्रोहया सः राष्ट्रिय भावना, सुधारवादी सन्देश, अतितया गौरव ब्वयेगु प्रवृत्तिं मू थाय् कयाच्वंगु दु । नाटकया सुं नं पात्र लेखकया मुखपात्र थें मजुसे सशक्त व जीवन्त जूगु दु ।

**सत्यमोहन जोशी (ने.सं. १०४०)**

- गौतम बुद्ध (ने.सं. १०७०)
- सिद्धिदास (ने.सं. १०९१)
- वैद्यबाः (ने.सं. १०९१)
- ७ दै लिपा (ने.सं. १०९१)
- म्हासय् खनाम्ह (ने.सं. १११९)

महाकवि चित्तधर 'हृदय' जुं न्हापां 'शाक्यानी' छ्धाः प्याखं पिकयाः आधुनिक छ्धाः प्याखंया लुखा चायेका दिल सा सत्यमोहन जोशीजुं 'गौतम बुद्ध' छ्धाः प्याखं पिकयाः छ्धाः प्याखंया ख्यःयात भ्रमः धायेका बिल । तर 'गौतम बुद्ध' सफूयां लिपा जोशीजुं थःगु च्वसा पूधाः प्याखंया लेखन पाखे न्ह्याकादिल । नेपालभाषा साहित्य उत्थानया निंतिं थःत निरन्तर पयाना च्वनादीम्ह सत्यमोहन जोशीया नाटकया अप्वः विषय नं नेपालभाषाया निंतिं समर्पित व्यक्तित्वतय्गु बारे हे जूगु दु । नाटक च्वयाः थःगु नाटककारया खुबि क्यनेगु स्वय्कः नं भाषिक महारथीपनिगु जीवन ब्वयाः भाषिक चेतना ग्वाकेगु हे वय्कःया नाटकया मू विशेषता जूगु दु । 'सिद्धिदास' नाटक सिद्धिदासया परिवारिक जीवन व साहित्यिक योगदानयात प्रस्तुत यानातःगु दु सा '७ दै लिपा' नाटकय् थेरवादी भिक्षुतय्सं वि.सं. २००७ साल न्ह्यः बुद्धधर्मया प्रचार प्रसार कथं नेपालभाषां धर्मदेशना याना जूगुलिं नेपालभाषा विरोधी राणा सरकारं भिक्षुपित नेपाः देशं पितनाछ्वःगु तर देशं पिने च्वनाः नं भिक्षुपिसं नेपालभाषाया प्रचार प्रसारया ज्या न्ह्याकावःगु यथार्थ घटनायात कयाः च्वयादीगु दु । अथे हे 'वैद्यबाः' नाटक नं नेपालभाषां न्हापां शब्दकोश दयेकादीम्ह 'पन्नाप्रसाद जोशी'या भाषिक योगदानयात केन्द्रित यानाः च्वयादीगु खः । सत्यमोहन जोशीजुं मूलतः थःगु नाटकय् नेपालभाषा व थ्वया साहित्यया विकासय् वःगु जागरणया व अवरोधया दथुइ पिदंगु द्वन्द्वयात ब्वयाः शोषण व दमनं जक विकासया पलाःयात लिक्कुं फइमखु धयागु सन्देश बियादीगु दु । उकिं थ्वय्कःया फुक्क धया थें नाटकया पात्रत जांगर व जोशं जाःपिं जूगु दु । तर नाटकया पात्र गुलि सजिव सशक्त जू उलि व ईयात म्वाकेगुलिइ च्वमि उलि सफल जूगु धाःसा खनेमदु ।

**विजयबहादुर मल्ल (ने.सं. १०४५-१११९)**

- फुटकर

विजयबहादुर मल्ल नेपाली भाषाय् 'कोही किन बर्बाद होस्' थें ज्याःगु बाल मनोविज्ञानय् आधारित नाटक च्वयाः आपालं न्ह्यः हे नाटककारया रुपय् परिचित

नेपालभाषा साहित्यया इतिहास/२३२



जुइधुंकूम्ह च्वमि खयां नं नेपालभाषाया नाटक विधाय् थ्वय्कः लिपा हे तिनि खनेदयेकः भाल । थम्हं नाटक च्वये धकाः स्वयां नं मेपिनिगु इनाप कथं हे अप्वः च्वयेगु यानादीम्ह बिजयबहादुर मल्लया थौं तक नं नाटकया सफू पिदंगु मनुनि, दबुलिइ मन्चन जक जूगु दु । नेपालभाषाया 'सहलह', 'सँझ्याः साहित्य पाःलाः' आदि संघ संस्थाया ग्वसालय् दबुलिइ, मन्चन जूगु थीथी नाटक गथे - 'कुलां चकनी तिनि', 'किसि न्याइम्ह मदनमान' 'किपालुं लिनाच्वंम्ह मनू', 'तिनातःगु लुखा', 'लैपंछ्याः', 'ल्वहंया बाखं', 'क्वसाःगु नुगः', 'निम्ह तिपू' आदि मल्लजुया नेपालभाषाया थीथी नाटक खः । समसामयिक सामाजिक विषययात कयाः च्वयातःगु मल्लजुया फुक्क धया थें नाटक समस्यामूलक जू । समस्याय् नं अप्वः थें मिसा समस्याय् केन्द्रित जूगु दु । नारी स्वतन्त्रता, नारी समानता, सामाजिक सुधार, आर्थिक समानता आदिया पक्षय् सः प्रतिध्वनित जुयाच्वंगु दु । थुगु दृष्टि विजयबहादुर मल्लयात अत्याधुनिक प्रवाह नाप सतीम्ह इब्सनया प्रभाव लाःम्ह नाटककार कथं प्रतिष्ठापित यायेछि । नाटकय् च्वमि वैचारिक हिउपाः सुधारया सन्देश प्रतिध्वनित यानाच्वं सां, पात्रतय्गु मनोवैज्ञानिक प्रभाव, विचारधाराया द्वन्द आदियात नं बांलाक मनन यानाः नाटकीय कलायात नं निर्वाह यानादीगुलिं प्रचारवाद, अस्वाभिकताया गन्ध थ्वय्कःया नाटकय् खनेमदु । थुकथं वैचारिक रुपं शिल्पगत रुपं परिष्कृत जूगु थ्वय्कःया नाटक नेपालभाषाया नाटकया स्तरयात छतँ थक्याबिउगु दु, मेपिनिगु भाषाया तःजिगु नाटकया प्रतिस्पर्धाय् बनेफयेका बिउगु दु ।

ईश्वरानन्द श्रेष्ठार्च्य (ने.सं. १०४६)

- पस्का (छधाः प्याखं पुचः, प्र. ने.सं. १०७७)
- थःगु छँ (ने.सं. १०७८)
- फिल्कुति (ने.सं. १०७९)
- फसंपू लप्ते (ने.सं. १०८०)

नेपालभाषा साहित्ययात छुं न्हूगु बिइ धयागु भावनां अभिप्रेरित जुयाः नाटक विधाय् ल्हाः न्ह्याकादीम्ह ईश्वरानन्दया प्रादुर्भावं नेपालभाषाया नाटक सिइदयेक छगू न्हूगु मोड ज्वन । शेक्सपियरया नाटक परम्पराया प्रभाव लानाच्वंगु नेपालभाषाया नाटकयात इब्सनया नाटक परम्परा कथं न्ह्याकेगु ज्या दकले न्हापां ईश्वरानन्द पाखें जुल । थ्व परम्पराया नी जक यायेगु मजुसे नेपालभाषाय् छगू प्रवाह कथं न्ह्याकेगुलिइ ईश्वरानन्द सफल जुयादिल । थ्वय्कःया प्रादुर्भावं घटना प्रधान नाटकया थासय् समस्या प्रधान नाटकया परम्परा न्ह्यात अले मानव समाजयात स्पर्श यानाच्वंगु समस्या मध्ये नं नारी समस्या व विद्रोहयात मू थाय् बियाः नाटक च्वयेगु प्रवृत्ति सीइदयेक ब्वलन । समस्या प्रधान नाटक च्वइम्ह ईश्वरानन्दया फुक्क नाटकया समस्या मिसा समस्या सम्बन्धी जूगुलिं थ्वय्कःयात नेपालभाषाया छम्ह Feminist नाटककार नं धायेगु याः । थ्वय्कः नाटकय् समस्या जक न्ह्यब्वयाः सुम्क च्वनीम्ह नाटककार मखु, समस्याया

नेपालभाषा साहित्यया इतिहास/२३३

कारण नं कुत्तुकुलाः ब्वयाः क्यनिइम्ह च्वमि खः । मिसा समस्याया मू कारण हे इमिगु आर्थिक पराधीनता खः । थथे मिसातय्त आर्थिक पराधीन जुइके बिउगुया मूलभूत कारक तत्व थौंया सामाजिक व्यवस्था, कानुनी नुटी, धर्म, संस्कृति आदि खः धकाः थ्वय्कलं क्यनादीगु दु । थुकथं सामाजिक समस्यायात नं ग्राहस्थ समस्या थें यानाः क्यनातःगु ईश्वरानन्दया फुक्क धया थें नाटकय् नाटकया थीथी पात्र छगू वर्ग वा छगू समाज विशेषया प्रतिनिधित्व यानाच्वंगु दु, नाप थीथी पात्रया माध्यमं निगू विचारधाराया संघर्ष क्यनेगु हे थ्वय्कःया नाटकया मू स्वरुप जूगु दु । थथे निगू विचारधाराया संघर्ष ब्वइबलय् निगुलिं विचाःया तर्क व आधार बांलाक न्ह्यब्वइगुलिं लेखक छखे पाखे लिना च्वंसां उलि प्रचारवादी खने मदु । थःगु सन्देश न्ह्यब्वयेगुलिइ जक अग्रसर मजुसे नाटकीय कलाया नं बांलाक निर्वाह यानादीगुलिं नाटकय् कृत्रिमताया गन्ध मदु । थुकथं ईश्वरानन्दया प्रादुर्भावं नेपालभाषाया नाटक छगू न्हूगु मोड ज्वंगु दु, नाटकया लाग्ना तब्या जूगु दु । तर थ्वय्कलं नाटक विधाय् ताःई तक थःगु च्वसा थातं तयामदी, गुगु नेपालभाषाया नितिं छगू हन्ताः हे धायेमाः ।

पुण्यरत्न बज्जाचार्य (ने.सं. १०४७-११०९)

- विवाह समिति (ने.सं. १०७८)

पुण्यरत्न नेपालभाषाया छम्ह नां दम्ह हास्यव्यंगकार खः । पाय्छिगु संवाद छयलाः न्हिइकाः मनोरञ्जन वीगुलिं थ्वय्कःया नाटक गाकं सफल जू । थ्वय्कःया नाटकय् हास्य, केवल हास्यया नितिं हे जूसां सामाजिक विकृति, विडम्बना प्रति नं व्यंग्य मदु धकाः धाये मछिं ।

धूस्वां साय्मि (ने.सं. १०५०)

- त्रिवेणी (ने.सं. १०७२)

- हयार्छे निभाल (ने.सं. १०७६)

धूस्वां साय्मि थःगु प्रारम्भिक साहित्यिक यात्राया इलय् छम्ह नाटककारया रुपय् पिदनादीगु खः । थ्वय्कलं समसामयिक विषयवस्तुयात कयाः नाटक च्वयादीगु खयां नं उपन्यास क्षेत्रय् गुलि उत्कृष्टता प्राप्त यानादिल, उलि नाटक विधाय् याये फुगु मदु । भावुकताय् लुकुं बियाः प्रचारोन्मुखी जुइगु प्रवृत्ति यानाः थ्वय्कःया नाटकय् चरित्र प्रतिपादन, संघर्ष, द्वन्द आदि उलि सन्तुलित रुपं न्ह्यानाच्वंगु मदु । नाटककारं नाटकीय कलाया निर्वाह यायेगु स्वयाः नं थःगु सन्देश वीगुलिइ हे अप्वः कुतः यानादीगु दु ।

भिक्षु सुदर्शन (ने.सं. १०५४)

- अम्बपाली (ने.सं. १०७५)

- राष्ट्रपाल (ने.सं. १०७८)

- बिम्बिसार (ने.सं. १०८२)

नेपालभाषा साहित्यया इतिहास/२३४



- जयप्रकाश (ने.सं. १०८२) श्रेष्ठ सिरपा: प्राप्त ने.सं. १०७८
- आशंका (ने.सं. १०९१)
- सुप्रिया (ने.सं. ११००)
- प्रतिशोध (ने.सं. ११०६)
- पटाचारा (ने.सं. १११७)

‘चित्तधर हृदय’ जु शुरु यानादीगु आधुनिक नाटक विधायात न्ह्याज्याकेगु महत्वपूर्ण ज्या भिक्षु शुदर्शनजुं यानादिल । भिक्षु सुदर्शन नेपालभाषाया दकले न्हापांम्ह प्धाः प्याखं च्वमि जक मखुसे नेपालभाषाय् दकले अप्वः नाटक च्वयाः, नाटक च्वज्याय् निरन्तरता प्रतिवद्धता क्यनादीम्ह नाटककार नं खः । थ्वय्कलं शेक्सपियर पहयागु पाश्चात्य शैलीया नाटकयात नेपालभाषाय् छगू प्रवाहया रुपय् न्ह्याकादिल । थ्वय्कःया ‘अम्बपाली’ (ने.सं. १०७५) नेपालभाषाया न्हापांगु प्धाः प्याखं सफू खः । भिक्षु सुदर्शन मूलतया शेक्सपियरया नाटकं प्रभावितम्ह नाटककार खः । थ्व हे कथं थ्वय्कलं नाटकय् थम्हं हे कथानक ज्यानाः नाटक सृजना यायेगु स्वयाः शेक्सपियरं थें न्हापा दये धुंकूगु कथानकयात थःगु नं कल्पना तनाः नाटक च्वयेगु यानादीगु दु । पालिभाषा, बौद्ध साहित्यया छम्ह विद्वान जुयादीगुलिं थ्वय्कलं अप्वः थें थःगु नाटकया कथावस्तु बौद्ध बाखं पाखें हे कयादीगु दु । बौद्ध बाखं बाहेक ऐतिहासिक घटनाय् आधारित नाटकत नं यक्व च्वयादीगु दु । थ्वय्कःया फुक्क धया थें नाटक चरित्र प्रधान जूगु दु सा नाटकया पात्रत व्यक्ति प्रधान जूगु दु । अले नाटकया पात्र दक्व बौद्धकालीन व्यक्ति जुयाः नं इपिं थौया ईया आचार विचारया प्रतिनितित्व याइपिं जूगु दु । थीशी पात्र पाखें च्वमिया थःगु विचाः प्वंकेगु अप्वः कुतः जूगुलिं गुलिं नाटकय् पात्रत, ला-हिया स्वाभाविक पात्र मजुसे च्वमिया मुखपात्र थें हे नं जूगु दु । प्राचीन नाटकय् अभाव खनेदुगु ‘संघर्ष’ ‘द्वन्द’ थ्वय्कःया नाटकय् गाकं दु । मूलतः थ्वय्कःयाके शेक्सपियरया नाटकया प्रभाव लानाः नं इब्सनया नाटकय् थें निगू विचारधाराया संघर्ष न्हयब्वयेगु प्रवृत्ति नं दु । भावनात्मक संघर्ष नापं बौद्धिक संघर्ष नितानायात थ्वय्कःया नाटकय् उलि हे थाय् बियातःगु दु । बरु नाटकय् पात्रतय्गु संवाद तसकं हे ताताःहाकः जू । थुकिं थ्वय्कःया नाटक दबुलिइ क्यनेत मखु, ब्वनेत खः धया थें अनुभव जुइका विउ । नाटकय् कलात्मक पक्षं स्वयाः नं सैद्धान्तिक पक्षं थाय् कयाच्वंगु खनेदु । थ्व हे कथं सुदर्शनजुया नाटकय् धार्मिक पक्षय् बुद्ध धर्मया प्रचार दु सा, राजनैतिक पक्षय् राजतन्त्रया विरोध, साम्राज्यवादया विरोध व गणतन्त्र व स्वतन्त्र राज्य स्थापना प्रति आशक्ति दु । नापं राष्ट्रिय स्वाधिनता व राष्ट्राभिमानया भावना थ्वय्कःया प्रत्येक नाटकय् दुथ्याःगु दु । थःगु सिद्धान्त दृष्टिकोण न्हयब्वयेगु नितीं पात्रतय् स्तरयात मल्वयेक नं नवाकेगु प्रवृत्तिं यानाः प्रचारवादया गन्ध, अले अस्वभाविकता नं थ्वय्कःया नाटकय् गनं गनं खनेदु ।

डा. जनकलाल वैद्य (ने.सं. १०५४)

- कल्याणी (ने.सं. १०८७)

नेपालभाषा साहित्यया इतिहास/२३५

- कृतिलक्ष्मीया पलाः (ने.सं. १११९)

नेपालभाषाया ख्यलय् छम्ह, समालोचक, अन्वेषकया रुपय् प्रतिष्ठितम्ह डा. जनकलाल वैद्यजु ‘कल्याणी’ नाटक च्वयाः नाटककारया रुपय् नं परिचीत जुयादीगु दु । धार्मिक बाखनं प्रभावित जुयादीम्ह वैद्यजु थःगु बाखंया कथावस्तु, पात्रत पौराणिक बाखनं कयादीगु खःसां नाटकय् पात्रतय्गु मानसिकता आचार-विचार द्वन्द, थौया परिवेश कथं न्हयथनेगु, सन्देश बीगु यानादीगु दु । थ्वय्कःया कल्याणी नाटकय् स्वदेश, स्वधर्म प्रति ममता ब्वयेगु जक मखु, छम्ह मिसाया इहिपा वं मनंतुनाम्ह मिजं नाप हे जुइमाः धैगु सामाजिक सुधारया सः ह्वलेगुलिइ नं लेखक सफल जूगु दु । नापं स्वस्थानी बाखनय् आधारित घटना पाखें थौया विश्वय् विद्यमान आन्तरिक हस्तक्षेप, विस्तारवादी, साम्राज्यवादी नीति प्रति नं व्यंग प्रहार यायेगुली नाटककार लिपा लाःगु मदु । अथे हे कृतिलक्ष्मीया पलाः छ्धाः प्याखं पुच्लय् नं थज्यागु हे प्रवृत्ति दु । थुकथं पौराणिक, ऐतिहासिक बाखंया लिधंसाय् नाटक सृजना यानाः नं थौया ईयात ल्वयेक सन्देश बीगुलिइ वैद्यजु, नेपालभाषाया मेम्ह नाटककार हेमलाल जोशीनाप ज्वःलाःगु दु ।

रामशेखर नकःमि (ने.सं. १०५५)

- धिताल्ल (ने.सं. १०९६)

रामशेखर नेपालभाषाया बाखं, उपन्यास विधाय् जक मखु नाटक साहित्यया विकासय् नं महत्वपूर्ण योगदान बियादीम्ह च्वमि खः । थ्वय्कलं ख्यालः, छ्धाः प्याखं च्वयाः नाटक ख्यःयात व्यापक व विस्तृत यायेगुलिइ जक मखु, थम्हं हे निर्देशन बीगु, अभिनय तर्क यानाः थ्व ख्यःयात अभि जन ग्राह्य जनप्रिय यायेगुलिइ तर्क तिबः बियादीगु दु । थ्वय्कःया छ्धाः प्याखं व ख्यालः उतिकं च्वन्ह्याः । समसामयिक विकृति विसंगतियात ब्वयातःगु थ्वय्कःया ख्यालः व छ्धाः प्याखनं, जनतायात थौया स्थिति प्रति सजग सचेत यायेत गाकं तिबः ब्यूगु दु । बाखं, उपन्यासया क्षेत्रय् छम्ह प्रगतिशील च्वमिया रुपय् प्रतिस्थापितम्ह भाजु रामशेखर नाटक साहित्यय् नं प्रगतिवादया पलाःचिं क्यनेगुलिइ लिपा लाःगु मदु ।

दुर्गालाल श्रेष्ठ (ने.सं. १०५७)

- निमन्त्रणा (गीती नाटक, ने.सं. १०८८)

- बिहांचुली (गीती नाटक, ने.सं. १०९०)

- प्याखं पिचा (छ्धाः प्याखं पुचः, ने.सं. ११०६)

नेपालभाषाया छम्ह तसकं हे लोकं हवाःम्ह कवि दुर्गालाल श्रेष्ठ, नाटक विधाय् नं उलि हे थःगु मूल्य व मान्यता स्थापित यायेफुम्ह नाटककार जूगु दु । श्रेष्ठजु नेपालभाषाया काव्य ख्यलय् नव- स्वच्छन्दतावादी प्रवृत्तिं पलाः छिनाः प्रगतिवादयात नालाः न्हयज्याःम्ह, कवि खः । थथे हे नाटक क्षेत्रय् नं न्हापां ‘निमन्त्रणा’ ‘श्रीमती’ थेंज्याःगु गीती नाटक च्वयाः थ्व ख्यलय् प्रवेश यानादीम्ह

नेपालभाषा साहित्यया इतिहास/२३६



श्रेष्ठजुं लिपा नेपाली जनजीवनया दुःख, बेदनाया सयात नाटकया माध्यमं थ्वयेकेगु जक मखु शोषण दमनया समाधानया मू लँपु 'संघर्ष' खः धकाः क्यनाः संघर्ष, विद्रोहया आह्वान यायेगु ज्या नं थ्वय्कलं नाटकय् यानादिल । थुकथं दुर्गालालया आगमनं नेपालभाषाया नाटकय् प्रगतिशील नाटकया प्रारम्भ जुल, नेपालभाषाया नाटकय् छगू न्हूगु आयाम तनाविल । थौया सामाजिक, राजनैतिक, भाषिक सांस्कृतिक विसंगति प्रति थःगु जक विद्रोह प्वकेगु मखु, ब्वमिपित नं अज्याःगु हे भाव सम्प्रेषण यायेगु क्षमता थ्वय्कःयाके दु । खयेत ला सफूया रूपय् थज्याःगु प्रगतिशील भावनां जाःगु थ्वय्कःया छथाः प्याखं पुचः 'प्याखं पिचाः' ने.सं. ११०६ स जक पिदंगु खःसां छम्ह प्रगतिशील नाटककारया रूपय् थ्व स्वयाः आपालं न्हयः हे थ्वय्कः परिचित जुइधुंकूगु दु । अथे हे थ्वय्कःया कविवर सिद्धिचरण नाप जानाः च्वयादीगु 'जि सिद्धिदास' प्याखनं सिद्धिदासया मातृभाषानुराग जक ब्वयेगु याःगु मखुसे थज्याःगु हे भाषिक ममता थौया समाजय् देजायेकेगु चेष्टा नं याःगु दु । नाटकया माध्यमं थौया विकृति विसंगति प्रति असन्तोष विद्रोह प्वकेगुलिइ थ्वय्कः गुलि सक्षम जुयादीगु खः, अथे हे भावुकता व आक्रोसयात भच्चा नियन्त्रण यायेफुगु जूसा थ्वय्कःया नाटक अभिवास्तविक व स्वाभाविक जुयाः च्वन्ह्याइगु जुइ ।

बासु शशी (ने.सं. १०५८-१११३)

- ताःचाप्वाँय (ने.सं. १०८६)

- भुमिं यम्ह मनू (ने.सं. ११०७)

ईश्वरानन्दयां लिउ नेपालभाषाया नाटकय् छगू न्हूगु अनुभूतिया आभास याकादीम्ह मेम्ह नाटककार बासु शशी खः । सामाजिक समस्यायात नं ग्राहस्थ समस्या पाखें ब्वयेगु जक मखु, ईश्वरानन्द स्वयां नं ग्राहस्थ समस्यायात अभिक्वथीक क्वजिक ब्वयेगु तथा मनोवैज्ञानिकता दुथ्याकेगुलिइ बासु शशी सक्षम जूगु दु । 'ताःचाप्वाँय' थ्वय्कःया नेपालभाषाय् चर्चित नाटक खः । 'ताःचा प्वाँय' नाटकया मू विषयवस्तु भौगु समाजय् युगं युगनिसें न्हयानावयाच्चंगु माजु व भौया ल्वापु खःसां छपु हे नाटकय् तःम्हेसिगु समस्या ब्वयेगुया नापं माजु व भौया ल्वापुया मू कारण आर्थिक जक मखु मनोवैज्ञानिक नं खः धकाः कारक तत्व तर्क क्यनादीगु दु । थुकथं न्हापा ईश्वरानन्दया नाटकय् समस्यायात आर्थिक दृष्टिं जक वालेंगु जूगुलिइ बासु शशी मनोविज्ञानयात नं थाय् बियादिल । फलतः नेपालभाषाय् समस्यामूलक नाटकयात अभि रौचक अभि व्यापक यायेगु ज्या बासु शशी पाखें जुल । तर शशीया नाटक मूलतः समस्यामूलक खयाः नं दर्शकतय्त अप्वः प्रभावित यायेगु प्रलोभनं नाटकया प्रस्तुतिकरणय् शशी दबुलिइ समस्याया छलफल स्वयाः नं घटना हे क्यनाविइगु, निगू बिचारधाराया संघर्ष स्वयां नं बाह्य संघर्ष हे क्यनाविइगु यानादीगुलिं, थ्वय्कःयात मुक्कं आधुनिक नाटककार धायेगु स्वयां नं संक्रमणकालया नाटककार कथं प्रतिष्ठापित याये छि । ताःचाप्वाँय नाटक नेपालभाषाया नाटक ख्यलय् गुगु प्रभाव बिइफुगु खः, लिपा पिदंगु

थ्वय्कःया 'भुमिं यम्ह मनू' नांगु मेगु नाटक बिइफुगु मदु । वय्कःया नेपाली भाषां पिदंगु 'बौसुरीमा नअटाएका धुनहरु' नांगु नाटकया अनुवाद थें जूगु थ्व नाटक प्रगतिवादी लँपु ज्वंगु दु ।

गिरिजाप्रसाद जोशी (ने.सं. १०५९-११०७)

- बाखाछें (ने.सं. ११०२)

- हाकु स्वाहाने (ने.सं. ११०७)

नेपालभाषाया छम्ह बहुप्रतिभाशाली च्वमि गिरिजाप्रसाद जोशी नेपालभाषाया नाटक ख्यलय् नं छम्ह प्रगतिशील नाटककारया रूपय् पिदनादीगु दु । तर थ्वय्कलं काव्य ख्यलय् उपन्यास ख्यलय्, गुगु थःगु पलाचिं त्वःते फुगु खः, नाटक क्षेत्रय् अज्याःगु पलाचिं त्वःतादीगु खनेमदु । थ्वय्कलं थःगु नाटकय् आर्थिक समस्यां पिदंगु विविध समस्या न्हयब्वयाः, थौया समस्याया मू हा हे आर्थिक खः धकाः क्यनेगु यानादीगु दु । नाटकया माध्यमं थःगु बिचाः प्वकेगु, सामाजिक चेतना थनेगु अले विद्यमान विकृति विसंगतियात ब्वयेगु थ्वय्कःया कृतः च्छाये बह जूसां, थःगु बिचाः प्वकेगु भवलय् नाटकय् स्वाभाविकता, यथार्थतायात चिउताः तयेमफुगु कारण थ्वय्कःया नाटक गुलि प्रभावशाली जुइमाःगु खः, उलि जुइफुगु खनेमदु । अथे खयाः नं नेपालभाषाया प्रगतिवादी नाटकया विकासय् थ्वय्कःया योगदान लुमकेबह जू ।

श्रीमती प्रकाश प्रधानाङ्ग (ने.सं. १०६१)

- कलाकार (ने.सं. १११७)

श्रीमती प्रकाश प्रधानाङ्ग नेपालभाषाया न्हापां न्हापांयापि नाटककारत मध्ये छम्ह जुयाः नं थ्वय्कःया नाटकया सफू आपालं हे लिपा तिनि पिदन । थ्वय्कलं थःगु बाखंया लिधंसाय् नाटक च्वयाः विभिन्न कार्यक्रमय् मञ्चन यानादी धुंकूगु दु । तर सफूया रूपय् हे धाःसा 'कलाकार' हे थ्वय्कःया न्हापांगु सफू जूगु दु । 'कलाकार' छथाःप्याखं नाककारया दकले न्हापांया मुना जक मखु नेपालभाषाया मिसा च्वमितय्गु नं न्हापांगु नाटक सफू खः । कलाकारया समस्या ज्वनाः नेपालभाषाया नाटक ख्यलय् प्रवेश यानादीम्ह प्रकाश प्रधानांग मेमेगु सामाजिक समस्या, ऐतिहासिक विषययात नं थःगु नाटकया विषय कथं प्रस्तुत यानादीगु दु । तर नाटकय् समस्या न्हयब्वयेगु भवलय् स्वाभाविकता, नाटकीय कलाया निर्वाह यायेगु स्वयां नं अप्वः भावुकता, सम्बेदनशीलताय् लुक्बिइगु प्रवृत्ति यानाः थ्वय्कःया नाटक गुलि च्वन्ह्याये माःगु खः, उलि च्वन्ह्याके फुगु मदुनि ।

पद्मरत्न तुलाधर (ने.सं. १०६२)

- आः जितः नं तन तन दइवल (ने.सं. १०९७)

- ख्याः बछि नी बछि (ने.सं. ११०४)



निबन्धया लिसेलिसे नाटक विधाय ल्हाः न्ह्याकादीम्ह पदमरत्नया प्रवेशं, नेपालभाषाया नाटकया ख्यलय् छगू न्हूगु आयामया शुरुवात जूगु दु । देय्या विविध ख्यलय् खने दयाचंगु विकृति, विसंगतियात तप्यंक ब्वयेगु मयासे हास्यव्यंगया माध्यमं ब्वयेगु प्रवृत्ति नेपालभाषाया प्याखनय् ब्यापक जुइके बिल । तुलाधरजुया न्हापां पिदंगु 'आःजितः नं तनतन दइबल' (ने.सं. १०९७) ख्यालः पुचः समसामयिक जीवनया विसंगति प्रति व्यंग्य खःसा लिपा पिदंगु 'बुद्धाः बछि नी बछि' नं थौया समाजयात बुद्धाः बछि नी बछि यानाः कयेकातःगु रचना खः । थ्वयकलं ख्यालः बाहेक छ्धाः प्याखं नं च्वयादीगु दु । थ्वयकःया प्याखं न्हिइकाः गिजय् यानाः पाठकतय्त मनोरन्जन विइत जक मखु, समाजय् मजिउगु, मनीगुयात हंकेत खः, जनतायात सजग व सचेत यायेत खः । मेमेपिं हास्यव्यंग च्वमितय्गु प्याखनय् स्वयाः तुलाधरजुया प्याखनय् गाकं बौद्धिकता दु, घ्याचू साप हे क्वातु, भाव नं तसकं हे सशक्त जू । उछुंखलता, अस्वाभाविकता, अस्पष्टः थ्वयकःया प्याखनय् खनेमदु । पात्र चित्रणय् मनोवैज्ञानिकता, वैचारिक संघर्ष क्यनेगुलिइ नं पदमरत्न गाकं सजग जूगु दु । थुकथं नुगः व न्ह्यपु नितानायात थिइफुगु दक्षता थ्वयकःयाके दु ।

श्री कृष्ण 'अणु' (ने.सं. १०६४)

- खःला मखुला (ने.सं. १०९७)

नेपालभाषाया ख्यालः च्वज्याय् नांजाःम्ह छम्ह च्वमि श्री कृष्ण 'अणु' नं खः । थ्वयकःया ख्यालः केवल बुद्धाः जक मजुसे नी नं खः । थौया समाजय् न्यनाचंगु मजिउगु मनीगु ज्याखंयात मर्मय् दिक्क, नुगलय् थिइक ब्वयेगु क्षमता थ्वयकःयाके दु । छुं नं खं तप्यंक कनेगु धायेगु स्वयाः नं गिजय् यानाः, कयेकाः धायेबलय् अप्वः थासय् लाइ धैगु खं थ्वयकःया ख्यालकं क्यनाबिउगु दु । बौद्धिक सजगतां भयविउगु थ्वयकःया ख्यालकं नेपालभाषाया नाटकया लागा तब्ब्या तच्चाः यायेगुलिइ गाकं तिवः बिउगु दु ।

राजभाइ जकःमि (ने.सं. १०७८)

- ल्हाबसा (ने.सं. ११०५)

नेपालभाषाया काव्य ख्यलय् छम्ह आधुनिक प्रगतिशील युवा कवि कथं परिचितम्ह राजभाइ जकःमि, 'ल्हाबसा' नाटक च्वयाः नेपालभाषाया नाटक ख्यलय् नं खनेदयेकः भ्नाःगु दु । थ्व क्षेत्रय् नं जकःमिजु शोषित पीडित जनताया पं लिनाः अमित जुयाचंगु अन्याः अत्याःया विरोधय् सः थ्वयेकीम्ह, अले इमिगु विजय प्रति आशावादी जुयादीम्ह छम्ह प्रगतिशील नाटककारया रुपय् थःत परिचित याकादीगु दु । थ्वयकलं नाटकया माध्यमं शोषण दमन प्रति थःगु जक विद्रोह आक्रोस पदकेगु मखु, पाठकतय्त नं थज्याःगु हे भाव संचार यायेगु क्षमता थ्वयकःया नाटकय् दु । थुकथं जकःमिया आगमनं नेपालभाषाया नाटकय् प्रगतिवादी सःयात अभूत तिख्बर यानाब्यूगु दु । थ्वयकलं सान्दर्भिक विषययात ज्वनाः पाठकतय्त

नेपालभाषा साहित्यया इतिहास/२३९

आकर्षण यानादी थें प्रचारोन्मुखी प्रवृत्तियात भ्ना चिउताः तयादिल धाःसा थ्वयकःया नाटक अज्ज च्वन्ह्याइगु खनेदु ।

दिनेश भुजु (ने.सं. १०७८)

- बायावंगु लँपु (प्र. ने.सं. ११०३) श्रेष्ठ सिरपाः प्राप्त, ने.सं. ११०४

बायावंगु लँपु छ्धाः प्याखं च्वयाः श्रेष्ठ सिरपाः त्याकादीम्ह दिनेश भुजु नेपालभाषाया छम्ह चर्चित युवा नाटककार खः । थौया राजनैतिक, सामाजिक, आर्थिक, भाषिक क्षेत्रय् विद्यमान विसंगति, विकृति, विडम्बनायात नाटकया माध्यमं ब्वयादीम्ह, हि क्वाःपिं हि जाःपिं पात्र सृजना यानाः शोषण दमनया विरुद्धय् प्रतिकार यायेगु प्रेरणा बियादीम्ह, अन्याः अत्याःया प्रतिकार यायेत कानूनी लँपु मन्तं धायेवं उकिया परिणाम विद्रोह संघर्ष खः धकाः सन्देश बियादीम्ह नाटककार दिनेश भुजु खः । थ्वयकलं थौया युवा पिढियाके खनेदुगु वैचारिक हिउपाः, परिवर्तनया चाहना, जाँगर व जोशयात नं उलि हे सशक्त रुपं पिब्वयेफुगु दु । भुजु थःगु नाटकय् वर्गीय चेतना वैचारिक आन्दोलनया जक प्रतिबिम्बित यायेफुगु मखु, आधुनिक नाटकया रुप, विधान, प्रवाह कथं नं थःगु नाटकयात न्ह्याकेफुगु दु । उकिं भुजुयात समालोचकतय्सं नेपालभाषाया छ्धाः प्याखं ख्यलय् प्रगतिवादी सः व आधुनिक विचाःया समन्वय यानाः नाटक च्वइम्ह आधुनिक नाटककारया रुपय् प्रतिष्ठापित याःगु दु (माली, वर्ष ३ अंक ३ पृ. ६६) मेपिं प्रगतिशील लेखकत थें थ्वयकलं नं प्रचारोन्मुख व उद्देश्यपरक प्रवृत्तियात धाःसा नियन्त्रण यायेमाःगु दु । थथे कलापक्ष प्रति नं संयमित जुयाः पलाः छिनादिल धाःसा भुजुया नाटक नेपालभाषा साहित्यया नितिं छगू तःधंगु उपलब्धि ज्वनी ।

थ्वयकःपिं बाहेक नेपालभाषाया नाटक विधा बलकेत तिवः बियादीपिं मेपिं नं आपालं उल्लेख यायेबहिपिं नाटककारत दिन । थ्वयकःपिं मध्ये गुलिं पूवाः प्याखं च्वमि खःसा गुलिं छ्धाःप्याखं च्वमि, गुलिं हास्यव्यंग च्वमित खः । थ्वयकःपिं खः - चन्द्रबहादुर उलक - भाग्य व साहित्य (ने.सं. ११०१), कृष्णगोपाल कुसि - श्रद्धाञ्जली (ने.सं. १११२) शेषराज दली - भक्तिलता (ने.सं. १०९६), गोविन्दहरि नेकू व हरि श्रेष्ठ - निपु रूपक (ने.सं. १०७७), बासुपासा - श्रद्धा (ने.सं. ११०४), भैरवगोपाल वैद्य - 'जिं छन्त याकनं कायेके ह्ये', (ने.सं. ११०८), धर्मरत्न शाक्य - विश्वन्तर (ने.सं. ११११), सुरेन्द्र शाक्य - समाजया सेवा (ने.सं. १०९४) जीवन श्रेष्ठ - ..... या अर्ध पागल (ने.सं. ११०८), गणेशराम लाछि - ह्वगंछि (ने.सं. ११०७), राममान प्रधान - यशोधरा (ने.सं. १११६), शुकुराम महर्जन - सर्वाथसिद्ध (म्ये प्याखं) (ने.सं. ११०७), मनरत्न शाक्य - विश्वन्तर (ने.सं. ११११), पुष्पराम शाक्य - अजात शत्रु (ने.सं. १११९) आदि ।

थ्वयकःपिं बाहेक सफूया रुपय् प्याखं पिकयामदीसां विभिन्न पत्रपत्रिकाय् वा कार्यक्रमया नितिं प्याखं च्वयादीपिं मेपिं नं प्याखं च्वमित दिन गथे परमानन्द वज्राचार्य, मथुराकृष्ण साय्मि, पुष्परत्न तुलाधर, स्वयम्भुलाल श्रेष्ठ, पुष्प चित्रकार,

नेपालभाषा साहित्यया इतिहास/२४०



सुवर्ण शाक्य, प्रकाश बज्राचार्य, भूषणप्रसाद श्रेष्ठ, राजा शाक्य, शाक्य सुरेन, त्रिरत्न शाक्य, महेशमान लँजुवाः, शशिकला मानन्धर, पुष्कर माथेमा, रोजीमैया श्रेष्ठ, ध्रुव मधिकर्मि, सुशील जोशी, श्यामदास कुमाः, निर्मल बज्राचार्य, सुभाषवीरसिंह कंसाकार, अमीररत्न ताम्राकार, शुभ शान्ति बज्राचार्य, श्यामलाल दिवाकर, रविन्द्रसिद्धि महर्जन, माणिकरत्न शाक्य, राजु स्यस्यः, सुरेशकिरण, शरद कसाः, मोहनलाल पांसु, सुरेन्द्र तुलाधर, रवि डंगोल, राम सिंह आदि ।

**लिखें :** थौ नेपालभाषाय न्हूगु परम्पराया नाटक शुरु जूगु बागू शदी दयेक धुंकल । थुलि समयावधिया दुने पूधाः प्याखं व छधाः प्याखं यानाः ५५ गू ति प्याखंया सफू पिदंगु दु । थुपि मध्ये सामूहिक संकलनया रुपय् निगू स्वंगु हे जक प्याखं सफू पिदंगु दु सा मेगु फुक्क व्यक्तिगत लेखन वा संकलन या रुपय् खः । सफूया रुपय् बाहेक आपालं छधाः प्याखं, विभिन्न प्याखं धेंधेंबल्ला कासा, नाटक महोत्सव आदिया नितिं नं च्वयेगु जूगु दुसा विभिन्न पत्र पत्रिकां नं छधाः प्याखं पिकायेगु याःगु दु । अथे हे साहित्य गुथि पाखें नं जापानया छगू नाटक कथिजूमह मन् (ने.सं.११०९) नेपालभासं अनुवाद जुया पिदंगु दु । तर बाखं, चिनाखें आदिया तुलनाय नेपालभाषाय नाटक आपालं म्हो हे जक पिदंगु दु । थ्व विधाय गुलि नं च्वमि पिदंगु दु प्यम्ह खुम्ह त्वःताः मेपिं फुक्क धै थें नाटक च्वयेगु रहंर वा छुं कार्यक्रमया नितिं नाटक मालाः च्वइपिं जक जूगु दु । थ्व क्षेत्रय् प्रतिवद्ध जुयाः निरन्तरता बिउपिं नाटककारत तसकं हे म्हो जक दु ।

थौ नेपालभाषाय पिदंगु नाटकयात अनुशीलन यायेबलय् मूलतः ऐतिहासिक, पौराणिक तथा जातक, समस्यामूलक, हास्यव्यंग्य कथंया नाटक खनेदु । ऐतिहासिक नाटकया क्रमय् नं छगू राजनैतिक इतिहासय् दुपिं पात्रतय्गु जीवन सम्बन्धी सा मेगु नेपालभाषा साहित्यया इतिहासय् नांजाःपिं व्यक्तित्वतय्गु जूगु दु । थुमिगु चारित्रिक विशेषता क्यनेगु हे थज्याःगु नाटकया मू उद्देश्य जूगु दु । पौराणिक तथा जातक सम्बन्धी नाटकय्, गुलिं पौराणिक बाखं स्वस्थानी आदि सम्बन्धी जूगु दुसा अप्वः थें बौद्ध बाखं सम्बन्धी जूगु दु । थज्याःगु नाटकया कथानक, पात्रतय्गु नां सम्बन्धित पुराण वा जातकयागु जूसां उकी न्हयव्यातइगु परिवेश, आचार विचार थौयागु मूल्य व मान्तया कथं हे जूगु दु । अथे हे थौ दकले अप्वः पिदंगु नाटक समस्यामूलक नाटक खः । थौया भौगु समाजय् विद्यमान - मिसा समस्या, शैक्षिक समस्या, भाषा समस्या, सामाजिक कुरिति, आर्थिक विसंगति, राजनैतिक विकृति आदि हे समस्यामूलक नाटकया मू विषय जूगु दु । समाजय् विद्यमान थज्याःगु विकृति विसंगतियात न्हंकेगु, न्हूगु परिवर्तन न्हूगु मूल्य व मान्यता स्थापना यायेगु थ्व प्रवृत्तिया लेखकतय्गु मू कुतः जूगु दु । अथे हे हास्यव्यंग्य कथंया नाटकय् नं समस्यामयिक विडम्बना, विरोधाभास, कमजोरी आदियात तप्यंक कुखिनेगु पलेसा हास्यव्यंगया माध्यमं स्याच्चुक थासय् लाक्क कयेकेगु जूगु दु । थुकथं थौया नाटककारतय्सं चाहे ऐतिहासिक विषययात ज्वनेगु जुइमा चाहे पौराणिकयात हे ज्वनेगु जुइमा, थौया

ई, थौया इच्छा आकांक्षायात नं प्रतिबिम्बित यायेगु कुतः याःगु दु । समस्यामूलक, हास्यव्यंग नाटककारतय्गु ला खँ हे मन्त । तर थथे खयां नं थौ यातायात, आधुनिक संचार माध्यम आदिया विकासं विश्व गुलि चकने धुंकूगु दु, उलि नेपालभाषाया नाटक विधां व्यापक विषयवस्तुयात कःघायेफुगु मदु नि । थौतक नेपालभाषाय गुलि नं नाटक पिदन्, नेपाः देय्या परिवेशं पिहां बनेफुगु मदुनि । अभ्र धायेगु खःसा नेवाः समाजया परिवेशय् हे अप्वः नाटक लिक्नुना च्वंगु दु सा सामाजिक कुरिति, मिसा समस्या, भाषिक असमानता, आर्थिक विषमता, शोषण आदि थें ज्याःगु सीमित विषयस केन्द्रित जुयाच्वंगु दु । अन्तर्राष्ट्रिय स्थिति वा सम्पूर्ण मानव समाजं भोगय् यानाच्वंगु विश्वव्यापी समस्या - युद्ध, हासोन्मुख जुयाच्वंगु नैतिक मान्यता, यान्त्रिक सभ्यतां ब्वलंकूगु जीवनया जटिलता, न्हूगु आर्थिक परिस्थिति ब्वलंकूगु न्हूगु मानव मूल्य आदि थें ज्याःगु विषययात नेपालभाषाया नाटक ज्वने हे मानिगु दनि । खयेत ला प्रवाह प्रवृत्तिया दृष्टिकोणं नेपालभाषाय नं इब्सनवादी नाटकया प्रवाह नं न्ह्याये धुंकूगु दु सा, समस्यामूलक नाटकय् नं प्रगतिशील प्रवाह पिदने धुंकूगु दु । शिल्पगत रुपं नं हास्यव्यंग, प्रतिकात्मक आदि नाटक नेपालभाषाय प्रचलनय् वयेधुंकूगु दु । अथे खया नं थौ विश्वया नाटक साहित्यय् खनेदुगु विविध अत्याधुनिक प्रयोग प्रविधि नेपालभाषाया नाटकय् अभ्र दुतहये मानिगु हे दनि ।

नेपालभाषा नाटकया ख्यलय् छधाः प्याखं, पूधाः प्याखंया प्रचलन थौ जक मखु प्राचीनकालं निसें हे दु । तर थौ नेपालभाषाय छधाः प्याखंया तुलनाय पूधाः प्याखंया च्वमित तसकं हे म्हो जक खनेदु । अभ्र नाटककारया रुपय् प्रतिष्ठित जुयाः थःगु मूल्य व मान्यता स्थापना याये धुंकूपिं पूधाः प्याखं च्वमित तकं थ्व क्षेत्रं पलायन जूगु दु सा गुलिस्थां मेमेगु विधायात ज्वनेगु याःगु दु । अथे हे पूधाः प्याखंया तुलनाय छधाः प्याखंया च्वज्याय् अप्वः च्वमित खनेदु सां इमिके नं प्रतिवद्धता मदु, निरन्तरता मदु । थौ नेपालभाषा साहित्य ख्यलय् पत्र-पत्रिकाया प्रकाशनं गुलि न्हू च्वमित पिकायेफुगु खः उकि नाटककारत तसकं म्हो हे जक पिकायेफुगु दु । अभ्र विद्यार्थी च्वमितय्गु सहभागिता ला थ्व क्षेत्रय् नगण्य हे धाःसां जिउ । अथे हे नेपालभाषाया चिनाखें, बाखं च्वज्याय् मिसा च्वमितय्सं गुगु सक्रियता क्यंगु खः उगु नाटक विधाय् मदु । प्रकाशकुमारी, शशीकला थें ज्याःपिं छम्ह निम्ह मिसा च्वमिपिं बाहेक मेपिं च्वमिपिं खने हे मदु धाःसां ज्यू । थथे नाटक विधाय् च्वमितय् सहभागिता म्हो जूगु छगू कारण खः - भाव, विचाःया नापं नाटकीय कलाया ज्ञान नं छम्ह नाटककारयात अति आवश्यक जू । मेगु कारण - थौ दबू प्याखंप्रति मनूतय् अभिरुचि म्हो जुयावंगु, थुकिया थाय् टेलिफिल्म, फिल्म आदिं कयाहःगु तथा नेपालभाषाया फिल्म, टेलिफिल्मया विकासया सम्भावना तसकं म्हो हे तिनिगु कारण नं खः । थथे थौ नेपालभाषाया नाटकया रचना दबुलिइ क्यनेत मखु, पाठकतय् कनेत जूगु दु । थौ नाटकया च्वज्या क्यनेत मखु, थःगु खँ पाठकतय् न्यंकेगु नितिं थें जूबलय्, नाटक स्वयाः अःपुक ध्वाथुइक थःगु खँ कनेछिं मेगु विधा बाखं, उपन्यासयात हे थौया



चमितीयसं अप्वः ज्वंगु दु । नाटककार ईश्वरानन्द उपन्यास क्षेत्रय ल्हाः न्ह्याकूगु रामशेखर थें ज्याःम्ह हास्यव्यंग्यकार उपन्यास च्वःगु, धूस्वां साय्मिं उपन्यास विधाय थातं च्वनाछ्वःगु थुकिया दसु खः । थुकथं संख्याया दृष्टि, स्तरया दृष्टि नेपालभाषाया मेमेगु साहित्यिक विधाया तुलनाय नाटक विधा क्वय् हे लानाच्वंगु दु । निम्ह प्यम्ह दुपिं स्तरीय नाटककारतयसं नं उलि निरन्तरता सक्रियता मक्यंगुलिं थ्व नाटक विधा गुलि थौं न्हयज्याये फुगु खः, न्हयज्यायेमाःगु खः उलि न्हयज्याये फुगु मदुनि ।

## समालोचना

**पृष्ठभूमि :-** समालोचनायात पाश्चात्य साहित्यय प्रचलित 'क्रिटिसिज्म' (Criticism) या पर्यायया रूपय थौं भीसं छ्यला वयाच्वना । आलोचना, समीक्षा, विवेचना, अनुशीलन आदि समालोचनाया पर्यायवाची खंग्वः खः । समालोचनाया संक्षिप्त अर्थ खः पारख यायेगु । थुकथं समालोचना साहित्य धायेबलय् साहित्ययात विषय दयेकाः च्वयातःगु रचनाया विवेचना, व्याख्या, मूल्यांकन खः । समालोचनां छुं नं साहित्यिक कृतिइ गुलित स्वायत्तता, स्वनिष्ठता दु, गुलित संगति विसंगति दु, गुलित प्रयोजन प्रतिफलित जूगु दु धकाः क्यनाबिइ । न्ह्यागु प्रकारया साहित्य नं अर्थात् कविता, प्याखं, उपन्यास आदि फुक्कया जीवन नाप तप्यंक, सीदयेक स्वापू दइ व साहित्य धयागु छगू कथं जीवनया व्याख्या खः । समालोचना साहित्यया व्याख्या खः, अथे जूगुलिं समालोचना जीवनया व्याख्याया व्याख्या खः (श्रेष्ठ, १०८८:३) । प्रसिद्ध समालोचक हडसनया धापू कथं 'रचनाय् दुने थ्यंक दुहां वनाः स्वयेगु, उकिइ दुने च्वंगु गुण, शक्ति व सौन्दर्य मालास्वयाः खंकेगु, पिनेया अस्थायी तत्व व दुने च्वंगु शाश्वत गुण फायाः क्यनेगु, उकिया विवेचना व्याख्या यानाबिइगु, लेखकयात प्रेरणा बिइगु, कलात्मक व नैतिक आदर्श, स्पष्ट क्यना बिइगु हे समालोचकया ज्या खः' । अथे हे तुं माथ्य आर्नल्ड - 'विश्वय् सिउगु व खंगु दकलय् भिंगु खें सिइकाः प्रचार याना बिइगु निस्वार्थ वा निर्लिप्त कुतःयात हे समालोचना नालादीगु दु । वाल्टर पेटर्न 'कवि वा कलाकारया गुण खंकेगु, उकियात वालाः फायाः स्पष्ट क्यनाबिइगु हे समालोचनाया ज्या खः' धयादीगु दु । थुकथं छुं नं कृतिया व्याख्या विश्लेषण यायेगुया नापं निर्णय बिइगु हे थौंया समालोचनाया मू कुतः जूगु दु । तर अथे खःसां विभिन्न ईया विभिन्न समालोचकतयसं समालोचना यायेगु क्रमय विभिन्न तरीका छ्यःगु दु । गथे - छुं नं रचनाया समालोचना यायेबलय् गुगुं पिनेया नियमयात कसि मयासें, लेखकया रचनाया नियम वयागु हे रचनाया आधारय न्हयव्वयेगु व रचनाय् छु छु तत्व दु धकाः वालाः फायाः क्यनाबिइगु प्रयोगवादी तरीका (Inductive), छुं नं साहित्य



कला सम्बन्धी सिद्धान्तयात आधार नाला: छुं छगू रचनाया गुण दोष वाला: फाया: थथे च्वं धका: क्व:छिना बिइगु निर्णायक तरीका (Judicial), छुं छगू सिद्धान्त व दर्शनया मिखां कृतियात वाला स्वयेगु दार्शनिक तरीका (Philosophical), छुं छगू कृतियात इतिहासया क्रम कथं विवेचना विश्लेषण यायेगु ऐतिहासिक तरीका (Historical), छगू कृतियात मेगु कृति नाप तुलना यायेगु तुलनात्मक तरीका (Comparative), छुं छगू कृतिया भावनात्मक तथा मनोवैज्ञानिक प्रभावया अध्ययन यायेगु मनोवैज्ञानिक तरीका (Psychological Criticism), भौतिकवाद व वर्ग संघर्षयात आधारभूमि नाला: श्रमजीवी तथा सर्वहारावर्गया हीतया च्यूता: तया: यायेगु प्रगतिवादी समालोचना (Progressive Criticism), छुं नं ग्रन्थयात आधार नाला: व ग्रन्थया नियम, सिद्धान्तया लिधंसाय मेगु कृतिया पारख यायेगु शास्त्रीय समालोचना (Classical Criticism), छुं नं कृतिया सौन्दर्य तथा विशिष्टतायात कया: व्याख्या यायेगु व्याख्यात्मक समालोचना (Interpretative Criticism), सामाजिक यथार्थयात मू आधारभूमि नाला: याइगु समाजशास्त्रीय समालोचना (Socialological Criticism) तथा थौंकन्ह्य भाषाशास्त्रीय अध्ययनया आधारय् ब्वलंगु रूपवादी समालोचना (Formalistic Criticism), संरचनावादी समालोचना (Structuralistic Criticism), शैली वैज्ञानिक समालोचना (Stylistic Criticism) आदि । तर थुपिं समालोचनाया विविध पद्धति, तरीका खया: नं थुमिगु मुक्कं अलग्ग अस्तित्व दुगु खनेमदु । छम्ह हे समालोचकं तःगू समालोचनात्मक पद्धति ल्वाक:बुक: याना: समालोचना याना वयाच्वंगु दु ।

समालोचना साहित्यया इतिहासयात वालास्वल धा:सा विश्व साहित्यया इतिहासय् समालोचना नं छगू पुलांगु विधाया रूपय् न्हयलूवइ । संस्कृत साहित्यय् थौं स्वया: भिगुस: दै न्ह्य: आचार्य भरतमुनि थःगु नाट्यशास्त्र सफुलिइ नाटक सम्बन्धी विधि विधान न्हयथने धुंकुगु दुसा पाश्चात्य साहित्यय् थौं स्वया नीनिस: दै न्ह्य: हे एरिष्टोटलं ग्रीक नाटककारत 'एस्काइलस', 'सोफोक्लिज', 'युरिपिडिज' आदिपिनिगु नाटक स्वया: नाटक सम्बन्धी धारणा थःगु पोइटिक्स सफुलिइ प्वंके धुंकुगु दु । तर समालोचनायात छगू अलग्ग हे साहित्यिक विधाया रूपय् प्रतिस्थापित यायेगु ज्या धा:सा थ्व हे नीगूगु शताब्दीइ वया: तिनि जुल । समालोचना यायेगु वा पारख यायेगु ज्या लेखकं सिर्जना याइगु थें हे ख: । गथे छम्ह कलाकारं थःगु भावना अभिव्यक्त यायेत अनेक लँपु माला: ल्व:गु माध्यम लुइवं शब्द रंग थःगु भाव प्वंकीगु खं, अथे हे समालोचकं नं थःगु हे माध्यम ज्वना: थम्हं हाकनं मेगु कृति सिर्जना याइगु जूगुलिं थौं समालोचनायात नं छगू सृजनाया रूपय् नालेगु यानाहःगु ख: । थथे समालोचनायात नं छगू सृजनात्मक साहित्य कथं नालेगु गुगु ज्या जुल, थुकिया श्रेय पाश्चात्य समालोचकतय्सं हे बिइमा: । खयेत ला संस्कृत साहित्यय् नं 'भरत', 'आनन्दवर्धन', 'अभिनव गुप्त', 'भामह', 'रुद्रत', 'वामन', 'कुन्तक', 'दण्डी' थें ज्या:पिं साहित्याचार्यतय्सं प्रतिपादन यानातःगु साहित्यिक सिद्धान्त, गथे - सामाजिक आध्यात्मिक प्रयोजन व विषयवस्तुयात आधार याना: समालोचना याइगु - रस, ध्वनि, औचित्य सिद्धान्त,

रूपयात स्वया: याइगु - अलंकार, रीति, वक्रोक्ति सिद्धान्त आदिया विकास जूगु जक मखु, थज्या:गु सिद्धान्तं थःथःगु इलय् गाक्कं थाय् कयावःगु व छगू सिद्धान्तया प्रतिपादकतय्सं मेगु सिद्धान्तयात कया: खण्डन मण्डन यायेगु ज्या नं जूगु ख: । तर थुमिगु प्रभाव निगू प्यंगू साहित्यय् जक सीमित जुल । पाश्चात्य समालोचकतय् प्रभाव थें व्यापक व विस्तृत जुइमफुत । अथे हे थौं समालोचना क्षेत्रय् गुलि नं न्हू न्हूगु प्रवाह, प्रयोग प्रवृत्ति ब्वलंगु दु, थुकिया श्रेय नं पाश्चात्य समालोचकतय्सं हे मबिसें मगा: ।

पाश्चात्य समालोचना साहित्यया इतिहास 'एरिष्टोफेनस', 'सोक्रेटिज' 'एरिष्टोटल' आदिपिनिगु रचनां निसें शुरु जूगु नालेगु जूसां समालोचना, साहित्यया विकासय् निरन्तरता सर फिलिप सिडनीया - डिफेन्स अफ पोयट्रि (ई.सं. १५९५) निसें कायम जुल । कविं जीवन गथे खन, अथे हे क्यनेमा:, कविं थःगु राष्ट्र व युगया आकांक्षाया अभिव्यक्ति बिइमा: धयावंह भिंच्यागूगु शदीयाम्ह जोन ड्राइडन' नं समालोचनाया ख्यलय् न्हयथनेबहम्ह व्यक्तित्व ख: । अथे हे क्लासिकल समालोचनाया जग क्वातुकेगुली 'अलेक्जण्डर पोप', 'डा. जोन्सन' पिसं तिब: बिलसा 'गेटे', 'हेगल', 'लेस्सि', थें ज्या:पिं समालोचकत पाखें दार्शनिक समालोचनाया प्रादुर्भाव जुल । भिं'गूगूगु शताब्दी समालोचना साहित्यया विकासय् छगू महत्वपूर्ण युग साबित जुल । भिंच्यागूगु शदीइ जन्म जूगु मनोवैज्ञानिक समालोचनाया विकास, थ्व हे भिं'गूगूगु शताब्दिइ जुल सा थ्व शताब्दी 'कार्ल मार्क्स' थें ज्या:मह दार्शनिक जक मखु, 'कलरीज', 'म्याथु आर्नल्ड', 'रस्किन', 'पेटर' थें ज्या:पिं व्याख्यात्मक समालोचकत नं पिकाल । फ्रायडया मनोवैज्ञानिक सिद्धान्त, कार्ल मार्क्सया द्वन्दात्मक भौतिकवादी सिद्धान्तं साहित्ययात स्वयेगु मिखाय हे हिउपा: हयाबिलसा कलरीजया 'कल्पना सिद्धान्त', 'सौन्दर्य सिद्धान्त' साहित्यया मूल्यांकन पद्धतिइ हिउपा: हयाबिल । साहित्यया कला पक्षयात जक थिइगु ज्या पेटरयात सा जोन रस्किन थें ज्या:पिं समालोचकतय्सं नैतिकता, उपयोगितायात आधारभूमि नाला: समालोचना यायेगु परम्पराया नी यानाबिल । नीगूगु शताब्दी थ्यंबलय् अफ अफ: समालोचकत तथा समालोचना सम्बन्धी सिद्धान्तत खनेदत । वेनेडितो क्रोचे, आई.ए.रिचार्डस, टि.एस् इलियट आदि थुगु युगया न्हयथनेबहपिं समालोचकत ख: । थुपिं समालोचकतय्सं साहित्य सम्बन्धी थःपिनिगु धारणा जक प्वंकेगु या:गु मदु, साहित्यया मूल्यांकन पद्धति, प्रविधिइ नं थःपिनिगु सिद्धान्त, दृष्टिकोण प्वंकेगु या:गु दु । अथे हे हडसन नं थौया आधुनिक युगया छम्ह प्रभावशालीमह समालोचक ख: । हडसन थौया न्हूपिं समालोचकतय्गु निति 'क्लासिक' थें जूगु दु । अथे हे थौं भाषा विज्ञानया अध्ययनया विकास नं भाषाविज्ञानया आधारय् निर्माण जूगु न्हू न्हू कथंया समालोचनात्मक पद्धतितय्गु प्रयोग आपा: जुयावःगु दु । थथे विभिन्न पाश्चात्य समालोचना पद्धति तथा समालोचकतय्गु प्रभाव विश्वया आपालं साहित्यय् लात, नेपालभाषाया समालोचना नं थुकिं विमुख मजुल ।



## नेपालभाषाय् समालोचना

विश्व साहित्यया इतिहासय् समालोचनाया परम्परा आपालं पुलां जुयां नं थौं समालोचना विधा दुने अनेक प्रयोग प्रवाह न्ह्यायेधुकूगु खयां नं नेपालभाषाया साहित्यय् समालोचना साहित्यया विकास यक्व हे लिपा तिनि जुल । ख्वपया जुजु जगतज्योति मल्ल व वंशमणि ओझा (ने.सं. ७३३-७५६)या नां न्ह्यथनातःगु 'संगीच्चन्द्र' (द्वि २२२, बी २८८/२२) अभिलेख ग्रन्थ आतकया दुने लूगु मध्ये दकल्य न्हापांगु प्राचीन नेपालभाषा टीका व्याख्या अभिलेख ग्रन्थ खः । थ्व सफू पण्डित विप्रदास उबलय् शास्त्रीय संगीतमय नाटक प्याखं दयेकेगु विधि स्यनेगु, कनेगु नितिं 'भरतनाट्य शास्त्र' अध्ययन यानाः उकिं माःमाःगु मूल संस्कृत पाठ ल्ययाः नेपालभाषां टीका व्याख्या विवेचना परिभाषा थाय्थासय् दुथनाः सम्पादन यानातःगु अभिलेख ग्रन्थ खः (वैद्य, ने.सं. १११९:१०) । अथे हे जगतप्रकाश मल्ल व वय्कःया मन्त्री चन्द्रशेखर (ने.सं ७५९-७९३) जानाः च्वयातःगु 'नेपालभाषा गीत' (बी ३८८/२२ द्वितीय २२२, ने.सं ७९३) सफुलिइ 'जगतचन्द्र रस सम्बन्धी ज्ञान दुम्ह नापं शिक्षित बुद्धिजिवितयुत लयतायेके फुम्ह' धकाः न्ह्यथनातःगु दु । थुकिं मल्लकालीन नेपालय् काव्यया सैद्धान्तिक पक्षया अध्ययन यायेगु चलन जक मखु, सुं च्वमिया विषयलय् टीका टीप्पणी यायेगु परम्पराया नं नी जुइधुकूगु यचुक खनेदु । अथे हे थुगु हे इलय् रचना जूगु संस्कृतया नेपालभाषां अनुवाद यानातःगु 'गायनलोचन' (बी २८४/९ ने.सं ८१०) सफुलिइ नं रस व रस साधारणीकरण सम्बन्धी विस्तृत व्याख्यात्मक चर्चा यानातःगुलिं काव्य सिद्धान्त सम्बन्धी अध्ययन चिन्तन यायेगु परम्परा थुगु इलय् दुगु स्पष्ट जू (वैद्य, ने.सं. ११०६) । तर धाथेंगु समालोचनात्मक गतिविधिया प्रारम्भ पुनर्जागरणकालय् वयाः तिनि जुल । धर्मआदित्य धर्माचार्यया इलं निसें तिनि नेपालभाषाया समालोचनां थःगु पलाः चिं क्यनेगु यात । धर्मआदित्य धर्माचार्यया 'बुद्ध धर्म व नेपालभाषा' पत्रिकाय् पिदंगु 'नेपालभाषा व थ्वया साहित्य' (दँ १, अंक १-२, पृ ९-२४) नांगु प्रबन्ध रचना हे नेपालभाषाया दकल्य न्हापांगु समालोचनाया पलाः जूगु दु । खयेत ला सिद्धिदास महाजुं नं 'सरल छन्द बोध' (ने.सं १०३६), शूक्ष्म छन्द शास्त्र (ने.सं १०४७) थेंज्याःगु पूर्वीय सैद्धान्तिक समालोचना सम्बन्धी थीथी सफूचा नं च्वयादीगु खः, तर थ्व दक्कं च्वमिया जीवनकालय् प्रकाशन मजुसे यक्व हे लिपा ने.सं १०८७ स तिनि जुल । उकिं प्रकाशनया ल्याखं नेपालभाषाया समालोचनाय् न्हापां पलाः ल्हवनेगु ज्या धर्मआदित्यपाखें हे जूगु दु । नेपालभाषा व थ्वया

साहित्य लेखय् धर्मआदित्य तत्कालीन घण्टाघर पुस्तकालयय् दुगु नेपालभाषाया सफू व पाश्चात्य लेखकतय्सं पिकयातःगु नेपालभाषा सफूया धलःया आधारय् प्राचीन सफूया धलः ब्वयेगु ज्या यानादीगु खः । तर प्राचीन नेपालभाषाया सफूयात विषयगत व विधागत रुपं ब्वथलाः गुगु पारख यायेगु विश्लेषण यायेगु खुबि थ्व लेखय् धर्मआदित्यजुं क्यनादिल (श्रेष्ठ, ने.सं १११०:२१), थुकिं धर्मआदित्ययात नेपालभाषाय् न्हापां समालोचनाया पलाः चिं क्यंम्ह व्यक्तित्वया रुपय् प्रतिस्थापित याकेबिल । च्वय् उल्लेख जूगु फुक्क गतिविधिं नेपालभाषाय् समालोचनाया विकासया छुमां क्यनेगु याःसां समालोचना विधायात निरन्तरता बिइगु तथा सृजनात्मक कृतिया पारख यायेगु ज्या धर्मोदय (ने.सं १०६७) पत्रिकां निसें जुल । थ्व पत्रिकां न्हून्हुपिं लेखकतय्त थाय् बियाः बाखं, कविता, निबन्ध, प्याखं आदि पिकयाः समालोचना विधाया नितिं छुछे पृष्ठभूमि तयार यानाबिलसा मेखेर रत्नध्वज थें ज्याःपिं न्हापा हे नेपाली भाषाया समालोचना विधाय् ल्हाः न्ह्याकेधुकूपिं समालोचकतय्गु समालोचना पिकयाः, नेपालभाषाय् नं समालोचनाया प्रारम्भ यानाबिल । धर्मोदयया ने.सं १०६९ बछला अंकय् भाजु रत्नध्वज जोशीया धर्मोदय कहानीत नांगु समालोचनात्मक लेख पिदन, गुगु लेख नेपालभाषाया हे दकल्य न्हापांगु श्रृजनात्मक कृति सम्बन्धी समालोचनाया लेख जूगु दु । थ्व धर्मोदय पत्रिकाय् पिदंगु २३ पु बाखंयात कंयाः समीक्षा यानातःगु लेख खः । नेपालभाषाय् सृजनात्मक समालोचनाया शुरुवातया इलय् समालोचनायात लेखकया कमि कमजोरी जक क्यनेगु आलोचनाया रुपय् नालेगु गुगु जूगु खः, थ्व खंया संकेत रत्नध्वजया थ्व लेखं स्पष्ट याःगु दु । थुगु इलय् आलोचनां तत्कालीन लेखकत हतोत्साहीत जुइ धकाः समालोचक तर्क ग्याःगु खनेदु (मल्ल, ने.सं ११८७:८) । धर्मोदय पत्रिकाय् 'धर्मोदयया कहानीत' धुनेवं हानं मेगु रत्नध्वजया 'लिसःया लिसः' नांगु समालोचनात्मक लेख पिदन सा, मेपिं न्हूपिं समालोचकत नं तीजक खनेदयेकः वल । थ्वय्कःपिं खः - आदिवज्र - 'आलोचना', रामहरि जोशी - 'श्रीकैदारमान व्यथित'या काव्य साधना, राजेन्द्रमान प्रधान - 'ल्वापु : छगू आलोचना', माधवलाल कर्माचार्य - 'सीस्वांया विषयलय् छत्वाःचा खँ' । थ्वय्कःपिनिगु आगमनं पाश्चात्य समालोचना पद्धतियागु प्रादुर्भाव नेपालभाषाया समालोचनाय् नं जुल । व्याख्या प्रधान कथंया थुगु ईया समालोचनाय् दकल्य सशक्त माधवलालजुयागु 'सीस्वांया विषयलय् छत्वाःचा खँ' खःसा रामहरि जोशीयागु 'श्री कैदारमान व्यथितया काव्य साधना' समालोचनात मध्ये नं उगु ईया छगू ग्यसु ग्यंगु समालोचना जूगु दु । तर थुगु समूहया समालोचकत मध्ये माधवलाल कर्माचार्य छम्हेस्यां जक निरन्तरता बियादिल, रामहरि जोशीजुं मेगु छपु निपु समालोचना च्वयाः ल्हाः दिकादिल सा, आदिवज्र, राजेन्द्रमानपिसं थ्व ख्यलय् हानं दुस्वयेगु यानामदिल ।

नेपालभाषाय् समालोचना साहित्यया प्रारम्भ विश्व साहित्यया समालोचना ख्यलय् अनेक पद्धति, प्रवृत्तिया प्रयोग जुइ धुंकाः तिनि जूगु खः । थ्व हे कथं माधवलालजुं पाश्चात्य समालोचनाय् खनेदुगु प्रयोगवादी, प्रभाववादी



समालोचनाया प्रयोग नेपालभाषाय न यानादिलसा समालोचना सम्बन्धी सैद्धान्तिक दृष्टिकोण न न्हापां थ्वय्कलं हे व्वयादिल ।

नेपालभाषाय समालोचना साहित्यया प्रारम्भ, २००७ सालया प्रजातन्त्र न्ह्यः हे जूगु खःसां समालोचना विधायी वास्तविक विकास २००७ सालया क्रान्ति लिपा हे जक जुल । प्रजातन्त्रया स्वच्छन्द वातावरण छ्छे नेपालभाषां सफू पत्रपत्रिका पिकायेगु जाँगर व जोस तत्कालीन लेखकतय्क वयेका विल सा, मेखेर न्हून्हुगु विधाय ल्हाः न्ह्याकेगु अन्तरभावना बजायेका विल । फलतः नेपालभाषाय धर्मोदय पत्रिका बाहेक मेमेगु न पत्रिका - थौंकन्हे (१०७०), नेपाल (१०७०), पासा (१०७३), तिकिझ्याः (१०८०), नसंचा (?), भ्नी (१०७८), सितु (१०८४), नेपालभाषा न्हिपौ (ने.सं १०७३) आदि पिदन । न्हापा खनेमदुनिपिं न्हूपिं आपालं समालोचकत गथे - पूर्णकाजी ताम्राकार, माणिकलाल श्रेष्ठ, आशाराम शाक्य, सूर्यबहादुर शाक्य, चित्तरञ्जन नेपाली, धस्वां साय्मि, कृष्णचन्द्र सिं प्रधान, कमलप्रकाश मल्ल, सिद्धिचरण श्रेष्ठ, चित्तधर हृदय, गोपालमान श्रेष्ठ, गजसुन्दर प्रधान आदि खनेदत । थ्वय्कःपिनिगु प्रवेशं नेपालभाषाया समालोचनां छगु स्तरियता, विविधता कायम यात । थुगु समूहया आपालं समालोचकत अंग्रेजी साहित्यया ज्ञाता अले गुलिं गुलिं ला पाश्चात्य समालोचनाया विधार्थीत हे जूगुलिं पाश्चात्य समालोचना पद्धतिया प्रभाव नेपालभाषाय गाक्क दुथ्यन । न्हापा खने मदुनिगु यथार्थवादी, प्रगतिवादी समालोचनाया प्रादुर्भाव नेपालभाषाय न जुल सा नेपालभाषाया कृतियात पाश्चात्य लेखक तथा कृति लिसे लनेगु तक जुल । तर थ्व समूहया समालोचकत मध्ये कृष्णचन्द्रसिंह प्रधान, माणिकलाल श्रेष्ठ व कमलप्रकाश मल्ल स्वम्हेस्यां जक समालोचकया रुपय् धस्वानाः थ्व क्षेत्रय् प्रतिबद्धता क्यनादिल, निरन्तरता बियादिल । थथे धर्मोदयया १३ दँ, १४६ अंक दुने -१९ पु, पासा-१७पु, थौंकन्हे ४ पु, नेपाल-२२ पु, तिकिझ्याः-२ पु, नसंचा-२ पु, भ्नी (वर्ष ५, अंक-९)-१९ पु, सितु (अंक ६८)-६७ पु, जः (वर्ष ३ तक)-८ पु समालोचनात्मक लेख पिदन । थुकथं बलुहुं हे जूसां नेपालभाषाय समालोचना लेखनया क्रम त्वाःमदयेक न्ह्यानां वन । ईया हिउपाः लिसें थुपिं पत्रिका मध्ये गुलिं पत्रिका दिनावनसा मेमेगु न्हून्हुगु न्हिपौ, बाःपौ, लय्पौ, ऋतुपौ, दँपौ आदि विभिन्न खलः पुचःपाखें पिदना न च्वन । थुपिं पत्रिका मध्ये गुलिं पत्रिकां प्रत्येक अंकय् छुं न छुं समालोचनात्मक कृतित पिकाकां यंकेगु यात सा गुलिं पत्रिकां समालोचना विशेषांक हे पिकायाः न समालोचना विधायी विकासया निम्ति महत्वपूर्ण भूमिका म्हितां यंकल । अथे हे समालोचकतय् दथुइ आलोचना प्रत्यालोचनाया लहर न न्ह्यात । 'नःलि कविता संग्रह'लय् दुथ्याःगु कविताया आधुनिकतायात कयाः कृष्णचन्द्रसिंह प्रधान, रत्नध्वज जोशी व कमलप्रकाश मल्लपिनिगु आलोचना, प्रत्यालोचना, मध्यस्थता जूगु नेपालभाषा समालोचनाया ख्यलय् छगु उल्लेखनीय घटना खः । ई न्ह्यानावलिसे नेपालभाषाया समालोचनाया ख्यलय् न्हापा खने मदुनिपिं - जनकलाल वैद्य, भुलेन्द्रमान प्रधान, ईश्वरानन्द श्रेष्ठार्चय, सुन्दरकृष्ण जोशी, स्वयम्भूलाल श्रेष्ठ, पुष्पबहादुर चित्रकार,

जगदीश चित्रकार, इन्द्र माली, शंकर श्रेष्ठ, बिमला मानन्धर, मंगलप्रसाद श्रेष्ठ, रे.रे.न. स्यस्पाः, वि.आर. कसाः आदि थें ज्याःपि प्रतिभाशाली सृजनशील समालोचकत न खनेदत नापं सैद्धान्तिक समालोचना नापं व्यावहारिक समालोचनाया कृति न न्हापा स्वयाः अप्वः पिदन । अध्ययन व अन्वेषणात्मक प्रवृत्ति नेपालभाषाया समालोचनाय् न दुथ्यन । अध्ययन व अन्वेषणया लिधंसाय् व्याख्या विवेचना यायेगु व निर्णय बिङ्गु वैज्ञानिक आधारत नेपालभाषाया समालोचनाय् न ब्वलना वल । तर कृति लेखनया हिसाबं साहित्यया मेमेगु विधा-बाखं, चिनाखेंय् गुगु गतिं न्हून्हुपिं च्वमित पिदने फुगु खः, उलि समालोचनाया ख्यलय् पिदंगु खनेमदु । च्वय् उल्लेख जूपिं समालोचकत मध्ये न भुलेन्द्रमान प्रधान, ईश्वरानन्द, सुन्दरकृष्ण जोशी, पुष्पबहादुर चित्रकार, आदिपिसं निपु प्यपु ग्यसुलाःगु समालोचना च्वया समालोचकया भूमिका निर्वाह याःसां केवल जनकलाल वैद्य, इन्द्र माली, जगदीश चित्रकार स्वम्हेस्यां जक थ्व क्षेत्रय् प्रतिबद्धता क्यन, निरन्तरता बिल । मेपिं थ्व क्षेत्रय् थातं च्वना मच्वन ।

२००७ सालया प्रजातन्त्र पश्चात विविध पत्रपत्रिका जक पिदंगु मखुसे आपालं च्वमितय्के सफू पिकायेगु, सफू सम्पादन यायेगु जाँगर व उत्साह न ब्वलन । थुकिया सकारात्मक प्रभाव नेपालभाषाया समालोचना साहित्यय् न लात । थ्व हे कथं थीथी समालोचकतय्गु समालोचना मुनाः समालोचना संग्रह, अथे हे व्यक्तिगत समालोचनाया सफू (सैद्धान्तिक तथा व्यावहारिक) आदि न पिकायेगु जुल । थ्व हे कथं रत्नध्वज जोशीया सम्पादनय् थःगु न्यापु समालोचना व मेपिं प्रतिनिधि समालोचकतय्गु न न्यापु समालोचना तयाः साहित्यया सुलचं (ने.सं १०७२) समालोचना संग्रह पिदनसा, कमलप्रकाश मल्लया सम्पादनय् नःलि स्वना (ने.सं १०८७), 'नःलि कविता छगू विवाद' (ने.सं. १०८७), भरत साय्मिया सम्पादनय् - बाखं समालोचना (ने.सं १०९५), हितकरवीरसिं कसाकारया सम्पादनय् -तुतां, प्रेमबहादुरया सम्पादनय् -सिद्धिदास म्हीके (ने.सं १०८७), डा. जनकलाल वैद्य व प्रेमबहादुरया सम्पादनय् -आशा सफू कुथिया अभिलेख ग्रन्थया वर्णनात्मक धलः (ने.सं ११११), पुष्पबहादुर चित्रकारया सम्पादनय् पासाः समालोचकपिनिगु मिखाय (१०९७), रविन्द्र राजकर्णिकार व पासापिनिगु सम्पादनय् - जिमिगु मिखाय सत्यसती, प्रेमशान्ति तुलाधरया सम्पादनय् -नेपालभाषा व थ्वया साहित्य विभागीय गोष्ठी (ने.सं १११०) आदि पिदन । अथे हे व्यक्तिगत समालोचनाया सफू न आपाल पिदन । चित्तधरया- भ्नीगु साहित्य (ने.सं १०७४), ईश्वरानन्दया - 'सौन्दर्य व आलोचना' (१०८७), भुलेन्द्रमानया- काव्य व काव्यया स्वभाव (१०८७), रत्नध्वजया- 'नेपालभाषा साहित्यया तिसा' (१०९४), माणिकलाल श्रेष्ठया- 'समालोचनाया सिद्धान्त' (ने.सं. १०८८), जनकलाल वैद्यया - सत्यसतीया विवेचना (ने.सं. १०८७), नेपालभाषा काव्यया सृजनात्मक प्रवृत्ति (ने.सं. ११०६) कमलप्रकाश मल्लया - तिकिःमिया स्वांने' (ने.सं. १०९८), नर्मदेश्वर प्रधानया - जिगु विचाः जिगु धापू (ने.सं. १११५) साहित्यया स्वंगः मिखा (ने.सं. १११८), नेपालभाषा साहित्यया इतिहास बारे (ने.सं.१११८), इन्द्र



मालीया - पुलां कसि न्हूगु दापू (ने.सं.१९९७), विद्रोही कवि बुद्ध साय्मि (१९९७) व माध्यमिक कालया छुं (१९९९) व कृष्णचन्द्र सिंह प्रधानया - पला:चिं लिना (ने.सं.१९९६), पुर्ण वैद्यया - कविताया लाग्ना (ने.सं. १९०९), बुद्ध साय्मि - कविता: थौया मिखां आदि समालोचनाया ख्यलय् न्ह्यथनेबहगु नेपालभाषाया वैयक्तिक समालोचनाया संकलनया सफू खः ।

थुपिं समालोचना सम्बन्धी सफू बाहेक, मेमेगु सृजनात्मक कृति सम्बन्धी सफूया भूमिका नं नेपालभाषाया समालोचनाया धुकू जायेकगुलिइ आपालं तिबः बिउगु दु । भूमिका लेखन नं नेपालभाषा समालोचनाया छगू उर्वरभूमि सिद्ध जूगु दु । थःगु सफूया भूमिका, पासाभाइ, न्हूम्ह चमियागु सफूया भूमिका च्वयेगु बाध्यता नं न्हापा समालोचक कथं पिदनेधुकूपिं च्वमितयूत जक मखु पिमदपिं च्वमितयूत नं समालोचक, समीक्षक जुइगु करं क्यंकूगु दु । थथे भूमिका लेखन पाखें नेपालभाषाया समालोचनाया ख्यलय् खनेदयेकःवःपिं च्वमित खः - सिद्धिचरण श्रेष्ठ, चित्तधर 'हृदय', खड्गमान मल्ल, प्रेमबहादुर कसाः, सत्यमोहन जोशी, पूर्णदास श्रेष्ठ, फणिन्द्ररत्न वज्राचार्य, दुर्गालाल श्रेष्ठ, पूर्ण वैद्य, बुद्ध साय्मि आदि । वयकःपिसं भूमिका लेखनया सिलसिलाय् सम्बन्धित कृति प्रति थःपिनिगु धारणा दृष्टिकोण जके मखु, साहित्यया विविध विधा सम्बन्धी परिभाषा बिइगु, व्याख्या विश्लेषण यायेगु, अझ समालोचनाया सैद्धान्तिक पक्ष सम्बन्धी तर्क जः हवलेगु याःगु दु । सिद्धिचरणया 'घःमाः' थज्याःगु हे भूमिका लेखनया छगू नमूना सफू खः । थ्व हे कथं भूमिका लेखन नं नेपालभाषा समालोचनाया छगू अध्याय जूगु दु । तर भूमिका लेखनय् थःपिनिगु तिक्छ समालोचकीय प्रतिभा क्यपिं समालोचकतय्सं धाःसा लिपा नं थ्व क्षेत्रय् प्रतिबद्ध जुयाः निरन्तरता बिउगु म्हो हे जक दु ।

२००७ सालया प्रजातन्त्रया प्रातिफल स्वरूप नेपालभाषायात नं शैक्षिक मान्यता बियाः पठनपाठनय् दुध्याकेगु जुल । ने.सं १०७४ निसं स्कूलया पाठ्यक्रमय् नेपालभाषा दुध्यात सा ने.सं १०८० स आई.ए. ने.सं. १०८२ स बी.ए.या पाठ्यक्रमय् ने.सं १०९७ निसं एम.ए. तथा विद्यावारीधी थ्यंकं नेपालभाषा दुध्यात । थुकिं नेवाःतय्के छगू जाँगर व उत्साह हयाविल । थथे नेपालभाषायात पठनपाठनय् दुध्याकुसैलि छखे पाठ्यक्रमय् मेमेगु सफू नापं सैद्धान्तिक समालोचनाया सफू नं दुध्याकेमाःगु आवश्यक जुलसा मेखेर अध्ययन अध्यापनया सिलसिलाय् थीथी सफूया समीक्षा, विश्लेषण, विवेचना यायेमाःगु आवश्यक जुल । फलस्वरूप पाठ्यक्रमयात आवश्यक जूगु सफू च्वयेग, पुलांगु सफूया अध्ययन अन्वेषण यायेगु, पाठ्यय् दुध्याःगु सफूया समीक्षा विश्लेषण यानाः पिकायेगु ज्या जुल । थुकथं नेपालभाषाया समालोचना ख्यलय् छगू हिउपाः वल । न्हापा हे समालोचकया रुपय् नांजाये धुकूपिं - रत्नध्वज जोशी, माधवलाल कर्माचार्य, कृष्णचन्द्र सिंह प्रधान, माणिकलाल श्रेष्ठ, डा. कमलप्रकाश मल्ल, भुलेन्द्रमान प्रधान, जनकलाल वैद्य, ईश्वरानन्द, पुष्पबहादुर चित्रकार, इन्द्र माली, आशाराम शाक्य, सुन्दरकृष्ण जोशी, समालोचक आदि थेंज्याःपिं शिक्षकतय्सं

सैद्धान्तिक व व्यावहारिक समालोचना च्वयेगु जक याःगु मखुसे न्हापा समालोचना मच्चःनिपिं न्हूपिं प्राध्यापक तथा बौद्धिक व्यक्तित्वतय्सं नं थःपिनिगु उत्तरदायित्व बहन याये कथं थ्व क्षेत्रय् सशक्त रुपं ल्हाः न्ह्याकल । थथे थःपिनिगु नेपालभाषा शिक्षण पेशाया उत्तरदायित्व बहन यायेकथं नेपालभाषाया समालोचना च्वज्याय् ल्हाः न्ह्याकादीपिं न्हापांया पुचःया शिक्षक, प्राध्यापकत - नर्मदेश्वरमान प्रधान, खड्गमान श्रेष्ठ, गिरिजाप्रसाद जोशी, लक्ष्मीभक्त जोशी, शान्तहर्ष वज्राचार्य, काशीनाथ तमोट खःसा लिपाया पुचःया प्राध्यापकत - चन्द्रमान वज्राचार्य, पूर्ण ताम्राकार, प्रेमशान्ति तुलाधर, डा. चुन्दा वज्राचार्य, जनक नेवाः, मदनसेन वज्राचार्य, रामलोचन भा, प्रेमहीरा ताम्राकार, मनोरमा तुलाधर, ओमकारेश्वर श्रेष्ठ, तुयबहादुर महर्जन, तुल्लिलाल सिंह, कृष्णा वैद्य, ज्वाला तुलाधर आदि खः । थथे प्राध्यापन ज्याय् संलग्न जुयाः समालोचना च्वयेगु याःपिं थुपिं प्राध्यापकतय्सं थःपिनिगु पेशा प्रति बफादारी क्यने कथं पाठ्य विषय सम्बन्धी हे अप्वः व्यावहारिक समालोचनाया लेख च्वयेगु याःगु दु । थुमिके अध्ययन अन्वेषण यायेगु क्षमता दु । शूक्ष्म दृष्टि दु । तर अप्वःसिके निरन्तरता धाःसा मदु । थुपिं पाखें नेपालभाषाय् व्याख्यात्मक समालोचनाया विकासय् तिबः जूगु दु ।

प्राध्यापन ज्याय् संलग्न गुरुपिं पाखें जक मखु, नेपालभाषा ब्वनीपिं विद्यार्थीत पाखें नं नेपालभाषाया समालोचना विधाया विकासया नितिं महत्वपूर्ण ज्या जूगु दु । विद्यार्थीतय्गु सक्रियतां अन्तर क्याम्पस साहित्य सम्मेलनया व्यवस्था जुलसा, विभिन्न क्याम्पसपाखें थःथःगु पाःलाः स्वनाः विभिन्न ज्याभवः नापं दँपौ पिकायेगु यात । थज्याःगु साहित्य सम्मेलन, दँपौया प्रकाशन नं समालोचना विधाया विकासया नितिं छुं अवश्य तिबः बिउगु दु । तर विद्यार्थीतय्गु समालोचना विधाय् महत्वपूर्ण योगदान पठनपाठनया सिलसिलाय् यायेमाःगु शोधकार्य पाखें जूगु दु । नेपालभाषायात एम.ए.या नितिं स्वीकृति बिउबलय् न्हापां शोधपत्र च्वयाः एम.ए. याकेबिउगु खः । तर लिपा एम.ए.या नियमित पठनपाठन यायेगु व्यवस्था जुसैलिं पाठ्यांसय् छगू पत्र शोधपत्र च्वयेगु नं दुध्यात । थज्याःगु शोधपत्र च्वज्यां नं नेपालभाषाया समालोचना विकासया नितिं महत्वपूर्ण योगदान बिउगु दु । अथे हे नेपालभाषाय् विद्यावारीधी याइपिं विद्यार्थीत पाखें नं थ्व विधाया ख्यलय् महत्वपूर्ण उपलब्धी जूगु दु । तर थज्याःगु शोधपत्र अप्वः थें त्रिभुवन विश्वविद्यालय केन्द्रीय विभाग व पुस्तकालयय् जक लिकुनाचन । प्रकाशनय् हयेगु ज्या मजू । फलस्वरूप सर्वसाधारण जनता थज्याःगु पत्र अध्ययन पाखें विमुख जुइमाःगु दु । थथे शोध कार्यया भवलय् प्रकाशित जूगु छगू उपलब्धिमुलक कृति डा. जनकलाल वैद्यजुयागु 'नेपालभाषा काव्य सृजना प्रवृत्ति' (ने.सं १९०६) नं खः ।

नेपालभाषायात पठन पाठनय् दुध्याकाः शैक्षिक मान्यता बिसैलिं त्रि.वि.वि. नापं अनेक संघ संस्थापाखें नं नेपालभाषा व थ्वया साहित्य सम्बन्धी गोष्ठी न्यायेकेगु, सहलह यायेगु ज्या जुयावल । थज्याःगु गोष्ठी नं नेपालभाषाया



समालोचना विकासया निति महत्वपूर्ण योगदान बिउगु दु । नेपालभाषाया समालोचना इतिहासय् न्हापांगु थज्याःगु गोष्ठीइ ने.सं. १०८७ स सिद्धिदास सच्चिदैं बुदिया लसताय् स्वन्हुयंकं कार्यपत्र न्ह्यब्वःगु खःसा सिद्धिदास बुदिया लसताय् समालोचना सम्बन्धी जक खगू ग्यसुलाःगु सफू नं पिदन । सिद्धिदास सच्चिदैं बुदिया गोष्ठी बाहेक जगतसुन्दर मल्ल सच्चिदैं बुदिया लसताय् जूगु गोष्ठी (ने.सं. ११०४) जगतसुन्दर मल्ल सम्बन्धी कार्यपत्र प्रस्तुत जुलसा, निष्ठानन्द वज्राचार्य बुदिया लसताय् जूगु गोष्ठी (ने.सं. ११०५) स निष्ठानन्द व वय्कःया 'ललितविस्तर' सम्बन्धी कार्यपत्र प्रस्तुत जुल । अथे हे समालोचनाया इतिहासय् उल्लेख यायेबहगु त्रि.वि.वि.पाखें डा. सुन्दरकृष्ण जोशीया संयोजकत्वय् संचालन जूगु- नेपालभाषा व श्वया साहित्य विभागीय गोष्ठी (ने.सं. ११०८), स्वम्ह वयोवृद्ध कविपिनिगु साहित्यिक देन गोष्ठी (ने.सं. १११०) नं खः । 'नेपालभाषा व श्वया साहित्य विभागीय गोष्ठी'या कार्यपत्रयात गोष्ठीइ हे जक लिकुंका तयेगु मयासे सर्वसाधारणयात सुसूचित जुइकेगु निति प्रकाशनय् नं हल । अथे हे नेपालभाषाया मेमेगु संस्थापाखें नं विविध गोष्ठी आदिया संचालन यानाः गोष्ठीइ ब्वंगु थीथी रचना समीक्षात्मक टिका टिप्पणी पिकयाः थ्व विधाया विकासया नितिं तिबः बिइगु ज्या जूगु दु । तर थौं तकया नेपालभाषा साहित्यिक गोष्ठीइ गुलि नं कार्यपत्र न्ह्यब्वयेगु जुल, न्हापा हे समालोचकया रुपय् प्रतिष्ठित जुइधुकूपिं च्वमित पाखें हे जक जुल, गुलि नं कार्यपत्रया टिप्पणी च्वयेगु ज्या जुल, व नं थज्याःपिं पाखें हे जुल । उकिं थज्याःगु गोष्ठीं न्हून्हुगु समालोचनाया च्वसु, शोधपत्र पिकायेगु याःसां न्हून्हुपिं समालोचकत उलि पिकाये मफुनि ।

प्राध्यापन पेशाय् संलग्न मजुसां नेपालभाषाया शैक्षिक तथा साहित्यिक क्षेत्रया उन्नतिया नितिं विभिन्न पत्रपत्रिकाय् च्वसु च्वयाः थःपिनिगु समालोचकीय प्रतिभा ब्यावयाच्वंपि युवा च्वमितय्सं नं समालोचना विधाया विकासया नितिं आपालं महत्वपूर्ण भूमिका म्हिता वयाच्वंगु दु । थ्वय्कःपिं खः - सिन्हःमू, रामभक्त श्रेष्ठ, भूमिहेश जोशी, मल्ल के. सुन्दर, डा. केशवमान शाक्य, डा. पुष्पराज राजकर्णिकार, गोवर्धन शर्मा, मनमोहन श्रेष्ठ, बालगोपाल श्रेष्ठ, रमेशकाजि स्थापित, अपर्णा प्रधान, रविन्द्र राजकर्णिकार आदि । थ्वय्कःपिंके अध्ययन दु, शूक्ष्म दृष्टि दु, संयम पूर्वक विश्लेषण यायेगु क्षमता दु, निर्णय बीगु युवा जोश दु, तर समालोचना च्वयेगुलिइ निरन्तरता प्रतिबद्धता धाःसा खनेमदुनि । थौं नेपालभाषाया समालोचनाया ख्यलय् खनेदुपिं प्रमुख समालोचकत थुकथं दु ।

### प्रमुख समालोचक

धर्मआदित्य धर्माचार्य (ने.सं. १०२२)

- नेपालभाषा व श्वया साहित्य (ने.सं. १०४७)

नेपालभाषा साहित्यया इतिहास/२५३

धर्मआदित्य धर्माचार्य नेपालभाषाय् दकलय् न्हापां पत्रिका पिकयादीम्ह पत्रकार जक मखु समालोचनाया ख्यलय् न्हापां पलाः तयादीम्ह समालोचक नं खः । थ्वय्कःया 'बुद्ध धर्म व नेपालभाषा पत्रिका'य् पिदंगु 'नेपालभाषा व श्वया साहित्य' नांगु रचनायात नेपालभाषाया न्हापांगु समालोचनाया पलाः नालातःगु दु । धर्मआदित्य मूलत छम्ह भाषा अनुरागी खः । थ्व हे कथं वय्कलं नेपालभाषा व श्वया साहित्य लेख स्वदेशी तथा विदेशी विद्वानतय्त नेपालभाषा साहित्यया इतिहास सम्बन्धी ज्ञान बिइगु नितिं च्वयादीगु खः, समालोचनाया अभावपूर्ति यायेगु उदेश्यं च्वयादीगु मखु । तर थ्व लेखय् थें थ्व स्वयाः न्ह्यःयापिं सुं नं लेखकया रचनाय् थुकथं अन्वेषण, विश्लेषण तथा निर्णय यायेगु थें ज्याःगु समालोचनात्मक प्रवृत्ति खनेमदु । उकिं 'नेपालभाषा व श्वया साहित्य' लेखयात हे नेपालभाषाया न्हापांगु समालोचनाया प्रयास कथं नालाकायेगु जूगु खः । थ्व लेखय् धर्मआदित्य सुं नं च्वमिया कृतियात कयाः आलोचना, विवेचना यायेगु मयासे नेपालभाषाया थीथी विषय सम्बन्धी सफूया धलः ब्वयेगु ज्या यानादीगु दु । तर थथे खयाः नं प्राचीन कृतियात गुगु विधाय् तयेबहःजू धकाः निर्णय यानातःगु, गुगु विधाय् छु छु कृति नां काये योग्य जू धकाः पारख यानातःगुलिं, धर्मआदित्य समालोचनाया ख्यलय् न्हापां पलाः ल्हवम्ह व्यक्तित्व जूगु दु । 'नेपालभाषा व श्वया साहित्य' नांयागु लेख धर्मआदित्यजुं न्हापां थःगु सम्पादनय् पिदंगु 'बुद्धधर्म व नेपालभाषा' पत्रिकाय् (दं १, अंक १-२, पौ १-२४) क्रमिक रुपं पिकयादीगु खः, तर लिपा चित्तधर 'हृदय' जुं थुकियात छथासं मुनाः सफूया रुपय् पिकयादिल । खयेत ला थौं धर्मआदित्यया समालोचना धायेबहगु सफू थ्व हे छगू खयां नं थ्वय्कःया 'बुद्ध धर्म व नेपालभाषा' पत्रिकाय् पिदंगु 'बुद्ध चरित्र' नांगु मेगु गद्य रचनाय् नं थ्वय्कःया समालोचकीय प्रतिभा जाहां थिनाच्वंगु दु । थ्व रचनाय् कालिदासया 'रघुवंश' नाटकया प्रभाव अश्वघोषया 'बुद्ध चरित्र'य् छुं छुं अंशय् लाःगु दु धकाः क्यनातःगु दु । थुकथं थ्व रचनां नं धर्मआदित्यया, तुलना यायेगु, पारख यायेगु थें ज्याःगु समालोचकीय गुण ब्याबिउगु दु ।

बैकुण्ठप्रसाद लाकौल (ने.सं. १०२६)

- रस अलंकार छन्द (ने.सं. १०९८)

- नेपालय् स्थविरवाद गुकथं वःगु खः (ने.सं. ११०५)

- नेपालय् हानं स्थविरवाद वयेकेत व नेपालभाषा हवयेकेत

- धर्माचार्य (ने.सं. ११०५)

- जिगु मिखाय् जे.एस्. मल्ल (ने.सं. ११०८)

बैकुण्ठप्रसाद लाकौल नेपालभाषाया काव्य ख्यलय् स्वच्छन्दवादया न्हापां प्रयोग याःम्ह छम्ह कवि जक मजुसे नेपालभाषाया अग्रज साहित्यिक व्यक्तित्वतय्गु जीवनी व क्रियाकलापायात समीक्षात्मक रुपं ब्वयेगु यानादीम्ह छम्ह समीक्षक नं खः । थ्वय्कःया समीक्षक व्यक्तित्वया पूर्वाभास 'बुद्ध धर्म व नेपालभाषा' पत्रिकाय् पिदंगु 'धर्म आदित्यया धर्म सेवा' (दं-१, अंक १-२, पौ ७)

नेपालभाषा साहित्यया इतिहास/२५४



प्रशस्ति चिनाखँय हे खने दये धुंकूगु खः । थ्वय्कःया रचनाय् जीवनपरकता, व्याख्यात्मता अप्वः थाय् काःगु दु । व्यक्तित्वतय्गु जीवनीयात समीक्षात्मक रुपं व्वयेगु जक मखु, पूवीयं समालोचना सम्बन्धी सैद्धान्तिक ज्ञानयात नं अःपुक ध्वाथुइक व्वयेगु ज्या थ्वय्कलं यानादीगु दु । 'रस अलंकार छन्द' सफू थुकिया दसु खः ।

**चित्तधर हृदय (१०२६-११०२)**

- भनीगु साहित्य (१०७४)

नेपालभाषा व साहित्य ख्यलय् छम्ह साहित्यिक प्रतिभाया रुपय् जक मखु, छगू प्रतिस्थापित संस्थाया रुपय् परिचितम्ह चित्तधर 'हृदय' जुया समालोचनात्मक प्रतिभाया परिचय बिइगु छगू कृति 'भनीगु साहित्य' खःसा, मेगु सफूया भूमिकाया रुपय् च्वयातःगु आपालं रचनां नं थ्वय्कःया समालोचनात्मक प्रवृत्तिया जः ह्वलेगु याःगु दु । धर्मआदित्य प्राचीन कृतियात कयाः इतिहास व्वयेगु व वर्गिकरण यायेगु ज्या यानादी थें व हे परम्पराय् च्वनाः वा व हे प्रवाहायात अभ् न्हयज्याकाः चित्तधर 'हृदय' जुं प्राचीन कृतियागु जक मखु, थः समकालीन च्वमितय्गु कृतिया नं चर्चा यानातःगु 'भनीगु साहित्य'यात धर्मआदित्यया लेखसिकं समालोचनाया दिशाय् छपलाः न्हयज्याःगु धाये बहज् (श्रेष्ठ, १०८८ : १७५) थ्वय्कःया भनीगु साहित्य सफलइ दुथ्याःगु फुक्क रचनायात समालोचना धायेमफुसां, गुलिं गुलिं रचना गथे - नेपालभाषा साहित्यया विविध गतिविधि, साहित्यिक महारथी व वय्कःपिनिगु कार्य तथा कृतिया लेखाजोखा यानातःगुलिइ चित्तधरया समालोचनात्मक व्यक्तित्व जक मखु समालोचनात्मक पद्धति तर्क प्रतिविम्बित जूगु दु । अथे हे 'हृदय'जुया भूमिका लेखन विशेषतः थः समकालीन तथा अग्रज लेखकतय्गु कृति लिसे सम्बन्धीत जूगु दु । थः समकालीन च्वमितय्गु भूमिका लेखनय् विशेष यानाः च्वमितय् प्रेरणा प्रोत्साहन बिइगुलिइ हे थ्वय्कः अप्वः तक्यनादीगु दु । समग्र रुपं 'हृदय'जुया समालोचनात्मक प्रवृत्तियात मूल्यांकन यायेबलय् थ्वय्कःयात छम्ह प्रयोगवादी समालोचक कथं नाले छिं । छुं नं कृतिया विस्तृत अध्ययन विश्लेषण यानाः उकिं हे मूल्य निरूपण यायेगु थ्वय्कःया मू चेष्टा जूगु दु । थ्वय्कःया समालोचना सम्बन्धी धारणा खः, समालोचना धयागु हे कवि कलाकारया कृतिइ छु छु दु धकाः वालाः क्यनाबिइगु जक खः, बांलाः बांमलाः धकाः पारख यायेगु च्वमितय्गु त्वःता बिइमाः । थ्व धारणा हृदयजुया 'फोटोग्राफर' धयागु कवितां स्पष्ट क्यंगु दु । तर समालोचक डा. कमल प्रकाश मल्लजुं 'हृदय' जुयात छम्ह साहित्यया इतिहासकार वा आलोचकतय् तथ्यांक चूलाका बिइम्ह छम्ह (Enumerator) व्यक्ति कथं खंकादीगु दुसा, मेम्ह समालोचक माणिकलाल श्रेष्ठजुं थ्वय्कःयात क्लासिकल व इण्डक्टीभ समालोचकया रुपय् नालादीगु दु । अथे हे माणिकलालजुया धापू कथं हृदयजुयाके तेल्लाःगु मिखा व थुइका कायेगु सम्बेदनशीलता व बौद्धिक समदृष्टि नं दु, तर भावावेशयात पनेगु संयम मदु ।

नेपालभाषा साहित्यया इतिहास/२५५

**खड्गमान मल्ल (ने.सं १०३१-१११८)**

- फुटकर

नेपालभाषाय् समीक्षात्मक भूमिका (न्हू बाखं पुचः - ने.सं १०८०) परिचयात्मक सफू धलः (नेपाल ऋतु पौ, ल्याः ५ ने.सं १०७३) च्वयाः नेपालभाषाया समालोचनायात तिबः बियादीम्ह छम्ह व्यक्तित्व खड्गमान मल्ल नं खः । नेपाली भाषा प्रकाशनी समितिया हाकिम जुयाच्चना दीबलय् थ्वय्कलं अन अड्डाय् प्रकाशनया स्वीकृतिया निंति वःगु तत्कालीन थीथी नेपालभाषाया सफूया अध्ययन यानाः उगु हे सफूया समीक्षात्मक टिप्पणी धलः दयेकाः प्रकाशनय् हयादिल । धर्मआदित्य धर्माचार्यया लिउ नेपालभाषा सफूया धलः विवरण दयेकादीम्ह उबलय् सरकारी अधिकृत मध्ये वय्कः न्हापांम्ह खः (वैद्य, ने.सं १११९, २० : १७) । थ्वय्कःया थज्याःगु सफू धलः, सफूया भूमिका व्वनेबलय् थ्वय्कःयाके दुगु व्याख्यात्मक शक्ति, पारख यायेगु खुवि यचुक खनेदु । थथे खयां नं थ्वय्कलं मूलरुपं समालोचना च्वयेगु धाःसा यानामदी । अयन थ्वय्कःयात समालोचक कथं नालातःगु दु ।

**ठाकुरलाल मानन्धर (ने.सं. १०३२-११११)**

- फुटकर

अन्वेषणात्मक निबन्ध च्वयेगुली नांजाःम्ह ठाकुरलाल मानन्धरयात नेपालभाषाया सैद्धान्तिक समालोचनाया ख्यलय् नं योगदान बिउम्ह छम्ह प्रारम्भिक ईयाम्ह समालोचक कथं नाले छिं । थ्वय्कःया 'लय्ता' (नेपाल ऋतु पौ थ्यंल्याः ११, ने.सं १०७४) नांगु कृति, संस्कृतया रस सम्बन्धी सिद्धान्तय् आधारित स्वतन्त्र चिन्तन मनन दुगु छपु विवेचनात्मक च्वसु खः । छम्ह समालोचकयाके दयेमाःगु अध्ययन, अन्वेषण, व्याख्या विश्लेषण तथा तर्क यायेगु क्षमता थ्वय्कःयाके गाकं दु । थथे छम्ह समालोचकयाके दयेमाःगु क्षमता दयां नं थ्वय्कः थ्व क्षेत्रय् प्रतिबद्ध धाःसा जुयामदी ।

**सिद्धिचरण श्रेष्ठ (ने.सं १०३२-१११२)**

सिद्धिचरणया घःमाः (सम्पादक-फणिन्द्ररत्न बज्राचार्य ने.सं १११६)

फुटकर

थःगु जीवनकालय् समालोचनाया सफू पिकया मदीसां नेपालभाषाया आपालं च्वमितय्गु सफलइ भूमिका च्वयाः नेपालभाषाया समालोचनाया विकासय् छगू महत्वपूर्ण देन बियाभाःम्ह छम्ह अग्रज समालोचक सिद्धिचरण श्रेष्ठ नं खः । समालोचकतय् छम्ह यथार्थवादी समालोचकया रुपय् खंकादीम्ह सिद्धिचरण श्रेष्ठयाके साहित्यया विविध विधा सम्बन्धी विशद ज्ञान, तीक्ष्ण दृष्टि, सही मूल्यांकन यायेगु क्षमता गाकं दु । खयेत ला थ्वय्कःया फुक्क धया थें समालोचनात्मक लेख व्यावहारिक समालोचना सम्बन्धी जूगु दु, तर अथे हे खयां नं थज्याःगु लेखय् साहित्यया विविध विधा सम्बन्धी थःगु धारणा, दृष्टिकोण नं

नेपालभाषा साहित्यया इतिहास/२५६



व्येगु यानादीगु दु । थुकथं सिद्धिचरण छम्ह मर्मज्ञ, सहृदयी, सुस्पष्ट विचारयाम्ह समालोचक जूगु दु । सिद्धिचरणजुया प्रकाशनया ल्याखं नेपाल (वर्ष-१, अंक-१) पत्रिकाय् पिदंगु 'भीगु भाषाय् भी कवि चित्तधर' नांगु 'हृदय'जुया काव्य प्रवृत्ति, काव्यया विकासक्रमयात विस्तृत रुपं न्हयब्वयातःगु लेख न्हापांगु खःसां, सिद्धिचरणया समालोचना च्वेगु अभ्यास जेलकालय् हे जुइ धुकल धयागु खं 'सिद्धिचरणया निबन्ध' (ने.सं १११२) नांगु सफलइ दुध्याःगु 'बाखंजात गय् जुइमाः' धयागु रचनां स्पष्ट याःगु दु । थुकथं समालोचनाया सफू हे धकाः च्वया मवसां थ्व विधाय् थःगु विशेष योगदान बियावम्ह नेपालभाषा समालोचना ख्यःया छगः थीगु नगु सिद्धिचरण नं जूगु दु ।

**रत्नध्वज जोशी (१०३६-११०९)**

- नेपालभाषा साहित्यया तिसा (१०९४)

- लिसः (११००)

- आरती (११०७)

नेपाली भाषा साहित्यय् छम्ह समालोचकया रुपय् प्रतिस्थापित जुइ धुंकाः तिन नेपालभाषाया समालोचना विधाय् ल्हाः न्ह्याकादीम्ह रत्नध्वज जोशी नेपालभाषाया सृजनात्मक कृति सम्बन्धी दकलय् न्हापां समीक्षात्मक लेख च्वयादीम्ह समालोचक खः । थुकथं धर्मोदय पत्रिकाय् ने.सं १०६९ वछला अंकस पिदंगु 'धर्मोदयया कहानीत' नांगु समीक्षात्मक लेख थ्वयाकःया जक नेपालभाषाय् न्हापांगु समालोचना मजुसे नेपालभाषाया हे न्हापांगु सृजनात्मक कृति सम्बन्धी समालोचनात्मक लेख जूगु दु । खयेत ला थ्वय्कलं अप्वः थें व्यावहारिक समालोचना च्वयादीगु दु, तर अथे खयां नं सम्बन्धित कृतिया विश्लेषण मूल्यांकन यानादीबलय् थःगु नं साहित्य सम्बन्धी धारणा सिद्धान्त व्वेगु यानादीगु दु । तर थज्याःगु धारणा सिद्धान्त छगू निश्चित व मौलिक मजुसे प्रसिद्ध समालोचकत पाखें दं वःगु खनेदु । थ्वय्कलं विशेषतः पूर्वीय साहित्यया शास्त्रीय पद्धतियात, कसि थें छयलाः थीथी कृतिया मूल्यांकन यानादीगु दु । थ्व नियम कथं लाःगु रचनायात भि मलाःगु मभिं धायेगु प्रवृत्ति रत्नध्वजयाके दु (श्रेष्ठ, ने.सं. १०८८:१७४) । थथे यानादीबलय् थनया शैक्षिक स्तर, देशकाल वातावरणयात नं ध्यान तयाः धाःसा समालोचना यानादीगु दु । थम्हं समालोचना यानागु कृतिया मूल्यांकन यायेत उज्वःगु हे मेगु कृतिलिसे लना स्वयेगु तुलनात्मक पद्धति नं थ्वय्कःया समालोचनाया छगू विशेषता जूगु दु । रत्नध्वज जोशीया सृजनात्मक कृतिया समालोचना मध्ये बाखं विधाय् वय्कःया समालोचना गम्भीर उपलब्धीमूलक जूगु दु । बाखंया समालोचना यानादीबलय् विशेषतः विषय पक्ष स्वयाः नं शैली व शिल्प पक्षय् थ्वय्कः अप्वः केन्द्रित जुयादीगु दु । अथे हे थ्वय्कःया समालोचना सम्बन्धी अवधारणा थ्वय्कलं च्वयादीगु निबन्धय् नं पिज्वःगु दु । थःगु कृति सम्बन्धी सुनानं टिका टिप्पणी यायेवं तुरन्त प्रतिवाद यानादीम्ह रत्नध्वजया समालोचनाया प्रतिवाद मेपिं समालोचकतय्गु स्वयाः अप्वः

हे पिदंगु दु । थुकथं रत्नध्वज जोशीया समालोचना पद्धतिइ मिखा व्वेबलय् बलय् वय्कःयात छम्ह शास्त्रीय समालोचकया रुपय् प्रतिस्थापित याये छिं ।

**प्रेमबहादुर कसाः (ने.स. १०३७-११११)**

- फुटकर

भूमिका लेखन पाखें नेपालभाषाया समालोचनाया धुकू जायेका थकूम्ह छम्ह व्यक्तित्व प्रेमबहादुर कसाः नं खः । थ्वय्कःया समालोचनाया सफू व समालोचना सम्बन्धी अलग्ग लेख पिदंगु मदुसां, 'बाखंम्ये' 'रत्नेश्वर प्रार्थुभाव,' 'खाखें पुचः नगु', 'शुक बहत्तरी' आदि सफूया भूमिका व्वनेबलय् थ्वय्कःयात छम्ह सफल समालोचकया रुपय् कायेफु । बाखंम्ये, सफूया भूमिकाय् बाखंम्ये सम्बन्धी परिभाषा, धारणा न्हयब्वयादीगु दु सा बाखंम्ये सफू दुने छपु छपु बाखंम्येयात कयाः गुगु दुवालादिल उकिं वय्कःया समालोचनात्मक प्रतिभाया बांलाक परिचय बिउगु दु । अथे हे 'रत्नेश्वर प्रार्थुभाव' नाटकय् गुगु विस्तृत भूमिका बियातल, उकिं भीगु प्याखं साहित्ययागु इतिहास, परम्परा व प्रवृत्तियात यचुका बिउगु दु सा, 'खाखें पुचः नगु' निबन्धया भूमिकां निबन्ध सम्बन्धी वय्कःया धारणा जक मखु सैद्धान्तिक ज्ञानया नं जः ह्वलेगु याःगु दु । 'शुक बहत्तरी' सफूया दुय्यंगु भूमिकां थ्वय्कःयाके दुगु विश्लेषणात्मक क्षमता अन्वेषणात्मक प्रवृत्ति, निर्णयात्मक शक्तिया परिचय बिउगु दु । प्रेमबहादुर कसाःया समालोचना छद्म नामय् नं पिदंगु खनेदु । 'ती' बाखं पुचःयात कयाः जूगु समालोचनाया प्रत्यालोचना कसाःजुयागु हे खः धयागु आपाःसिया बिचाः दु । थथे समालोचकया प्रतिभा दयाः नं खनेदयेक समालोचना च्वयाः समालोचकया रुपय् न्हयःने दं मभाःम्ह छम्ह च्वमि प्रेमबहादुर कसाः नं जूगु दु ।

**पूर्णकाजी ताम्राकार ( ने.सं. १०४०)**

- फुटकर

बागू शदी न्हयलं निसें थौं तकं निरन्तर रुपं नेपालभाषाया भाषिक साहित्यिक क्रियाकलापय् थःत फ्याना भाःम्ह पूर्णकाजी ताम्राकार नेपालभाषाया प्रारम्भिक ईया समालोचकपिं मध्ये नं छम्ह खः । थ्वय्कःया धर्मोदय पत्रिका (ने.सं. १०६९ ६:४) स पिदंगु ख्ववि व भाजु हरिकृष्ण नेपालभाषाया न्हापा न्हापांगु व्यवहारिक समालोचनात मध्ये छगू खः । प्रौढ भाषा शैली, व्याख्यात्मक पद्धति थ्वय्कःया समालोचनाया विशेषता खः ।

**लक्ष्मीभक्त जोशी (ने.सं १०४२-११११)**

- फुटकर

नेपालभाषाया प्राध्यापनयात तिवः बिइगु तातुनाः समालोचना क्षेत्रय् ल्हाः न्ह्याकादीम्ह छम्ह समालोचक लक्ष्मीभक्त जोशी नं खः । व्याख्यात्मक प्रवृत्तियागु थ्वय्कःया थीथी समालोचनात्मक लेख विशेषतः छपु बाखं, छपु नाटक छगू



उपन्यासया शिर्षकयात कयाः चव्येगु जूगु दु । थ्वय्कःया समालोचनात्मक लेखं नेपालभाषाया पठन पाठनयात सुगम यायेगुलिइ तिवः बिउगु दु । थ्वय्कःया समालोचना 'व्याख्यात्मक' समालोचना पद्धतियात ब्वलंकेगुलिइ वः बिउगु दु ।

ईश्वरानन्द श्रेष्ठाचार्य (ने.सं. १०४६)

- सौन्दर्य व आलोचना (ने.सं. १०८७)
- नुगल्य बुद्ध (ने.सं. १०८७)
- इमा मन्दः (ने.सं. १०९१)

सैद्धान्तिक तथा व्यावहारिक समालोचना निताय नं ल्हाः न्ह्याकादीम्ह ईश्वरानन्द नेपालभाषाया न्हापां न्हापांयापि समालोचकत मध्ये छम्ह खः । थ्वय्कः मूलतः यथार्थवादी समालोचक खः । थ्वय्कःया 'सौन्दर्य व आलोचना' नांगु सैद्धान्तिक समालोचना सम्बन्धी सफुलिं मार्क्सवादी विचार, दृष्टिकोणयात सरल व सुगम तरिकां ब्वयाबिउगु दु । व्यावहारिक समालोचनाय् थ्वय्कलं मूलतः व्याख्यात्मक प्रवृत्तियात नालादीगु दु । तीक्ष्ण अन्तर्दृष्टि, तर्क यायेगु शक्ति, सशक्त अभिव्यक्ति बिइगु प्रतिभा थ्वय्कःयाके दयां नं संयम व सन्तुलनयात धाःसा थ्वय्कलं उलि कायम यायेफुगु खनेमदु ।

कृष्णचन्द्रसिंह प्रधान (ने.सं. १०४६)

- भीगु बाखं साहित्य (ने.सं. १०९७)
- पलाःचिं लिना (ने.सं. १११६)

थौं नेपाली व नेपालभाषा निगुलिं भाषाया साहित्य क्षेत्रय् उलि हे चर्चित परिचितम्ह वरिष्ठ समालोचक कृष्णचन्द्रसिंह प्रधान २००७ सालया क्रान्तिं हःगु उत्साह व उमंगया वातावरण नेपालभाषाया समालोचना ख्यलय् दुतहःम्ह छम्ह समालोचक खः । नेपालभाषा साहित्यय् कृतिया समालोचना व समालोचनाया सिद्धान्त निगू पक्षय् नं योगदान बियादीम्ह समालोचक कृष्णचन्द्रसिंह प्रधान नेपालभाषाय् दकल्य न्हापां यथार्थवादी समालोचना परम्पराया नी स्वनादीम्ह समालोचक नं खः । 'साहित्यया मू', 'नेपाल-साहित्यया विकास व भीगु ज्या', 'प्रगतिशील साहित्यया विकास व भीगु ज्या', 'प्रगतिशील साहित्यया लँपु' आदि थें ज्याःगु सैद्धान्तिक समालोचना च्वयाः यथार्थवादी समालोचनाया जः ह्वलादीम्ह कृष्णचन्द्रसिंह प्रधानजुं लिपा थ्व प्रवृत्तियात नालाः समालोचना यायेगु त्वःतादिल । थौंकन्हय् थ्वय्कः नेपालभाषाया समालोचना क्षेत्रय् छम्ह निर्भिक व त्याजिक निर्णय बिइम्ह समालोचकया रुपय् कृष्णचन्द्रसिंह प्रधान प्रतिष्ठित जूगु दु । गहन अध्ययन, विशुद्ध विश्लेषण, तीक्ष्ण अन्तर्दृष्टि, स्पष्ट अभिव्यक्ति, निष्पक्ष मूल्य निरूपण थें ज्याःगु गुण जाःगु थ्वय्कःया समालोचनां नेपालभाषाया समालोचनाया विधायात हे छगू स्तरीयता बिउगु दु । तर थ्वय्कःया विशिष्टता धाये ला ब्वमितयगु कमजोरी धाये ला, थ्वय्कःया भाषा शैलीयात कयाः समालोचकतय्सं सारगर्भित ओजपूर्ण भाषा शिल्पया प्रयोक्ता धकाः थ्वय्कःयात च्वछायेगु याःसां,

नेपालभाषा साहित्यया इतिहास/२५९

नेपालभाषाया जनपक्षीय समालोचनाया प्रयोक्ता जुयाः न थ्वय्कःया समालोचनाया भाषा व शैली सर्वसाधारण ब्वमितयगु नितिं बोधगम्य मजुसे बौद्धिक व्यक्तित्वतयगु नितिं थें जक जूगु दु । थ्व हे थ्वय्कःया विशेषता कथ काये मालि ।

सूर्यबहादुर शाक्य (ने.सं. १०४६- १११९)

- फुटकर

नेपालभाषाया अग्रज समालोचकपि मध्ये सूर्यबहादुर शाक्य नं छम्ह खः । थ्वय्कः नेपालभाषाय् म्हो समालोचना च्वयाः न थःगु प्रभाव त्वःताथकेफुम्ह समालोचक खः । नेपालभाषाय् न्हापां न्हापां पाश्चात्य समालोचना पद्धति छयलादीम्ह सूर्यबहादुर शाक्यया धर्मोदय पत्रिका स पिदंगु भी भाषाया प्रथम उपन्यास मिसा, नेपालभाषाया दकले न्हापांगु उपन्यास सम्बन्धी समालोचना जूगु दु । तीक्ष्ण अन्तरदृष्टि, विशद् विश्लेषण, सही मूल्यांकन थ्वय्कःया समालोचनाया विशेषता खः । थज्यागु समालोचकीय प्रतिभा दया नं थ्वय्कलं थःगु च्वसा थ्व क्षेत्रय् ता ई तक छयला धाःसा मदिइ ।

माधवलाल कर्माचार्य (ने.सं. १०४७)

- जिगु मिखाय साहित्यया छुं (ने.सं. ११००)
- खँ साहित्ययागु साहित्यया खँय् (ने.सं. ११०५)

नेपालभाषाया समालोचना विधाय प्रतिबद्धता, क्यनादीम्ह, निरन्तरता बियादीम्ह छम्ह प्रौढ अले विवादय् मलाइम्ह समालोचक माधवलाल कर्माचार्य नं खः । 'सीस्वा'या विषये छत्वाःचा खँ (धर्मोदय ३५-३७) नांगु समालोचनात्मक लेख च्वयाः नेपालभाषाया समालोचनाया ख्यलय् दुहां भाःम्ह माधवलाल कर्माचार्य नेपालभाषाय् न्हापां पाश्चात्य समालोचना पद्धति दुतहयादीम्ह अले समालोचना सम्बन्धी सैद्धान्तिक ज्ञान न्हयब्वयादीम्ह समालोचक नं खः । थ्वय्कःया निपु च्वखँ 'साहित्ये आलोचकया स्थान' व 'निबन्धया खँय्' नेपालभाषाया समालोचना विधाय लुमंके बहगु न्हापांगु सैद्धान्तिक च्वसु खः । थ्व च्वसु नेपालभाषाया प्रारम्भिक ईया समालोचकतयगु नितिं छगू दिशाबोध थें जूगु दु । 'साहित्यय् आलोचकया स्थान' नांगु लेखय् 'साहित्य धयागु प्रकृतिया यान्त्रिक अनुकरण मखु मनुयात माःगु जीवन खः ..... साहित्य जीवन स्वयेगु सुलचं जक मखु, जीवन न्ह्याकेगु घःचाः नं खः .....' आदि धकाः उद्गार प्वकाः साहित्यया उदेश्य, आदर्श व मूल्य तथा समालोचकया भूमिका तक उल्लेख थ्वय्कलं यानादीगु दु । अथे हे माधवलालजुं आपालं सफूया विवेचनात्मक भूमिका च्वयाः नं समालोचना तथा समालोचक सम्बन्धी थःगु धारणा, दृष्टिकोण ब्वयादीगु दु । माधवलालजुयात छुं नं पूर्वाग्रह मज्वंसे शिष्ट, सरल व सहज भाषा छयलाः कृतिया विश्लेषण पाखें हे मूल्य निरूपण यानादीम्ह छम्ह प्रयोगवादी प्रभाववादी

नेपालभाषा साहित्यया इतिहास/२६०



समालोचकया रूप्य नाले छिं । तर साहित्यया उदेश्य, आदर्श, मूल्य तथा समालोचकया भूमिका सम्बन्धी थःगु हे निश्चित धारणा दुम्ह लेखक खयां न लेखकत हतोत्साही जुइ वा अमिसं नुगल्य स्याकीभनं थ्वय्कःया समालोचनाय् व्याख्या विश्लेषण पक्ष गुलि सशक्त जू, उलि निर्णय पक्ष सशक्त व स्पष्ट मजू । उकिं थ्वय्कःयात डा. जनकलाल वैद्यजुं ...सहृदय, सहानुभूतिशील, पूर्वाग्रहरहित व प्रभाववादी आलोचक कथं नालादीगु दुसा, समालोचक माणिकलालजुं 'स्पष्ट धारणा दयेकं नं किटानीसाथ तप्यंक सुं लेखक वा छुं कृतिया दोष मक्यनेगु अले थःत गाक्क प्रभाव लाःगु पक्षयात जक कयाः च्वयेगु ..... कृतियात बांलाक व्याख्या यानाः लेखक व पाठकया दथुइ स्वापूया ज्या सफल जुइक यानादी' (श्रेष्ठ, ने.सं १११०, पृ २४) धकाः छम्ह प्रभाववादी व्याख्यात्मक समालोचकया रूप्य मूल्यांकन यानादीगु दु ।

**रामहरि जोशी (१०४८)**

- फुटकर

नेपालभाषाया समालोचना ख्यलय् रत्नध्वज जोशी धुनेवं खनेदयेकः भ्नाःम्ह मेम्ह समालोचक रामहरि जोशी खः । थ्वय्कःया नेपालभाषाय् पिदंगु न्हापांगु समालोचनात्मक लेख 'श्री केदारमान व्यथितयागु काव्य साधना' खः । थ्वय्कःया समालोचना विशेषतः व्याख्या प्रधान जू । तर रामहरि जोशी नेपालभाषाया अग्रज समालोचकत मध्ये छम्ह जुयाः नं थ्व क्षेत्रय् ताः ई तक प्रतिवद्ध जुया च्वना मदिल । रामहरि जोशी थें हे छम्हाः नेपालभाषाया समालोचनाय् पुलुकक खनेदयेकः वयाः लिपा तनावपिं थकालिपिं समालोचकतय्गु भवलय् राजेन्द्रमान श्रेष्ठ'या नां नं न्ह्यथने बहः जू । राजेन्द्रमान श्रेष्ठया 'ल्वापु : छगू आलोचना', नेपालभाषाया समालोचनाया प्रारम्भिक ईया समीक्षात्मक च्वसु खः ।

**आशाराम शाक्य (ने.सं १०४८)**

- फुटकर

पाश्चात्य समालोचना पद्धतियात नेपालभाषाया समालोचनाय् दुतहयादीपिं समालोचकत मध्ये आशाराम शाक्य नं छम्ह खः । धर्मोदय पत्रिकाय् 'क्रान्तिलिपा भीगु नेपालभाषा साहित्य' (धर्मोदय वर्ष १०/२-३)स थें ज्याःगु व्यावहारिक समालोचना च्वयाः नेपालभाषाया समालोचना क्षेत्रय् खने दयेकःभ्नाःम्ह आशाराम शाक्ययाके त्येयुल्लाः मिखा, विशद विश्लेषण शक्ति, सही पारख यायेगु क्षमता, निष्पक्ष निर्णय बीगु थें ज्याःगु गुण दया नं थ्वय्कलं समालोचनाया ज्याय् थःत उलि छयलादीगु मदु । निपु प्यपु समालोचनाया लेख निगू प्यंगू सफूया भूमिका च्वयाः थुलि हे थःत थ्व क्षेत्रय् सीमित यानादीगु दु ।

**भुलेन्द्रमान प्रधान (ने.सं १०४९)**

- काव्य व काव्यया स्वभाव (१०८७)

नेपालभाषा साहित्यया इतिहास/२६१

- नेपालभाषाया बाखं साहित्यया इतिहास - भाग १ (ने.सं १०९०)

- नेपालभाषा बाखं साहित्यया इतिहास - भाग २ (ने.सं ११०४)

नेपालभाषाया प्राध्यापन ज्याय् न्हापां न्हापां न्ह्यचिलादीपिं प्राध्यापकपिं मध्ये थ्वय्कः नं छम्ह खः । थःगु पेशागत उत्तरदायित्व बहन यायेकथं नेपालभाषाया सैद्धान्तिक तथा व्यावहारिक समालोचना निताय् नं ल्हाः न्ह्याकादीम्ह थ्वय्कः नेपालभाषाया छम्ह प्रौढ समालोचक खः । थ्वय्कःया 'काव्य व काव्यया स्वभाव' सफू नेपालभाषाया न्हापांगु सैद्धान्तिक समालोचनाया सफू जक मजुसे सिद्धान्तयात व्यावहारिक उदाहरण क्यनेगु सफू नं जूगु दु । विशेषतः समालोचनाया सैद्धान्तिक पक्षय् अप्वः केन्द्रितम्ह भुलेन्द्रमानजुयाके व्यावहारिक समालोचनाय् कृतिया मूल्य निरूपण यायेगु प्रवृत्ति स्वयाः नं अन्वेषणात्मक तथा व्याख्या विश्लेषण यायेगु प्रवृत्ति हे अप्वः खनेदु । थ्वय्कःया नेपालभाषाया बाखं साहित्यया इतिहास सफू, धार्थे बाखं साहित्यया इतिहास मजुसे नेपालभाषाया पुलां बाखंया छगू अन्वेषण थें जक जूगु दु । थ्वय्कःया समालोचनाया भाषा शैली भच्चा क्लिष्ट जूगुलिं थःगु रचनां ब्वमितयूत गुलि विइ धकाः वय्कलं तातुनादीगु खः उलि ब्वमितयूसं ग्रहण यायेफुगु खनेमदु ।

**धूस्वां साय्मि (ने.सं १०५०)**

- फुटकर

थौं नेपालभाषा उपन्यासया पर्याय नां धायेबहःम्ह धूस्वां साय्मि नेपालभाषाया छम्ह समालोचक नं खः । धर्मोदय पत्रिकाय् 'उल्ले म्हाय्मचा आः भौमचा छगू समालोचना' (११/११) लेख च्वयाः समालोचना क्षेत्रय् ल्हाः तयादीम्ह धूस्वां साय्मिजु थ्व क्षेत्रय् ताः ई तक प्रतिवद्ध जुयाच्वना मदीसां आलोचनाया प्रत्यालोचना आदि च्वयाः थ्व क्षेत्रय् थःगु प्रभाव न्ह्यब्वयेगुलिइ सफल जुयादीगु दु ।

**फणीन्द्ररत्न बज्राचार्य (ने.सं १०५१)**

- फुटकर

नेपालभाषाया बहुमुखि प्रतिभाशाली व्यक्तित्वपिं मध्ये फणिन्द्ररत्न बज्राचार्य नं छम्ह खः । सम्पादक जुयाः जक मखु, नेपालभाषा परिषदं पिदनीगु सफूया भूमिका च्वयाः विभिन्न कृति सम्बन्धी समीक्षात्मक लेख तथा विभिन्न विषय सम्बन्धी विचारात्मक लेख च्वयाः थःगु समालोचकीय व्यक्तित्वया परिचय बियादीम्ह फणीन्द्ररत्न बज्राचार्ययात छम्ह प्रभाववादी समालोचक कथं नाले छिं । नापं थ्वय्कलं इलय् ब्यलय् विभिन्न समालोचनात्मक च्वसु नं च्वयाः समालोचना ख्यलय् ल्हाः तया भायाच्वंगु दु । च्वसु वा सफू ब्वनेवं थःत उकिं लाःगु प्रभावयात ब्वयेगु ज्या थ्वय्कःपाखें जुया वयाच्वंगु दु ।

**चित्तरञ्जन नेपाली (ने.सं १०५१)**

- फुटकर

नेपालभाषा साहित्यया इतिहास/२६२



धर्मोदय पत्रिकाय 'साय्मिजुया मतिना' (१९१९-१०) नांगु समीक्षात्मक लेख च्वया: नेपालभाषाया समालोचना ख्यलय् खनेदयेक: भ्ना:म्ह 'चित्तरञ्जन नेपाली' नेपालभाषाया अग्रज समालोचकपि मध्ये छम्ह ख: । सफूया रुपय् समालोचना सम्बन्धी छुं कृति पिदंगु मदुसां 'पसूका छगू अध्ययन' 'विजयबहादुर मल्लया नाटक' सम्बन्धी समीक्षा आदि च्वया: थ्व क्षेत्रय् थःगु प्रतिभा ब्यायादीम्ह छम्ह समालोचक थ्वय्क: ख: । थ्वय्क:या समालोचना प्रयोगवादी तथा व्याख्यात्मक प्रवृत्ति कथंयागु जूगु दु ।

रेवतिरमणानन्द स्यस: (ने.सं १०५२)

- फुटकर

बहुमुखी प्रतिभाया धनी रेवतीरमणानन्द श्रेष्ठ कवि, निबन्धकार, पत्रकारया रुपय् जक मखु, छम्ह समालोचकया रुपय् नं परिचित जुयादीगु दु । 'सम - दृष्टि तया: निर्णय बिडगु हे समालोचकया कर्तव्य ख:' धका: समालोचना सम्बन्धी थःगु दृष्टिकोण ज्वनादीम्ह रेवतीरमणानन्द श्रेष्ठ समालोचकतय्गु धापू कथं व्यक्ति विशेषया कृतिया विहंगम अध्ययन याना: मूल्यांकन यानादीम्ह समालोचक ख: ।

प्रो. माणिकलाल श्रेष्ठ (ने.सं १०५२)

- समालोचनाया सिद्धान्त (ने.सं १०८८)

माणिकलाल श्रेष्ठ नेपालभाषाय् दकलय् न्हापां पाश्चात्य समालोचना सम्बन्धी सफू च्वयादीम्ह च्वमि ख: । नेपालभाषाया समालोचना क्षेत्रय् बहुचर्चितम्ह माणिकलाल श्रेष्ठ समालोचक जगदीश चित्रकारया कथं आइ.ए. रिचार्डसया साहित्यिक सिद्धान्तया अनुयायी ख: । पाश्चात्य समालोचना सिद्धान्तयात नाला: नेपालभाषाया सैद्धान्तिक व व्यावहारिक समालोचना निगू पक्षय् नं ठोस योगदान बियादीम्ह माणिकलाल श्रेष्ठ नेपालभाषाया समालोचना साहित्यया विकासया निति आधारभूमि निर्माण यायेगुलिइ संलग्न जुयादीम्ह समालोचक नं ख: । थ्वय्कलं नेपालभाषाय् थम्ह हे जक पाश्चात्य समालोचना पद्धति छ्यलादीगु मखुसे थुकिया प्रचार प्रसारया निति नं गाकं कृत: यानादीगु दु । 'छुं नं कृतिया मूल्यांकन यायेगु कसि सर्वसाधारण जनताया हित धा:सा मयासैं मगा:' (श्रेष्ठ, ने.सं १११०, :२७) धका: जनताया सर्वोपरी हितयात हे समालोचनाया मू आधार नालादीम्ह माणिकलाल श्रेष्ठ प्रगतिवादी समालोचना पद्धति प्रति प्रतिबद्धता क्यना: थुकियात निरन्तरता बिडगु जक मखु, छगू प्रवाहया रुपय् न्ह्याकेगु कृत: नं यानादीम्ह समालोचक ख: । समालोचना धयागु पारख यायेगु ख: उकिं समालोचना यायेबलय् व्याख्यां विश्लेषण जक मखु, तथ्य व सत्यया आधारय् निर्णय बिडगु नं जुइमा (श्रेष्ठ, १०८७ : पृ ३) धयागु समालोचना सम्बन्धी थ्वय्क:या दृष्टिकोण ख: । तर थथे खया: नं निर्भिक व त्याजिक निर्णय बिडगु ज्याय् थ्वय्क: उलि न्ह्यचिलादीगु खनेमदु, बरु लेखकतय्त प्रोत्साहन बिडगु, अले छता नितो मिले मजगु खँ क्यना: इमित मार्गदर्शन यायेगु प्रवृत्ति

नेपालभाषा साहित्यया इतिहास/२६३

विशिष्ट रुप थ्वय्क:याके दु । बहुसंख्यक जनताया हितया पक्षय् समालोचना यानादीम्ह माणिकलालया समालोचनाया भाषा नं बहुसंख्यक जनतां ल्हाइगु सरल व सहज भाषा जूगु दु । सरल व सहज भाषा छ्यला: नं समालोचना च्वये जिउ धयागु खँ थ्वय्क:या रचनां क्यना बिउगु दु । मार्क्सवादी सिद्धान्त हे थ्वय्क:या समालोचनाया मू आधारभूमि जूगुलिं थ्वय्क:यात छम्ह प्रगतिवादी समालोचक कथं मूल्यांकन यानात:गु दु ।

डा. जनकलाल वैद्य (ने.सं १०५४)

- सत्यसतीया विवेचना (ने.सं १०८७)

- नेपालभाषा काव्य सृजना प्रवृत्ति (ने.सं ११०६)

- आशा सफू कुथिया अभिलेख ग्रन्थया वर्णात्मक धल: (ने.सं. ११११)-  
'प्रेमबहादुर कसा:नाप जाना: च्वयात:गु '

नेपालभाषाया छम्ह प्राध्यापकया नातां थःगु उत्तरदायित्व वहन याये कथं समालोचना विधाप्रति प्रतिबद्ध जुया: निरन्तर रुप सक्रियपूर्वक थ्व विधाय् ल्हा: न्ह्याकादीम्ह छम्ह समालोचक जनकलाल वैद्यजु नं ख: । नेपालभाषाया महाविद्यालय, विश्वविद्यालयया पाठ्यांश नाप सम्बन्धित आपालं समालोचनात्मक लेख च्वया: थ्व क्षेत्रय् वैद्यजु महत्वपूर्ण योगदान बियादीगु दु । व्यावहारिक समालोचनाया नाप सैद्धान्तिक समालोचनाय् नं योगदान बियादीम्ह वैद्यजुया समालोचनात्मक पद्धतियात समीक्षकतय्तसं व्याख्यात्मक शास्त्रीय समालोचनात्मक पद्धतिकथं थुइकेगु या: । थ्वय्क: नेपालभाषाय् नेपालभाषाया प्राचीन काव्य सम्बन्धी दकलय् न्हापां विद्यावारिधि यानादीम्ह विद्वान ख: । थ्व विषय सम्बन्धी शोध पुस्तकय्, थःगु अध्ययन अन्वेषणं वःगु ज्ञानयात व्याख्या विश्लेषण याना: छगू निष्कर्ष बिडगु ज्या जूगु दु । गहन अध्ययन, अन्वेषणात्मक प्रवृत्ति, शूक्ष्म दृष्टि, थ्वय्क:या लेखनया विशेषता जूगु दु । थीथी पुलांगु नेपालभाषाया सफूया अध्ययन अन्वेषण याना: अज्या:गु कृति सम्बन्धी ज: हवलेगु थ्वय्क:या ज्यां नेपालभाषाया अध्ययनया लागो त:धं तचा: जूगु दु, पुलांगु साहित्यया अध्ययनया धुकू चायेका बिउगु दु ।

डा. सुन्दरकृष्ण जोशी (ने.सं १०५६)

- फुटकर

थःगु प्राध्यापन पेशाया उत्तरदायित्व वहन याये कथं नेपालभाषा समालोचना क्षेत्रय् ल्हा: तयादीम्ह छम्ह स्येल्ला:म्ह समालोचक डा. सुन्दरकृष्ण जोशी नं ख: । मूलत: व्यावहारिक समालोचना च्वयेगुलिइ संलग्न जुयादीम्ह सुन्दरकृष्ण जोशीजुं म्हो हे समालोचनात्मक लेख च्वयादियां नं थ्व क्षेत्रय् थःगु तीक्ष्ण समालोचकीय प्रतिभा धा:सा क्यनादीगु दु । संक्षिप्त व्याख्या विश्लेषण पाखें नं आपालं खँ ध्वाथुइका दीफुम्ह जोशीजुया समालोचनाय् इमान्दारिता, सत्यनिष्ठता, यथार्थता थें ज्या:गु प्रवृत्ति लेहें पूगु दु । तर थ्वय्क: थौकन्हय्

नेपालभाषा साहित्यया इतिहास/२६४



समालोचना क्षेत्र तापाना भाषा विज्ञानया अध्ययन अनुसन्धान पाखे न्ह्यचिलादीगु दु ।

डा. कमलप्रकाश मल्ल (१०५६)

- नःलि स्वना (सम्पादन, समालोचनाया संग्रह, ने.सं १०८७)
- नःलि कविता - छगु विवाद (सम्पादन, ने.सं १०८७)
- सिंकःमिया स्वाःने (ने.सं १०९८)

थःगु प्राध्यापन ज्याया उत्तरदायित्व वहन याये कथं समालोचना क्षेत्रय् न्हापां ल्हाः च्वयेकादीम्ह कमलप्रकाश मल्ल नेपालभाषाया छम्ह स्येल्ताःम्ह समालोचक खः । समालोचक माणिकलालया कथं क्लासिकल तथा इण्डिकटिभ समालोचनाया विरोधय् दनावःम्ह कमलप्रकाश मल्ल भावावेश तथा पूर्वाग्रहं मुक्त जुयाः अध्ययन, अन्वेषणया लिधंसाय् शिष्ट व संयमित भाषा शैली छ्यलाः कृतिया व्याख्या विश्लेषण तथा मूल्य निरूपण यानादीम्ह समालोचक खः । पारख यायेगु तथा त्याजिक निर्णय विइगु थें ज्याःगु थ्वय्कःया समालोचनात्मक प्रवृत्तिया छगू नमूनाः 'नःलि कविता व निम्ह आलोचक' लेखयात हे कायेफु । खयेत ला थ्वय्कःया फुक्क धया थें समालोचनाया कृति व्यावहारिक समालोचना सम्बन्धी जूगु दु, तर अथे खयाः नं समालोचना सम्बन्धी थःगु छगू निश्चित धारणा दृष्टिकोण थ्वय्कःया आपालं रचनाय् खनेदु । थ्वय्कःया समालोचना सम्बन्धी छगू महत्वपूर्ण लेख 'नःलि स्वना' (ने.सं १०८७)या भूमिका नं खः । थ्व दकलय् न्हापांगु नेपालभाषाया समालोचनाया इतिहास सम्बन्धी लेख खः । थ्व लेखय् थ्वय्कलं नेपालभाषाया समालोचनाया इतिहास कीइगु, समालोचकतय्गु मूल्यांकन यायेगु जक यानादीगु मखुसे समालोचना सम्बन्धी थःगु हे धारणा, दृष्टिकोण नापं नेपालभाषाया समालोचनाय् खने दयाच्चंगु कमि कमजोरी व थुकिया विकासया निंतिं थःगु सुभाब तर्क न्ह्यव्वयादीगु दु । थ्वय्कःया कथं समालोचना धयागु उत्तरदायित्वपूर्ण बौद्धिक चिन्तनया उपज खः । छम्ह समालोचकया ज्या व्याख्या विश्लेषण यायेगु जक मखु, तर्कया, तुलनाया आधारय् मूल्यांकन नं यायेगु जुइमाः । सन्तुलन हे आलोचनाया आत्मा खः (मल्ल ने.सं १०८७ : पृ ६) । थथे समालोचना सम्बन्धी छगू ठोस विचाः ज्वनाः न्ह्यज्यानादीम्ह मल्लजु थौकन्हय् थ्व समालोचना क्षेत्रय् प्रतिबद्ध जुइगु पलेसा भाषाविज्ञानया अध्ययन अनुसन्धान पाखे धेचुलादीगु दु ।

डा. हिमांशु थापा (ने.सं १०५७)

- फुटकर

डा. हिमांशु थापा छम्ह नेवाः मखया नं नेपालभाषा साहित्यय् चीरपरिचितम्ह व्यक्तित्व खः । समालोचक इन्द्र मालीया धापू कथं हिमांशु थापा नेपालभाषाया समालोचना क्षेत्रय् सांस्कृतिक शब्दावली छ्यलाः कृतिया मूल्य निरूपित यायेगु परम्परा नी यानादीम्ह समालोचक खः । पूर्वाग्रहरहीत,

नेपालभाषा साहित्यया इतिहास/२६५

प्रोत्साहनमूलक प्रवृत्ति हे थ्वय्कःया समालोचनाया विशेषता जूगु दु । थथे समालोचना क्षेत्रय् थःगु विशिष्टता कायम यायेफुम्ह व्यक्तित्व खयां नं नेपालभाषाय् थ्वय्कःया समालोचना म्हो हे जक पिदंगु दु ।

शान्तहर्ष बज्राचार्य (ने.सं १०५८)

- अर्हतनन्द महाकाव्यया विवेचना (ने.सं १०९०)
- रस मञ्जरी (१०९९)
- दबू प्याखं पुचःया न्ह्यसः लिसः (ने.सं ११११)
- सँदेया लिसः न्ह्यसःया लिसः (११०८)
- पद्य पुचः (पद्य पुचः सारांश)

आपालं पाठ्यपुस्तकया लिधंसा च्वयाः नेपालभाषाया पठन पाठनयात ग्वाहालि यायेगु मनसुवा तयादीम्ह छम्ह समालोचक शान्तहर्ष बज्राचार्य नं खः । थ्वय्कःया समालोचना सैद्धान्तिक तथा व्यावहारिक निगू पक्षय् नं दु । अथे हे सैद्धान्तिक समालोचनाय् नं पूर्वीय व पाश्चात्य नितां कथंया समालोचना च्वयेगु यानादीगु दु, तर थ्वय्कःया उपलब्धिमूलक समालोचना धाःसा पूर्वीय समालोचना सम्बन्धी हे जूगु दु । थ्वय्कःया समालोचना पद्धतियात व्याख्यात्मक समालोचना कथं नाले छि ।

गिरिजाप्रसाद जोशी (ने.सं १०५९-११०७)

- फुटकर

बहुमुखी प्रतिभाया धनी गिरिजाप्रसाद जोशी स्पष्ट निर्णय विइपिं समालोचकत मध्ये छम्ह खः । सुं नं च्वमियागु कृतिइ थम्हं खंगु चाःगु कमि कमजोरीयात निर्भिक रुपं आक्रमणकारी भाषां प्वकेगु प्रवृत्ति थ्वय्कःयाके दु । थ्वय्कःया गुलिं गुलिं समालोचनाय् द्वन्द्वात्मक भौतिकवादयात आधार नालेगु याःगु नं दु । खयेत ला थौं भीगु साहित्यया विकासया निंतिं थाय्माच्च गयेकीपिं समालोचकत मखु, द्रगु पलाः क्यनाबिइपिं समालोचकत माःगु दु, तर लं क्यनाबिइम्ह समालोचक थः हे निं सुस्पष्ट सुनिर्दिष्ट धाःसा जुइमाःगु दु ।

पुष्पबहादुर चित्रकार (ने.सं १०५९)

- फुटकर

विभिन्न पत्र-पत्रिकाय् समालोचना च्वयाः थःगु समालोचनात्मक प्रतिभाया परिचय बियादीम्ह पुष्पबहादुर चित्रकार मूलतः सृजनात्मक कृतिया समालोचक खः । थ्वय्कःया समालोचना अध्ययन अन्वेषणमूलक तथा तुलनात्मक प्रवृत्ति कथंयागु जूगु दु । बल्लाःगु तर्क व तुलनाया आधारय् निस्कर्षय् वयेगु थ्वय्कःया समालोचनाया विशेषता खः । तर थथे थ्वय्कःयाके समालोचनात्मक प्रतिभा दयां नं थ्व क्षेत्रय् थःगु प्रतिबद्धता धाःसा थ्वय्कलं क्यनादीगु मदु ।

नेपालभाषा साहित्यया इतिहास/२६६



खड्गमान श्रेष्ठ (ने.सं १०६१)

- फुटकर

नेपालभाषाया प्राध्यापन पेशाय सलग्न जुयादीबल्य थीथी पत्रिकाय समालोचनात्मक लेख च्वयाः थःगु प्रतिभाया परिचय बियादीम्ह छम्ह समालोचक खड्गमान श्रेष्ठ नं खः । साहित्यया आधुनिक प्रवाह प्रतिया विशद ज्ञान, तीक्ष्ण दृष्टि, अन्वेषणात्मक प्रवृत्ति थें ज्याःगु समालोचकीय प्रतिभा दयाः नं थ्वय्कः थ्व क्षेत्रय् ताःई तक थातं च्वना मदिइ । प्राध्यापन पेशा ताःतेवं थ्वय्कलं समालोचना च्वयेगु नं त्वःतादिल । थ्व नेपालभाषा समालोचनाया नितिं छगू हन्ताः खः ।

पूर्ण वैद्य (ने.सं १०६१)

- कविताया लाग्ना (ने.सं ११०९)

पूर्ण वैद्य छम्ह कवि जक मखु कविता तथा निबन्ध सम्बन्धी थःगु धारणा दृष्टिकोण बियादीम्ह प्रसिद्ध अंग्रेजी कवि टि.एस. इलियट थें छम्ह समालोचक नं खः । थ्वय्कःया समालोचनात्मक लेख अप्पः थें कविता, निबन्ध सम्बन्धी जूगु दु । थ्वय्कः प्रगतिवादी दृष्टिकोणयात आधारभूमि नालाः कृतिया समीक्षा यानादीम्ह समालोचक खः । समालोचकीय क्षमता प्रतिभा दया नं थ्व क्षेत्रय् ल्हाः न्ह्याकेगु प्रतिबद्धता धाःसा थ्वय्कलं उलि क्यनादीगु मदु । प्रौढ भाषाया प्रयोग, वैचारिक सुस्पष्टता थ्वय्कःया समालोचनाया विशेषता जूगु दु ।

नर्मदेश्वरमान प्रधान (ने.सं १०६२)

सिर्जना (ने.सं १०९६)

जिगु बिचाः जिगु धापू (ने.सं ११०५)

स्वंगः मिखा (ने.सं १११८)

नेपाल भाषाया साहित्यया इतिहास बारे (ने.सं १११८)

महाकाव्यया बारे (ने.सं १११८)

सौन्दर्य व आलोचना (११२०)

छम्ह नेपालभाषाया शिक्षकया नातां विशेष यानाः विद्यार्थीतयगु पठन पाठनयात तिबः जुइगु समालोचनाया लेख च्वयेगु थःगु बौद्धिक उत्तरदायित्व भाःपादीम्ह नर्मदेश्वर नेपालभाषाया सैद्धान्तिक समालोचना नापं व्यावहारिक समालोचना निताय् नं उलि हे ल्हाः न्ह्याकादीम्ह समालोचक खः । नर्मदेश्वर छम्ह अंग्रेजी साहित्यया विद्यार्थी खयाः नं थ्वय्कःया सैद्धान्तिक समालोचना केवल पाश्चात्य समालोचना सिद्धान्त सम्बन्धी जक मजुसे, पूर्वीय समालोचनाया थीथी अंग - रस, ध्वनि, छन्द आदि थें ज्याःगु विषयय् नं व्यापक जूवंगु दु । साहित्यया विविध विधा सम्बन्धी दुयःगु ज्ञान दुम्ह थ्वय्कलं छुं नं कृतिया पारख यानादीबल्य व विधा सम्बन्धी थःगु धारणा व दृष्टिकोण नं च्वयेगु यानादीगु दु । विशेषतः थ्वय्कलं नेपालभाषाया प्राध्यापनयात तिबः बिइगु जक उद्देश्य च्वयेगु यानादीगुलिं विद्यार्थीतयगु स्तरयात त्वःकथंया सरल भाषा शैलीया प्रयोग

नेपालभाषा साहित्यया इतिहास/२६७

थ्वय्कःया समालोचनाय् जूगु दु । थ्वय्कःया समालोचना, समालोचना विधा ब्वलकेगुलिइ जक मखु, नेपालभाषाया पठन पाठनया वातावरण दयेकेगुलिइ नं तःधंगु योगदान बिउगु दु । नेपालभाषाया समालोचना क्षेत्रय् सशक्तता, निरन्तरता, प्रतिबद्धता क्यनादीपिं समालोचकत मध्ये थ्वय्कः नं छम्ह जूगु दु ।

जनक नेवाः (ने.सं १०६२)

- पुजाभः (ने.सं ११०६)

जनक नेवाः नेपालभाषाया प्राध्यापन समालोचनाया ख्यलय् सालाहः छम्ह समालोचक खः । विश्लेषणात्मक प्रवृत्तिया थ्वय्कःया समालोचनां सम्बन्धित विषयस जः हवलेगुलिइ गाकं तिबः बिउगु दु । व्याख्या विश्लेषण पक्षय् थ्वय्कःया समालोचना गुलि ग्यसु ग्यंगु खः, निर्णय पक्षय् धाःसा उलि सवल सशक्त जुइफुगु मदुनि ।

इन्द्र माली (ने.सं १०६३)

- न्हू पुखुली कसाःया ख्वाःपाः (ने.सं १०९१)

- पुलां कसि : न्हूगु दापु (ने.सं १११७)

- भीगु भाय् : भीगु खंग्वः (ने.सं १०९८)

- विद्रोही कवि बुद्ध साय्मि (ने.सं १११७)

नेपालभाषाया माध्यमिक कालया छु (ने.सं १११९)

कुचा कुचागु किपा दुने (ने.सं ११२०) सम्पादन

नेपालभाषाया समालोचना ख्यलय् प्रतिबद्धता क्यनादीम्ह, निरन्तरता बियादीम्ह छम्ह समालोचक इन्द्र माली खः । थ्वय्कःयात नेपालभाषाय् न्हू पीढीयाम्ह छम्ह यथार्थवादी तथा समाजशास्त्रीय समालोचक कथं नालातःगु नं दु । थम्हं खंगु व चाःगुयात निर्भिक व निर्धक्क जुयाः अभिव्यक्त यायेफूम्ह इन्द्र मालीया समालोचनाय् छखे थःगु भाषा साहित्यया गरिमा ब्वयेगु, न्हूपिं च्वमितय्त हःपाः विइगु कुतः जूगु दु सा मेखेर लेखकतयगु कमि कमजोरी क्यनाः थम्हं खं कथं, चाः कथं सल्ला साहुति बियाः इमित परिस्कृत जुइकेगु कुतः नं दु । छम्ह समालोचकया भाषा त्याजिक क्वःछिनाः धायेगु जुइमाः, ग्याःचिकु पहयागु मखु धयागु धारणा थ्वय्कःया जूगु दु । थःम्हस्यां यानागु अध्ययन व अन्वेषणया लिधंसाय् जक निष्कर्ष बियादीम्ह इन्द्र मालीया समालोचनां लेखकतय्त प्रोत्साहन हौसला जक मखु दीशाबोध नं यायेगु छम्ह समालोचकया कर्तव्य खः धकाः क्यनाविउगु दु । थ्वय्कः छम्ह स्वाभिमानि, सुस्पष्ट व निर्धक्कम्ह समालोचक खयाः नं, सुनानं थःगु कमजोरी त्रुटि क्यनाविल धाःसा उकियात ग्रहण यायेगु सहृदयता नं थ्वय्कः याके दु । 'सौन्दर्य व सामाजिक मनोविज्ञानयात बः कयाः कृतियात दुवालेगु जक मखु समाज व जीवनयात स्वयेगु न्हूगु मिखा समालोचनां बिइगु स्वयेमाः' (नेपाल ऋतु पौ, वर्ष ४७ ल्याः ८८ : पृ १०) धयागु थ्वय्कःया धारणा खः ।

नेपालभाषा साहित्यया इतिहास/२६८



अमृतरत्न तुलाधर (ने.सं १०६४)

- फुटकर

नेपालभाषाया समालोचना ख्यलय् पिदंम्ह छम्ह प्रतिभाशाली व्यक्तित्व अमृतरत्न तुलाधर नं खः । विस्तृत विश्लेषण जक मखु कृतिया मूल्य निरूपन तर्क यानादीम्ह अमृतरत्नया समालोचनाय् मौलिक चिन्तन व अन्वेषणात्मक प्रवृत्ति भयविउगु दु । भीगु पुलांगु म्येयात कयाः वयकलं गुगु विश्लेषणात्मक कथं समलोचना च्वयेगु कुतः यानादिल थुकिं भीगु प्राचीन साहित्यया अध्ययनय् छगू न्हूगु लुखा चालीगु सम्भावना लूगु दु ।

काशीनाथ तमोट (ने.सं १०६५)

- गद्यगुरु पं. निष्ठानन्द बज्राचार्य व वयकःया ललितविस्तर

- नेपालभाषा साहित्यया ध्वःकिया (ने.सं १११८)

नेपालभाषा प्राध्यापन पेशा भाषा, साहित्यया अध्ययन अनुसन्धान क्षेत्रय् अग्रसर जुइका बिउम्ह छम्ह व्यक्तित्व काशीनाथ तमोट नं खः । वयकःया समालोचना सृजनात्मक कृति सम्बन्धी स्वयां नं भाषिक साहित्यिक इतिहास सम्बन्धी विषयस जूगु दु । अन्वेषणात्मक व व्याख्यात्मक पह हे वयकःया समालोचनाया मूलभूत प्रवृत्ति खः । समालोचनात्मक प्रतिभा दयां नं वयकलं थःगु प्रतिवद्धता भाषाविज्ञानया अध्ययन अनुसन्धान पाखे क्यनादीगु दु । वयकःया 'आधुनिक कविता संग्रह'या भूमिकां वयकःया समालोचकीय प्रवृत्तिया जः हवलेगु याःगु दुसा आधुनिक नेपालभाषाया काव्यया विकासक्रमयात नं ब्वया बिउगु दु । अथे हे वयकःया 'नेपालभाषा साहित्यया ध्वः किया' सफुति वयकःयात छम्ह तथ्यांक संकलन कर्ताया रुपय् परिचित याकूगु दु ।

रामलोचन भ्ना (ने.सं १०६६)

- फुटकर

नेपालभाषाया प्राध्यापन पेशाय् संलग्न जुयाः समालोचना च्वयेगु यानादीम्ह छम्ह समालोचक रामलोचन भ्ना नं खः । समालोचना लेखनय् निरन्तरता म्हो हे जूसां पूर्वीय समालोचना सिद्धान्तया लिधंसाय् स्याचुक तर क्वातुक कृतिया व्याख्या व विश्लेषण यानादीम्ह च्वमिया रुपय् रामलोचन भ्ना खः ।

रामभक्त श्रेष्ठ (ने.सं १०६६)

- भीगु नःलि साहित्य छुं बिचाः (ने.सं १०६६)

- सिद्धिदास लुमकाः (ने.सं १०९७)

रामभक्त श्रेष्ठ नेपालभाषाया प्रगतिवादी प्रभाव पाखे भुकाव दुम्ह छम्ह समालोचक खः । वयकःया समालोचनाय् निष्पक्ष निर्णय बिइगु प्रवृत्ति जक मखु, अन्वेषणात्मक प्रवृत्ति पाखे नं उलि हे सशक्त जू । 'महाकवि चित्तधर 'हृदय'या

नेपालभाषा साहित्यया इतिहास/२६९

कृति सम्बन्धी विस्तृत विश्लेषण' वयकःया छपु महत्वपूर्ण समालोचनात्मक लेख खः ।

जगदीश चित्रकार (ने.सं १०६७)

- फुटकर

विशेषतः उपन्यास सम्बन्धी व्यावहारिक समालोचना च्वयेगु यानादीम्ह जगदीश चित्रकार नेपालभाषाया न्हू पिढीयाम्ह छम्ह सशक्त प्रतिवद्धम्ह समालोचक खः । यथार्थवादी दृष्टिकोण, निर्भिक व निश्चिन्त अभिव्यक्ति वयकःया समालोचनाया छगू विशेषता जूगु दु । धायें धायेगु खःसा वयकःया अभिव्यक्ति शैली कुई थें हे नः, स्याःचुपि थें हे जः । छम्ह समालोचकयाके दयेमाःगु अन्वेषणात्मक प्रवृत्ति, अध्ययनशीलता, त्येयल्लाःगु मिखा, सही पारख यायेगु क्षमता वयकःयाके गाकं दु । वयकःया समालोचनां नेपालभाषाया उपन्यास विधाया अध्ययनय् व्यापकता हयाबिउगु दु । वयकलं समालोचना यायेबलय् भावावेशय् वयेगु प्रवृत्तियात संयम यायेफुगु जूसा वयकःया समालोचनाया स्तर अभि च्वन्हाइगु खनेदु ।

मल्ल के. सुन्दर (ने.सं १०६८)

- फुटकर

मल्ल के. सुन्दर नेपालभाषाया 'छम्ह न्हू पीढीयाम्ह प्रतिभाशाली लेखक खः । सफूया रुपय् वयकःया समालोचनात्मक कृति पिदंगु मदुसां विभिन्न विचार गोष्ठीइ प्रस्तुत जूगु गोष्ठी पत्र तथा विविध भाषा, साहित्य संस्कृति, अर्थ, राजनीति सम्बन्धी विचार प्रधान लेख तथा सृजनात्मक कृतिया समीक्षात्मक लेख वयकःया समालोचनात्मक प्रतिभाया परिचय बिउगु दु । क्वातुगु तर्कया लिधंसाय् कृतिया मूल्य निरूपण यानादीम्ह मल्लजुयात नेपालभाषाया सुस्पष्ट, सुनिर्दिष्ट विचारधारायाम्ह समालोचक कथं नाले छिं । समालोच्य विषययात गम्भीर रुपं ग्रहण यानाः विश्लेषण यायेगु, थः धायेमाःगु खंयात त्याजिक, क्वातुक, ध्वातुक धायेगु क्षमता वयकःयाके गाकं दु ।

मनमोहन श्रेष्ठ (ने.सं १०६८)

- पसूकाया स्वपु का (१०८५)

मुकं छगू कृतियात कयाः व्याख्या यानादीम्ह मनमोहन श्रेष्ठ नं नेपालभाषाय् थःगु प्रभाव क्यनेफुम्ह छम्ह समालोचकया रुपय् खने दयेकः भाःगु दु । तर वयकलं थ्व विधाप्रति प्रतिवद्धता व निरन्तरता धाःसा क्यनादीगु मदु ।

गोवर्धन शर्मा (ने.सं १०६९)

- फुटकर

नेपालभाषा साहित्यया इतिहास/२७०



गोवर्धन शर्मा नेपालभाषाया समालोचना क्षेत्रय् खनेदुम्ह छम्ह न्हू प्रतिभा खः । विशेषरूपं व्यावहारिक समालोचनाय् ल्हान्हाकादीम्ह शर्माजुया समालोचनाय् कृतिया व्याख्या विश्लेषण जक मखु, मूल्य निरूपण यायेगु प्रवृत्ति नं सबल हे जू धायेमाः ।

**डा. केशवमान शाक्य (ने.सं १०७१)**

- फुटकर

नेपालभाषाया आधुनिक साहित्यया विकासया नितिं योगदान बियावःपि युवा साहित्यकारत मध्ये केशवमान शाक्य नं छम्ह खः । कविता, बाखं, निबन्ध विधाय जक मखु, समालोचना क्षेत्रय् नं थःगु प्रतिभा ब्यादीम्ह केशवमान शाक्ययात थम्हं ज्वनागु विषयलय् दुग्यंक दुहां वनाः विश्लेषण यानादीम्ह समालोचक कथं नाले छिं । आधुनिक साहित्य सम्बन्धी विशेष अध्ययन दुम्ह थ्वय्कलं साहित्यया ख्यलय् खनेदुगु न्हू न्हूगु, प्रवाह दृष्टिकोण, सिद्धान्तया जः ह्वलेगु यानादीगु दु ।

**प्रेमशान्ति तुलाधर (ने.सं १०७२)**

- न्हू बाखं पुचःया बाखंत (ने.सं ११०९),
- सुगत सौरभ महाकाव्यया बारे छुं (ने.सं. १११९),
- जिगु सृजनाया पुचः (ने.सं. ११२०)

नेपालभाषाया शिक्षण पेशां समालोचनाया ख्यलय् सालाहःम्ह छम्ह मिसाच्चमि प्रेमशान्ति तुलाधर नं खः । थ्वय्कःया 'न्हू बाखं पुचःया बाखंत' नांगु सफू नेपालभाषाय् मिसाच्चमिपि पाखें पिदंगु दकलय् न्हापांगु समालोचना सम्बन्धी सफू खः । थम्हं ज्वनागु विषयय् पूर्वक ध्वाथुइक समालोचना यायेगु कुतः यानादीम्ह मय्जु तुलाधरया अप्वः थें समालोचना सृजनात्मक कृति सम्बन्धी जूगु दु । थ्वय्कःया समालोचनात्मक प्रवृत्ति मूलतः विश्लेषणात्मक कथंयागु जूगु दु सां निर्णयात्मक प्रवृत्ति नं सबल खनेदु ।

**मनोरमा तुलाधर (ने.सं १०७२)**

- निपासः (ने.सं १११७)

मनोरमा नेपालभाषाया प्राध्यापन पेशां समालोचना ख्यलय् साला हःम्ह छम्ह मिसा च्वमि खः । थ्वय्कःया समालोचना पाठ्य पुस्तक सम्बन्धी जूगु दु सा, समालोचनात्मक प्रवृत्ति व्याख्यात्मक कथंयागु जूगु दु ।

**डा. चुन्दा बज्राचार्य (ने.सं १०७४)**

- फुटकर

पत्र-पत्रिकाय् समालोचनात्मक लेख च्वयाः थःगु समालोचनात्मक प्रतिभाया परिचय बियादीम्ह छम्ह मिसाच्चमि डा चुन्दा बज्राचार्य नं खः ।

नेपालभाषा साहित्यया इतिहास/२७१

सृजनात्मक कृतिया विवेचनाय् थःगु च्वसा केन्द्रित यानादीम्ह मय्जु बज्राचार्यया समालोचना विशेषतः आधुनिक नाटक सम्बन्धी जूगु दु । समालोचक इन्द्र मालीया धापू कथं थ्वय्कःया समालोचनाया निर्णय पक्ष सबल मज्जसां समालोचनाया भाषा तिख्खर जूगु दु । थ्वय्कःया समालोचना विशेषतः अन्वेषणमूलक तथा व्याख्यात्मक जू ।

**मदनसेन बज्राचार्य (ने.सं १०७४)**

- फुटकर

आपालं लोक साहित्यविदपिनिगु जीवनी च्वयाः नेपालभाषाया साहित्यिक व्यक्तित्वतय् अमर यानातयेगुलिइ तिवः बियादीम्ह भाजु मदनसेन छम्ह समालोचक नं खः । खयेत ला व्यक्तित्वतय्गु जीवनी लेखनय् हे थ्वय्कःया समालोचक व्यक्तित्व गाकं प्रतिविम्बित जूगु दु । तर थ्व बाहेक नं वय्कलं विभिन्न पत्र-पत्रिकाय् सृजनात्मक कृति सम्बन्धी समीक्षात्मक लेख च्वयाः थःगु प्रतिभाया परिचय बियादीगु दु । अन्वेषणात्मक प्रवृत्ति, सशक्त अभिव्यक्ति थ्वय्कःया समालोचनाया विशेषता जूगु दु ।

**पूर्ण ताम्राकार (१०७५)**

- साहित्य लचं (ने.सं १११२)
- साहित्यया लिच्छः (ने.सं. १११९)

नेपालभाषाया समालोचनाय् प्रगतिशील प्रवृत्तियात आत्मसात यानाः समालोचना यानादीम्ह छम्ह समालोचक भाजु पूर्ण ताम्राकार नं खः । विशेष रुपं नेपालभाषाया पाठ्यज्वलं सम्बन्धी समालोचनात्मक लेख च्वयादीम्ह पूर्ण ताम्राकार थम्हं ज्वनागु विषयय् गम्भीर रुपं दुहांवनाः विश्लेषण यायेगु कुतः यानादीम्ह समालोचक खः । नेपालभाषाय् प्रगतिवादी समालोचना प्रवाहयात विस्तार यायेगु ज्याय् थ्वय्कःया समालोचनां नं तिवः बिउगु दु ।

**चन्द्रमान बज्राचार्य (ने.सं १०७५)**

- छ्वास काव्यय् कवि व्यथित (ने.सं १०७५)
- सिर्जनाया विवेचना (ने.सं १११७)

नेपालभाषाया पाठ्यज्वलं दुनेया सफूयात कयाः समालोचनात्मक लेख च्वयाः पठन पाठनयात तिवः बिउगु नापं समालोचना साहित्ययात न्ह्यज्याकेगु नितिं पलाः च्वयेकादीम्ह न्हू पीढीयाम्ह छम्ह प्रतिभाशाली समालोचक चन्द्रमान बज्राचार्य नं खः । पूर्वीय तथा पाश्चात्य साहित्य निगुलिं क्षेत्रय् ल्हाः न्ह्याकादीम्ह बज्राचार्यया अप्वः थें समालोचना सृजनात्मक कृति सम्बन्धी जूगु दु । सृजनात्मक समालोचनाय् नं अप्वः थें काव्य व उपान्यास सम्बन्धी हे जूगु दु । थम्हं ज्वनागु विषयलय् ध्वाथुइक व्याख्या विश्लेषण यायेगु क्षमता थ्वय्कःयाके दु ।

नेपालभाषा साहित्यया इतिहास/२७२



प्रेमहीरा तुलाधर ( ने.सं. १०७५ )

- फुटकर

विभिन्न पत्रपत्रिकायु समीक्षात्मक च्वसुत पिब्वयाः नेपालभाषाया समालोचना विधाया विकासयु तिवः बियादीम्ह प्रेमहीरा तुलाधर नं प्राध्यापन पेशां समालोचनाया ख्यलयु सालाहःम्ह छम्ह मयजु च्वमि खः । विशेषत गद्य गुरु निष्ठानन्द बज्राचार्य सम्बन्धी अनुसन्धानात्मक च्वसु च्वयेगुली मन क्वसाःम्ह तुलाधरजुया समालोचनात्मक पद्धति व्याख्यात्मक कथंयागु जूगु दु ।

ओमकारेश्वर श्रेष्ठ ( ने.सं. १०८० )

- फुटकर

सफूया रुपयु समालोचनात्मक कृति पिदंगु मदुसां पत्र-पत्रिकायु समालोचना च्वयाः रेडीयोयु सफूया समीक्षा यानाः थःगु प्रतिभाया परिचय बियादीम्ह छम्ह ल्यायुम्हम्ह च्वमि ओमकारेश्वर श्रेष्ठ नं खः । नेपालभाषाया प्राध्यापन पेशायु संलग्न जुयादीम्ह श्रेष्ठया समालोचनाया विषय मूलतः पाठ्यपुस्तक सम्बन्धी जुइगु स्वभाविक खः । थ्वयुक्काके खनेदुगु तीक्ष्ण दृष्टि, अन्वेषणात्मक प्रवृत्ति स्वयंबलयु भविष्ययु थ्वयुक्कः छम्ह सफल समालोचक जुइफइ तिनि धकाः आशा यायेफु ।

थथे च्वयु उल्लेख जूपिं समालोचकत बाहेक निपु स्वपु हे जक समालोचनात्मक लेख च्वयाः नं थ्व क्षेत्रयु थःपिनि प्रतिभा ब्वयाभाःपिं मेपिं नं आपालं समालोचकत दनि । नेपालभाषाया समालोचना साहित्यया शुरुवातया इलयु खने दयेकःभाःपिं समालोचकतयगु भवलयु - राजेन्द्रमान श्रेष्ठ, सत्यमोहन जोशी, पूर्णदास श्रेष्ठ, सूर्यबहादुर पिवाः, वि.आर. कसाः, भूवनलाल प्रधान, स्वयम्भूलाल श्रेष्ठ, छत्रबहादुर कायष्ठ, पुण्यरत्न बज्राचार्य, हितकरवीरसिंह कसाः, आदिपिनिगु नां दुथ्याके छिसा लिपा पिदंगु समालोचकतयगु भवलयु - रमेश मधु, ब.आ. कनकद्वीप, योगि विकासानन्द, शंकर श्रेष्ठ, मंगलप्रसाद श्रेष्ठ, अर्पणा प्रधान, बिमला मानन्धर, महेश जोशी, माधवलाल प्रधान, नन्दमाया नकर्मि, श्रीलक्ष्मी, बालगोपाल श्रेष्ठ, रविन्द्र राजकर्णिकार, डा. पुष्पराज राजकर्णिकार, विजयरत्न बज्राचार्य, अशोक श्रेष्ठ, विजय शंकर मल्ल दारुण, पूर्ण मुनकर्मि, तुल्लिलाल सिंह, कृष्णा वैद्य, योगेश राज, वितोदराज शर्मा, शराम नेवाः, शान्तराज शाक्य, बुद्ध सायुमि, रमेशकाजी स्थापित आदि दुथ्याके छिं ।

लिखैः थौं नेपालभाषा साहित्ययु समालोचनायात मेमेगु भाषायु थें विस्कंगु छगू महत्वपूर्ण साहित्यिक विधाकथं नालाहःगु दु । साहित्य क्षेत्रयु व्यावहारिक समालोचनायात जक समालोचना कथं नालेगु प्रवृत्ति थौं ब्वलना वयाचवंगु दुसां सैद्धान्तिक तथा व्यावहारिक समालोचना नित्यातां समालोचना विधा दुने दुथ्याकेगु परम्परा नेपालभाषायु कायम हे जुयाचवंगु दनि । नेपालभाषायु समालोचना साहित्यया विकासया शुरुइ समालोचनायात आलोचनाया रुपयु

कायेगु गुगु प्रवृत्ति ब्वलंगु खः, व थौं मदये धुकूगु दु । समालोचना धयागु मुक्क कृतिया नकारात्मक पक्ष जक च्वयेगु मखु धयागु अवधारणा व्यापक जुइधुकूगु दु । पाश्चात्य तथा पूर्वीय नित्यां समालोचना पद्धतिया प्रभाव लाःपिं नेपालभाषाया च्वमितयुसं व्यावहारिक समालोचनायु थ्व नित्यां सैद्धान्तिक पक्षयात ग्रहण यानाः समालोचना याःगु खनेदु । अथे हे विषय पक्ष, कला पक्ष नित्यातां थियाः समालोचना यायेगु प्रवृत्तिया नं नी जुइधुकूगु दु । थौया विश्व समालोचना साहित्ययु खनेदुगु विविध कथंया समालोचना पद्धति तथा प्रणाली गथे - सैद्धान्तिक, ऐतिहासिक, तुलनात्मक व्याख्यात्मक, पाठ्यात्मक, मनोवैज्ञानिक, प्रगतिवादी, प्रयोगवादी, समाजशास्त्रीय, शैली विज्ञान आदी नेपालभाषाया समालोचनायु नं छयला हये धुकूगु दु ।

नेपालभाषाया प्रारम्भिक ईया समालोचनाया तुलनायु थौं समालोचना विधाया आपालं विकास जुइधुकूगु दु । तर अथे खयां नं थौं नं थ्व क्षेत्र स्वस्थ रुपं न्हयज्याये फुगु मदुनि, आपालं कमि कमजोरी ल्यं हे दनि । नेपालभाषायु समालोचना साहित्यया शुरुवात जूगु न्हयगू दशक दये धुकल । थुगु समयवधि दुने आपालं समालोचकत पिदने धुकूगु दु सा आपालं समालोचनात्मक कृति नं प्रकाशित जुइधुकूगु दु । तर थौं नेपालभाषाया समालोचना क्षेत्रयु गुलि समालोचकतयगु छयंग्वः खाःगु खः, उकिया समानुपातिक रुपयु समालोचना पिदंगु मदु । थुगु दृष्टि बाखं, चिनाखं, ख्यलयु गुलि च्वमितयगु वैयक्तिक संकलन तथा सामूहिक संकलनया सफू पिदनाचवंगु खः, उकिया तुलनायु समालोचना क्षेत्रयु तसकं म्हो जक सफू पिदंगु दु । थुकिया मू कारण खः - समालोचना लेखनयु प्रतिबद्ध जुयाः थुकियात निरन्तरता बियाचवंगु, सक्रियता क्यनाचवंगु समालोचकत तसकं हे म्हो जक दु, अझ धायेगु खःसा फिपतिनयु निने छिं । थ्व विधायु निपु प्यपु च्वसु च्वयाः लिपा अथें हे पलायन वा बिलिन जुयावंगु वा यानयु इनयु निपु प्यपु समालोचना च्वयाः थःत समालोचक धायेकाचवंगु समालोचकत हे आपाः दु । गुलिखे प्रतिभा सम्पन्न च्वमितयुसं तकं नं छपु निपु समालोचना च्वयाः थ्व क्षेत्रयात अथें हे आशां द्याक त्वःतावंगु दु, गुगु नेपालभाषाया समालोचना विकासया नितिं छगू विडम्बना हे धायेमाः ।

नेपालभाषायु समालोचना लेखनयु निरन्तरता बिइपिं समालोचकत जक म्ह जूगु मखुसे समालोचना लेखन प्रति प्रतिबद्ध जुयाः अर्थात् नी यानाः समालोचना च्वइपिं समालोचकत नं तसकं हे म्हो धायेमाः । थःम्हं च्वये धकाः स्वयां नं, मेपिनिगु करं क्यनाः समालोचना च्वइपिं समालोचकत हे नेपालभाषायु आपाः दु । ध्वाना यंकेगु मोटर थें ध्वात्तले च्वल, ध्वायेगु दित कि च्वसा नं दित । अथे हे आधुनिक साहित्य व समालोचना साहित्यया विकास नाप नापं हे जूगुलिं लेखक व समालोचकत व हे ईयापिं जूगु दु । फलतः छम्हस्यां मेम्हसित म्हसिइगु, छम्हसिया मेम्हनाप पासाया सम्बन्ध, विद्यार्थी वा गुरया सम्बन्ध, थःथितिया सम्बन्ध दइगु स्वाभाविक खः । थज्याःगु स्थितिइ पिदंगु नेपाभाषाया समालोचनायु निष्पक्षता, सही निर्णयात्मकता नं म्हो जुइगु स्वाभाविक खः ।



फलतः बहुसंख्यक समालोचनाय् चर्मितयुत हौसला प्रोत्साहन बिडि थें कृतिया सकारात्मक पक्षयात जक अप्वः व्याख्या विश्लेषण यायेगु समालोचकया थःगु निगू प्यंगू बिचाः दृष्टिकोण जक ब्वयेगु जूगु दु । अप्वः थें कृतियागु कमजोर पक्षय् समालोचकत मौन जुयाबिडगु प्रवृत्ति दु । लेखकतयगु कमि कमजोरी न्हयब्वयाः इमित सही दीशाबोध यायेगु, कृतिया सही मूल्य निरूपण यायेगु पाखे छम्हनिम्ह न्हयज्याःसां थज्याःगु परम्पराया विकास गाक्क जुइफुगु मदुनि । धाथें धायेगु खःसा शुरुनिसें थौतक नं नेपालभाषाया समालोचनाय् प्रभाववादी समालोचनात्मक पद्धति प्रवृत्ति हे थाय् कया वयाच्वंगु दनि, समालोचनाया ज्याय् व्याख्यात्मक पक्ष गुलि सवल जूगु दु, निर्णयात्मक पक्ष उलि हे दुर्बल जुयाच्वंगु दनि ।

समालोचना विकासया शुरुया तुलनाय् थौ नेपालभाषाय् सैद्धान्तिक तथा व्यावहारिक समालोचनाया निगू पक्षय् नं ल्हाः न्ह्याकीपिं समालोचकत पिदने धुंकूगु दु । तर अथे खयाः नं व्यावहारिक समालोचनाय् गुलिसिनं ल्हाः न्ह्याकेगु याःगु दु, उलि सैद्धान्तिक समालोचनाय् याःगु मदु । अहं सैद्धान्तिक समालोचनाय् नं आधुनिक पाश्चात्य समालोचना पद्धति सम्बन्धी अध्ययन चिन्तन यानाः च्वइपिं समालोचकत तसकं हे म्हो धायेमाः । थुकथं नेपालभाषाया समालोचनाया सिद्धान्त पक्ष कमजोर हे तिनि । फलतः समालोचनाया सैद्धान्तिक ज्ञान तथा विविध प्रवाह प्रवृत्तिया अध्ययन विश्लेषण यानातःगु सफूया रचना यानाः थौ समालोचना साहित्यया विकासया निरिति आधारभूमि तयार यायेगु ज्या गुगु जुइमाःगु खः, व थौतक नं बांलाक जुइफुगु मदुनि । अथे हे नेपालभाषाया समालोचना ख्यलय् व्यावहारिक समालोचनाया ल्याः अप्वः खनेदु सां, थुकी नं सन्तोष कायेगु स्थिति मदुनि । छम्ह साहित्यकारया मुकं कृति वा छगू साहित्यिक विधाया वैशिष्ट्य वा साहित्यय् छगू प्रवृत्तियात कयाः पूर्वक अध्ययन व अनुशीलन यानातःगु समालोचना तसकं हे म्हो जक दु । थुकिया थासय् छगू सफू, छपु प्याखं, अहं छपु बाखं वा निबन्धया तकं समालोचना च्वयेगु प्रवृत्ति अप्वः दु । अहं थज्याःगु समालोचनाय् नं समालोचकयात लाःगु निता प्यता प्रभाव ब्वयाः कर मेते यायेगु तकं ज्या जूगु दु । थुकथं गुगु अर्थय् समालोचना, छगू पृष्ठभूमिइ छगू कृतिया साहित्यिक मूल्यांकन जुइमाःगु खः व अर्थय् भीगु समालोचना न्हयज्याये फुगु मदुनि ।

समालोचना छगू बौद्धिक उपज खः । साहित्यया विधागत ज्ञान, अन्वेषणात्मक प्रवृत्ति, तीक्ष्ण दृष्टि, निर्णयात्मक शक्ति, विश्लेषणात्मक क्षमता आदि थें ज्याःगु गुण थ्व विधाय् ल्हाः च्वयेकीपित आवश्यक जुइगुलि, नेपालभाषाया बाखं चिनाखं विधाय् थें भाषिक अनुरागं सां गुलिस्थां ल्हाः च्वयेकेगु याःगु खः, उलि थ्व समालोचना विधाय् च्वयेकूगु खनेमदु । थौ थ्व विधाय् ल्हाः न्ह्याकेगु ज्या विशेषतः नेपालभाषाया प्राध्यापन पेशाय् संलग्न प्राध्यापकत पाखें हे आपाः जूगु दु । फलतः थःपिनिगु प्राध्यापन ज्याया उत्तरदायित्व बहन यायेकथं नेपालभाषाया पाठ्यांसय् दुथ्याःगु जक सफू वा विषय सम्बन्धी समीक्षा विश्लेषण यायेगु जूगु दु । पाठ्यांशय् दुमथ्याःम्ह च्वमि, कृति वा साहित्यिक विषय सम्बन्धी

म्हो हे जक समालोचनात्मक लेख पिदंगु खनेदु । खयेत ला नेपालभाषाया पठन पाठनयात सुथां लाकेगु दृष्टि पाठ्यांश सम्बन्धी समालोचनात्मक लेख आपाः पिदने माःगु थौया आवश्यकता नं खः । तर थथे खयां नं फुक्क सफूया च्वमिया समानुपातिक रुपं समालोचना मजुइबलय् स्वस्थ समालोचनाया विकास छगू परिकल्पना जक जुइगु स्वभाविक खः ।

थौ नेपालभाषाया समालोचनाय् विविध कथंया समालोचनात्मक पद्धतियागु प्रयोग जुइधुंकूगु दु सां थःगु हे अलग्ग समालोचनात्मक पद्धति धाःसा ब्वलंके फुगु मदुनि । छथ्वः समालोचकतय्सं नेपालभाषाया समालोचनाय् नं प्रगतिवादी समालोचनायात व्यापक यायेगु कुतः यानाच्वंगु दु सां थ्व नं छगू प्रयोगया रुपय् तिनि, प्रवाहया रुपय् न्ह्यायेफुगु मदुनि । थौ बहुसंख्यक समालोचकतय्सं थःथःगु हे दृष्टिकोण तथा क्षमता कथं समालोचना यानाच्वंगु दु, छम्ह समालोचकया समालोचना पद्धतिनाप मेम्हसिया पद्धति पाःगु दु । छगू समूहयात हे नेतृत्व यायेगु ज्या आतक सं पाखें नं मजुनि धाःसां जिउ (श्रेष्ठ, ने.सं. १११०:२६) । अथे हे नेपालभाषा साहित्यया मेमेगु विधा गथे : उपन्यास, कविता, नाटक आदि क्षेत्रय् विश्व साहित्यय् पिदंगु अत्याधुनिक प्रवृत्ति, प्रवाह गुलि द्रुत रुपं दुहां वयाच्वंगु दु, उलि समालोचना विधाय् दुहां वयेफुगु मदुनि । समाजशास्त्रीय पद्धतिया समालोचना, शैली वैज्ञानिक समालोचनात गुगु थौ आधुनिक समालोचना साहित्यय् खनेदुगु खः थ्वयात नेपालभाषाया समालोचनाय् विकास यायेगु ल्यं हे दनि ।

तर थथे समालोचना क्षेत्रय् आपालं कमि कमजोरी थौ नं ल्यना हे च्वंगु दनि सां थ्व विधाय् आपालं नेपालभाषाया बौद्धिक वर्गया मन क्वसाःगु, साहित्यया विविध विधाय् आपालं न्हून्हुगु सृजनात्मक कृति पिदंगु, अध्ययन अनुसन्धान जुयाच्वंगु नापं समालोचनां थौ साहित्य ख्यलय् लोकप्रिय तथा प्रतिष्ठित विधाया रुपय् मान्यता प्राप्त याःगु, नेपालभाषा समालोचना विधाया विकासया निरिति बांलाःगु लक्षण खः धकाः मधासैं मगाः ।



## उपन्यास

**पृष्ठभूमि :-** थौं भीसं उपन्यासयात पाश्चात्य साहित्यय् प्रचलित नोवेल (Novel) वा प्रोजे फिक्सन (Prose Fiction) या पर्यायया रूपय् प्रयोग याना वयाचवना । वास्तवय् उपन्यास भीगु नितिं जक मखु, पाश्चात्य साहित्यया नितिं नं छगू न्हूगु विधा खः । साहित्यया छगू विधा नोवेल पश्चिमी साहित्यया छगू उपज खः । विश्व साहित्यय् १८ सदी 'डेनियल डिफो'या 'रविन्सन क्रुसो' (ई.सं. १७१९)या प्रकाशनं निसं तिनि उपन्यास साहित्यया शुरुवात जुल धयागु धारणा अप्वः खनेदु सां, इटालिया बोकासियोया चवसां पिहां वःगु विस्मयवह कौतूहलपूर्ण घटनां जाःगु गद्य माध्यमया वर्णात्मक साहित्यं निसं 'नोवेल' (Novel) शब्दया जन्म जूगु खः । नोवेल शब्दया शाब्दिक अर्थ ला न्हूगु खः । दकलय् न्हापां इटालिया बोकासियो थम्हं चवसागु रचना छगू न्हूगु प्रकारया विधाय् लाः थें खनाः थुकियात नोवेल (Novella) धकाः नां तःगु खः । लिपा थ्व हे 'नोवेल' शब्द 'नोवेल' (Novel) नां च्वन । थ्व हे 'नोवेल' बिलायत, जर्मन, फ्रान्सया व लिपा रुसी साहित्यय् गाक्क विकास जुयाः ब्वमितयगु दथुइ छगू तसकं लोकं हवाःगु विधा जूवन । विकासक्रमया विभिन्न इलय् नोवेलया रूप व विषय-वस्तु नं हिलावन, नोवेलया परिभाषा तकं नं पानावन । थ्व हे नोवेल भारतय् थ्यंकः वःबलय् भारतया बंगला, हिन्दी साहित्यय् नोवेल विधा नाप छुं भति ज्वःलाःगु संस्कृत साहित्यया छगू प्रकारया वर्णात्मक रचनाया नां 'उपन्यास' कथं 'नोवेल'यात उपन्यास धकाः नां छुनाबिल । उकियात हे भीसं नेपालय् नेपालीभाषा व नेपालभाषा निगुलिं ख्यःया साहित्यय् उपन्यास धयाछवया (श्रेष्ठ, १९९७ : ६)

उपन्यासयात कयाः डेभिड वि. गुराल्लिकं वेवस्टर्स न्यू वर्ड डिक्सनरी (Webster's New World Dictionary Page - ९७४) स 'ताहाकःगु काल्पनिक गद्यात्मक विवरण गुकी मानव जीवन, इमिगु भावना, विचाः, ज्याखें आदि थीथी जटिल वस्तु घटना समावेश जुयाच्वंगु दइ' धकाः परिभाषित यानादिल सा एच्.जेम्स 'फिक्सनया कला' (Art of Fiction) धयागु थःगु चवसुइ उपन्यासयात

जीवनया प्रतिनिधित्व याइगु प्रयासया रूपय् खंकादिल । अथे हे नेपालभाषाया छम्ह समालोचक प्रो. माणिकलाल श्रेष्ठजुं उपन्यासयात जीवनया 'मिमेसिस' (अनुकरण) अर्थात् जीवन थें तु च्वंक लेखकं चित्रण याइगु बस्तुकथं नालादीगु दु । थुकथं बाखं, प्याखं थें उपन्यासया विषय नं मनुखं याःगु छुं ज्या वा मनूयात जूगु छुं खं खः धयागु सिइदु । विधागत रुपं - विविध संरचनात्मक एकाइया माध्यमं हरेक अंग थःथवय् कथं हुनाः व्यापक ई.व थाय्या लाग्ना कःधानाः छागू निश्चित मूल्य प्राप्त याःगु जीवन प्रतिविम्बित जूगु सौन्दर्ययुक्त कथात्मक गद्य रचनायात हे उपन्यास धायेगु पाय्छि जुइ ।

थौया परिवेशय् मनूया जीवनयात क्वात्तुक चकंक ब्वयेछिगु ब्वयेफुगु साहित्यिक ख्यः उपन्यास जूगु दु । समालोचकतय्गु धापूकथं नाटकया छगू न्हूगु रुप उपन्यास खः । थौया स्वतन्त्रतु स्वःगु, गुईं गुईं निउगु जीवन व जगतयात ब्वयेगु नितिं बाखं, प्याखंया माध्यम जक पर्याप्त मज्जुगुलिं उपन्यास विधाया विकास जूगु खनेदु । प्याखनं थें निम्ह पात्रयागु खँलाबल्हाया माध्यमं जक जीवन ब्वयेगु मयासे उपन्यासय् लेखक थः हे न्ह्यःने वयाः नं खं कं वये छिं, माःगु धाः वये छिं, दबुलिइ कयने मछिंगु कल्पना, सपना, द्रन्द अन्तरद्रन्द थें ज्याःगु विषय नं उपन्यासय् अप्पुक् न्ह्यब्वये छिं । अथे हे रुपया दृष्टिं बाखं उपन्यास उथें च्वसां, बाखं जीवनया छगू समय, छगू पक्ष छगू स्थिति वा छगू घटनाया चित्रण खःसा उपन्यास जीवनया छगू पूर्वांग घटना वा जीवन सम्पूर्णया हे क्रमवद्ध चित्रण खः । उकिं बाखनं स्वयाः उपन्यासं काइगु परिधि तःधं तचाः जुइगुलिं बाखनं स्वयाः उपन्यासं जीवनयात पूर्वक थाथुइक कयनेफु । बाखं व उपन्यास नितानायात नं पाश्चात्य समीक्षाशास्त्र कथं आख्यान वा फिक्सन (Fiction) धयातःगु दु । संरचनाया दृष्टिं उपन्यासय् नं बाखनय् थें कथा योजना, पात्रतय्गु मानसिक अवस्थाया चित्रण, क्रिया व्यापार, द्रन्द, संवाद, वातावरण, भाव परिमण्डल, रुप विन्यास आदि दयाचवनी । तर थुपिं फुक्क तत्वयात उपन्यासया अनिवार्य तत्व कथं नाले मछिं, छुं छता निताना तत्व मदयेक नं बांलाःगु उपन्यासया संरचना जुइफु ।

विश्व साहित्यय् उपन्यास विधाया विकासया क्रमय् उपन्यास सम्बन्धी धारणा व उपन्यासं चित्रण याइगु मू विषयवस्तु नं इलय् ब्यलय् पाना वनाच्वंगु दु । शुरुया बोकासियोपिनिगु इलय् उपन्यास धयागु लेखकं न्हयाइपुक बाखं कनेगु थें जक जूवन सा 'मिगेले दे सर्वातिस' पिनिगु इलय् वनाः उपन्यासं मखुगु अवास्तविक प्रवृत्तिया आलोचना यायेमाः धयागु, धारणा ब्वलन । फलस्वरुप १८ शदी वनाः 'डेनियल डिफो'या 'रविन्सन क्रुसो' (१७१९) थें ज्याःगु उपन्यास पिदन । यथार्थवादी उपन्यास च्वयेगु क्रमय् उपन्यास धयागु समाजया न्हाय्कं खः, उकिं छुं छगू देशया साहित्यय् उपन्यास ब्वनेबलय् उगु देश व समाजया तस्वीर अनया मनुतय्गु जीवन रहन सहन कयनेमाः धयागु धारणा नं खनेदत । वयां लिपा हानं उपन्यास धयागु हे मनुतय्गु जीवनया अध्ययन जुसेलि, वयागु वाह्य क्रियाकलाप जक मखु वया अन्तर हृदयया नं अध्ययन विश्लेषण जुइमाः धयागु मनोवैज्ञानिक



प्रवाह नं ब्वलन । अथे हे यौन नं मानव जीवनया छगू अभिन्न अंग जूगुलिं मानव जीवनयात धाथे पूर्वक ब्वयेगु खःसा यौनयात नं थियाः उपन्यास च्वयेमाः धयागु धारणां मोपांसा, इमिलि जोला थें ज्याःपिं उपन्यासकारतयूत यौनवादी उपन्यास पिदंकेगुलिइ तिबः बिल । थये हे शैली पक्षय्, वैचारिक पक्षय् उपन्यासया विकासक्रमय् मेमेगु नं हिउपाः खनेदत । प्रेम, समन्वय, त्यागया सन्देश उपन्यास ह्वलेमाः, धयागु धारणां आदर्शवादी उपन्यासया जन्म बिलसा बहुसंख्यक जनताया आकांक्षा, हितया प्रतिनिधित्व उपन्यास यायेमाः धयागु विचाल प्रगतिवादी उपन्यासया विकास जुयावल ।

## नेपालभाषाय् उपन्यास

विश्वया उपन्यास साहित्यया विकासक्रमय् उपन्यासया विषयभूमि प्रतिया धारणा पानावन, प्रवाह हिलावन, न्हू न्हूगु प्रविधिया विकास जुल । भीगु देशय् अभि नेपालभाषा साहित्यय् ने.सं १०७४ य् वयाःतिनि 'उपन्यास' विधाया जन्म जुल । नेपालभाषाय् आधुनिक बाखं, प्याखं, काव्य आदिया शुरुवात जुइ धुंकाः तिनि उपन्यासया जन्म जूगु खः । खयेत ला नेपालभाषाय् १७ शदी हे ततःहाकःगु आख्यानोत्मक गद्य - गथे लच्छि बिकाः कनीगु 'स्वस्थानी व्रत कथा', गुंला यंकं कनीगु जातक अवदान बाखं, चतुर्मास प्यला बिकाः कनीगु महाभारत, रामायण बाखं मदुगु मखु, तर थुकियात बाखं जक धाये छि उपन्यास धाये मछि । थज्याःगु बाखं, न मानव जीवन सम्बन्धी जक हे खः, न थुकिं थौया उपन्यास थें मानव जीवनया व्यापक व विस्तृत परिधियात हे कःधाये फुगु दु । नेपालभाषा साहित्यय् उपन्यासया प्रादुर्भाव थज्याःगु हे आख्यान पाखें स्वाभाविक रुपं विकास जुयावःगु धकाः गब्लें नं धाये फइ मखु । बरु विदेशी भाषाय् च्वंगु उपन्यास ब्वनाः उकिं प्रभावित जुयाः थःगु भाषाय् नं उपन्यास दयेके धयागु भावनां उपन्यास च्वयेगु जूगु खः । २००७ सालया प्रजातन्त्र लिपा हे तिनि नेपालभाषाया उपन्यासया जन्म जूगु व खुल्ला, स्वतन्त्र वातावरणं, थनया च्वमितय्सं आपालं मेमेगु भाषाया उपन्यास ब्वने धुंकूगु व थःपिनिगु थीथी भाव अनुभूति नं स्वतन्त्र अकुण्ठित रुपं प्वंकेगु स्थिति दयेधुंकूगुलिं नेपालभाषाया उपन्यासं शुरुनिसें हे विश्व साहित्यया अत्याधुनिक प्रवाह, विश्व साहित्यया विकास क्रमया फुक्क अनुभव, फुक्क प्रयोगयात नालाकयाः पिदन (श्रेष्ठ, १९९७ : ११) । थये नेपालभाषाय् दकलय् न्हापां पिदंगु उपन्यास धूस्वां साय्मियागु 'मिसा' उपन्यास खः । नेपालभाषाय् उपन्यासया अभावपूर्ति धूस्वांया मिसा उपन्यास याःगुलिं

थुकियात च्वसापासाया तत्वावधानय् जूगु विराट नेपालभाषा साहित्य सम्मेलन नगद पुरस्कार तथा श्रेष्ठ सिरपाः गुथिं श्रेष्ठ सिरपाः तर्क प्रदान यात । मिसा जाति शोषित पीडित जुइमाःगुया मू कारण अशिक्षा खः । धकाः क्यनातःगु थ्व मिसा उपन्यासय् औपन्यासिक प्रवृत्ति स्वयाः नं बाखंयात ताहाकय्केगु प्रवृत्ति अप्वः खनेदु सां मिसा उपन्यासं सामन्ततय्गु चारित्रिक अनैतिकता, अन्याययात ब्वयाः, थज्याःपिं असामाजिक तत्त्वतय्गु विरोधय् चेतना ब्वलकाः आदर्श चरित्रया उदाहरण न्हयब्वयेगु गुगु कुतः याःगु खः, प्रजातन्त्रया जःखःया पाखे इलं हःगु सामाजिक चेतना व प्रभावया रुपय् स्वयेबलय् थ्वयात पाय्छि, मध्यासें च्वने फइमखु । उपलब्धिया ल्याखं लछिलाःम्ह न्हापांया म्हायाम्चा थें धायेमाः 'मिसा'यात । बुइवं भीगु साहित्य थारी मखु धकाः वं प्रमाणित याना बिउ थें स्वात्तु स्वां दयावं वनाच्च गु मस्त खनाः धाये मास्ति वइ थीथी सन्तानया मुहान जुया बिउम्ह 'मिसा' मांया ज्या यानाः उपन्यास साहित्यया शून्य कोख जायेका बिल (प्रधान, १९९६ : ९७) । मिसा उपन्यासया लिउ केशवलाल श्रेष्ठया 'मां' (१०७५) पिदनसा धूस्वांया हे मतिना (१०७७), पासा (१०७८), गंकी उपन्यास पिदन । 'मिसा' उपन्यासया औपन्यासिक घेराय् केशवलालया 'मां' उपन्यासं छुं तनेगु मयाःसां धूस्वानं 'मिसा' उपन्यासय् खनेदुगु कमजोरीयात थःगु लिपायागु उपन्यासय् भिकेगु कुतः यानादिल । फलस्वरुप घटनायात माःहनाय्केगु शिल्प, पात्रतय्गु मनोविश्लेषण यायेगु कला, समस्या न्हयब्वयेगु शैली न्हापाया उपन्यासय् स्वयाःनं परिमार्जित जुजुं वल । 'मतिना' 'पासा', उपन्यास न्हापायागु 'मिसा' थें घटना प्रधान सामाजिक उपन्यास खयाः नं आदर्श, सच्चरित्रतायात बः बिइगु ज्या थुकिइ मजू । बरु मनोविश्लेषणात्मक प्रवृत्तिया पूर्व संकेत थुपिं उपन्यासं बिइगु यात । 'गंकी' निसें भीगु उपन्यासय् मनोविश्लेषणवादायात दुध्याकाः आन्तरिक जीवनया अध्ययन यायेगु प्रवृत्तिया नी जुल । थुकथं व्यक्ति दुने दुस्वयाः जीवनया आन्तरिक याथार्थ दुवालेगु मनोवैज्ञानिक उपन्यासया न्हयलुवां नं धूस्वां हे जुयादिल । प्रवृत्तिगत मानसिकता अध्ययन विश्लेषण यायेगु मनोवैज्ञानिक आधार धूस्वां नं छयलादीसां मनोवैज्ञानिक सिद्धान्तया समर्थनया निंतिं गवसाः गवसाः बाखं, पात्र ज्यायेगु ज्या वय्कःपाखें मजू । थये धूस्वांया स्वंगू उपन्यास पिदने धुंकाः नेपालभाषाया उपन्यास ख्यलय् छम्ह मेम्ह उपन्यासकार 'धर्मरत्न यमि' खने दयेकः भाल । न्हापां सामाजिक उपन्यास लिथु (१०७८) ज्वनाः उपन्यास ख्यलय् दुहां भायादीम्ह खयां नं भूकुटी (१०८०) उपन्यासया प्रकाशनं वय्कःयात छम्ह ऐतिहासिक उपन्यासकारया रुपय् प्रतिस्थापित यानाबिल । खयेत ला समालोचकतय्सं 'भूकुटी'यात ऐतिहासिक उपन्यास स्वयां नं ऐतिहासिक रोमान्स धाये ययेकू । अथे खःसां थ्व उपन्यासं इतिहासयात विषयभूमि नालाः उपन्यास च्वयेगु परम्पराया नी यानाबिल । उपन्यासया माध्यमं सामाजिक जीवनया किपा जक ब्वयेगु जुयाच्चंगु थासय् नेपाःया ऐतिहासिक गौरव, सांस्कृतिक चित्रण यायेगु नं कायम जुल । अथे हे धर्मरत्न यमिया मेगु 'आइल्हामो' (१०९६) उपन्यासया प्रकाशनं राजनैतिक परिपाटीया उपन्यास च्वयेगु



परम्पराया प्रारम्भ जुल । सेक्सयात न जीवनया छगू अंश भाःपाः उपन्यासय् व्येगु प्रवृत्ति तिब्र जुल । तर आङ्ग्लमोयात प्रचारय् वयेमखं हे तत्कालीन सरकार जफत यानाबिल । धर्मरत्नयां लिउ हान मेम्ह उपन्यासकार ईश्वरानन्द श्रेष्ठाचार्य थ्व क्षेत्रय् खनेदत । धूस्वांजु छुनादीगु मनोवैज्ञानिक प्रवृत्ति थ्वय्कःया उपन्यासय् वनाः अभि व्यापक जूवन । मनूया नुगःखं क्यनेगु जक मखु, मनूया मनया स्वंगु तह - मनखं थम्ह चाःगु बिचाः, बच्छि जक चाःगु भावना व थम्ह हे छति मचायेक मनय् च्वनाच्वंगु भावना स्वतां वालाः व्येगु, अज्याःगु भावना ब्वलंगुया कारक तत्व तक् क्यनेगु ज्या ईश्वरानन्दजुं यानादिल । मनोविज्ञानया दकलय् न्हून्हुगु अनुसन्धानं वःगु ज्ञानयात पात्रचित्रणय् छयलेगु, विश्व-साहित्यय् वयाच्वंगु न्हूगु प्रवाह ईश्वरानन्दजुं नेपालभाषाया उपन्यास साहित्यय् प्रयोग यानादिल । नये त्वनेया समस्या जक मखु, यौन समस्या नं समाजया छगू समस्या कथं न्हयव्येगुलिइ ईश्वरानन्दया उपन्यास वः बिल । अथे हे कयेकगु समाज, साहु, सामन्त, जमिन्दार, बदमास मिजंत, आदितय्गु अन्याय शोषणया चित्रण यानातइगु आदर्शोन्मुखी सुधारवादी थें ज्याःगु उपन्यास प्रवृत्ति प्रति समर्पित जुयाः रत्नबहादुर साय्मि थ्व क्षेत्रय् खनेदयेकः भाल । धूस्वांया 'मिसा' उपन्यासं किया बिउगु लागायात छुं भचा विकसित, व्यवस्थित व तचाः यायेगुलिइ थ्वय्कःया उपन्यासं तिबः बिल । जगदीश चित्रकार, मथुराकृष्ण साय्मि, अरुण साय्मि, दुर्लभलाल आदिपिं थ्व हे लँपुया लँजुवाःत खः । आदर्शोन्मुखी सुधारवादी प्रवृत्ति बाहेक जिन्दगीया विघटित यथार्थयात नं थ्वय्कःपिनिगु उपन्यासं व्येगु चेष्टा याःगुदु । थज्याःगु हे इलय् गिरिजाप्रसाद जोशीया उपन्यासया प्रकाशनं नेपालभाषाया उपन्यास ख्यलय् छगू हिउपाः हल । सामाजिक विद्रोह व आक्रोश - असन्तोषयात व्यक्तिगत विचारय् थनाः स्वच्छन्द रुपं उपन्यासया सामान्य परिपाटी परम्परा प्रचलनया दुने मच्चसे च्वयातःगु गिरिजाया उपन्यासं न्हूगु सवाः फ्ययेकल । थ्वय्कलं परम्परागत मूल्य व मान्यताप्रति जक विद्रोह आक्रोस क्यनाः थःगु हे दृष्टिकोण थःगु हे सिद्धान्त स्थापित यायेगु कुतः यानादीगु मखुसे औपन्यासिक संरचनाय् हे छगू न्हूगु परिपाटी स्वनेगु प्रयास यानादिल । सामाजिक विसंगतिवादी उपन्यास नेपालभाषाय् नं खनेदत । थथे हे श्रमिक वर्गयात जुयाच्वंगु अन्याः शोषणयात उलाः चीमि व शोषित जनताया पुचलं वुलुहुं थ्वया वयाच्वंगु विरोधया सः व चेतनाया जःयात पितहयेगु कुतलय् कन्हय् वइगु, परिवर्तनया सूचं बिइगु प्रगतिशील उपन्यासया नी रामशेखरया 'नसंफाःगु चा' उपन्यासं जुल । भिदं लिपा मल्लके सुन्दर 'नसना' उपन्यास ज्वनाः थज्याःगु हे लँपुइ खनेदयेकः भाल । खयेत ला विद्रोह व क्रान्तिया सः रामेशखर स्वयाः १३ दँ न्हयः हे धर्मरत्नया 'आङ्ग्लमो' (१०८०) उपन्यासं थ्वयेके धुंकूगु खः, तर वय्कःया थ्व उपन्यासयात पूर्णरुपं प्रगतिवादी प्रवाहया दुने दुथ्याके मछिं । थुकथं ई न्ह्याःलिसे नेपालभाषाय् न्हू न्हूगु विषय न्हून्हुगु प्रवाह प्रवृत्ति ज्वनाः पुलापिं नापं न्हू न्हूपिं उपन्यासकारत थ्व विधायत न्हयज्याकेगु कुतलय् संलग्न जुजुं वल । चिनियालाल

बज्राचार्य, पद्मरत्न तुलाधर, मदनगोपाल, केदार 'सितु', शशीकला मानन्धर, तुयुबहादुर, प्रकाश बज्राचार्य आदि प्रवृत्तिया उपन्यासकारत मूलतयाः सामाजिक यथार्थ, मानवीय शाश्वत भावना - प्रेम, रति, इर्ष्या, द्वन्द आदि थें ज्याःगु विषयप्रति केन्द्रित जुयादिल । उपन्यासया प्रस्तुतिइ नं गुलिं च्वमितय्सं आख्यान शैलीयात छयलादिलसा गुलिंसा आत्मकथात्मक शैली चेतना प्रवाह पद्वति, आदिवात ज्वनादिल । घटनाया 'प्लेश बायूक' क्यनेगु थौया उपन्यासया विशेषता हे जूवन । उपन्यासया प्रकारय् नं सामाजिक घटनाप्रधान उपन्यास, मनोवैज्ञानिक चरित्रप्रधान उपन्यास, ऐतिहासिक उपन्यास, राजनैतिक उपन्यास अभि धार्मिक तथा जासूसी उपन्यास तक् खनेदत । अथे हे उपन्यासय् समाजया चित्रण यायेगु क्रमय् नं नेवाः समाज नेवाः संस्कृतिइ जक सीमित जुइगु परम्परायात हाचां गायेगु प्रवृत्ति नं ब्वलन । धूस्वांया 'जि भ्वातिं जि सतः' थज्याःगु हे प्रवृत्तिया छगू नमूना खः । थौ नेपालभाषाया उपन्यास विधाय् खनेदुपिं प्रमुख उपन्यासकारत थुकथं दु ।

## प्रमुख उपन्यासकार

धर्मरत्न यमि (ने.सं १०३५ - १०९५)

- लिथु (१०७८)

- भूकुटी (१०८०), श्रेष्ठ सिरपाः प्राप्त (ने.सं १०८०)

- आङ्ग्लमो (१०९६)

धर्मरत्न 'यमि', धूस्वांया लिउ न्हूगु विषयभूमि ज्वनाः पिदंम्ह उपन्यासकार खः । न्हापां 'लिथु' सामाजिक उपन्यास ज्वनाः, उपन्यास क्षेत्रय् दुहांभाःम्ह खयां नं थ्वय्कःयात म्हासीके बिइके ज्या 'भूकुटी' उपन्यासं यात । मतिना, रोमान्स सम्बन्धी उपन्यास जक खने दयाच्वंगु नेपालभाषाय् नेपाःया प्राचीन, राजनैतिक, सांस्कृतिक गौरवं जाःगु 'भूकुटी' ऐतिहासिक उपन्यास च्वयाः थ्वय्कलं उपन्यासया विषय लागा चकंका दिल । अथे हे थ्वय्कःया 'आङ्ग्लमो' उपन्यासं नं नेपालभाषाया उपन्यास ख्यलय् प्रगतिवादी धाराया पलाः चिं छुत । धर्मरत्न 'यमि'या उपन्यासं नेपालभाषाया उपन्यास विधाय् थथे विषय विविधताया अनुभव जक याके बिउगु मजुसे उपन्यासया माध्यमं राजनैतिक चेतना, राष्ट्रिय भावना, सांस्कृतिक गरिमा, सामाजिक सुधारया सः थ्वयेकेगु संस्कार नं ब्वलंकूगु दु ।

केशवलाल श्रेष्ठ (ने.सं १०४५)

- मां (१०७५)

धूस्वां साय्मिया लिउ पिदंम्ह मेम्ह उपन्यासकार केशवलाल श्रेष्ठ खः । केशवलाल श्रेष्ठयात नं धूस्वांयात थें मातृभाषा अनुराग तथा सुधारया सन्देश कनेगु आग्रहलं हे उपन्यास च्वकूगु खनेदु । थ्वय्कःया उपन्यास, औपन्यासिक



शिल्प स्वयां न आदसोन्मुख समाजया परिकल्पना व सुधारया सन्देशं अप्वः प्रभावित जूगु दु ।

ईश्वरानन्द श्रेष्ठाचार्य (ने.सं १०४६)

- खार्जेहि (१०८३)
- न्हायक (१०९३) श्रेष्ठ सिरपा: प्राप्त (ने.सं १०८३)
- स्वःनुगः (१०९७)

न्हापां कविता, निबन्ध, नाटक चव्याःलि लिपातिनि उपन्यास विधाय ल्हाः न्ह्याकादीम्ह ईश्वरानन्द श्रेष्ठाचार्यजुं नेपालभाषाय् उपन्यासया धुकू जायेकेगु उदेश्यं जक मखु थम्हं नं थ्व क्षेत्रय् छुं बिइ, थ्व क्षेत्रया माध्यमं थःगु नं छुं कने धयागु भावनां प्रेरित जुयाः उपन्यास चव्यादीगु खनेदु ।। थ्व हे कथं थ्वयकलं मनोविज्ञानया न्हून्हुग अनुसन्धानं वःगु जानयात पात्रचित्रणय् छयलेगु यानादिल । 'फ्रायड'या यौन सम्बन्धी मनोवैज्ञानिक सिद्धान्तयात प्रतिपादन यायेगु ज्या 'न्हायक' उपन्यासय् यानादिलसा, मार्क्स व फ्रायडया सिद्धान्तया समन्वयात्मक प्रभाव 'खार्जेहि' उपन्यासय् ब्वयादिल । यौन नं जीवनया मुख्य अंग खः । उकिया प्रतिस्पर्धा, प्रभाव अतृप्तिं समाजय् गुलिखे असाधारण विकृति, विचलन, पिज्वयेफु धयागु यौनया विकृतिमूलक स्वरुपयात न्हयब्वयेगु चेष्टा 'न्हायक' उपन्यासय् जूगु दु । अथे हे 'खार्जेहि' उपन्यासय् छम्ह असाधारण मनःस्थितिइ लाःम्ह पात्रया मनया शूक्ष्म अध्ययन विश्लेषण जक मखु छम्ह मनूयात असाधारण स्थितिइ थ्यंकेगुलिइ आर्थिक कारण नं महत्वपूर्ण खः धयागु सिद्धान्तया प्रतिपादन यानादीगु दु । अथे हे बुद्धया 'वहुजन हितायः वहुजन सुखायः'या धारणायात 'छ धन्य खः' उपन्यासय् ब्वयादीगु दु । थुकथं थ्वयकःया उपन्यासय् अनुभूतियात प्वंकेगु सहज स्वाभाविक चेष्टा स्वयां नं थःगु सिद्धान्त अवधारणा ब्वयेगु प्रयास अप्वः जूगु दु । अथे हे, तंस्वीर हे न्हयःने हयेफुगु उपाख्यान शैली छयलाः उपन्यासया कथानक न्ह्याकेगु प्रवृत्ति, नायक नायिकातयगु जीवनया माध्यमं समाज ब्वया क्यनेगु पलेसा छुं छगू समाजया पृष्ठभूमिइ पात्रत सृजना यानाः इमिगु नुगःयात वालाक्यनेगु ईश्वरानन्दया उपन्यासया संरचनात्मक विशेषता जूगु दु ।

धूस्वां साय्मि (ने.सं १०५०)

- मिसा (१०७४) नेपालभाषाया न्हापांगु उपन्यास,
- श्रेष्ठसिरपा: प्राप्त, (ने.सं १०७४)
- पासा (१०७८) श्रेष्ठसिरपा: प्राप्त, (ने.सं १०७८)
- मतिना (१०७८)
- गंकी (१०७८) नेपाली, अंग्रेजी व बुल्गेरीयन भाषाय् अनुवाद
- पल्पसा (१०७९)
- फिसःया लिसः (१०८६) हिन्दी अनुवाद जूगु ।
- माखा (१००९)

नेपालभाषा साहित्यया इतिहास/२८३

- जि भ्वाति जि सतः (११००)
- निभाः (११०५)
- तिसा (११०५)

न्हापां कविता, बाखं, प्याखं विधाय ल्हाः न्ह्याके धुंकाःलि उपन्यास विधाय ल्हाः छयलादीम्ह धूस्वां नं थःगु न्हापांगु 'मिसा' उपन्यास नेपालभाषाय् उपन्यासया अभावपूर्ति यायेगु नितिं चव्या धयादीसां तत्कालीन समालोचकतय्सं धूस्वां लिपा छम्ह तःधंम्ह उपन्यासकार जुइतिनि धयागु खँया पूर्व लक्षण थुकिइ हे खंके धुंकूगु खः । वास्तवय् थ्व अनुमान थौं सार्थक जूगु दु । थौं नेपालभाषाय् उपन्यासया पर्याय धूस्वां जुइधुंकूगु दु । धूस्वां नेपालभाषाय् दकल्य् अप्वः व दकल्य् न्हापां उपन्यास चव्यादीम्ह उपन्यासकार जक मखु, पाश्चात्य उपन्यास जगतय् पिदंगु न्हून्हुग प्रयोग प्रविधियात नेपालभाषाय् दकल्य् न्हापां दुत हयादीम्ह उपन्यासकार नं खः । व्यक्ति दुने दुस्वयाः जीवनया आन्तरिक यथार्थ दुवालेगु मनोवैज्ञानिक उपन्यासया न्हयलुवा जक मखु, नेपालभाषाया छम्ह अद्वितीय मनोवैज्ञानिक उपन्यासकार नं जुयादीगु दु । प्रवृत्तिगत मानसिकताया अध्ययन विश्लेषण याइम्ह मनोवैज्ञानिक उपन्यासकार वय्कः छम्ह त्वःताः मेपि मदुनि (प्रधान, १११६:९८) । थः छम्ह मिजं च्वमि जुयाः नं थःगु फुक्क धया थें उपन्यासय् मू पात्र कथं मिसातय् थाय् बियाः इमिगु चेतन, अर्ध चेतन, अचेतन मनया विश्लेषण यायेगु नापं थौया समाज इमित यानाच्चंगु अन्याः अत्याः न्हयब्वयाः इमित सहानुभूति तयादीम्ह च्वमि जूगुलिं वय्कःयात नेपालभाषाया छम्ह Feminist Writer कथं नं नाले छिं । अथे हे वय्कःया उपन्यासय् यौन अतृप्तिं हइगु विकृत चरित्रया चित्रण जक मजुसे सामाजिक, आर्थिक कारण व छेंया वातावरण व ईया परिवन्धं विकृत जुइमाःपिं व्यक्तिया अवस्थाया विश्लेषण नं दइगुलिं वय्कःयात छम्ह सामाजिक यथार्थवादी उपन्यासकार कथं नं नाला मकासें मगाः । थौया समाजया विविध क्षेत्रय् ब्वलना च्वंगु अनेक विकृति विसंगतियात थःगु उपन्यासया कथावस्तु नाप प्रासंगिक जुइक ब्वयेगुलिइ न्ह्याबलें सशक्त, सक्रियम्ह धूस्वां छम्ह निर्भिक उपन्यासकार जक मजुसे छम्ह च्वमिया धर्म मर्म पालन याइम्ह उपन्यासकार नं जूगु दु । धाथें धायेगु खःसा थ्वय्कःयात ध्वयेफुम्ह उपन्यासकार नेपालभाषाय् थौं पिदने हे मानि । थम्हं जक उपन्यास चव्याः मखु, उपन्यास विधाया समृद्धिया नितिं 'सिरपाः' तकं स्वनाः गुगु उल्लेखनीय ज्या थ्वय्कः पाखे जुल थ्व नेपालभाषाया नितिं कम गौरवया विषय मखु ।

रामशेखर (ने.सं १०५५)

- नसफाःगु चा (१०९३),

श्रेष्ठ सिरपा: प्राप्त, (ने.सं १०९१) जापानी भाषाय् अनुवाद

रामशेखर नकःमि नेपालभाषां छगू हे जक उपन्यास चव्याः नं थ्व क्षेत्रय् तसकं चर्चित जुयादीम्ह उपन्यासकार खः । नेपालभाषाय् न्हापां पिहांवःगु

नेपालभाषा साहित्यया इतिहास/२८४



प्रगतिवादी उपन्यास थ्वय्कःया हे 'नसंफाःगु चा' जूगु दु । शोषित पीडित वर्गया पं लिनाः इमित जुयाच्चंगु अन्याः अत्याः न्ह्यब्वयाः, शोषण दमनया विरुद्धय् इमिके चेतना दनावःगु, थुकिया नितिं इमिसं याःगु संघर्ष न्ह्यब्वयाः, इमिगु विजय व कन्हय् वइगु परिवर्तन प्रति आशावादी जुयाः च्वयातःगु थ्व उपन्यासं नेपालभाषा उपन्यास ख्यलय् जक मखु, नेपालभाषा साहित्यय् हे प्रगतिवादी साहित्यया विकासय् महत्वपूर्ण योगदान विउगु दु । खयेत ला थुकिइ न्ह्यब्वयातःगु समस्या समय सापेक्ष खः, तर शासन व्यवस्था जक हिलाः थनया स्थिति महिउगु थौया सामाजिक परिवेशय् थज्याःगु उपन्यासया थौं नं उलि हे मू दनि । अथे हे समाज – चित्रण थ्व उपन्यासया आकर्षणया मेगु विषय जूगु दु । पालुंग गां व अनया समाजया सचित्र वर्णन, श्रमिक वर्गया अवस्थाया यथार्थ चित्रण उपन्यासकार रामशेखरयाके दुगु जीवन व जगतप्रतिया शूक्ष्म अध्ययन तथा तस्वीर हे न्ह्यःने हयाविइ फुगु वर्णन शक्तिया परिचय विउगु दु ।

**रत्नबहादुर साय्मि (ने.सं १०५७), मणिगल सिरपाः प्राप्त (ने.सं. १११८)**

- मिलाखों (१०८७)
- ब्वइच्चंगु सुपः (११००)
- गुँसिघाँय् (११०३)
- गुँ पुलेवं (११०६)

रत्नबहादुर साय्मि नेपालभाषाया उपन्यास ख्यलय् आदर्शोन्मुखी सुधारवादी धाःयात तब्या तचाः यानादीम्ह उपन्यासकार खः । प्रेमया त्वह चिनाः छुं मिसिउपिं मिसातय्त स्यंकाबिइपिं व्यभिचारी मिजंत, धेवाया बल क्यनाः, मिसा धेवां न्यायेत स्वइपिं साहु महाजनतय्गु कुकृतिया बाखं हे थ्वय्कःया उपन्यासया मू विषयभूमि जूगु दु । थुकथं उपन्यासया माध्यमं सामाजिक विकृति न्ह्यब्वयाः सुधारया सन्देश हवलेगु नापं, मानवीय शाश्वत भावना प्रेम, रति, घृणा, ईष्यायात हार्दिक मार्मिक धंगं ब्वयेगु थ्वय्कःया उपन्यासया मू कृतः जूगु दु । कार्यकारणया श्रृंखलावद्ध कथानक योजना, मानवीय गुण अवगुण नितानां दुपिं लाहियापिं पात्रत न्ह्यब्वयेगु पात्र चित्रण कला, ब्वमितय्गु मनयात थिइफुगु अभिव्यक्ति शैली थ्वय्कःया औपन्यासिक विशेषता खः ।

**गिरिजाप्रसाद जोशी (ने.सं १०५९-११०७)**

- धकिं (१०९०)
- छि स्याना हत्या (१०९६)
- सिलुस्वां (१०९८)
- भाजमिखा (१०९९)
- विपात्र (१०९९)
- व गमला थ्व खै थल (११०३)
- व ल्वहं जि झ्वाला (११०७)

नेपालभाषा साहित्यया इतिहास/२८५

- न्याल्लल ब्यां (१११०)
- यमि गामाः यें शहर (१११२)

गिरिजाप्रसाद जोशी धूस्वां धुंकाः दकलय् अप्वः उपन्यास च्वःम्ह उपन्यासकार जक मखु, धूस्वां स्वयां छगू अलग्ग हे औपन्यासिक प्रवाह न्ह्याकेगु चेष्टा यानादीम्ह उपन्यासकार नं खः । समालोचक कृष्णचन्द्रसिंहया शब्द धायेगु खःसा प्रचलित उपन्यासया धारणा, स्वरूप व संरचनाया विरोधय् एकदम हे पाकाः छगू मेगु विद्रोहया नी तयेत स्वइम्ह उपन्यासकार गिरिजा खः । थ्वय्कलं उपन्यास सिकं नं औपन्यासिक कथ्य वा विचाःयात बः बियाः न्ह्यथनेगु, उपन्यासया च्वज्याय् विद्रोह खालि धापुतिइ जक तर्ककेगु मयासे दयागु सः संरचनाय् नं थ्वयेकल । समसामयिक जीवन न्ह्यथनाः छगू आक्रोशित मनःस्थिति ब्वयेगु सामाजिक जीवनया थीथी विसंगति, शोषण, मतिनायात थःगु हे कथं विश्लेषण यायेगु प्रवृत्ति थ्वय्कःया उपन्यासय् खनेदु । धार्थे धायेगु खःसा विरोध व बौद्धिकता थ्वय्कःया उपन्यासया मू विशेषता जूगु दु । अथे हे थ्वय्कःया उपन्यासयात अनुशिलन याना स्वयेबलय् थ्वय्कःया उपन्यासय् छगुलिं समाज मखु, समाजया मयःगु गुगुं छगू परम्परा, छम्ह मनू मखु, मनूया दुने च्वंगु गुगुं, छगू संस्कार, छगुलिं वाद हे नं मखु, वादया गुगुं मभिंगु, मयःगु ज्याखँ ब्वयेगु प्रवृत्ति खनेदु । थ्वय्कःयात मिखा तिसिनाः कबुल यायेगु संस्कारया विरुद्ध विरोध ब्वलंका तःम्ह, वाद सिद्धान्तया प्रतिवद्धताय् मखु, चीमितय्गु अधिकार, मार्यादाया पक्षय् अन्याः अत्याः सह मयाइम्ह उपन्यासकार कथं नाले छिं (प्रधान, १९९६ : १२४)

**मथुरा साय्मि (ने.सं १०५९)**

- कतांमरि (१०९८)
- ज्वाला (१०९८)
- यामिखा (११०३)

न्हापां बाखं च्वमिकथं नेपालभाषा साहित्यय् खने दयेकः भ्नाःम्ह मथुराकृष्ण साय्मि कथावस्तुयात स्वयाः नं पात्र चित्रणय् विशेष बः बियाः उपन्यास च्वइम्ह उपन्यासकार खः । थ्वय्कःया उपन्यासया मू विषय मतिना खयां नं थौया मनूतय्गु विघटित यथास्थितिया चित्रण अले पात्रतय्गु हृदयया शूक्ष्म अध्ययन यायेगु प्रवृत्ति उपन्यासय् मू थाय् काःगु दु ।

**मदनगोपाल प्रधान (ने.सं. १०६०)**

- हिसिला (ने.सं १११३)
- जन्ति क्वचायेकाः (ने.सं १११६)

सामाजिक क्रान्ति, सामाजिक सुधारया सन्देशयात उपन्यासया माध्यमं हवलेगु कृतः यानादीम्ह छम्ह उपन्यासकार मदनगोपाल प्रधान नं खः । थौया समाजयात युग अनुरूप हिलेमाःगु दु, समाजयात नं न्ह्यज्याके माःगु दु, थुकिया

नेपालभाषा साहित्यया इतिहास/२८६



नितिं थ्व हे समाजया युवा वर्ग निं न्ह्यज्याये माःगु दु, इमिसं क्रान्तिकारी पलाः ल्हवने माःगु दु धयागु अवधारणां प्रेरित जुयाः थज्याःगु हे क्रान्तिकारी पलाः छिकेगु कुतः मदनगोपालया उपन्यासय् जूगु दु । थुकथं थ्वय्कःया उपन्यासया मू विषय मतिना जुयाः नं छगू न्हूगु संस्कार स्वनेगु, न्हूगु अवधारणा ब्वलकेगु चेष्टां जूगु दु ।

**जगदीश चित्रकार (ने.सं १०६७)**

- माखापिखा (१०९१)

जगदीश चित्रकार नेपालभाषाया छम्ह आदेशोन्मुखी सुधारवादी प्रवृत्तियाम्ह उपन्यासकार खः । मध्यम वर्गीय समाजया सजीव किपा किङ्गलिइ सिद्धहस्तम्ह जगदीश चित्रकारया नितिं सामाजिक सुधार थौं महसं मगाःगु छगू आवश्यकता खः । थ्व हे कथं वय्कःया 'माखापिखा' उपन्यास माखामिखाया जालं पिहांवये मफुपिं मिसातय्गु छगू यथार्थ चित्रण, पुरुष प्रधान समाजया छापाः ख्वाःपाः जूगु दु । मिजंतयसं मिसातय्त याइगु शोषण, अन्याः अत्याः न्ह्यब्वयाः सुधारया आवश्यकता महशुस याकेगु कुतः थःगु उपन्यासया माध्यमं यानादीसां, सशक्त व चेतनशील पात्रत उपन्यासय् न्ह्यब्वये मफुगु कारणं सुधारया सम्भावना थौं नं ता हे पाःनि ला धया थें भीत अनुभव जुइक् । तर अनैतिक, व्यभिचारी मिजंतयगु पतन क्यनातःगुलिं धाःसा थ्वय्कःया सुधारवादी धारणा, संदेश स्पष्ट यानाबिउगु दु ।

**मल्ल के. सुन्दर (ने.सं १०६८)**

- नसना (ने.सं ११०३)

थःगु राजनैतिक जीवनय् मार्क्सवादी विचारधारां प्रभावितम्ह मल्ल के. सुन्दर उपन्यास ख्यलय् नं थःत छम्ह प्रगतिशील उपन्यासकारया रुपय् परिचित याकादीगु दु । विश्व मजदूरतय्गु प्रसिद्ध नारा 'भी (मजदुर) छधी जुइमाः, छपै जुइमाः, भीगु भिया नितिं' धयागु सन्देश वियाः, थुकिया औचित्य प्रमाणित यायेत, शोषित वर्गय् चेतना थनेत, ध्वाथुइकेत, भीगु थौकन्हय्या परिवेशय् बाखं न्ह्याकातःगु थ्वय्कःया 'नसना' उपन्यासं नेपालभाषाया प्रगतिवादी साहित्यया विकासय् महत्वपूर्ण तिवः विउगु दु । तर छम्ह उपन्यासकारया रुपय् ब्वमितय्त उपन्यासया माध्यमं बौद्धिक खुराक चूलाकेगुलिइ थ्वय्क गुलि सक्षम व सशक्त जुयादीगु दु कलात्मक तृप्ति विइगुलिइ उलि सफल जुइफुगु खनेमदुनि । अथे हे उपन्यासया कथ्य सशक्त जुयाः नं संदेश संप्रेषणीय जुयाः नं घटनाया विकासक्रमयात सहज व स्वभाविक रुपं उलि न्ह्याके मफुगु थ्वय्कःया उपन्यासया छगू कमजोरी हे धायेमाः ।

**केवलप्रसाद कायष्ठ (ने.सं १०७०)**

- हिं प्याःगु सः (ने.सं १०९७) श्रेष्ठ सिरपाः प्राप्त(ने.सं १०९९)

नेपालभाषा साहित्यया इतिहास/२८७

नेपालभाषाया भाषा साहित्य ख्यलय् तःदं न्ह्यवनिसें छम्ह समर्पितम्ह कार्यकर्ता जुयां नं उपन्यास विधाया नितिं छम्ह न्हूम्ह हस्ताक्षर जुयादीम्ह केवलप्रसाद कायष्ठ दकलय् न्हापांगु प्रयासय् हे श्रेष्ठ सिरपाः त्याकादी खंम्ह उपन्यासकार खः । केवलप्रसाद कायष्ठ नेपालभाषा साहित्यय् प्रगतिशील प्रवाह सशक्त यायेगुली थःगु उपन्यासया माध्यमं न्ह्यथने बहःगु योगदान बियादीगु दु । समाजय् व्याप्त जुयाच्चंगु शोषण न्ह्यब्वयाः शोषण विरुद्धय् संघर्ष यायेमाः, शोषण मदितले संघर्ष नं न्ह्याकां च्वनेमाः धयागु सन्देश न्ह्यब्वयातःगु थ्वय्कःया 'हिं प्याःगु सः' थुकिया दसु खः । भविष्यय् विषयगत दृष्टिकोणं जक मखु उपन्यासया शिल्पगत दृष्टिकोणं नं थ्वय्कःपाखें नेपालभाषाया उपन्यासय् महत्वपूर्ण योगदान जुइ धकाः आशा यायेफु ।

**तुयुबहादुर महर्जन (ने.सं १०७१)**

- खों मोह (ने.सं ११०१)

- म्हायाम्चा (ने.सं ११११)

सामाजिक उपन्यास च्वयाः थौया समाजया यथास्थितियात सूक्ष्मरुपं ब्वयेगु कुतः यानादीम्ह छम्ह उपन्यासकार तुयुबहादुर नं खः । थम्हं यानागु अनुभव अनुभूतियात उपन्यासया रुप बियादीम्ह तुयुबहादुरया उपन्यासया मेगु विशेषता सहजता, स्वाभाविकताया चेष्टा खः धकाः मधासं मगाः ॥

**अरुण साय्मि (ने.सं १०७७)**

- हाकुतां (ने.सं १०९६)

- वैचुमिला (ने.सं ११०९९)

- ह्याउँस्वां (ने.सं ११०४)

अरुण साय्मि मानवीय शाश्वत भावना 'मतिना' यात केन्द्रबिन्दु यानाः उपन्यास च्वइम्ह उपन्यासकार खः । च्वमियो मतिना सम्बन्धी थःगु हे दृष्टिकोण दु, थःगु हे धारणा दु । फुक्क धया थें मनोवैज्ञानिक (Monologue) कथं च्वयातःगु थ्वय्कःया उपन्यासय् पात्रतय्गु चेतन मन व अर्ध चेतन मनय् जूगु द्वन्द्व अन्तरद्वन्द्व न्ह्यब्वयाः मनूयात वालाक म्हासिइके विइगु जक मखु, मतिनाया सार्थकता जीवनया दसु जुइ धया थें ज्याःगु सन्देश नं पिज्वाःगु दु । छम्ह लेखक थःत सुचुके मजिउ, थःत वालाक उले फयेकेमाः अले तिनि वया रचना सार्थक जुइ, पत्याः याये बह जुइ धयागुया छगू दसु अरुणया उपन्यास नं जूगु दु । तर धूस्वांजु उपन्यासय् गुगु स्वाभाविक रुपं थःगु अनुभूति पिब्वयेफुगु खः, उलि अरुणया उपन्यासय् जुइफुगु मदुनि थुगु दृष्टि अरुण साय्मि, धूस्वाया आतक नं काय् हे तिनि धायेमाः ।

**शशीकला मानन्धर (ने.सं १०८०)**

- शैली (ने.सं ११०६)

नेपालभाषा साहित्यया इतिहास/२८८



- लैय् लूम्ह (ने.सं १११७)

मिसात अवला व कमजोरपि जक मखु, इपि नं छुं खः, इमिसं नं छुं यायेफु धयागु मिसातयगु आत्म सम्मानया सः ज्वनाः उपन्यास चव्यादीमह शशीकला नेपालभाषाया न्हापांमह मिसा उपन्यासकार खः । न्हापां बाखं च्वमिया रुपय् न्ह्यज्यानादीमह शशीकला मानन्धर उपन्यास छ्यलय् नं नेपाःया संक्रमण अवस्थाय् न्ह्यानाच्वंगु समाजया संक्रमण अवस्थाय् हे लानाच्वंपि युवा युवतीतयगु वाहय तथा आन्तरिक स्थितिया यथार्थ किपा कियादीगु दु । नारी, शोषण उत्पीडनया चित्रणं जक थाय् कयाच्वंगु नेपालभाषाया बाखं उपन्यासया थासय् नारी जागरण, नारी सम्मान जाःगु ध्वकःया उपन्यासं न्हूगु सवाः पययेकूगु दु, समाजयात आधुनिकता पाखे न्ह्यज्यायेत बल बिउगु दु ।

केदार 'सितु' ( ने.सं १०८० )

- स्वम्हम्ह मन् (ने.सं १११२)

केदार 'सितु' नेपालभाषा उपन्यास छ्यःया छम्ह न्हू हस्ताक्षर खः । ध्वकःया उपन्यासया संरचना, विषयवस्तु ल्यज्या प्रस्तुतीकरण शिल्प आदियात दुवाला यंकेबलय् नेपालभाषाया प्रचलित उपन्यास परम्परायात हाचां गायेगु कुतः ध्वकःपाखें जूगु खनेदु । धूस्वांया औपन्यासिक प्रवृत्तियात हाचां गायेगु कुतः गिरिजाप्रसाद जोशीजुं यानादी थें गिरिजाप्रसाद जोशी धुंकाः नेपालभाषाया उपन्यास विधाय् न्हू प्रवृत्तिया अनुभव याकादीमह उपन्यासकार केदार 'सितु' खः । वैचारिक सजगता सशक्तता ध्वकःया उपन्यासया महत्वपूर्ण पक्ष जूगु दु सा, उपन्यासया प्रस्तुतिकरण, अभिव्यक्ति शिल्प आदि ध्वकःया उपन्यासया आकर्षणया विषय जूगु दु । ध्वकः पाखें नेपालभाषाय् उपन्यासय् छगू न्हूगु आयाम न्ह्याइ धकाः आशा याये छि ।

ध्वकःपि बाहेक नेपालभाषाया उपन्यास विधा बलकेत तिबः विद्यादीपि न्ह्यथनेबहपि मेपि उपन्यासकारत नं दनि । वय्कःपिनिगु नां व उपन्यास थथे खनेदु ।

रामकुमार खें - दीपक (ने.सं. १०८१), व पथिक (१११९) राज साय्मि - यःमह सन्तु (ने.सं १०९३) केशवनारायण राजोपाध्याय - जःया दुने (ने.सं १०९८), दुर्लभलाल सिंह - पलाःख्वाँय् (ने.सं ११०३), व थौया परिवेशय् यगानाच्वंगु जीवन (१११८) चिनिबालाल बज्राचार्य-वैय् पाजु (ने.सं ११००), नसंचा (ने.सं १०९९) बुंबाली (ने.सं १११५), बसन्त कुमार - सुपाचं भुंगु सर्गः (ने.सं ११०३), पद्मरत्न तुलाधर-हसना (ने.सं १०९९), प्रकाश बज्राचार्य - हि बुलातःगु पौ (ने.सं ११०३), पुरुषोत्तमलाल श्रेष्ठ- छोलानी (ने.सं १११५), योगेश राज- हलिया सिथय् (ने.सं १११६), बासुपासा- कीर्तिलक्ष्मी (ने.सं १११७), भीमरत्न बज्राचार्य - थःथःगु भाग्य (ने.सं १११०), नजरमान महर्जन- मि पुसा (ने.सं ११०५) आदि ।

थुपि उपन्यास सफू बाहेक मेमेगु भाषाया उपन्यास नेपालभाषाय् अनुवाद जुयाः पिहांवःगु दुसा, उपन्यासकार 'धूस्वां साय्मि', 'रामशेखर' आदिपिनिगु

उपन्यास नं मेमेगु भाषाय् अनुवाद जूगु दु । थथे मेमेगु भाषाया बां बांलाःगु उपन्यास अनुवाद यानाः नेपालभाषाय् दुतहयेगु ज्याय् साहित्य गुथियात लुमंके वहः जू । थ्व गुथि पाखें नेपालभाषाय् अनुवाद जुयाः पिदंगु उपन्यास खः - यक्षी (ने.सं १११४), लः हय् (ने.सं १११८), तमस (ने.सं १११८), डाक्टरया कलाः (ने.सं १११०), ल'जुवाः (ने.सं ११०९), संस्कार (ने.सं १११८), आदि (अथे हे थ्व विधाया विकासया निति 'श्रेष्ठ सिरपाः' गंकि बसुन्धरा सिरपाः थें ज्याःगु सिरपाः नं स्वनातःगु दु ।

लिखें - थौ नेपालभाषाय् उपन्यास साहित्यया जन्म जूगु पीप्यदं दत । थ्व अवधि दुने स्वीमं मयाक उपन्यासकारत पिदने धुकूगु दुसा छ्वीन्यागू धैथे उपन्यास प्रकाशित जुइधुकूगु दु । थथे प्रकाशित जूगु उपन्यास मध्ये गुलिं च्वमिं थम्हं हे पिकयातःगु दु सा गुलिं नेपालभाषाया थीथी संघ संस्थापाखें प्रकाशित जूगु दु । थथे जनस्तरं थुलिमछि उपन्यासया सफू पिदंगु धैगु नं छगू उपलब्धीया खं हे धायेमाः । तर छगू आश्चर्य धाये ला दुखया खं धाये ला थ्व विधाय् थौ गुलि नं उपन्यासकारत पिदन, धूस्वां, गिरिजा थें ज्याःपि निम्ह स्वम्ह च्वमितय्सं बाहेक मेपि उपन्यासकारतय्सं उपन्यास च्वज्याय् निरन्तरता क्यंगु खनेमदु । छगू निगू उपन्यास च्वयाः ईया हिउपाः लिसें तनावनेगु जूगु दु, मेमेगु विधाय् पलाः तःवनेगु जूगु दु । रामशेखर थें ज्याःमह चर्चित उपन्यासकार तकं छगू उपन्यास च्वयाः ल्हाः दिकाछवत । अथे हे नेपालभाषाया मेमेगु विधा गथे - कविता, बाखं विधाय् गुलि मिसा च्वमित च्वय् च्वय् धायाः पिदनीगु खः, उलि हे च्वय् च्वय् धायाः उपन्यास च्वज्याय् ब्वति कायेगु ला गन 'शशीकला' छम्ह बाहेक मेपि सुं नं मयजु च्वमिपि थ्व छ्यलय् दुस्वःगु तकं वःगु मदुनि । तर छता खं, थौ तक नेपालभाषाय् गुलि नं उपन्यासकारत पिदन, सुनां नं सफू चुइकेगु प्रलोभनं, लोकप्रियताया प्रलोभनं थौकन्हय् बजार खनेदुगु थें ज्याःगु समाजय् विकृति हइगु अश्लील उपन्यास पिकयाः नेपालभाषा उपन्यास साहित्यया न्हाय् ध्येनेगु ज्या धाःसा याःगु मदु, बरु थौ नेपालभाषाय् औपन्यासिक दृष्टिकोणं तस्कं च्वछाय्बहगु यक्व उपन्यास पिदंगु मदुनि । थौ नं स्वाभाविकता, श्रृंखलावद्धता, सहजता थें ज्याःगु औपन्यासिक शिल्प आपालं उपन्यासं क्यनेफुगु मदुनि, यद्यपि नेपालभाषाया बाखं, प्याखंया तुलनाय् उपन्यास विधा च्वथ्याःगु हे दु । खयेत ला थौ उपन्यासया ताया ल्याखं नेपालभाषाय् - सामाजिक उपन्यास, ऐतिहासिक उपन्यास, राजनैतिक उपन्यास, धार्मिक उपन्यास खनेदये धुकल सा, सामाजिक उपन्यास दुने नं, आदर्शमूलक, सन्देशमूलक, सुधारमूलक, यथार्थमूलक, विद्रोहमूलक, मनोविश्लेषणमूलक आदि उपन्यास पिदने धुकूगु दु । तर नेपालभाषाया उपन्यासयात बांलाक अनुशीलन यानास्वयेबलय् थ्व निता प्यता प्रवृत्ति हे जक केन्द्रित जूगु दु, गथे - कयेकंगु समाज, साहु सामन्त, जमिन्दार, प्रधानपञ्च, व्यभिचारी मिजंत आदितयगु अन्याः अत्याः न्ह्यब्वःयातःगु सुधारमूलक आदर्शवादी उपन्यास, निगूगु - सामाजिक विकृति आर्थिक विपन्नता वा छेंया हामाया



व्यभिचारी क्रियाकलापं मनं मतुना थें थाःगाः मदयेक स्यनीगु जिन्दगीया विघटित यथार्थताया मनोविश्लेषणात्मक उपन्यास, स्वंगूगु - गांया जीवन अथवा श्रमिक वर्गतयगु समाजया यथार्थ व अमिगु जीवनय वयाच्वंगु सामाजिक चेतना, संघर्षया भावना प्रतिबिम्बित याइगु प्रगतिवादी उपन्यास, प्यंगूगु खः - थौया समाजय विद्यमान विकृति विसंगतिया विरोधय ब्वलंगु सामाजिक विद्रोह असंतोषयात थःगु वैयक्तिक विचारय थनाः स्वच्छन्दताया लँपुइ न्हयज्यायेत स्वयाच्वंगु विसंगतिवादी उपन्यास आदि । थौया समाजय व्याप्त जुयाच्वंगु अन्तर विरोध, न्हासोमुख जुयाच्वंगु नैतिक मान्यता यान्त्रिक सभ्यता ब्वलकूगु जीवनया जटिलता थें ज्याःगु व्यापक विषययात नेपालभाषाया उपन्यास थःगु मू विषयभूमिकथं ज्वने फुगु मनुनि । मतितना, सामाजिक कुरिति, आर्थिक समस्या आदि थें ज्याःगु विषयभूमिइ जक केन्द्रित जुइगु प्रवृत्तियात अप्वःसिनं त्वःतेफुगु खनेमनुनि । अथे हे थौ नेपालभाषाया उपन्यासया परिवेश स्वनिगःया जीवनय जक केन्द्रित मजुसे अमेरिकाया सिकागो, वासिङ्गटन (जि भ्वातिं जि सतः) तकं नं थ्यंगु दुसां, अप्वः थें नेपालभाषाया उपन्यास स्वजातीय संस्कृति, भावना, कामनायात ब्वयेगुलि हे केन्द्रित जुयाच्वंगु दु । थथे थःगु जातीय संस्कृतियात त्वःताः च्वयातःगु उपन्यास छगू निगू दु सां अनुभूति, अध्ययनया अभाव सफल जुइफुगु नं मनुनि । थुकथं थौ नेपालभाषाया उपन्यास नेवाः जातिया जीवन शैलीया छगू अभिलेख थें जूगु दु । अथे हे नेपालभाषाया उपन्यासया मेगु विशेषता खः - 'प्याखं, बाखनं जक थःगु खं कने मगानाः उपन्यास साहित्यया जन्म जूगु खः' धयागु गुगु समीक्षकतयगु अवधारणा खः, थ्व नेपालभाषाया उपन्यासया परिप्रेक्ष्य नं सत्य साबित जूगु दु । धूस्वां, रामशेखर, मथुरा कृष्ण, केशवलाल, केदार, सितु, दुर्लभलाल सिंह थें ज्याःपिं नेपालभाषाया थौया प्रतिस्थापित उपन्यासकारत न्हापां बाखंच्वमि निं खः । धूस्वां नं थःगु धारणा, मान्यता, अनुभूति, असन्तोषयात वायेत बाखनं जक मगानाः उपन्यासय थातं च्व भालसा, रामशेखर थःगु प्रगतिवादी सः थ्वयेकेत हास्यव्यंग च्वयां जक मव्यानाः उपन्यासया लँपु हे ज्वानादिल । अथे हे ईश्वरानन्द थःगु मार्क्सवाद फ्रायदवाद विचारधारा प्रति प्रतिबद्धता क्यनेत प्याखनं जक मछिनाः उपन्यासया लिधंसा काःभाल, अभ मल्ल के. सुन्दर थें ज्याःम्ह पत्रकारं तकं मार्क्सवाद प्रगतिवादया प्रचारया निंतिं उपन्यासया ध्वाँय हे ज्वनादिल । थुकथं थौ नेपालभाषाया उपन्यास फुक्कं बाद, सिद्धान्तयापिं न्हयंगु छगू दबू जूगु दु ।

## स्वंगूगु खण्ड

### परिशिष्ट



## क्वखँ प्वला

- अमात्य, पूर्णप्रसाद (सं) - नेपालभाषाया वाङ्मय सूचि ( यैः नेपालभाषा एकेदमि, ने.सं १११८) ।
- आचार्य, नरेन्द्रदेव - बौद्धधर्म दर्शन (बिहारः राष्ट्रभाषा परिषद, सन् १९७१) पेज १२३ ।
- आचार्य, बाबुराम - नेपाः, नेवाः व नेवाःभाय, सितु, दै ६:३२ (ने.सं १०८९) पौ ३-१६ ।
- इन्दूनाद - भगवान बुद्ध, नेपालभाषा कविता संग्रह ( यैः नेपालभाषा परिषद् ने.सं १११६) पौ १७
- कर्माचार्य, माधवलाल - मोतिलक्ष्मी उपासिका, भावना व विचार, नेपाल ३५४७ (ने.सं. ११०८ वर्षा) पौ ४८-५९।
- कायस्थ, छत्रबहादुर - नेपाल संवत् छागू विवेचना ( ललितपुर : साहित्यया मू लुखा, ने.सं १०९६)
- कंसाकार, प्रेमबहादुर - भी नाटक परम्परा, रत्नेश्वर प्रादुर्भाव ( यैः चवसापासा, ने.सं. १०८४)
- गुरुङ्ग, हर्षबहादुर - नेपालीभाषा अधिगोष्ठिइ ब्यूगु भाषण (काठमाडौं, नेपाल राजकीय प्रज्ञा प्रतिष्ठान, वि.सं. २०३३)
- Greirson (Ed) - Linguistic survey of India vol III Part I, 1909, P. 211-226, 255-270.
- Guralnik, David B - Webster's New World Dictionary (Calcutta : Amerind Publishing Co./Pvt. Lt., 1970) P-974]
- जोशी, डा. सुन्दरकृष्ण - नेपाःया शिक्षाय् नेपालभाषा, नेपालभाषा, दै १:१ (यल : नेपालभाषा केन्द्रीय विभाग) ने.सं. १११८) दिल्ली पौ ३२-४४।
- जोशी, हरिराम - नेपालको प्राचीन अभिलेख (काठमाडौं : नेपाल राजकीय प्रज्ञा प्रतिष्ठान, वि.सं. २०३०) पृ. ८९।
- तंमोट, काशिनाथ - नेपालभाषाया दँखँ (उत्पत्ति) देशयुमरुब्ब्याः, १:२६-३२ (ने.सं १११४ दिल्ली-६ गुला-१८) पौ ५।



- तन्त्राख्यान - नेपालको पञ्चतन्त्र छोटो परिचय, बालसाहित्य (काठमाडौं : नेपाल बाल साहित्य समाज, संख्या-४) पृ. ४०-४३२
- हरमेखला (ने. ४९४, न्हयपौ व लिपौ) देशयमरुड्याः १:३४ (ने.सं. १११४ यंलाथ्व-३) पौ -५।
- ने.सं. २९३या छगू अभिलेख, नेपाल ३०:२ (ने.सं. १०९७, ग्रीष्म) पौ-१२।
- नेपालभाषा भागवत, देशयमरुड्याः, ५:४६ (ने.सं. १११९ थिंलागा-७, विहीवार) पौ.२।
- लिच्छवि अभिलेखय् संस्कृत मखुगु खँगवाःया ल्याःचाः, खेलुइताः निगूगु ल्याः (यल : खेलुइताः पिकाकः गुथि, ने.सं. ११०१) पौ १३१-१३५।
- नेपाल संवत् म्हसीका नसना, दँ १:१९ (ने.सं. १११८, कछलाथ्व-२) पौ-२।
- गोपालराज वंशावलीया सामान्य परिचय, नेपालभाषा १:१ (यल : नेपालभाषा केन्द्रीय विभाग ने.सं. १११८ दिल्ली) पौ १८-२५।
- नेपालभाषाया न्हापांगु प्याखं : एकादशीव्रत देशयमरुड्याः दँ ३:४४ (ने.सं. १११६, पौष १८ विहीवार) पौ - २।
- नेपाल लिपिया स्वंगू शैली, नेपालभाषा १:१ (यल : नेपालभाषा केन्द्रीय विभाग, ने.सं. १११८ दिल्ली) पौ १४-१७।
- पूर्व प्राचीनकालया नेपालभाषाया भाषिक स्थिति व स्वरूप, नेपालभाषा व ध्वया साहित्य विभागीय गोष्ठी (यै : लाकौल पिथना, ने.सं. १११०) पौ ११८-१३७।
- निबन्धया बारे छुं व नेपालभाषाय् निबन्ध साहित्यया विकास, जि व जि दुने (यल : लोकसाहित्य परिषद् ने.सं. १११५) पौ. क-प।
- न्हू बाखं पुचःया बाखंत, (यै : लाकौल पिथना, ने.सं. ११०९)
- नेपालभाषाया साहित्यया इतिहास, स्वदँया नेपालभाषा स्नातक तहया पाठयांश सम्बन्धी जूगु न्हापांगु अभिमुखि गोष्ठी न्हयब्वःगु पत्र (यल : नेपालभाषा केन्द्रीय विभाग, ने.सं. १११७)

तुलाधर, ज्वाला

तुलाधर, प्रेमशान्ति

तुलाधर, मानदास (सं)

प्रधान, नर्मदेश्वर

प्रधान, कृष्णचन्द्र सिंह

प्रधान, भूवनलाल

प्रधान, भैरवबहादुर

पन्त, महेशराज

बज्राचार्य, चुन्दा

बज्राचार्य, गौतमबज्र

- नेपालभाषाया काव्य परम्पराय् कवि व्यथितया काव्य, स्नाकोत्तर च्यागूगु पत्रया निरतिं लःल्हाःगु शोध पत्र (यल : नेपालभाषा केन्द्रीय विभाग, ने.सं. ११०७)
- नेपालभाषाया गद्य साहित्यया इतिहासय् मिसा च्वमिपिं, नेपालभाषा मिसा खलःया न्हापांगु साहित्य गोष्ठी न्हयब्वःगु कार्यपत्र (यै : नेपालभाषा मिसा खलःया ज्याकुथि, ने.सं. १११७)
- मल्ल शाहकालया म्ये (यै : मानदास सुगतदास, ने.सं. १०७७)
- पद्य साहित्य, स्वदँ नेपालभाषाया पाठ्यक्रम न्हापांगु अभिमुखि गोष्ठीस प्रस्तुत याःगु कार्यपत्र (यल : नेपालभाषा केन्द्रीय विभाग, ने.सं. १११७) -
- नेपालभाषा साहित्यया इतिहास बारे (यल : साहित्य मूलखा, ने.सं. १११८)
- नेपालभाषाया साहित्यया इतिहासया संक्रमणकाल छगू चर्चा, नेपाल संस्कृति दँ ५:२।
- पलाः चिं लिना (यै : नेपालभाषा एकेदमि ने.सं. १११६)
- भीगु साहित्यय् बाखं, (यै : देगः म्हिचा सफू, ने.सं. १०९७)
- भिक्षुपित पित्युंगुया यथार्थ विवरण, न्हाय्कं, पौ १०१-११२।
- माध्यकालीन नेपाल (कीर्तिपुर : कृष्णबहादुर प्रधान, वि.सं. २०१०)
- वटेश्वर सिद्धान्त र नेपाल संवत्, पूर्णिमा, ५९ (वि.सं. २०४१)पृ-२९।
- नेपालभाषाया आधुनिक नाटक प्रवृत्ति व प्रवाह, विद्यावारिधीया निरतिं न्हयब्वःगु शोधपत्र (यल : नेपालभाषा केन्द्रीय शिक्षण विभाग, ने.सं. १११२)
- नेवारी भाषामा फारसी - अरबी आदि मुसलमानी भाषाको प्रभाव, पूर्णिमा १:१ (वि.सं. २०२१, वैशाख) पौ ३३-४६।



मल्ल, के. सुन्दर

- नेवा: जातिया परिचय, नेवा: जाति व भाषा विषयक त:मुँज्या (यै : राष्ट्रिय सभागृह, ने.सं १९९९ सिल्लागा ३०-चिल्लाथ्व १)
- नेपालभाषाया आधुनिक कविता ऐतिहासिक रुप रेखा, नेपालभाषा श्रव्या साहित्य विभागीय गोष्ठी (यै : लाकौल पिथना, ने.सं १९९०)-पौ २८-३८।

मल्ल, कमलप्रकाश

- नेवा:तय संगठनात्मक आन्दोलन, नेवा: राष्ट्रिय विचार गोष्ठी (यै : सिद्धार्थ वनस्थली सभा भवन, ने.सं १९९७ कउलागा ७-८)
- नेपालभाषा व नेपाली बिहार म्हिग: व थौं, नेपालभाषा निबन्ध पुच: (यै : पासा मुना, ने.सं १९०३) पौ १०७-१२३।
- भूमिका, नेपालभाषा ध्वाना सफूया धल: (न्हापांगु) (यै : लय्ता दबू, ने.सं १०९९)
- लं स्वया: (भूमिका) नेपालभाषाया ध्वाना सफूया धल: (निगूगु), (यै : पासामुना, ने.सं १९०४)
- सिँक:मिया स्वाँने (यै : नेपालभाषा परिषद्, ने.सं. १०९८)

महर्जन, पि.डी. व मेपि

- सफू न्ह्यथना, न:लि स्वना (यै : च्वसापासा, ने.सं १०८७) पौ क-व।
- भूमिका, भीगु भाय् : भीगु खँव: (पोखरा : मांभाय् मूलुखा, ने.सं १०९८) पौ क-त्र।
- नेपालभाषाया न्ह्यस: लिस: कासा सफू ( न:गां. : न:गां ग्वसा: खल: , ने.सं १०९५)

महर्जन, तुयुवहादुर

- नेपालभाषा परिचय ( किपू : कीर्ति सफू पिथना, ने.सं. १९९५)

माली, इन्द्र

- नेपालभाषा समालोचना व समालोचकपि, पलिस्था दँ ७:७ (ने.सं. १९९९)
- छ्धा: प्याखं सिंहावलोकन, पलेस्वां , ७: : ३ (ने.सं १९९५) पौ ६०-६६।
- पुलां कसि न्हुगु दापू (यै: त्रिवेणी साहित्य प्रतिष्ठान, ने.सं. १९९७)
- नेपालभाषाया माध्यमिक कालया छुं (यै : कुत: पिकाक: ने.सं. १९९९)
- मोतिलाल श्रेष्ठ, ग्वय्स्वां ७ : ६ (ने.सं १९०९) पौ १३२-१४३।

नेपालभाषा साहित्यया इतिहास/२९७

Mirsah, v.v

Regmi, D.r

लाकौल, वैकुण्ठ प्रसाद

William, Hudson Henry

वैद्य, जनकलाल

श्रेष्ठ, पूर्णदाश (अनुवादक)

शाक्य, हेमराज

श्रेष्ठ, ओमकारेश्वर (सं)

- जिगु खँ, नेपालभाषा निबन्ध पुच: ( यै : पासामुना, ने.सं १९०३) पौ क-थ।
- A gold coin of pranararayana, J.NSI :3 (1941) : 9-9 (From Rodes etal 1981 : The Coinage of Nepal, London Royal Numisnatic Society\_ —
- Ancient Nepal (Calcutta : Mukhopadhaya 1960 A.D) page-16.
- न्ह्यखँ, बुद्ध धर्म व नेपालभाषा मुना (यै : वैकुण्ठप्रसाद लाकौल, ने.सं. १०९२) पौ २६-३४।
- An introduction to the study of Literature (Nineth Reprint New Delhi : Kalayani, Publishers-1985 A.D)
- नेपालभाषाया काव्य सृजना प्रवृत्ति (यल : जनकलाल वैद्य, ने.सं १९०६)
- 'पुनर्जागरणकाल' खेलुइता: ५:६ (ने.सं १९०४) पौ २-२६।
- नेपालभाषाया साहित्यय् धर्मोदय पत्रिकाया देन, खेलुइता: ८:८ (ने.सं १९०७) पौ ५३-६४।
- नेपालभाषाया बाखं धा: भिंतुना दँ १० (ने.सं. १९९९) पौ १-५।
- राष्ट्रिय अभिलेखालयया सफुतिइ नेपालभाषा नां, ग्वय्स्वां दँ २ (ने.सं. १९०४), पौ ६०।
- नेपालभाषाय् समालोचना विधा, खेलुइता: वर्ष २०:२० (ने.सं. १९९९)
- नेपालया अभिलेखय् नेपालभाषाया स्थिति, गं ३:३ (ने.सं १९०५) पौ १०२-१२३
- नेपालभाषां थ: नालात:गु लिपि, नेपाल (ने.सं. १०९७)
- न्ह्यखँ, सीगफ्रेड लीन हार्डजुया नेवारी गीति मञ्जरी ( यै : नेपालभाषा परिषद्, ने.सं. १९०९)
- शिवदेव संस्कारित श्री रुद्रवर्ण महाविर स्थित विभिन्न अभिलेखया सारांश अर्थ (यल : सन्तकुमार शाक्य, ने.सं. १९९९)
- सँझ्या: (यै : पब्लिक युथ क्याम्पस, ने.सं. १९९७)

नेपालभाषा साहित्यया इतिहास/२९८



श्रेष्ठ, नारायणदेवी

श्रेष्ठ, माणिकलाल

शाक्य, हेमराज

साय्मि, भरत

श्रेष्ठ, तुल्लिलाल

Siegfried Lienhard

हृदय, चित्तधर

- नारीयात, नेपालभाषा कविता संग्रह (यै : नेपालभाषा परिषद्, ने.सं. १११३)
- समालोचनाया सिद्धान्त (यै च्वसापासा, ने.सं. १०८८)
- गद्य साहित्य, स्वर्द नेपालभाषा स्नातक तहया पाठ्यक्रम सम्बन्धी अभिमुखि गोष्ठी प्रस्तुत कार्यपत्र (यलः नेपालभाषा केन्द्रीय विभाग, ने.सं. १११७)
- नेपालभाषाया समालोचना साहित्यया परम्परा विकासया स्थिति, नेपालभाषा व श्रव्याः साहित्य विभागीय गोष्ठी (यै : लाकौल पिथना, ने.सं. १११०) पौ १५-२८
- बुद्ध धर्म व नेपालभाषाया स्थान - नेपालभाषा साहित्यया इतिहासे, बुद्ध धर्म व नेपालभाषा मुना (यै : बैकुण्ठप्रसाद लाकौल, ने.सं. १०९२) पौ ८-११।
- श्री रुद्रवर्ण महाविहार स्थित तालपत्र अभिलेख, न्हापांगु संस्करण (यलः बुद्धजयन्ती समिति उकुवहाः, ने.सं. ११००) पौ ६-७।
- बाखं समालोचना, (यै : पल्पसा साहित्य ख्यः, ने.सं. १०९५)
- नेपालभाषाया प्राचीन काव्य, स्वर्द स्नातक नेपालभाषा पाठ्यक्रम अभिमुखी गोष्ठी न्हयव्वःगु(यलः केन्द्रीय नेपालभाषा शिक्षण विभाग, ने.सं. १११७)
- Songs of Nepal (Delhi : Motilal Benarasidas. 1992 A.D.)
- भीगु साहित्य, स्वर्द खुसी (यै : नेपालभाषा परिषद्, ने.सं. ११०२)
- नेपालभाषाया जातः (यै : नेपालभाषा परिषद्, ने.सं. १०९१)
- भूमिका, योगसुधा (यै : नेपालभाषा परिषद्, ने.सं. १०७१)

नेपालभाषा साहित्यया इतिहास/२९९

## गवाहालि ज्वलं

अमात्य रेवति

उपाध्याय, केशवप्रसाद

कसाः, प्रेमबहादुर (सं)

कर्माचार्य, माधवलाल

कायष्ठ, छत्रबहादुर

चित्रकार, जगदीश

जोशी, कुमारबहादुर

जोशी, रत्नध्वज

जोशी, हरिराम

तमोट, काशिनाथ (सं.)

ताम्राकार, पूर्ण

- विदेशी विद्वान व नेपालभाषा, यलः साहित्य मू लुखा, ने.सं. १०९८।
- उँ बहाल त्वालाया दाफा म्ये (छगूगु)
- न्हापांगु संस्करण, कान्तिपुर : उँ बहाल त्वालाया दापा खलः, ने.सं. १०९०।
- साहित्य प्रकाश, काठमाडौं : साभा प्रकाशन, वि.सं. ....।
- बाखं म्ये, यै : च्वसापासा, ने.सं. ११०३।
- सिद्धिदास म्हसीके, यै : च्वासपासा, ने.सं. १०८७।
- जिगु मिखाय् साहित्ययागु खं, यै : नेपालभाषा परिषद्, ने.सं. ११००।
- खँ साहित्ययागु, साहित्ययागु खँ, यै : धनश्याम राजकर्णिकार, ने.सं. ११०५
- नेपालभाषाया प्राचीन काव्य व काव्यकार, यलः साहित्य मूलुखा, ने.सं. १०९६।
- आधुनिक कविता सनातन कविता व समाज, कुलां ७६, ने.सं. ११०१।
- पलाःचिं उपन्यासया, जः ल्याः ८, - ने.सं. ११०५।
- नेपालभाषा वाङ्मयया गतिविधि, खेनुइताः दँ १० : १० ने.सं. ११०९।
- साहित्यया सुलचं, यै : नेपालभाषा परिषद्, ने.सं. १०७२।
- मध्यकालको अभिलेख, प्राचीन नेपाल, ल्याः ५३ : ५६, वि.सं. २०३६, पृ १८-१९।
- नेपालभाषाया साहित्य परिचय नेपालभाषा परिषद्, ने.सं. ११०३।
- साहित्यया ध्वःकिया, यै : नसना पब्लिकेशन, ने.सं. १११८।
- साहित्य लचं, यै : न्हाय्कं साहित्य पाःलाः, ने.सं. १११२।

नेपालभाषा साहित्यया इतिहास/३००



ताम्राकार, बेलमाया

तुलाधर, प्रेमहीरा

थापा, हिमांशु

दर्शनधारी, सुदर्शना

Panday, Dr. Ram Nivas

नेवा, जनक  
Nepali, Gopal singh

निरौला, खगेन्द्र

डा, नगेन्द्र (सं.)

प्रधान, नर्मदेश्वर

प्रधान, भुलेन्द्रमान

प्रधान, कृष्णचन्द्र सिंह (सं.)

पाण्डे, राजकुमार

पिवा, सूर्यबहादुर, व  
मल्ल, के सुन्दर

- नेपालभाषा साहित्यय धर्मोदय लयपौया देन व उकिया च्वसु धलः, स्नाकोत्तर च्यागूगु पत्रया लागी लःल्हाःगु शोधपत्र, यल : नेपालभाषा केन्द्रीय विभाग ने सं. ११११।
- ललितविस्तरया भाषाया छगू अध्ययन, स्नातकोत्तर च्यागूगु पत्रया निंति लःल्हाःगु शोध पत्र, यलः नेपालभाषा केन्द्रीय विभाग ने.सं १११२।
- साहित्य परिचय, काठमाडौं : साभा प्रकाशन, वि.सं. २०४२।
- धर्मआदित्य व वयकःया कृति छगू अध्ययन, नेपालभाषा स्नातकोत्तर च्यागूगु पत्रया निंति लःल्हाःगु शोधपत्र, यल : नेपालभाषा केन्द्रीय विभाग, ने.सं. - १११८।
- Literary Heritage of Nepal Occasional Paper in the Humanities & Social Sciences, 1978, P 31-59.
- पुजाभु, यै : तेजशोभा शाक्य, ने.सं. ११०६।
- The Newars, Bombay : United Asia publication, 1965 A.D.
- नेपाल परिचय, काठमाडौं : रत्नपुस्तका भण्डार, वि.सं. २०४८।
- हिन्दी साहित्ययका इतिहास, प्रथम संस्करण, दिल्ली : नेशनल पब्लिकेशन हाउस, ई.सं. १९७३।
- जिगु बिचाः जिगु धापू, यै : सान्त्वना प्रकाशन, ने.सं. १११२।
- साहित्य समीक्षाया स्वंगःगु मिखा, यै : नसना पब्लिकेशन, ने.सं. १११८।
- नेपालभाषाया बाखं साहित्यया इतिहास, यै : च्वसापासा, ने.सं. १०९०।
- नेपाली साहित्य कोश, काठमाडौं, नेपाल राजकीय प्रज्ञा प्रतिष्ठान, वि.सं. २०५५।
- नेपाल परिचय, काठमाडौं : साभा प्रकाशन, वि.सं. २०४६।
- मा. जगतसुन्दर मल्लया जीवनी, खप : सच्छि दँ बुन्हि गवसाःखलः, ने.सं. ११०३।

पौडेल, भोलानाथ

बज्राचार्य, गौतमवज्र

Pathak, D.P.

बज्राचार्य, धनवज्र

बज्राचार्य, चुन्दा

बर्मा, धीरेन्द्र

वैद्य, जनकलाल व  
कसाः प्रेमबहादुर

बज्राचार्य शान्तहर्ष (सं.)

भिक्षु, सुदर्शन  
Malla, Kamal Prakash

मल्ल, कलमप्रकाश (सं.)

मल्ल, खड्गमान (सं.)

मल्ल, के. सुन्दर

- जगच्चन्द, पूर्णिमा, ल्याः ८ वि.सं २०२२, पृ २०-२५।
- ऐतिहासिक घटनावली, पूर्णिमा दँ १२:१८ ( वि.सं. २०२३-२०२५) पृ. २२-३९ व १०९-११४ छसिकथं।
- India script, A strategy for study
- Aspect of applied linguistic, Asia pulbisher House, 1969 A.D., p-78-81.
- पण्डित सुन्दरानन्द : छगू चर्चा, खेल्नुइताः ल्याः ३ (ने.सं ११०२) पौ ५९:६०।
- लिच्छविकालया अभिलेख, कीर्तिपुर : नेपाली एशियाली अध्ययन केन्द्र, वि.सं. २०३०।
- नेपालभाषा नाटक साहित्यया इतिहास छगू परिचय, यै : अनुसन्धान महाशाखा, ने.सं. ११०९
- माध्यमिककालया घटनावली छगू अध्ययन, काठमाडौं : सफू धुकू, ने.सं. ११०७।
- हिन्दी साहित्य कोश, बाराणसी : ज्ञानमण्डल लिमिटेड, वि.सं. २०२०
- आशा सफूकुथिया अभिलेख ग्रन्थया वर्णनात्मक धलः, यै च्वसापासा, ने.सं ११११।
- मल्लकालया मुक्कं नाटकया धलः पौ, यै : विमला बज्राचार्य, ने.सं. ११०५।
- लुमंकेबहःपिं, यै : च्वासपासा, ने.सं.१०९०। classical Newari Ligerature A sketeh, Kathmandu : Nepal Study centre, 1981 A.D.
- नःलि कविता : छगू विवाद, यै : नेपालभाषा प्रकाशन, ने.सं. १०८७।
- नेपालभाषा न्ह बाखं पुचः, यै : नेपालभाषा परिषद्, ने.सं १०८०।
- नेपालभाषाया न्ह चिनाखं, नेपालभाषा स्नातकोत्तर उपाधिया निंति प्रस्तुत याःगु शोधपत्र यल : नेपालभाषा शिक्षण विभाग, ने.सं. ११०२।



माली, इन्द्र

(सं.)

यात्री, पूर्णप्रकाश

Ricket Arthur compton

राजवंशी, शंकरमान (सं.)  
Wright, Danil

लाकौल, वैकुण्ठप्रसाद

लीनहार्ड, डा. सिगफ्रेड

वैद्य, जनकलाल

- भोगु मांभाय् म्हागः व थौ, नेवाः राष्ट्रिय विचाः गोष्ठीस लःल्हाःगु ज्यापौ, यै : कछलागा-७, ने.सं. १११५।
- न्ह पुखुली कसाःया छ्वाःपाः, यैःने.सं. १०९१।
- पुलां कसि न्हुगु दाप्, यैः त्रिवेणी साहित्य प्रतिष्ठान, ने.सं. १११७।
- नेपालभाषाया माध्यमिक कालया छु, यै : कुतः पिकाकः ने.सं. १११९।
- कुचा कुचागु किपा दुने, यै : शाक्य जः, ११२०।
- नेपाल र नेवारी अस्मिता भिमिरे वर्ष २४:४, पूर्णांक १११९, वि.सं. २०५२, पृ. ११-१६।
- A History of English Literature, London : Thomas Nelson & Sons Ltd 1955 A.D.
- ऐतिहासिक घटनावली, यै : पुरातत्व विभाग।
- History of Nepal, calcutta : F. Ranjan Gupta, 1966 A.D.
- जिगु मिखाय् जे.एस.मल्ल, यै : लाकौल पिथना, ने.सं. ११०८।
- नेपालय् हानं स्थविरवाद वयेकेत व नेपालभाषा हवयेकेत धर्माचार्य, यै : मालति लाकौल, ने.सं. ११०५।
- थुलिंचा कान्तिपुर : तारा लाकौल, ने.सं. १०७४।
- नेपालया प्राचीन भाषा - नेपालभाषा भनी, कमलप्रकाश मल्ल (अनु) वर्ष ५-७, ने.सं. १०९२, पौ १३-१८।
- राष्ट्रिय अभिलेखालय स्थित नेपालभाषा/नेवारी अभिलेख ग्रन्थ, काठमाडौं यै : अनुसन्धान महाशाखा, त्रि.वि.वि., ने.सं. ११०५।
- नेपालभाषा साहित्यया धाः, खेलुइताः अंक १६, १७, १८, ने.सं. १११५-१११७।
- नेपालभाषा नाटकया प्राचिनता, नेपाल भाषा नाटकया प्रवाह, नेपाल रजत जयन्ति, तँसा पौ, ने.सं. १०९४, पृ. ३७-४२।

नेपालभाषा साहित्यया इतिहास/३०३

शर्मा, बन्दना

शाक्य, हेमराज

श्रेष्ठाचार्य, ईश्वरानन्द

श्रेष्ठ, भगवतीप्रसाद

श्रेष्ठ, भूषणप्रसाद (सं.)

श्रेष्ठ, दयाराम

श्रेष्ठ, नारायणप्रसादजी

श्रेष्ठ, देवचन्द्र

श्रेष्ठ, माणिकलाल

श्रेष्ठ, दयाराम सम्भर र

शर्मा मोहनराज

श्रेष्ठ, इश्वरीमैया

नेपालभाषा साहित्यया इतिहास/३०४

- लिच्चःगु मध्यकालीन नेपालभाषा नाटक नाटिका, खेलुइताः दँ १२:१२, ने.सं. ११११।
- नेपालभाषा साहित्यया इतिहासया काल विभाजन, कुला, ९:९, ने.सं. ११०८, पृ. ४९-५६।
- २०२२ सालया नेपालभाषा आन्दोलन, स्नातकोत्तर च्यागू पत्रया नितिं प्रस्तुत याःगु शोधपत्र ने.सं. १११८, यल : नेपालभाषा केन्द्रीय विभाग।
- नेपाल-लिपि प्रकाश, काठमाडौं : नेपाल राजकीय प्रज्ञा प्रतिष्ठान, वि.सं. २०३०।
- सौन्दर्य व आलोचना, यै : च्वासापासा १०८७।
- नेपालभाषाया पत्रपत्रिकाया जातः, यै : नेपालभाषा परिषद्, ने.सं. ११०१।
- नेपालभाषा सामान्यज्ञान, यै : नेपालभाषा परिषद्, ने.सं. १०८०।
- ज्ञां छांचा, यै : श्रीघः विहार, १११२।
- नेपालभाषा र साहित्यको विकासमा शाहवंशको देन, श्री ५ को सरकार संचार मन्त्रालय, काठमाडौं : सूचना विभाग, वि.सं. २०४४।
- स्वामी अभयानन्दजी, कल्याण ल्याः १३४ (वि.सं. १९९४) पौ ६८०।
- नेपालका लिखितपत्रहरूको परम्परा, कानून विवरणिका ६०, वि.सं. २०५०, पृ. ३०-४०।
- नेपालभाषा सम्बन्धी केही तथ्य, अक्षलोक १:१, वि.सं. २०३८।
- आधुनिक कविता, जः ल्याः ७, ने.सं. १०९६।
- नेवाः जातिया परिचयया छुं खँ, स्वनिगः न्हूदँ तँसापौ, ने.सं. ११२०।
- नेपाली साहित्यको संक्षिप्त इतिहास, काठमाडौं : साभा प्रकाशन, वि.सं. २०४०।
- नेपालभाषा साहित्यय् श्रेष्ठ सिरपाःया योगदान, स्नातकोत्तर च्यागू पत्रया नितिं



श्रेष्ठ, कृष्णप्रसाद

श्रेष्ठ, श्रीलक्ष्मी

सार्यमि, बुद्ध

सुवाल, अनुपसिंह

सिंह, नामवर

शाक्य, लक्ष्मीशोभा

सिंह, फत्तेबहादर

'हृदय' चित्तधर

जवाली, सूर्यविक्रम

प्रस्तुत या:गु शोधपत्र, ने.सं. १११७, यल :

नेपालभाषा केन्द्रीय विभाग

- नेपालभाषा साहित्य, मस्को : हिमाल प्रकाशन गुठी, वि.सं. २०५४ ।

- नेपालभाषा समालोचनाय् प्रो. माणिकलाल श्रेष्ठ छगू अध्ययन स्नातकोत्तर च्यागूगु पत्रया निति प्रस्तुत या:गु शोधपत्र १११८, यल : नेपालभाषा केन्द्रीय विभाग ।

कविता थौंया मिखां, येँ : सम्यकलुमना पिथना, ने.सं. ११२० ।

नेपालभाषा रेडियो प्रसारण छगू अध्ययन, स्नातकोत्तर च्यागूगु पत्रया निति प्रस्तुत या:गु शोधपत्र ने.सं. ११२०, यल : नेपालभाषा केन्द्रीय विभाग ।

- आधुनिक साहित्य प्रवृत्तिया, चतुर्थ संस्करण, इलाहाबाद : लोक भारती प्रकाशन, वि.सं. २०२५ ।

- नेपालभाषाया विकासय् धर्मोदय सभाया योगदान । स्नातकोत्तर च्यागूगु पत्रया निति प्रस्तुत या:गु शोधपत्र ने.सं. १११६, यल : नेपालभाषा केन्द्रीय विभाग ।

- नेपाली विहार, येँ : चिनियालाल, ने.सं. १०५९ ।

- धर्माआदित्य धर्माचार्य व थ्वया साहित्य, येँ : नेपालभाषा परिषद्, ने.सं. १०८४ दिल्लीगा ३० ।

- नेपाल उपत्यकाको मध्यकालीन इतिहास, रोयल नेपाल एकेडेमी, काठमाडौं, वि.सं. २०१९ ।

(चव्य क्वखँ प्वलेगु क्रमय् उल्लेख जूगु सफूत, थ्व नेपालभाषा साहित्यया इतिहास च्वयेगु ज्याय् लिपा नं ग्वाहालि कयागु जूसां, वहे वहे सफूया नां तःक्वः दोहरे मजुइमा धयगु मनंतुनाः थज्याःगु सफूत थ्व ग्वाहालि ज्वलंया धलखय् हानं दुमथ्याकागु जुल ।)

नेपालभाषा साहित्यया इतिहास/३०५

## प्राचीन अभिलेखया छुं नमूना

(क) थी थी नेपाल लिपिया छुं नमूना

नन(कुल्लु)विपन्ना ॥ यीन ॥ एकपि सुपुअयव कुलायन ॥ न  
द्राभकवचनेदि कुडवद्विलावग ॥ नरकावरावेराइं कुडालरुवपाणिपा ॥  
अर्थ्यारीयुदवह य द्राफ गीवजल तथा ॥ अर्थवयुअय अर्थमम कुवीमम  
धतः ॥ नर पापिकम अफिम उलमय कीर्तिता ॥ यवरिक सुपु  
वक्षिपी नवधुता ॥ ७ ॥ अथवाअपियः सहुपुआ अलिनाववीत  
हु रानाकुदि नागमसा तुपि कुनिजिधव । सवधु उड काठिका  
रुदि बाह्यथा ॥ सर्वधुतलधुधुतलं सारेल कवगारयमकपिगि ॥

आतक स्यूगुलिइ नेपाल लिपि प्रयोग जूगु दकले न्हापांगु ग्रन्थ - ने.सं. २८  
या 'लंकावतार'या छकू नमूना

व कयना ॥ अथवाअपियः सहुपुआ अलिनाववीत ॥  
यवरिक सुपु अर्थवयुअय अर्थमम कुवीमम ॥  
नर पापिकम अफिम उलमय कीर्तिता ॥ यवरिक सुपु  
वक्षिपी नवधुता ॥ ७ ॥ अथवाअपियः सहुपुआ अलिनाववीत  
हु रानाकुदि नागमसा तुपि कुनिजिधव । सवधु उड काठिका  
रुदि बाह्यथा ॥ सर्वधुतलधुधुतलं सारेल कवगारयमकपिगि ॥

भुजिगोल लिपि च्वयातःगु ने.सं. ६९१ या 'हितोपदेश' बाखं सफूया  
छकू नमूना


नेपालभाषा साहित्यया इतिहास/३०६



नेपालभाषा साहित्यया इतिहास/३०८



(ख) नेपाल संवत्, नेपालभाषा सम्बन्धी जः ह्वलीगु  
अभिलेखया छुं नमूना



नेपाल संवत्‌या प्रणेता शंखधर साख्वाँल खः धैगु पुष्टि याइगु 'अथ नेपालभाषा  
शंखा सम्बत् ८२७' धकाः न्ह्यथनातःगु जुजु भूपतिन्द्र मल्लया ईयागु  
खपया जेँला त्वालय च्वंगु छ्गू अभिलेखया नमूना ।

नेपालभाषा साहित्यया इतिहास/३०९

[illegible]

नेवाः भाय्या संस्कारित नां 'नेपालभाषा' खः धकाः प्रमाणित याइगु जुजु ज्यस्थिति मल्लया ईयागु नेपालभाषाया कोश सम्बन्धी सफू ने.सं. ५०६ या अमरकोशया पुष्पिका वाक्यया छकु नमूना ।

[illegible]

नेपालभाषाया मान्यता नेपाः दुने जक मखु पिने नं दु धैगु प्रमाणित याइगु नै.सं. ८९५ स नेपाःया जुजु श्री ५ प्रतापसिंह शाहनं ल्हासाया जुजु ग्याल्छपरिं बोछे लामाजुयात नेपालभाषं च्वयाछः गु लालमोहरया छकू नमूना ।

नेपालभाषा साहित्यया इतिहास/३१०



नेपालभाषा साहित्यया इतिहास/३१२



आःतक लुगुलिइ नेपालभाषां चव्यातः गु न्हापांगु सफू - ने.सं. ४९४ या तान्त्रिक चिकित्सा सम्बन्धी टीका ग्रन्थ-

‘हरमेखला’ या छक् नमूना ।

[illegible]

जयस्थिति मल्लया राज्यकालय् रचना जुगु अनुमान यातातःगु नेपालभाषाया न्हापांगु मौलिक ग्रन्थ तथा नेपाःया न्हापांगु आधिकारिक वंशावली 'गोपालराज वंशावली' या छकु नमूना ।

नेपालभाषा साहित्यया इतिहास/३१४

अनन्तवर्त्मान् समस्तपुकारान् दिव्यान्मन्त्रान् कलादि कलाक्रान्  
 मन्त्रलोकं ध्यायन्मयाश्रयं ध्यानयाक्षणं ध्यायन्मन्त्रं पञ्चधानं  
 मन्त्रलोकं ॥ ६६३ ॥ ॥ सचक्रुः ॥ ६६४ ॥ ॥ मातृगिनिपुत्रकृष्णकान्  
 श्रुत्वा निरुद्धं विमानं  
 नादन् ॥ ६६५ ॥ ॥ गालिनि

आःतक स्यगलिइ नेपालभाषया त्हापांगु बाखं सफू ने.सं. ६२५ या 'भागवत पुराण' या अन्तिम पौया छकू नमुना ।

[illegible]

आः तक्या नेपालभाषाया दकले न्हापांगु आधिकारिक म्ये नालातः गु यलया तिभय जुजुपिं— नरसिंहदेव, पुरन्दरसिंहदेव, उदबसिंहदेवबपिनिगु विजय यात्राया वर्णन यानातः गु नै.सं. ६९४ या म्येया छक नमूना ।





नेपालभाषा साहित्यया इतिहास/३१६



सिद्धिनरसिंह मल्लया (ने.सं. ७२९-७८१) एकादशी व्रत नाटक्या छक्कू नमूना ।

नानमगान॥विकिषिकवाक्कलया रुचयनकाया लोकनाथाग्रिनिवासडववक्षया॥ ॥ द्वात्रीनवा  
वाकदाम॥ नगरुयग्रथी॥ वा॥ राजायंति गदवानस्रिद॥ क॥ ययुते ददयने कुर्मके० मथाननः  
वाक्कलसाकास॥ डामसवागदमनिसनाकाडान यहवादगाथन्न॥ मानकसूहयानयडानने दलव  
ग्रयगथन॥ राजया॥ डान॥ वाक्कलडा॥ मरीद॥ अतमगदिवानिजम॥ द॥ डानडोवदुसुथायि  
अथन॥ नमगडयग्रदिन॥ वामनया॥ अमककिदुयावलिसुयाजगवास॥ आदुयायसदकाया॥ सा॥  
मनाकवायनाकजगकाय धधममयहथाय॥ ॥ गुकावाय्या॥ ययादिगसु कयनगदनायाड

जुजू श्रीनिवास मल्लया (नै.सं. ७४७-८०७) दशअवतार नाटकया छक्कू नमूना ।



 ॐ नमो भगवते वासुदेवाय ॥ ६॥ गङ्गा देवती ॥  
 मध्यामं प्रह्णमं निशं काली त्रयोविधं ॥ कृष्णं वीरं च यत्र  
 भूषणं ॥ जगन्निद्रं नकुनृतं यन्त्रं यत्तु सङ्गमं तत्रासीत् ॥  
 गङ्गा वदन्ती वीर्यं शक्तिं चैव तत्तु तदा चतुर्गुणं त्रयोविधं  
 ननु त्रयोविधं तदा त्रयोविधं तदा त्रयोविधं तदा त्रयोविधं ॥ ७॥  
 त्रयोविधं तदा त्रयोविधं तदा त्रयोविधं तदा त्रयोविधं ॥ ८॥

जुजु श्री ५ राजेन्द्रविक्रम शाहदेवं ने.सं. १५१ स चव्यावंगु 'महासत्त्वपाठ्यान्त्रम्'  
नाटक्या छक् नमूना ।

कयाथवल्लरूकाकसकालवयाडावलिखाननाडाअथमिरुनादयाकडाअनिर्दानेन  
 दात्तुडाविगननुकागडादादोदकोयगियावसागामिनैकाडाअवसअतुयिडा  
 डाडाअमादसाकसाडाअअहसडगिडाअकोनैथवल्लेसाछीमसाकालीकादिने  
 जीसथिडाअगीगननैनेनित्तिदीसप्रथमगनयिषाअल्लुगपगियाकोदिआथप  
 निदकोसनेकडावनगमकाडाएथिविदोत्तामयइयकैलायदुयाडावैरेरविम  
 रडछीइमसादवयातेनिजायाकक्रयागादक्षपक्रागक्रियागनासयाकडसपीलसा  
 नयित्तुजेसीकसडल्लेकैअनगमादननुक्रियाडाअविलरडयाअनगउनेक  
 किनायाडाअनानैथनेल्लेदक्षपक्रागमिनेयाकलानयिलनिनल्लेसाथअसी  
 मिदक्षपक्रागियाविलरडनैथयाअकलित्तमागअकसनेकयाअम्वल्लुलोड

44